

11




Torneo Unico

V. 1. H. 1. P. 2

XV. G. 55

14-1. G. 30



DIALECTICA,

S E U


LOGICA MINOR

Tribus Disputationibus circumscripta,

AUTHORE

P. JOANNE DE ULLOA MADRITANO,

Societatis JESU Theologo.



ROMÆ, MDCCXI.

Ex Typographia Pauli Komarek in [via Cursus.

SUPERIORUM PERMISSU.

THE [illegible] OF [illegible]

[illegible] [illegible] [illegible]

[illegible] [illegible] [illegible]

[illegible] [illegible] [illegible]

[illegible] [illegible] [illegible]

[illegible] [illegible] [illegible]

[illegible] [illegible] [illegible]

[illegible] [illegible] [illegible]

B. ALOYSIO GONZAGA

OLIM

Collegii hujus, atque Universitatis Gregorianae Alumno,

NUNC

Collegii Eiusdem, atque Universitatis Advocato



JOANNES DE ULLOA SOCIETATIS JESU THEOLOGUS

O. C. D.



ECCĒ jam secundò ad Aras tuas redimus, BEATISSIME ALOYSI Secundam hanc nostræ adversus Te reverentiæ tesseram Altari tuo appendimus: Secundum Candelabrum ante Cineres tuos accendimus. Non panitet prioris obsequii eos, qui secundum exhibent, & tertium pollicentur. Custodiendi ergo Paradisum, non Angelum, non Archangelum, non Principatum, aut Potestatem, non demum Seraphinos ipsos, sed Cherrubinam elegit Deus, nam, Collocavit ante Paradisum Gen. 3:

voluptatis Cherubim, doctus, ni fallimur, genus humanum inde exulare jussu, non nisi per Scientiam, & Sapientiam, cujus plenitudo dicitur Cherubim, redendum esse ad Arborem vitæ. Per Sapientiam utique illam supernè illapsam; sed ordinaria Providentia non finit illabi illam, nisi adhibitis humanis mediis, atque præparationibus. Non enim socordibus, & in utramque aurem dormientibus promittitur Sapientiæ nectar, sed qui mane vigilant ad me invenient me, & qui observat ad postes ostii mei, sicut Populus ille, qui Manicavat ad eum in templo audire eum. Qui una nocte sanctos Primogenitos Egypti occidit, & nocte alia centum, & septuaginta millia Assyriorum trucidavit, valebat sane sine insidiis tradere Josue Urbem Hai; noluit tamen, sed jussit Pone insidias Urbi post eam. Similiter qui tories ante Davidem Philistæas phalanges profligavit, par erat easdem profligando, quando dixit: Non ascendas contra eos, sed gira post tergum eorum. Voluit tamen, & eterna lege sancivit præceptum illud, Non tentabis Dominum Deum tuum. Hoc est, quod homines non appellent miracula; sed proportionatis, licitisque humanis mediis utantur.

Hanc ergo parvulam nostram, & per humum adhuc serpentem Sapientiam, præparantem verò ad illam alteram super cælestem Tibi committimus Alme ΑΙΟΥΣΙ, quàm ut vigil Custos impertiaris Juventuti huic Gymnasium frequentanti, quod Tu olim illustrabas. Bene nostri communem Magistrum proferentem verba
sui

sui Prophetæ, quos sic vocaverat Doctos, Universos Fi-
lios tuos doctos à Domino, vocavisse dociles: Est scri-
ptum in Prophetis. Et erunt omnes docibiles Dei.
Et meritò, sicut enim superba contumacia perinde se ha-
bet, ac ignorantia, ita rationalis docilitas quasi con-
vertibilis est cum possessione Doctrinæ. Impertire igitur
ex Deo huic Tuæ Juventuti tuis modò insistenti vestigiis
docilitatem; non dicimus arundineam illam, qua Qui
credit citò levis est corde, quæque omni vento Doctri-
næ circumfertur; sed Celestem alteram, quã nolint.
Altum sapere sed timeant; qua vereantur Plus sapere
quàm oportet sapere, sed sapiant ad sobrietatem; Ju-
bemur quippè omnes à Doctore Gentium non sublimè
sapere. Sapiebas Tu quondam, Sacratissime Juvenis,
usque adeo, ut securus nunc à Superbiæ fastu dicere pos-
sis, super omnes docentes me intellexi; non solum
quia Testimonia Divina meditatio tua erant, sed etiam
quia memor sententiæ, cui severus Iudex totam prolem
humanam subjecit In sudore vultus tui vesceris pane,
robore virili, atq; constantia contra morbos assiduos, qui-
bus Te Deus exercebat, studebas, sudabas, laborabas, in-
genium exercebas: & scriptum est, Intellectus bonus
omnibus facientibus eum. Alacrem hunc animi vigo-
rem, virilem hanc constantiam inferè Juventuti, quæ Ti-
bi successit in hac Schola, ut polita, levigata, & exulta
si non digna, saltem non indigna sit, quæ intra Æternæ
Sapientiæ Cancellos admittatur.

Eccli. 19.
Ad Efc. 10. 6.

Eccli. 19.
Ad Efc. 10. 6.

Ad Rom.

11.
1. Ad Tim.

6.

Psal. 111.

Gcn. 3.

Psal. 110.

IMPRIMATUR,

Si videbitur Reverendis. Patri Magistro Sacri Palatii Apostolici.

*Dominicus de Zaulis Archiepisc. Theodisiae,
Vicesgerens.*

MICHAEL ANGELUS TAMBURINUS

Præpositus Generalis Societatis JESU.

Cum Librum, cui titulus: *Diactica, seu Logica Minor tribus Disputationibus circumscripta*, Auctore P. Joanne de Ulloa Societatis nostræ Sacerdote, aliquot ejusdem Societatis Theologi recognoverint, & in lucem edi posse probaverint, facultatem facimus, ut typis mandetur, si iis ad quos pertinet, ita videbitur: cujus rei gratia has Litteras manu nostrâ subscriptas, & sigillo nostro munitas dedimus. Romæ 22. Decembris 1710.

A P P R O B A T I O.

Dialecticam, seu Logicam Minorem tribus Disputationibus circumscriptam ab admodum Reverendo Patre Joanne de Ulloa Madrittenfi Societatis JESU Theologo, Reverendis. P. Fr. Paulinus Bernardinus Ordinis Prædicatorum Sac. Apost. Palatii Magister, meæ censuræ commisit: sed in tanti Auctoris opere, nihil deprehendi, quod bonis moribus, vel sanæ, & orthodoxæ doctrinæ contradicat, quin imò omnia valdè utilia reperi ad erudiendam Juventutem, eruditum enim opus est, in quo claritas, & subtilitas conneſtuntur amicè. Gaudeant ergo Magistri, quod tanti Viri labor admirabilem doctrinam ducem præferat, exardescat Juventutis affectus, cum & hinc non nemorum lac sugat, sed succum sanæ doctrinæ: verum undequaque mirandum opus aureum, nam præter re-
rum

rum copiam, dispositionis ordinem, quem continet, est opus Magistri eloquentia disertissimi, eruditione integerrimi. Hoc meum de tanto opere iudicium (salvo meliori) ut meritissime communi luce fruatur, & illuminetur posteritas nostri doctissimi Auctoris splendoribus. Faxit Deus, ut ad ulteriora progrediatur calamus. Romæ in hoc Divi Thomæ Collegio apud SS. Vincentium, & Anastasium in Trivio Calendis Januarii Anno 1711.

*Philippus de Castillon. Cleric. Regul.
Min. Sac. Theologiæ Doctor, Lector
Iubilatus, nec non pro Hispaniarum
Provinciis Assistent Generalis.*

IMPRIMATUR;

**Fr. Paulinus Bernardinius Sacri Palatii Apost. Magister,
Ordinis Prædicatorum.**

P R Æ F A T I O

AD STUDIOSAM JUVENTUTEM.

Lut. 18.



*E*MO bonis nisi solus Deus, quia nemo alius ita purus est ab omni macula, vel per naturam insita, vel per vitium contracta, vel per utrumque inhærente, ut defectibilis naturæ conditionem non sapiat, qualitates non redolcat, exceptiones non patitur. Sed num ideo probris, ac maledictis describenda sunt omnia, quæ supremus rerum Artifex condidit? Absit.

Sol & homo generat hominem, ut prisca vox clamat. Quot nihilominus homines, homo, & sol occiderunt! Quot mortalium strages singulis annis, ne dicamus singulis diebus, edit ferox elementum aquarum! Quot classes absorpsit, & absorbet! Quot thesauros rapuit, & rapiet! Sed non propterea non fabricavit ex ipso Deus machinam totam, quam suspicimus Orbium Cælestium, si Cyrrillo habenda est fides, qui adorare debebant, agenti, ex aquarum fluxa natura indeficientem Cælorum substantiam fabricantem. Non propterea non exivit illud Deus superfirmamentum, *Qui regis aquis superiora ejus*, Non propterea non fuit electus Thronus Spiritus Domini, qui ferebatur super aquas. Non propterea, non est janua Aulæ æterni Regis nisi quis renatus fuerit ex aqua &c. Nempe firmum est illud, licet poeticum.

Carib. 9.

Psalm. 103.

Genes. 1.

Iean. 3.

Nil est, quo non ledere quisque queat.

Igne quid utilius? Si quis tamen urere cœta,

Comparat, audaces instruit Igne manus.

Quam utiles fuerint Soboli humanæ septem illi perennes fontes gratiæ, quos Jesus Christus aperuit nemo est qui dubitet si Catholicus est. Quanti autem abusus Sacramentorum sint, nemo est, qui ignoret, si humanæ miseriæ sibi conscius est.

En, lectissima Juventus Collegii hujus, & Universitatis Gregorianæ, retusum acutissimum illud telum, quod invidia, vel ignorantia, vel ambæ simul contra vestrum studium Scholasticæ disciplinæ, qua non nulli abutuntur (fatemur) vibrare solent. Supervacaneas esse has lucubrationes clamant. Plus nocuenti, quam utilitatis in orbem Cristianum invexisse. Oportere tricas arcere ab ingenua Indo-

le

le. Frustra teri tempus aridis speculationibus. Præcisiones, formalitates, hypotheses pabulum esse levioris ingenii, & otiosi; robustiores autem mentes cibis magis solidis inhiare. Atque ut plebejas animas in factionem attrahant, scurrilitatem non dedignantur, agentes. A recipe Medicorum. A Textibus Jurisperitorum. A distinguo Theologorum libera nos Domine. Exprobrant nobis, quod sæpè uno in verbo hæreamus, super una vocula integros Codices scribamus. Muscarum autem, ac culicum esse Aranearum filis irretiri.

Ut hinc exordiamur: non meminerunt isti, quam acre olim fuerit bellum inter Patres nostros Ecclesiæ Doctores, atque Arianos subdolos super & *Homousion*, & *Homenzion*, quæ vocabula una litera differunt. Quam acre etiam inter Concilium Calcedonenſe, & Euty-
Calced.
a. 451.
chianos super *In*, & *Ex*, quæ levissimè differre videbantur, satente Dioscoro se Christum agnoscere *ex duobus*, *sed non in duobus natura-
i. d. 12.*
ris, & Ecclesia docente non modò *ex*, sed etiam *in* duabus Naturis. Quam acer quoque conflictus inter Ecclesiam Latinam, & Græcam super *ex*, & *per*, fatentibus Græcis Spiritum Sanctum esse *per* Filium, sed non *ex* Filio. Nimirum sicut olim, vel unus dumtaxat litteræ mutatio necem intulit corporibus, *Qui respondit Sibboleth*, eadem
i. d. 12.
litera spicam exprimere non valens. Ita vel unius dumtaxat voculæ, aut literulæ additio, omissio, inversio, & mutatio necem inferre solet intellectui veritatis amanti. Et hinc non persunctoriè commentantur Scholasticæ Disciplinæ. Discernunt subtilissimè, eaque indotto vulgo idem esse videntur, & apparet veritas, quæ latèbat. Uniunt quæ distincta credebantur, & detegitur falsitas, quæ occultabatur. Et quod invidis, ignaris, aut malitiosis subtilitas aerea videbatur, potentissimus rei nervus esse solet.

Quo pacto egregius Medicus evades nisi Musculos, Nervos, Fendones, membranas, cartilagineas, articulos, ossa, arterias, venas, & reliquam totam supellectilem corporis humani solertissimè percallueris quoad naturam, quoad quantitatem, quoad qualitatem, & quoad cætera omnia, quæ plebs rudis putat minutias, sapientes autem Medici ratione, atque experientia instructi merito credunt ad summam rei spectare? Quo pacto supremus rei maritimæ Præfectus classem gubernabit, si innumerarum rerum catervam ad Classem spectantium non bene notam habuerit? Valet utique illa vox, *guttis constat Oceanus*, neque res magnæ humanæ fieri possunt absque minimis. Præparant, perpolliunt, levigant Scholasticæ Disciplinæ rudes, & implexas mentes humanas, non ut cum venustate auribus lenocinentur, sed ut
cum

cum veritate intellectui non tam speciositatis, quàm veritatis avido obsecundent. Illa autem magna res ratiocinandi in quacumque materia, five Christiana, five Politica, five Militari, five Naturali, five supernaturali, five Cœlesti, five supercœlesti, ratiocinandi, inquam, solidè, atque verè quomodo obtineri potest, quin intellectus solertissimè dividat usque ad ultimas differentias, subtilissimè penetret usque ad intimam quidditatem, atque essentiam rerum, nec non acutissimè inferat ex eis omnibus, quæ introspexit, veritatem, quam amplecti debet, falsitatem, à qua debet fugere. En quod faciunt Scholasticæ Disciplinæ. Instruere humanas mentes, ut in quacumque occurrente materia subito involent in quidditatem rerum, sapienter dividant, quæ permixta sunt, acutè ratiocinentur: quo fit, ut intellectus Scholasticæ Disciplinæ assuetus tandem tandem in Philosophia, & Theologia pro humano modo assequatur pretiosissimam gemmam veritatis, quæ una est intellectus nostri scopus, atque finis.

Non negamus tempus quandoque teri superfluis quodammodo speculationibus. Sed neque illi Censores negare possunt multa, quæ rerum substantiæ superflua videntur, rerum earundem ornatui necessaria esse. Fontes in Urbe, barba in mento, capilli in vertice, frondes in arbore, profectò non ita sunt necessaria substantiæ, aut integritati Urbis, & arboris, ut sine illis subsistere nequeant. Sed qualis Urbs sine fonte, mentum sine barba, caput sine capillis, arbor sine foliis? Citò orbabitur necessariis, qui superflua omnia refecare voluerit. Sed absit, ut omninò superfluas dicamus speculationes illas paucas, quas sugillant aliqui ut aridas, & infæcundas. Sunt enim necessariae ad introspicendum quasi fibras essentiæ, & quidditatis rerum, ad faciendum quasi Anatomen veritatis, ad possidendum rem totam, ut ex nullo angulo erumpat clandestinus hostis veritatis: Nusquam sapientes Duces prætermiserunt cautiones illas in bello, quas Tyrones putare solent superfluas, atque ad folius militaris patientiæ exercitium necessarias.

Sed qui tandem sunt isti, qui adeo intonant contra speculativas, atque Scholasticas Disciplinas? Licitum est innocenti reo exceptiones pandere, vitia manifestare nocentis accusatoris. Duæ classes mortalium, aut clam insidiantur, aut palam bellum indicunt speculativis Disciplinis. Hæretici, & nonnulli Catholici, qui vel numquam ingressi sunt Philosophiæ, ac Theologiæ Sacramentum, vel aliquando ingressi primas Sedes non sunt adepti propter rationes, quas taciti apud se agno-

agnoscunt, sed fateri erubescunt. Hæretici è re sua faciunt exulare jubentes totam Scholasticam facultatem, sicut olim Philistæi volebant gladios, lanceas, tela cudi in Judæa, in qua sola notus erat Deus. Timent illi suis erroribus à perspicuitate, qua explicant, ab energia qua argumentantur illi, qui in speculativam incubuerunt. Scriptum est enim. *Qui male agit odit lucem*. Et quemadmodum, *quando ortus est sol in cubilibus suis collocabantur*, nempe volucres obscæni, rapaces nocturnæ bestię: ita oboriente Theologia speculativa, *que* lucem offundit Catholicis veritatibus, ut cum reverentia suscipiantur, nec non absurdis erroribus, ut cum horrore vitentur, Magistri, & Magistrelli hæreseos in angulos hinc inde diffugiant, in subterraneas suas specus pavidi, irati, & tumentes irrumpunt. Quanti verò apud se faciant speculativam, quam timent, tametli a longe visam, ipsi testantur, quando occurrat Dei judicio Theologus aliquis Scholasticus ab Ecclesiâ ad ipsos deficit. Tunc plausus, tunc reciproce gratulationes, tunc magna spes factionem promovendi. Nempe insistere vestigiis videntur illius, de quo scriptum, *Cibus eius electus*. Denique Hæretici odio implacabili prosequentes Theologos, & Philosophos Scholasticos fabulam renovant Luporum seriò luadentium Oves, ut a se arcerent moestum, & minime necessarium molossorum contubernium.

1. Reg.
13.

Joan. 3.
Psalm.
103.

Habac. 1.

Quod attinet ad pauculos illos Orthodoxos, qui incautè hoc in bello cum speculativa hæreticis dant manus, mirandum non est, cum jam olim præmoniti simus, *quæcumque ignorant blasphemant*. Antiquum valde est humanæ superbiæ non magni facere (saltem quoad externa signa) Margaritâ illam, qua nec habuit, nec habet, nec habere sperat. Renovamus passim fabulâ Vulpis spernentis, ut acerbas Uvas, quas nancisci non valebat. Rarò videbis rectis oculis intuentem nobiles familias eum, qui nec à Natalibus fungitur nobilitate, neque in via est illa aliquando fungendi. Rarò audies Carmina laudantem eum qui nec à limine salutavit Apollinem, vel si aliquando scandere conatus est per Parnassum, gravidine cerebri retrorsum præcipitatus est.

Iud. 1.

Vos igitur, lectissimi Juvenes, utrorumque horum voces contra speculativam, ne audiat. Expertis credite, & scitote Schommata, Satyras, & invectivas unas ex invidia dimanare; alteras ex ignorantia, vel superbia. Quis adeo stolidus, ut aquas bibat ex tam insalubribus fontibus descendentes? Si vidistis unquam Alambicum, cujus beneficio Spiritus, sal, succus herbarum discernitur à parte terrea, vidistis in praxi facultatem totam speculativam, cujus calore crudus, &

iudi-

indigestus cibus humanorum discursuum concoquitur, ejus energia anima, & nucleus illorum à cortice difiungitur, & corpore, ejus regulis, & exercitio quasi nanciscemini butyrum illud, & mel, quo pro humano modo scietis reprobare falsum, & eligere verum.

Unum vos præmonitos omnino volumus. Nihil in humanis æquè utile, ac necessarium pro speculativa, quàm vivax ingenium: Et nihil simul æquè perniciosum, ac ingenium solum, nisi judicio, & prudentiâ firmetur. Petulans Puer, nisi Pelagogi fræno cohibeatur, quid boni faciet: quid mali non faciet? Acutum, velox, subtile, volucre ingenium non prorsus barbarè comparabitur vivaci puero. Oportet ergo, quòd prudentiæ, atque judicii habenis compescatur. Si mente designatis dicere, atque defendere quidquid non refutetur evidentiâ palmari; heu in quantas, & quales Syrtis impingetis, in quàm absurdas propositiones labemini! Absit ab ingenua indole, ab animâ docili, ab intellectu saltem mediocriter rationali pervicax illa audacia, effrænis illa libido dicendi, ac defendendi quidquid non convincitur falsitatis metaphysicâ evidentiâ. Mementote solennis illius sententiæ: Omnes populi clamaverunt, & dixerunt: Magna est Veritas, & prævalet.

3. E. d. 9.
cap. 4.

DISPUTATIO I.

Cap. 1. *Quid sint Nomen, Verbum, & Signum.*

Cap. 2. *De Cognitionum significatione.*

Cap. 3. *Quid sit Propositio vocalis, id est Humana Locutio.*

Cap. 4. *Quid, & quotuplex sit terminus.*

Cap. 5. *Quid, & quotuplex sit suppositio Terminorum.*

Cap. 6. *Quid, & quotuplex sit enunciatio.*

Cap. 7. *Quot, quæ, & qualia sint Instrumenta sciendi.*

Cap. 8. *Explicantur octo Locutiones valdè frequentes.*

DIALE-



DIALECTICA.



UM Dialectica, seu Logica Minor sit facultas rectè differendi, media subministrat huic fini satis idonea. Primaria sunt tria, quæ vulgò dicuntur *tria instrumenta sciendi*; nimirum Definitio, Divisio, & Argumentatio. His accedunt alia, nempe Suppositio Terminorum, Quantitas, Qualitas, Conversio, Oppositio, Æquipollentia Propositionum. Hæc

omnia explicanda suscipimus, & incidentes non paucas quæstiones hinc resultantés. Totam igitur Dialecticam tribus Disputationibus distinctam dabimus. In quarum Primâ vocabula omnia, sive terminos Dialecticæ exponemus. In Secunda modos omnes legitimos, & illegitimos argumentandi. In Tertiâ Quæstiones expediemus, quæ *Proemiales* dicuntur, & sunt non de Logica Magna postea danda, sed de hac ipsa Dialectica, quam modò damus, & reflectunt supra eam examinando naturam, qualitates, & proprietates tum ipsius Logicæ Minoris, tum objecti, quod habet.



A

DIS-

DISPUTATIO I.

De Vocum Significatione.



Mnis humanus discursus per affirmationes fit, aut negationes: utræque frequenter constant vocibus habentibus jam eundem jam diversum sensum, ac significationem: cūm, enim, primi Professores linguarum non tractaverint, quæ minutissimè, ac subtilissimè modò, disputantur, non reliquerunt nobis præcisa, castigataque verba pro difficultatibus omnibus explicandis, quæ modò excitantur. Hinc 1. Barbaries illa vocabulorum paucis ab hinc sæculis inventorum, quibus scaterere solent scholasticæ disciplinæ; sed jam non sunt barbara, quorum assueti sunt viri doctissimi. Hinc 2. Molestus ille mos, distinguendi, subdistinguendi, dividendi, subdividendi, ut multis saltem, verbis aperiamus mentem nostram, quam unico verbo aperire nequimus. Hinc 3. Nascitur æquivocatio inter disputandum; sæpè enim ambo contendentes judicant idem apud Deum, qui comprehendit ipsorum mentem; vociferantur tamen validè ambo, quia unus intelligit in uno sensu, quæ audit ab altero, & hic dicit illa in alio sensu. Hinc 4. Sophistarum lucrum: animadvertentes namque hi æquivocationem vocum, torquent, & detorquent illas clam transseunt de uno sensu ad alium, illaque anxii gratià incautum. Adversarium. Forfan ob hanc causam scripsit Salomon: *Hanc occupationem pessimam (id est molestissimam) dedit Deus filiis hominum, ut occupentur in ea.*

CAPUT I.

Quid sint Nomen, Verbum, & Signum.

1. **N**omen est *Vox significativa ad placitum sine tempore finita, & recta*. Quid sit, & quotuplex significatio ad placitum dicemus mox. Dicitur nomen significare *sine tempore*: ubi adverte. Aliud est significare tempus, aliud connotare tempus, aliud consi-

gnifi-

Quid sit Nomen, Verbum, & Signum. 3

gnificare tempus; primum, & secundum conveniunt nomini, unde non excluduntur per illud *sine tempore*; quoniam hæ voces, *Hora*, *Dies*, *Menfis*, *Annus*, & similia sine dubio sunt nomina: & sine dubio etiam significant tempus: præterea hæ, *Jentaculum*, *Prandium*, *Cæna*, sunt quoque nomina: & certè connotant tempus: qui enim audit illas voces, & consuetudinem scit hominum, illicò venit in cognitionem temporis aut matutini, aut meridiani, aut nocturni: ergo voces illæ supposita hominum consuetudine connotant, sive alludunt, sive innuunt tempus: tertium igitur est, quod negatur de nomine in hac definitione, quippe quod proprium est, seu characteristicum verbi, ut jam dicemus.

2. Porro nomen dicitur *vox finita*, quia si calligatè loquamur, nomina infinita non sunt propriè nomina, quia non significant rem ullam, aut speciem, aut genus determinatè: dicuntur autem nomina infinita, seu potius *infinitata* illa, quæ desinunt significare quod priùs significabant, & transeunt ad significandum quod antea non significabant (quod non potest contingere nominibus illis transcendentibus, *Res*, *Ens*, *Verum*, *Bonum*, *Aliquid*, *Unum*, de quibus postea) v.g. hæc vox *Homo* significat hominem dumtaxat; infinitatur autem, si ei præponas voculam illam, *non*, & dicas, *non homo*: quia jam non significat hominem, sed omnia illa, quæ non sunt homo, quocirca qui in sensu infinitante dicit: *non-homo volat*, dicit: *id, quod non est homo, volat*, quod verum est intelligendo volucrem.

3. Ubi cautè procedendum est propter Sophistas transcurrentes interdum ex sensu purè negante ad infinitantem, & vice versa: si illa vocula, *non*, habeat sensum purè negantem, nihil aliud præstat, quam negare quidquid post se invenit, atque idcirco vocatur *malignantis natura*: nam quidquid post se invenit destruit cum propositione: unde fit, quòd propositio, in qua invenitur, est purè negativa.

4. Sin verò habeat sensum infinitantem, propositio evadit affirmativa, ut constat in exemplo posito; & potest habere novem tenus valde diversos. Primum Universalem, *Omne quod non est homo volat*. Alium particularem: *Aliquid quod non est homo volat*. Alium singularem: *Illud, quod non est homo, volat*; & cum unusquisque ex his tribus pos sit præscindere ab eo quòd homo volet, nec ne: & possit etiam hoc implicite negare: & possit hoc implicite affirmare, jam vides numerum, qui resultat. Quando autem illa vocula habeat sensum purè negantem, quando infinitantem, & ex iis quando ha-

beat unum, quando alium, id regulandum est per adjunctas circumstantias, quæ si lucem sufficientem non præbeant, utendum est distinctione, & concessa propositione in sensu vero, negetur in falso.

5. Denique nomen dicitur vox *recta*, quia licet alii casus distincti à nominativo possint etiam esse subiectum, aut prædicatum enunciationis, v. g. *Hominis est casus obliquus*, tunc ponuntur materialiter, & non pro suo significato, & subintelligitur nominativus quidam, nempe, *hæc vox*: nominativi autem soli sive sint declinabiles, sive indeclinabiles, subserviunt enunciationibus, v. g. *Homo est animal*: item *Hominem esse animal est esse vivens sensibile*. Hactenus de Nomine.

6. Verbum est *Vox significativa ad placitum finita consignificans tempus*, & est semper eorum, quæ de altero enunciantur nota. Priores particulae intelligendæ sunt sicut in definitione Nominis: verbum autem dicitur *consignificare tempus*: quoniam non solum significat rem aliquam, sed etiam tempus, in quo illa est. V. g. *Amo* significat amorem, & tempus præsens. *Amavi* significat amorem, & tempus præteritum. *Amabo* significat amorem, & tempus futurum: tempus, inquam, non quidem *extrinsecum*, quale est motus Firmamenti, qui motus vocatur tempus eo quod utamur illo tanquam mensura ad deprehendendum majorem, aut minorem durationem rerum; sed tempus *intrinsecum*, hoc est durationem ipsam illius rei, quæ significatur per verbum, ut *Amo* significat amorem, & hanc præsentem durationem amoris: *Amavi* durationem ejusdem amoris quæ fuit, & jam non est: *Amabo* durationem, quæ erit, & nondum est.

7. Ultimum illud: *Eorum quæ de altero &c.* significat verbum imbibere semper (quando utimur illo propriè ut verbo, & non purè materialiter, sicut solemus ut aliis vocibus) aliquid, quod de alio enunciat, sive per affirmationem, v. g. *Homo laborat*, sive per tacitam negationem, v. g. *Homo quiescit*, *Homo otiiatur*: unde omne verbum ut tale est nota, sive index, sive signum illius, quod de alio enunciat. Non diximus, *prædicatur*, sed *enunciat*; quia prædicari magis innuit affirmationes; enunciari autem est vox universalior significans affirmationes, & negationes: & poterant obijci tibi aliqua verba, v. g. *otiiatur*, *quiescit*, ac similia, quæ magis sunt negativa, quàm affirmativa, ac proinde magis sunt eorum, quæ de altero negantur, quàm eorum, quæ prædicantur, nota..

8. Tandem signum, juxta S. Augustinum, est *Id, quod præter*
spe-

Quid sit Nomen, Verbum, & Signum. 5

speciem, quam ingerit sensibus facit aliquid aliud in cognitionem venire. Loquitur de solis nostris signis humanis: quoniam cum Angeli habeant etiam sua signa, quorum usu colloquuntur (non enim formant Rempublicam Mutorum) nec non animæ separatæ à corporibus: & tam hæ, quàm illi careant sensibus corporalibus, idcirco non est de essentia omnis prorsus signi, quodd speciem ingerat *se: usibus*, sed tantum de essentia signi humani; cò quia anima nostra degens in carcere corporis non cognoscit naturaliter, nisi dependenter ab obscura ea luce, quæ illabitur per aliquem ex sensibus corporalibus. Hac luce diversimodè combinata, & adjecta tum supernè per auxilium Dei, tum infernè per experientias quotidianas, & per temperamentum optimum, aut mediocre, quo cerebrum nostrum constat, taciti apud nos formamus omnes nostras cognitiones, & iudicia, & discursus, obscura profectò omnia, & imperfecta (excepto quando cognoscimus accidentia aliqua materialia) sicut essent actus illi quibus videret homo in subterranea specu inclusus, & remotissima luce adjutus.

§. II.

9. **S**ignum est triplex. *Naturale. Ex consuetudine. Ad placitum, sive ex institutione.* Omittimus signum, quod aliqui vocant *Formale*, nimirum nostras ipsas cognitiones, quia hæ non sunt propriè signum humanum, quandoquidem non percipiuntur per sensus. Signum *Naturale* est illud, quod suaptè essentia indicat aliud, ut *Fumus* ignem: cumque res possit indicare aliam instar naturalis effectus illius, ut risus indicat rationalitatem, (nemo enim, nisi qui fuerit rationalis, potest verè ridere) vel instar causæ, ut *Ignis* indicat flammam; vel instar rei, quæ nec est causa, nec effectus alterius, ut ventus solet indicare procellam Maris, quatenus ventus, & procella nasci solent ab eadem causa, scilicet à furiosis exhalationibus ex Terræ visceribus erumpentibus, & agitantibus omnia quæ supra se inveniunt sive illud sit aqua, ut contingit in Mari, sive infima hæc regio aeris, ut experimur in Terra: cum hæc, inquam, ita sint, hac de causa signum naturale est triplex, nempe à *priori*, hoc est tanquam causa, à *posteriori*, hoc est tanquam effectus, à *comitante*, hoc est tanquam à focio, seu consfratre, qui nec est causa, nec effectus.

10. Rursus cum causa possit esse vel intrinseca, vel extrinseca; & hæc vel physica, vel moralis, juxta ea, quæ dicemus in Physica, dete-

deteges hinc multitudinem magnam signorum naturalium; lacrymæ autem, singultus, gemitus non sunt signa naturalia interni *doloris*: sicut nec risus, *alacritutis*: nec alia humana libera indicia sunt signa naturalia affectionis internæ ipsi alijs, respondere solitæ; quia homines multoties fingunt externæ affectionem, quam non habet internæ.

11. Signum ex consuetudine est illud, quod ducit nos in allus rei cognitionem, eò quod experientiâ didicerimus contingere hanc rem quoties fit illud: v. g. lugubris campanarum sonus est *ex consuetudine* signum Mortui; alius verò sonus signum festivitatis, alius serpentis ignis &c. quia experientiâ novimus eos sonus diversas illas res significare: cùmque hæc consuetudo possit esse humana, aut beluina (siquidem Venatores, Aucupes, & Piscatores observantes belluas nanciscuntur signa, seu indicia fausti, vel infausti eventus in suo exercitio) inde est quod signum ex consuetudine est duplex, nimirum *rationalē*, & *irrationalē*. Rursus cùm inter humanas consuetudines unæ sint communes omnibus hominibus, alteræ peculiari aliquibus: idèd signum ex humana consuetudine est duplex; unum *absolutum*, & *universale*; alterum *respectivum*, & *particulare*.

12. Signum ad placitum, seu ex institutione (cum quo illud alterum *ex consuetudine humana* coincidit, siquidem idèd viget illa consuetudo, quia homines id voluerunt, licet non semper ac volunt detur illicd consuetudo) est illud quod cùm sit ex se indifferens ad significandum, vel non significandum rem A. v. g. persona utitur illo, quia ipsa vult, vel alii voluerunt ad significandum determinatè rem illam: hæc autem significatio debet esse nota illi, cui fit illud signum, alijs respectu illius non erit signum; *nota*, inquam, vel per cognitionem spiritualem, quali funguntur homines, vel per materiale, & impropriam, qualem habent multa bruta: unde virgam elevare solet esse signum ad placitum hominum respectu equi, canis, felis, quia hæc animalia imperfectis suis cognitionibus imperfectè advertunt imminere sibi plagam quando homines faciunt actionem illam, quæ alioquin ex natura sua non est signum plagarum.

13. Hoc signum est triplex juxta triplicitatem rationalis naturæ quam novimus. 1. Ad placitum *Divinum*, nempe res illa, quam solus Deus instituit ad aliquid significandum creaturis. Hujusmodi sunt Sacramenta nostra, quia cùm Baptismus v. g. foret ex se indifferens ad significandum, vel non significandum gratiam dandam ritè baptizato, Deus elegit, atque instituit illum, & ipsi annexit gratiam: quocirca hujus est signum ad placitum Divinum: hujusmodi etiam

Quid sit Nomen, Verbum, & Signum. 7

etiam est Iris: nam cùm ea sit indifferens ex se ad significandum, vel non significandum immunitatem à Diluvio, quod saltem postmodum ingruere poterat, Deus, quia voluit, usus est illa ad significandum hominibus nunquam ampliùs futurum Diluvium: *Arcum mentis ponam in nubibus, & erit signum fœderis &c.* Unde quoties arcum eum videmus, quamvis non teneamur positivè credere, possumus tamen, Diluvium non ampliùs futurum: & tenemur non judicare oppositum, quia phœnomenon illud est locutio, est vox, est testimonium Divinum de Diluvio non ampliùs futuro, quia licèt sit effectus naturalis eorum trium principiorum, *Lucidum, Roridum, & Obscurum*: eo nihilominùs effectu naturali voluit Deus uti ad significandum id, cujus non est signum naturale. arcus ille. Hujusmodi autem signorum, quibus uti solet Deus ad loquendum cum hominibus, supra 40. species notavimus ex Scriptura Disp. ult. de Fide.

Genes. 9.

14. 2. Ad placitum, seu ex institutione *Angelica*; nempe res illa, quæ Angelus, vel Angeli probi, aut improbi instituunt quia volunt, ad significandum aliquid hominibus, vel Angelis aliis, cujus rei. obvia sunt exempla in Scriptura. 3. Ad placitum *humanum*: & hoc tripliciter etiam. 1. Quando unus solus homo, sed qui est aliquum caput, eligit rem aliquam ad significandum cæteris aliquid, ut solent facere Duces Exercituum mutatione vexillorum, sonitu tubæ, aut tympanorum. 2. Quando unus Privatus pacificitur cum alio de significatione talis, aut talis singularis actionis, ut pepigit Jonathas cum Davide in quadam jaculatione, quæ voluit ipsum monere de imminente periculo.

1. Reg.
c. 20.

15. 3. Quando Communitas ipsa, seu major pars omnium illorum eligit aliquid ad significandum aliud: & hoc modo voces verba, vocabula, characteres, hieroglyphici, emblemata, quibus homines utuntur ad loquendum, vel scribendum sunt signa ad placitum, sive ex humana institutione: quia cùm hæc omnia sint ex se indifferentia respectivè ad significandum illa, quæ jam significant; homines tamen quia voluerunt, convenerunt in eo quod tales res significant: & admittentes Successores priorem eam conventionem, invaluit Lex, quod hoc nomen v. g. *Calum* potius significet supremam Mundi regionem, quàm lapidem, vel arborem, ad quæ significanda potuerunt homines uti ea voce. Unde contumacibus contra significationem verborum, ex qua pendet firmissimè intelligentia quidditatis, & essentiæ rerum, obstruendum est os per unicum hanc rationem à priori: *Ita volvere Priores.*

16. Si.

16. Signis respondent duo conceptus. Unus vocatur *Non ultimus*; & est reflexa cognitio, quam habemus de signo ipso, v. g. cognitio de hoc nomine scripto, vel pronunciato *homo*. Alter vocatur *Conceptus ultimus*; & est cognitio directa, quam habemus de re illa significata per ipsum signum, v. g. cognitio non tam de hac voce, *homo*, quam de homine ipso.

§. I I I.

17. **U**T hæc omnia melius capias, adverte quinque. Cùm ægrè admodum possent homines initio Mundi convenire in significatione vocum absque aliis vocibus, quibus se se mutuò intelligerent; & quibus de hac ipsa conventionem convenirent, dicendum est. Infuisse Deum ut Authorem & Magistrum humanæ Reipublicæ Adamo, & Evæ notitiam, atque facilitatem multarum vocum, nec non significationis earundem, ut possent invicem colloqui, Evæque intelligeret linguam, quâ Diabolus sensibilibiter loquebatur in serpente transfiguratus; unde quando dicitur: *Omne enim, quod vocavit Adam Animæ viventis, ipsum est nomen eius*, v. g. quando Evam nuncupavit *Viraginem*, non est quia Eva haberet ex sua essentia vocari illo nomine, aut quia ea vox *Virago* haberet ex sua essentia significare fœminam de viro sumptam; nam hæc eadem vox potuit assumi ad significandum saxum in alia nominum derivatione.

18. Sed quia posito quod Deus ut primus Magister primi Hominis hunc docuerit voces externas, quas voluit, & eas habere, saltem aliquas, significationem, quam ipse Deus voluit, Adamus inter vocabula, quæ habebat infusa per Deum, elegit hoc v. g. *Virago* ad significandum Evam, quod vocabulum erat omnium propriissimum, non quidem ex sua essentia, sed ex suppositione quod Deus voluerit hanc vocem significare fœminam de viro sumptam, seu ex suppositione, quod radix primitiva, ex qua derivabatur hæc vox haberet significationem consentaneam Evæ: & similiter de aliis nominibus, quæ Adamus indidit rebus aliis, quæ nomina erant propria earum, non proprietate innata vocabulis, aut rebus ipsis; sed quia ex Divina institutione significabant essentiam, & proprietatem ipsarum rerum.

19. Similiter nomen illud Dei, *Adonai*, quod ipse Deus dixit, *Non indicavi eis*, scilicet antiquis Patriarchis non est proprium Dei proprietate essentiali aut ipsi Deo, aut vocabulo illi, quia illo eodem

Quid sit Nomen, Verbum, & Signum. 9

dem vocabulo potuit significari Creatura in alia rerum peristasi; sed dicitur proprium Dei ex suppositione significationis, quam voluit Deus ipsi annectere: & quia annexerat jam specialissimam quantam sui ipsius cognitionem. Idem dicendum de illis 72. linguis (consule tamen Pererium) distributis inter illas 72. Familias, à quibus propagatum fuit genus humanum, scilicet Deum infudisse unicuique personæ uniuscujusque Familiæ notitiam, & facultatem specialium vocabulorum, quæ Deus voluit, nec non significationis, quam Deus voluit; ne instar mutorum solis signis manuum se se intelligerent etiam personæ illæ, quæ ejusdem erant Familiæ, donec statuerent certas voces, & ipsarum significationes.

Lib. 16.
in Genes.
disp. 10.

20. Adjuncti ergo primitivi illi homines ab Authore, & Magistro rationalis naturæ subsidio aliquarum saltem vocum, ipsi postea, & sui Nepotes potuerunt inducere alias, ex quarum combinatione tum inter se, tum cum aliis vocibus aliarum Familiarum resultavit ingens linguarum copia, quam experimur. Quamobrem primæva illa nomina, & verba significarunt ad placitum *Divinum*, (Angeli enim impares sunt infundendo saltem naturaliter nobis spirituales cognitiones quidquid sit de potestate, quâ funguntur alterandi nostram phantasiam, quâ similes sumus brutis) reliqua verò ad placitum *humanum*.

21. Adverte 2. Vocis significatio non est regulanda per vocem ipsam solam; sed multoties per alias etiam adjunctas, sive antecedentes, sive subsequentes: & hanc ob causam hæc solæ voces, *non est Deus*, sonant atheismum; adjuncta verò hæc, *mendax*, faciunt veritatem Catholicam: & converso, *Deus est*, dant sensum verum; adjuncta verò hæc, *ignarus*, dant sensum blasphemum; vis ergo energia, & significatio aliquarum vocum plerumque non stat in eis solis, sed in eis, & aliis concurrentibus: unde jure dicitur erendum esse sensum textuum non solum ex *textu*, sed etiam ex *contextu*; & jure etiam reprehenduntur illi, qui inter disputandum non sinunt alterum absolvere orationem; sed ubi primum audiunt quidpiam ipsis asperum, exardescunt, insilium, & vociferantur iridentibus aliis phanatico acrem verberanti: nec solum stat sensus in adjunctis aliis verbis, sed etiam in adjunctis aliis signis distinctis à verbis, sic quamvis hæc verba, *iste est ingeniosus*, aliàs sint laudativa, si tamen ea proferas subridens, aut digitum vel caput utrinque agitans, certè non significant laudem absolutè, & simpliciter; nempe quia sunt multi humani modi loquendi: loquimur enim ore, fron-

te, oculis, capite, manibus, pedibus, digitis, lacrymis, tono, accentu, risu, silentio &c. ergo signa illa cadentia supra verba ore prolata prævalent multoties contra illa, adimuntque significationem, quam aliis haberent ex sua institutione, ut constat ex ironiis.

22. Adverte 3. Significatio vocum neque stat in solis vocibus adjunctis quoque aliis externis signis editis à loquente: sed stat etiam in aliis circumstantiis humana consuetudine introductis, tametsi fuerint contra priscam institutam significationem illarum vocum: sic qui neque osculatur, neque osculari cogitat alterius manus, citra mendacium dicit, urbanitatis gratiâ: *Osculor tuas manus*. item *Congratulator*: *Condoleo*; tametsi neque lætitiâ, neque dolore afficiatur; quoniam civilis mos utendi his vocabulis urbanitatis tantum gratiâ, sicut his aliis, *Excellentissimus*, *Serenissimus* &c. prævaluit contra aliâs institutam ipsorum significationem; & facit ne significant hic & nunc quod aliâs significabant. Idem dicendum de verbis comminatoriis, quibus Parentes terrere solent filios, & famulos sine ulla intentione infligendi plagas illas. Idem de multis, sed non de omnibus promissionibus solius urbanitatis, aut molestiæ vitandæ causâ factis: nec propterea vitatur humanum commercium, quod mediis verbis habetur: etenim usus locutionum earum est adeo frequens, ut solum decipiatur qui idioma non capit civile in eis, & similibus circumstantiis usitatum. Quod si patitur humana societas, ipsi homines inflexerunt sibi hoc vulnus.

23. 4. Nec significatio vocum sumitur ex solo abusu jam converso in usum, sed etiam ex circumstantiis adhærentibus personæ loquenti: nam multoties qualitas illa afficiens apertè innuit, volenti intelligere, sensum alium ab eo, quem præferunt verba: sic Sacerdos ad eas angustias redactus ut nisi clarè, expressè, ac formaliter dicat: *Non audiui tale crimen in Confessione*, & hoc confirmet iuramento, & insuper addat se non esse restrictiōe ulla mentali: si inquam hæc non faciat illico deveniendum sit in cognitionem, quod crimen illud audivit in Confessione, potest sine mendacio aut perjurio illa dicere, tametsi crimen verè audierit, intelligendo intra se: *Non audiui cum facultate revelandi*; quoniam licet illa verba sola, *non audiui*, aliâs significant falsum; complexum tamen ex illis, & ex inviolabilis sigilli obligatione, quâ tenetur ille Sacerdos (in quo complexo verborum, & aliarum circumstantiarum consistit locutio) sufficienter innuit, volenti intelligere, sensum illorum verborum esse hunc disjunctivum, *vel non audivit tale crimen, vel ratione*
invis-

Quid sit Nomen, Verbum, & Signum. II

inviolabilis sigilli utitur ipse aliqua mentali restricti one directâ, aut reflexa, qui sensus disjunctivus verus est; quocirca mentalis illa restrictio non est purè mentalis, sed sufficienter noscibilis, saltem sub disjunctione ab eo, qui advertere velit circumstantiam, quæ afficit personam loquentem, vi cujus hic non potest rationabiliter dicere, quæ audit in Confessione.

24. Non ita quando ille, qui interrogat habet jus interrogandi, v. g. Judex, qui legitime procedit cum Reo; quia tunc hic tenetur respondere juxta significationem ipsam verborum: quocirca si utatur mentali restrictione contra sensum, quem præferunt verba, illa restrictio erit purè mentalis, & consequenter non erit licita, quia erit mendax; neque quoddam Judex sciat desiderium illius accusati, vitandi mortem, torturam, dedecus &c. facit ne sit purè mentalis, & consequenter ne sit illicita responsio illa, *non feci istud*, cum hac mentali restrictione, *ut tibi dicam*; quoniam supponimus non adesse ullam circumstantiam, quæ Reum illum excuset in conscientia à respondendo veritatem Judici procedenti legitime; ergo desiderium istud nequit prævalere contra obligationem aperiendi veritatem: ergo quoddam illud desiderium sit notum Judici non probat huic esse notum aliquid, per quod verba externa rationabiliter constituentur in esse locutionis humanæ aliud significantis ab eo, quod sonat in verbis; cum verò oppositum accadat in casu Confessarii, ideo est disparitas.

25. 5. Mentitur omnis, qui edit signum aliquod indicativum rei, quam ipse putat falsam, atque ex intentione ut alius rem illam putet esse veram: v. g. qui ex intentione ut alius judicet se habere dolorem de peccatis genusexus ante Imaginem Christi Domini percuteret pectus, quando nullum prorsus habet dolorem suorum peccatorum: item qui plangeret ex intentione, ut alius crederet se moestum, quando internè est hilaris, aut è converso: item qui Davidem, aut Saulem depingeret cucullatos ex intentione, ut alii crederent illos fuisse Monachos: omnes inquam isti mentiuntur, si hæc faciant non quidem ex reflexa intentione, ut alius decipiatur ex sua ignorantia occasione eorum signorum externorum (quia hoc non tam esset decipere alium, quàm occasionem præbere, ut illè alius à sua ignorantia decipiatur) sed ex directâ, absoluta, & immediata intentione, ut alius credat illa. Ratio est: omnis, qui loquitur contra propriam mentem, mentitur: sed omnis, qui edit signum manifestativum rei, quam ipse putat falsam, atque illud

signum edit ex intentione directa, & absoluta, ut alius credat talem rem, loquitur illam contram propriam mentem.

26. Probat: usu, & experiētiā novimus, non omnem modum humanum loquendi reduci ad sola verba; sed esse multos alios usitatos modos loquendi, ut num. 21. notabamus, qui modi loquendi capaces sunt veritatis, ac falsitatis; ergo oportet assignare aliquem conceptum genericum, aut specificum, in quo omnes illi conveniant: sed non videtur alius magis idoneus, quā hīc *edere aliquod signum ex directa, & absoluta intentione, ut alius, vel alii judicent, seu credant rem A. v. g.* ergo omnis qui hoc facit, loquitur locutione inter homines usitata: ergo si ipse putat rem illam esse falsam, loquitur contra mentem; ergo mentitur. Sed Capite proximē sequente magis explicabimus hoc.

C A P U T II.

De Cognitionum Significatione.

27. **Q**uæstio alia est. An cognitiones, quæ etiam vocari solent conceptus formales, significant ad placitum nō minus quā voces, & verba: an potius habeant per solam suam essentiam significare objectum, quod semel significant, ita ut cognitio hæc v.g. *Homo est animal* in omni, & pro omni casu possibili significet hominem animal, & utriusque identitatem? Cēseō non esse prorsus improbabile, actus intellectus, sive cognitiones, sive conceptus formales, quos habemus in hac vita non habere per suam solam essentiam significare objecta, quæ significant. Et probari potest loquendo de prædicta cognitione, ac de hac altera *Paries est albus*, & similiter de reliquis omnibus cognitionibus, quas *modo ordinario* habemus in hac vita, quid quid sit de cognitionibus, quas Angeli, & animæ separatæ à corpore habent: imò quid quid sit de cognitionibus specialissimē infusus per Deum hominibus etiam in hac vita: quia præcindimus ab his omnibus, & duntaxat loquimur de cognitionibus modo habitis ordinario, id est dependenter à sensibus, à quibus supernaturales etiam cognitiones nostræ pendent juxta illam Apostolicam consequentiam. *Ergo Fides ex auditu.*

Ad Rom.
10.

28. Nil sine quo existere potuerunt ambo illa judicia interna, & mentalia, est illis essentiale, ut constat: sed judicium illud *homo est animal* potuit existere quin significaret hominem esse animal: & illud alte-

alterum *Paries est albus* potuit existere quin significaret parietem esse album; ergo non est illis essenziale significare hæc: Pr. minor. Esto quod illa verba, seu vocalis enuntiatio *homo est animal*, instituta forent per homines ad significandum parietem esse album, ut institui potuerunt, quia verba significant ad placitum humanum, vel divinum, & sicut defæcto illa ex usu, & placito hominum significant hominem esse animal: ita ex eodem usu, & placito potuerunt significare aliud diversum vg. parietem esse album, & hoc intelligeremus tunc, & judicaretur simul ac verba illa audiremus. Esto similiter quod hæc voces *Paries est albus*, institutæ essent, ut institui potuerunt, ad significandum hominem esse animal. In hoc casu iudicium mentale sic tendens *homo est animal* non significaret hominem esse animal, sed significaret parietem esse album: & iudicium hoc, *Paries est albus* non significaret quod modo, videlicet parietem esse album; sed significaret hominem esse animal.

29. Quoniam mentale illud iudicium significaret quod tunc significarent illa verba, *homo est animal*, per quæ exterius manifestaretur illud iudicium, atque ad quorum sonitum illud iudicium conciperetur: at verba illa ut supponimus, non significarent: quod modo significant, nempe hominem esse animal; sed significarent parietem esse album (& idem respectivè de illo altero iudicio: *Paries est albus*). ergo mentale illud iudicium non significaret mentaliter hominem esse animal, sed parietem esse album. Itaque sicut modo auditis istis vocibus *homo est animal*, illico formamus mente iudicium sic tendens *homo est animal*: & per hoc iudicium cognoscimus hominem esse animal, quia id est, quod modo significant illæ voces: ita in casu dicto auditis eisdem vocibus formaremus mente iudicium ejusdem tendentiæ, & per illud cognosceremus parietem esse album, quia id esset quod in eo casu significarent illæ voces ut ponimus.

30. Explicatur: qui tunc judicaret hominem esse animal, vel explicaret hoc suum iudicium his verbis *homo est animal*: vel his. *Paries est albus*. Si primis, ergo malè explicaret suum iudicium, quia supponimus illa verba non significatura tunc hominem esse animal, sed parietem esse album; explicare autem iudicium de eo quod homo sit animal verbis significantibus parietem esse album, esset mala, & disparata explicatio, sicut esset modò disparata explicatio ejusdem iudicii per hæc verba *paries est albus*, quæ modo significant parietem esse album. Immo casu quò ex hominum usu, ac institutione *est* significaret negationem, & *non est* significaret affirmationem ut potuit contingere
sequi-

liquidem ambo verba significant ad placitum hominum, iudicium mentis affirmativum explicare per *est* foret mendacium, & negativum explicare hoc verbo, *non est*, foret etiam mendacium; ergo dicendum, quod in casu dicto internum illud, ac mentale iudicium de eo quod homo sit animal, non debebat explicari, ac manifestari verbis illis, *homo est animal*, sed eis alteris, *paries est albus*, quæ sola verba in casu illo significarent ex hominum placito & usu hominem esse animal; tunc sic iudicium illud internum de eo, quod homo est animal, aut haberet hunc mentalem modum tendendi *homo est animal*; aut hunc, *paries est albus*: primum dici nequit, tum quia aliis verba externa, & iudicium internum non concordarent, siquidem verba haberent hanc expressionem, seu tendentiam, *paries est albus*, & iudicium hanc, *homo est animal*, quæ sunt invicem disparatæ; tum quia de facto verbis significantibus hominem esse animal, non respondet hoc iudicium, *paries est albus*, nec verbis significantibus parietem esse album, respondet hoc iudicium, *homo est animal*; nempe quia expressio, seu tendentia mentalis, atque vocalis debent univocari, non quidem in omnibus aliis ut patet; sed in modo proferendi, atque enunciandi.

31. Ergo casu quo illa verba, *paries est albus*, instituta forent ad significandum hominem esse animal, iudicium illis respondens, & quo sciremus hominem esse animal, non esset hoc, *homo est animal*, sed hoc, *paries est albus*; tum quia si vox *est* foret instituta ad negandum, & vox *non est* ad affirmandum, internum iudicium affirmativum non tenderet sic *est*, quia iudicio affirmativo non correspondet sine mendacio vox negativa, sed tenderet sic, *non est*, & vice versa; ergo verbis illis, *paries est albus*, significantibus hominem esse animal, iudicium illis respondens, quo iudicaretur hominem esse animal, non esset hoc, *homo est animal*, sed hoc, *paries est albus*, quæ erat secunda pars dilemmatis positi num. præcedente; ergo iudicium sic tendens, *paries est albus*, significaret tunc, hominem esse animal; sed nunc non significat hoc, ut patet, ergo iudicium hoc potest non significare illud, quod nunc significat; ergo non habet per solam suam essentiam significare quod significat.

32. Ubi adverteduo. Non contendimus, quod sit idem numero, ac quoad individuum iudicium (quamvis & hoc contendere poteramus, quoniam hoc individuum, & singulare iudicium potest existere, sive homines instituerint illas voces, *paries est albus* ad significandum parietem esse album, sive ad significandum aliud quidpiam,

siquidem hominum placitum, & institutio per accidens prorsus se habet respectu illius judicii) contenti sumus eo, quod sit idem quoad speciem: nempe unum judicium sic tendens, *paries est albus* posse significare parietem esse album: & aliud judicium solo numero distinctum, atque ejusdem penitus tendentiæ, nempe *paries est albus* posse significare *hominem esse animal*: adversarii autem erit, hoc posito, probare unum ex eis habere per solam suam essentiam significare parietem esse album; alterum autem habere per suam solam essentiam significare hominem esse animal, alterum est, posito casu, cui insistimus in tota hac questione, nimirum quod ex hominum usu, atque institutione mutata esset significatio earum vocum. *Est, non est. Homo est animal. Paries est albus*, cognosceret quidem intellectus hominem esse animal v. g., & de hoc maneret certus, ac securus: non est questio de hoc: difficultatis cardo stat in expressione, seu tendentia judicii, quod id cognosceret. nos dicimus, si illæ voces *paries est albus*, significarent hominem esse animal, judicium, quo intellectus id cognosceret, non fore hoc *homo est animal*, quia hoc significaret parietem esse album, sicut significarent illæ voces *homo est animal*; sed fore hoc. *Paries est albus*, quia hæc forent voces, quibus externè significaretur hominem esse animal.

33. Jam ratio à priori potest esse. In hac mortali vita formamus nostras mentales apprehensiones, judicia, & discursus habentes modum tendendi, sive internum, & spirituales sonum, ut ita dicamus, exactè respondentem sono materiali, & externo verborum, quæ audimus a baliis, aut proferimus nos, ut constet experienciâ, quis enim audiens, aut proferens hæc verba, *homo est animal*, formet hanc mentalem expressionem, seu vocem, seu tendentiam, seu judicium, *paries est albus*, & non potius hanc *homo est animal*, habentem eanalem expressionem, sive tendentiam, sive internum sonum, quem habent illa verba? & idem de audiente, sive proferente illa altera verba: *Paries est albus*, quis non habet tunc, si res procedat sine mendacio, & amphibologiis, judicium ejusdem soni, ac tendentiæ, idest *Paries est albus*? Idem de judiciis disjunctivis, conditionalibus, causalis, quæ habent tendentias, seu modum exprimendi respondentem expressioni vocali externæ, ergo etiam casu, quo ob placitum, & institutionem hominum mutata fuisset significatio eorum verborum ita ut illa *paries est albus*, significarent hominem esse animal, audiens, & proferens illa verba formaret judicium ejusdem tendentiæ, ac soni mentalis, nempe formaret hoc judicium *Paries est albus*: sed in eo casu judicium hoc

non

non significaret, quod modo significat, sed significaret hominem esse animal, quia significaret quod verba, quibus respondet, significant (alias mente diceremus unum, & ore aliud, unde continuis mendaciis, & confusionibus scaterent humana colloquia etiam Sanctorum), ponimus que verba illa significare hominem esse animal; ergo iudicium hoc in casu illo non significaret, quod modo significat; ergo non est ipsi essentialiter significare, quod significat: in nullo quippe casu possibili potest res ulla carere eo, quod sibi est absolute essentialiter.

34. Cumque idem argumentum possit fieri super omni cognitione sive apprehensiva, sive iudicativa, sive discursiva, quam ordinarij modo habemus in hac vita, palam fit omnem nostram cognitionem per se ab intrinseco esse capacem significandi aliud omnino distinctum ab eo, quod modo significat; ubi jam vides rationem totam stare in eo, quod pro hoc misero statu non cognoscimus nisi dependenter à phantasmatibus, seu speciebus, seu signis illapsis animæ nostræ per sensus; nam de omni nostra cognitione verificatur respectivè, quod de cognitionibus fidei docet Paulus loco citato: *quomodo credent ei, quem non audierunt!* Item ergo *fides ex auditu*: Item quod Philippo querenti. *Putas ne intelligis, quæ legis*, respondit bonus ille Æthiops, *quomodo possum, si non aliquis ostenderit mihi*, ergo si mutaretur, ut mutari potuit, significatio verborum, aut aliorum signorum, quæ illabuntur animæ per sensus, mutaretur etiam significatio eorum actuum internorum, quos modo concipit anima nostra ad præsentiam eorum verborum, aut signorum.

§. I I.

35. Obii 1. **I**udicia essentialiter vera, qualia sunt iudicia fidei, & multa iudicia naturalia v. g. existit Deus, quodlibet est, vel non est, & reliqua principia metaphysicè evidentia. Item iudicia essentialiter falsa, v. g. *Non est Deus*: utraque inquam iudicia essentialiter habent enunciare, quod enunciant; alias prima possent esse falsa, & secunda possent esse vera: & consequenter posset esse falsum hoc iudicium, *quodlibet est, vel non est*, & hoc, *Deus existit*: nec non posset esse verum hoc *Deus non existit*: ergo aliqua saltem iudicia habent per suam essentialiter significare, quod significant. Distinguo antecedens, essentialiter absolute vera, aut essentialiter absolute falsa, nego suppositum, quia in hoc statu mortali nulla id generis habemus juxta ordinariam providentiam, juxta quam nulla habent essentialiter.

tialiter significare, quod significant: & ex significatione pendet etiam, quod sint vera, aut falsa; essentialiter vera, aut essentialiter falsa conditionatè sub conditione, quod significant illud, quod significant, concedo antecedens: & similiter distincta probatione, nego consequentiam.

36. Explicatur: quemadmodum vocalis hæc propositio *Existit Deus*, utpotè una ex creaturis, essentialiter connectitur cum Deo, & consequenter cum sua veritate, & consequenter est essentialiter vera; non quidem absolute, sed tantum conditionatè ex suppositione: nimirum, quod significet affirmativè existentiam Dei, quæ tamen suppositio est ei accidentalis, quia non ex sua essentia, sed ex hominum placito significat existentiam Dei: unde ista eadem propositio vocalis potuit esse essentialiter falsa, si nimirum homines instituissent voces illas, ut potuerunt ad negandum existentiam Dei, & potuit esse contingenter vera, si homines instituissent illas voces ad affirmandum solum splendere in nostro Emispherio (idem, ac eodem modo dic de principiis evidentibus vocalibus, sive ore prolati): item quemadmodum vocalis hæc propositio: *Non est Deus*, est essentialiter falsa non quidem absolute, sed ex suppositione quod sit negativa Dei, quæ suppositio est ipsi accidentalis: unde hæc eadem vocalis propositio *Non est Deus*, potuit esse essentialiter vera, si nimirum homines instituissent illas voces ad significandum affirmativè existentiam Dei, ut potuerunt instituisse: quemadmodum inquam, res ita evenit in propositionibus vocalibus.

37. Ita hoc mentale iudicium *Deus existit*, est essentialiter verum, & hoc alterum *Deus non existit*, est essentialiter falsum ex suppositione, quod primum significet affirmativè, & secundum negativè existentiam, hæc autem suppositio est accidentalis eis vocibus, & verbis intellectualibus; hæc debent significare idem, quod verba externa, per quæ manifestantur aliis, ne contingat, quod unum dicat intellectus intra se, & aliud proferat lingua: cumque verba utraque externa potuerint permutasse significationem, quam certe ex mero usu, & institutione hominum habent, inde est, quod etiam voces illæ, & verba interna intellectualia potuerunt permutasse significationem; ergo quod una significant affirmativè, & altera negativè existentiam Dei, est illis accidentale. Idem dico de principiis evidentibus v.g. *quodlibet est*, *vel non est* &c. sunt utique essentialiter vera ex suppositione, quod significant id ipsum, quod modo significant; sed hæc suppositio est ipsis accidentalis; unde sicut hæc vocalis propositio *bituria* sunt

sunt sex, quodlibet est, vel non est, & similis quævis potuit esse falsa, imò necessario falsa, si voces illæ fuissent per homines institutæ ad aliud significandum; ita propositio mentalis ipsi correspondens quod ad modum tendendi, sed sonandi mentaliter.

38. Quod attinet ad mentales propositiones de Fide, ut *Verbum caro factum est*, & reliquas omnes, unum est extra controversiam, nimirum quod absolute loquendo omnes illæ sunt essentialiter veræ, & infallibiles, sicut etiam sunt propositiones vocales illis respondentibus, & quibus confitemur, ac protestamur ore quod corde credimus; *corde enim creditur ad iustitiam; ore autem confessio fit ad salutem*, juxta Apostolum. Cæterum quod hæc infallibilitas, seu essentialis determinatio ad veritatem (de qua infallibilitate ambigere non licet) identificetur adæquate cum solo actu interno specificativè sumpto, ita ut in omni casu possibili, in quo intellectus habeat dictum iudicium, illud sit actus Fidei; est quid merè speculativum, & non videatur verum: nam certè casu quo Verbum non incarnasset, ut potuit; vel Deus incarnationem non revelasset, ut etiam potuit; poterat intellectus concipere hoc iudicium, *Verbum caro factum est*: & certè tunc non esset actus Fidei Divinæ.

39. Igitur quemadmodum prædictum iudicium, si vocale sit, non habet per solam suam essentiam esse verum, aut pendere ab habitu Fidei, aut inniti revelationi Dei; sed solum connectitur cum his *conditionatè* sub conditione, quod voces illæ ex hominum placito significant id, quod est Incarnatio Verbi, & non aliud diversum: ita iudicium dictum, *Verbum caro factum est*, non habet per solam suam essentiam esse verum, certum, infallibile, aut pendere ex habitu Fidei, aut inniti revelationi Dei; sed tantum est connexum cum his omnibus *conditionatè* sub conditione, quod significet mentaliter Incarnationem Verbi, & non aliud diversum (& in hoc sensu intelligenda sunt quæ de infallibilitate actuum Fidei docet Theologia); eumque illa conditio sit ipsi accidentaliter, atque variabilis juxta variationem significationis verborum externorum, quibus respondere debent significationes verborum internorum intellectus; idcirco iudicium illud secundum se præcisè inspectum non habet ullum ex inuper insinuatibus capitibus infallibilitatis: unde fit, quod sicut iudicia vocalia secundum se inspecta, æqualia sunt capacitate veritatis, ac falsitatis, subeunt unam, vel alteram contingenter, aut necessario conditionatè sub conditione, quod ex placito hominum significant unum, & non aliud: ita iudicia inter-

na, quorum unum absolute, ac simpliciter est Fidei, & alterum absolute, ac simpliciter est haereticum; ubi ne confundas, ut jam innotuimus, *medicare rem*, & *iudicare per iudicium talis determinatae tendentiae*; illud potest esse absolute infallibile; hoc potest esse absolute falsum.

40. Obijcies 2. Amor, (& similiter de reliquis actibus voluntatis) habet per solam suam essentiam esse amorem illius objecti, cuius est amor; ergo cognitiones habent quoque ex sola sua essentia esse cognitiones illorum objectorum, quorum sunt cognitiones: ergo consequentiam: cognitiones namque cum sint expressiones, seu significationes, seu verba, quibus intellectus loquitur intra se illud idem quod ore loquimur ad extra, oportet, quod habeant tendentiam, sive sonum internum consentaneum externo sonui, & significationi verborum, quibus manifestantur; aliis intercedet mendacium, vel disparata expressio in nostris omnibus locutionibus; ergo si mutatur significatio verborum exteriorum retinentium eundem sonum, seu tendentiam vocalem, oportet, quod mutetur significatio verborum interiorum, hoc est, cognitionum retinentium eundem sonum, sive tendentiam mentalem: actus vero voluntatis non sunt expressiones, aut imagines, aut significationes suorum objectorum, (aliis forent capaces veritatis, ac falsitatis formalis, quod esset confundere actus voluntatis cum actibus intellectus) sed sunt inclinatio, seu aversio, prosecutio, seu fuga respectu illorum; ergo non est necesse, quod habeant tendentiam, aut significationem consonam tendentiae, aut significationi verborum; ergo est dispar ratio inter actus intellectus, & actus voluntatis quoad rem praesentem.

41. Verum est, quod actus voluntatis solemus explicare eodem verborum sonu, quo enunciationes mentales, & vocales: dicere enim solemus: *Volo A. quia est bonum*, *Nolo B. quia est malum*; sed hoc facimus 1. ut mutuo intelligamur; 2. quando reflexe affirmamus, aut explicamus mente nostros actus voluntatis, sed non quia actus ipsi voluntatis formaliter in se ipsis habeant ejusmodi sonum, sive tendentiam, sive expressionem; aliis formaliter in se ipsis forent affirmationes, aut negationes non minus quam actus intellectus, & non minus veri, aut falsi formaliter, quocirca auptera volitio esset formaliter vera quando A. esset bonum, & formaliter falsa quando A. non esset bonum, quandoquidem non minus quam actus intellectus enunciatet A. esse bonum. Hinc fit, quod si haec vox, *Petrus*, instituta esset, ut potuit, ad significandum Deum, & haec

vox, *Deus*, ad significandum Petrum, ut etiam potuit institui, tunc cognitio, quam haberemus circa Deum, esset hæc, *Petrus est amabilis super omnia*, & amor Petri tunc, idest objecti significati per eam cognitionem, *Petrus*, esset amor Dei, & è converso.

42. Explicatur. Esto hominem, qui tunc vocatur *Petrus*, vocatum fuisse Joannem; tunc amor Petri esset amor Joannis; non quia amor, qui nunc esset Petri, mutaret objectum; sed quia amor debet esse filius objecti, quod proponitur per cognitionem præviam: cumque cognitio tunc propria amori personæ illius esset hæc, *Joannes*, sicut modò est hæc *Petrus*, ideo amor ille tunc esset Joannis, non autem Petri, idest, esset amor objecti significati per illam cognitionem *Joannes*, non verò per hanc *Petrus*, quod tamen objectum est unum, & idem. Hoc dicimus in præsentī: & ratio est amor, odium, volitio, nolitio, complacentia, displicentia, & reliqui affectus voluntatis dumtaxat habent ex sua essentia esse amorem v.g. illius objecti, quod animæ obversatur per cognitionem præviam: at siue cognitio hæc prævia habeat hunc mentalem sonum, hanc tendentiam, siue expressionem *Deus*, siue hanc *Petrus*, eò quod mutata fuerit significatio vocum, & consequenter significatio cognitionum subsistit, quod objectum est idem: quoniam mutatio non stat in objectis, sed in significatione vocali, ac mentali eorundem: ergo amor v.g. erit semper objecti ejusdem, siue prævia cognitio habeat unum modum tendendi siue alium. Hoc autem non contingit cognitionibus collatis cum verbis externis, nam illæ habent eundem modum tendendi, sonandi, sed exprimendi, quem habent externa verba: & solum est differentia, quod illæ sunt actus spirituales; hæ verò materiales, ac externæ.

43. Ut cætera solvas, adverte. 1. Dicimus verba intellectuاليا, idest cognitiones, quas habemus in hac vita significare ad placitum hominum; non quidem immediate ac directe, sed mediate ac indirecte, quatenus naturaliter significant iuxta significationem vocum externarum, quæ substituuntur pro illis, & per quas illæ manifestantur: cumque harum vocum significatio pendeat ex placito, usuque hominum, ideo mediate, ac indirecte pendet ex placito eodem significatio vocum, & verborum interiorum, idest cognitionum. 2. Cum animæ separatæ à corporibus, & Angeli, & longe melius Deus ipse, non forment suas cognitiones dependenter à signis externis ingredientibus per organa corporis, quod non habent, id circo necesse non est, quod illæ cognitiones habeant eundem modum tendendi, sed mentaliter

liter sonandi, quem habent illa signa externa, quæ significant ad placitum; ergo non est necesse, quod mutata tendentia, sive significatione horum signorum mutetur aut mentalis sonus, aut significatio illarum cognitionum; ergo ratio cui institimus dicentes cognitiones, quas modo habemus posse mutare significationem suorum objectorum, nequit inservire probando idem de cognitionibus, quas habent animæ separatae, Angeli, ac Deus. 3. Casu quo homo esset cæcus, surdus, omnibusque sensibus externis captus, ita ut per nullum illaberetur animæ illi signum ullum objectorum cognoscendorum, nescimus quas cognitiones formaret, & an Deus illi succurreret sicut animæ separatae in ordine ad cognitiones formandas, nam anima illa vere esset quasi separata à corpore in ordine ad cognoscendum, quando quidem ponitur nullum suscepturam subsidium ab organo corporis.

44. Adverte 4. Si inter duos privatim conveniret, quod hæc vox *Non* significaret affirmationem, verum est, quod unus ex illis audiens illam vocem non formaret iudicium huius tendentiæ, sive soni mentalis *Non est*, sed potius contradictorium: hoc autem nasceretur ex privata illa conventionione, cui quoad illas duas personas cederet generale hominum placitum: locutio quippe illa staret in complexo ex illa voce, & conventionione illa privata, unde tunc dicere *Non* esset revera dicere *est*: in casu autem, quem produximus probaturi conclusionem, non esset privata, sed generalis hominum voluntas; quod illæ voces *paries est albus*, significarent hominem esse animal, & quod hæc alteræ *homo est animal*, significarent parietem esse album. 5. Verum est, quod actuale, absolutum, formale, ac immediatum exercitium significandi rem A v. g., per solam suam essentiam habet illam significare, ne abeamus in infinitum: cæterum sicut actuale formale, ac immediatum, & absolutum exercitium significandi *verbaliter* Petrum non est hæc sola vox *Petrus*, quia hæc potuit institui ad significandum verbaliter papyrum, vel Deum, vel aliud quidpiam; sed est complexum ex hac voce, & voluntate efficace hominum de eo, quod illa vox significet verbaliter Petrum; ita exercitium actuale absolutum, formale, & immediatum significandi *mentaliter* eundem Petrum v. g. non stat adequate in sola hac cognitione sic tendente *Petrus*; nam certè aliam habebit tendentiam, sed mentalem sonum cognitio circa eandem personam, quam formabunt homines assueti alius idiomatis, in quo vox alia valde diversa significet Petrum: stat igitur prædictum exercitium in complexo ex illa cognitione, & ex significatione, ac tendentia illorum verborum, quorum significationi,

ac so-



ac sano externo aptantur nostræ cognitiones: sed complexum non identificatur adæquate cum nostrâ cognitione, ut patet; ergo prædictum exercitium non identificatur adæquate cum nostris cognitionibus. Pleraque argumenta contraria retorquenda, & explicanda sunt per ipsa verba externa, quorum significatio sine dubio est ad placitum hominum, & consequenter est mutabilis, si non consequenter ad institutionem; at saltem antecederet.

45. Adverte 6. Hucusque diximus non esse essenziale actibus intellectus, quos in hac vita ordinariè habemus significare objectum, quod hic, & nunc significant, quod vero attinet ad alias eorundem proprietates, oportet distinguere inter illas, quæ nec directe, nec indirecte, nec immediate, nec mediate pendent ex hominum voluntate, atque illas, quæ mediate saltem, ac indirecte pendent ex illa: primæ dicendæ sunt essentielles actibus intellectus; secus secundæ. Explicatur hoc sicut reliqua exemplo verborum, & vocum exteriorum, quibus respondent verba, seu voces interiores prolata ab intellectu, tamen si pendeat ex hominum placito, quod verba hæc, seu voces exteriores *Homo est*. *Homo non est*, sint affirmationes, aut negationes, sint assensus, aut dissensus externi, eo quod potuerint instituere vocem *est* ad negandum, & vocem *non est* ad affirmandum; item quamvis ex eorundem placito pendeat proferre, ac non proferre tales, aut tales voces, verum tamen quod vox sit vox, quod acuta sit acuta, quod gravis sit gravis, non pendet ex humano arbitrio, sed est essentielle voci, quæ semel profertur, quæ semel est acuta &c.

46. Similiter de vocibus, seu verbis mentis, quæ sunt cognitiones nostræ. Quod hæc interna judicia *Homo est*. *Homo non est*, sint affirmationes, aut negationes, sint assensus, aut dissensus intellectuales, sint approbatio, aut reprobatio mentalis, & reliqua, quæ hinc sequuntur, pendet mediate, atque indirecte ex hominum placito, unde non est illis adæquate intrinsecum, & essenziale: si enim voces externæ *homo est*, institutæ fuissent ad negandum, iudicium internum similiter tendens, ac ipsis correspondens, non esset affirmatio, aut assensus, sed negatio, & dissensus, & non significaretur (extrinsece utique) a veritate sui objecti, sed a falsitate, & hanc non verò illam haberet ut objectum formale, quia actus intellectus inspicere secundum solâ suam entitatem non habent essentialiter respicere unum objectum formale, quam aliud, sicut neque voces exteriores; sed solùm reduplicative ut affirmationes, aut negationes, ac ex suppositione, quod affirmationes v. g. sign. Idem respective dici.

dicimus, si voces illæ, *homo non est*, institutæ fuissent ad affirmandum, quoniam tunc etiam iudicium internum ipsis respondens, esset hoc similiter sonans, *homo non est*, & hoc iudicium foret affirmatio intellectualis, assensus, & approbatio mentalis sui objecti; quocirca licet de facto iudicium hoc sit negativum, ed quia habeat negationem præpositam copulæ, & omne tale iudicium est negativum iuxta præsentem institutionem hominum; hoc tamen non est illi essentialis inspecto secundum solam suam entitatem, & pro omni casu possibili; ubi facillimam equivocationem cave; cum enim ex una parte loquatur utentes vocibus, in significatione, quam de facto habent, & cuius assueti sumus ab infantia; & ex alia pronunciemus de ipsis, atque de cognitionibus, quæ ipsis respondet contrariam significationem, quâ donari potuissent ab hominibus in alia providentia, facilem ingressum habebunt parallogismi, ac equivocationis, ut frequenter distinguas inter id, quod de facto contingit, & id quod semper ac necessarid in omni possibili providentia contingere debet, ed quod sit essentialis vocibus externis, atque interhis.

47.^{ma} Cæterum quod prædicta iudicia sint actus intellectus, sint actus spirituales, vitales, clari, obscuri, intuitivi, abstractivi, & similia, est ipsis respectivè penitus intrinsecum, & essentialis, & nullo prorsus modo pendens ex hominum placito, supposito, quod semel concipiantur ab intellectu, ut modò supponimus ex Philosophia Animastica: quod autem sint determinati, aut disjunctivi, conditionales, aut absoluti, aut modales, universales, aut particulares, aut singulares, aut contrarii, aut contradictorii, aut equipollentes, pendet quoque mediatè, ac indirectè ex hominum placito, ut fateri debemus de iudiciis externis, & vocalibus habentibus respectivè has proprietates; si enim notam illam disjunctionis vel instituissent homines ut potuerunt, ad significandum hypothesim, & vocem illam *si*, quæ est character conditionalitatis instituissent ad significandum disjunctivum, & signum illud, *omnis*, ad significandum unum tantum, & pronomen illud, *Hic*, ad significandum cuncta: in his casibus possibilibus sine dubio hæc propositio vocalis, seu mentalis, *Petrus existit, vel non existit*, esset conditionalis: & hæc vocalis, seu mentalis, *si Petrus existit est bonus*, esset disjunctiva: & hæc, *omnis homo currit*, esset singularis &c. modus tendendi per *vel*, per *si* &c. esset idem quoad entitatem, hoc est, perseveraret idem *vel*, idem *si*: cæterum illud *vel* intellectuale esset quod modò est ac significet *si* intellectuale.

§. III.

48. **E**X hucusque dictis inferuntur quatuor. 1. Sicut non omnis externa vox est relatio transcendentalis sui ipsius ad objectum, quod de facto significat: quia hæc eadem vox, *chimæra*, potuit institui ad significandum hominem, & hæc eadem, *homo*, ad significandum chimæram; unde fit, quod neque illa habet per suam solam essentiam, quod semper suum objectum sit impossibile; neque hæc habet per solam suam essentiam, quod semper suum objectum sit homo, in quo staret relatio transcendentalis ad suum objectum: ita propter eandem rationem descendentem ex hætenus dictis, non omnis cognitio humana ex istis ordinariis, quæ utique est verbum, seu vox interna prolata per intellectum, est relatio transcendentalis sui ipsius ad objectum, quod de facto habet; quia hæc cognitio, seu intellectualis vox, *chimæra*, significaret hominem casu, quo vox externa illum significaret externè: & hæc mentalis vox, *homo*, significaret mentaliter chimæram, casu, quo externa vox, *homo*, externè significaret chimæram; ergo neutra habet per solam suammet essentiam, quod semper sit objectum suum id quod est de facto; sed in hoc stat, quod non sit relatio transcendentalis sui ad objectum, quod habet de facto; ergo.

49. Secundum: quemadmodum non est absurdum quod dentur voces seu verba externa nil significantia: v.g. *Biliri scindapsus*, & quæ fingi possint ab otiosis; ita absurdum non est quod otiosæ ac frivolæ dentur cognitiones nullum habentes objectum, v.g. hujus ejusdem tendentiæ *Biliri*, cognitio, seu vox intellectualis, hujus ejusdem soni *scindapsus* verbum internum sive cognitio: intellectus quippe non minus quam, potentia locutiva est capax prorumpendi mentaliter in voces, seu verba seu sonos, seu tendentias frivolas, otiosas, aut nugatorias, unde si quæsieris, quid cognoscit intellectus per talem cognitionem? Reponemus: quid dicit per hanc vocem *Biliri*? quid per hanc *scindapsus*? nil dicit hic, & nil cognoscit ibi, quia utrobique oriatur utraque potentia, nempe locutiva, & cognoscitiva, si dixeris, omnis cognitio alicujus rei debet esse cognitio, quia est imago, seu representatio sui objecti, & possessio ejusdem, & addideris multa, quæ vulgo jactantur de cognitionibus; in primis sicut hæc sunt falsa de vocibus, ac verbis externis, ita falsa sunt si dicantur in sensu prorsus universali, & nullam penitus patiente exceptionem de verbis, sive voci-

vocibus intellectualibus: nam certe quæ respondent quoad sonum, atque modum tendendi illis vocibus externis non significativis, nullius rei sunt significativæ: cognitio sic tendens *Bliri*, cognitio sic sonans mentaliter *scindapsus* cuius rei sunt imago, representatio, seu possessio? deinde ista omnia quæ vulgò jactantur, & merito de cognitionibus, sunt vera de cognitionibus rationabiliter habitis ac juxta communem usum hominum; non verò de omni prorsus cognitione etiam fatua, otiosa, & quæ sit merum exercitium potentiae cognoscitivæ. Profecto quæcumque hic obieceris retorquentur facile in exercitiis potentiae locutivæ, quæ nil penitus significant.

50. Tertium, quod inferitur est resolutio famosæ illius quæstionis, an scilicet propositio possit transire de vera in falsam, & vice versa, id est, an hæc propositio, vg. *Petrus nunc vivit* prolata hodie quando Petrus vivit, & durans usque ad crastinam diem inclusivè possit cras esse falsa. Cardinalis ratio Authorum negantium possibilitatem hujus transitus est, quod dicta propositio mentalis semper debet significare mentaliter id quod semel significat, eo quia essentiale est omni actui intellectus significare, quod semel significavit: cumque illud *nunc vivit* non significet diem crastinam, sed hodiernam, ideo propositio illa fiduret usque ad diem crastinam, cras etiam significabit Petrum vivere hodie: sed hoc est verum, tametsi cras moriatur Petrus; ergo cras etiam erit vera hæc propositio *Petrus nunc vivit*, tametsi cras moriatur Petrus.

51. Hic tamen discursus non valet, nisi supposito, esse actibus intellectus essentiale repræsentare, ac significare quod semel significant: quod si suppositum hoc falsum sit, poterit propositio mentalis transire absolute de vera in falsam: cumque hætenus haud improbabiler dixerimus suppositum illud esse falsum, id circo haud improbabile est propositionem mentalem posse transire de vera in falsam, & vice versa. Igitur cum voces, & verba & internæ locutiones intellectus debeant correspondere quo ad modum tendendi, & quo ad rem significatam, vocibus & verbis externis, ne contingat quod potentia locutiva dicat unum, & potentia intellectiva dicat aliud: cumque illæ voces externæ *nunc vivit* prolatae hodie significant, ex hominum usu, ac institutione diem hodiernam, sonantes vero cras significant diem crastinam, idcirco mentalis vox intellectus seu verbum mentis correspondens illis vocibus hodiernis significat etiam diem hodiernam, & correspondens illis vocibus sonantibus cras significat diem crastinam: ergo mentalis ea propositio *Petrus nunc vivit* durans usque

ad crastinam diem, significaret cras Petrum tunc, id est cras, vivere; sed fieri potest quod cras jam non vivat, sed moriatur ergo fieri potest quod hæc propositio hodie vera, cras sit falsa: ergo non solum propositio vocalis, sed etiam mentalis, & quidem propter rationem eandem, transeat de vera in falsam, aut vice versa.

§2. Quartum, quod infertur est lux aliqua, donec res magis explicetur in Philosophia animastica, circa modum, quo cognoscimus apprehendentes, & discurrentes in hoc misero statu mortali. Duplicem modum cognoscendi habemus: unum *purè imaginativum* oriundum ex phantasia, qui sane est vastus, materialis, incultus & quasi terreus scilicet (& nonnunquam multo minor) quem habent multa bruta: elephas enim, simia, vulpes, & canis videntur timere, dubitare suspicari tendere insidias, & mira quedam facere, quorum nulum est rationis sed phantasie opus, quo phantasia, sive imaginatio quo vividior fuerit, eo sagacior facit illa bruta; hoc modo cognoscendi fruuntur pueri ante usum rationis, & phrenetici, & stolidi, & ebrii, & nos omnes inter dormiendum: somniamur quippe, cognoscimus, amamus, dolemus, appetimus, resistimus, volumus dormientes; sed hæc omnia proficiscuntur ex phantasia sola plerumque, & hac de causa non sunt actus rationales, sed affines actibus brutorum, quæ organis phantasie melius dispositis fruuntur.

§3. Alterum *verè rationalem*, quamvis redolentem semper miseriam incarceratæ animæ; hic nascitur immediatè ex intellectu quando expeditus, & compos sui est; & hoc fruuntur animæ separatæ à corporibus: hic modus cognoscendi purus, rationalis, atque spirituales pendens quidem in nobis à corpore, & à phantasia, sed in se ipso distinctus ab omni fece materiæ, est multiplex: interdum enim cognoscimus quasi attoniti neque affirmantes, neque negantes, nec adhuc dubitantes, sed quasi ore aperto contemplantes aliquid, & ibi hærentes; & vocatur *simplex apprehensio*; interdum conferimus, combinamus, comparamus mente unum cum alio; explorandi ergo convenientiam necne invicem; & hæc vocatur *comparatio simplex*: interdum proferimus mente sententiam pro, vel contra eorundem convenientiam, vel disconvenientiam; & vocatur *judicium*: interdum hæremus suspensi, non audentes pronunciare sententiam eo quia pro neutra parte detegimus fundamentum sufficiens; & vocatur *dubium negativum*: interdum hæremus, quia pro utraque parteprehendimus æqualia fundamenta; & vocatur *dubium positivum*: interdum denique ex uno colligimus, seu inferimus aliud; & vocatur

catur *discursus*: quod totum explicari potest exemplo Fabri mechanici assumentis ligna, lapides, ferra &c. comparantis unum cum alio, & æstimantis convenient nec ne, repellentis una, conjungentis alia, & super illa ædificantis.

54. Igitur quemadmodum per potentiam locutivam compingimus nostra reciproca colloquia ex variis discursibus, & hos ex variis propositionibus vocalibus modò affirmativis, modò negativis; & has ex variis vocabulis jam repudiantes una ut inepta, vel minùs apta, jam eligentes alia ut magis idonea, juxta significationem, quam habent ex hominum institutione: ita quando per potentiam intellectivam ratiocinamur nobiscum ad intra, compingimus totam nostram meditationem, & internum colloquium variis discursibus, & hos ex variis judiciis, & hæc ex variis apprehensionibus, quæ sunt quasi vocabula, voces, & verba intellectus, quandoque repudiantes unas cognitiones (non quidem signatè, ac reflexè semper, sed vel signatè, vel exercitè) ut ineptas ad rem præsentem, quandoque indagantes alias ut idoneas, juxta proportionem, quam in sua significatione, atque modo tendendi intellectualem habent cum significatione, atque modo tendendi materiali vocum: cumque hæc vocum significatio potuerit mutari, & consequenter non sit essentialis ipsis vocibus, idèò significatio quoque earum vocum intellectualium, quibus nostros intellectuales discursus fabricamus, potuit etiam mutari; ergo non est illis essentialis.

55. Sic meditantes, & taciti apud nos ratiocinantes circa Mysterium Incarnationis v. g. utimur his cognitionibus ad formandum nostros discursus: *Verbi Personalitas, Natura Divina, Humanitas, Unio*; non verò his: *Apogæum, Perigæum, Iupiter, Satelles primus, Satelles secundus*; nempe quia illæ primæ cognitiones, factis hæc secundæ respondent huic externæ propositioni: *Verbum caro factum est*; quodd si vocum earundem significatio fuisset mutata, & hæc vox *Apogæum* significaret Unionem, & hoc *Iupiter* significaret Verbum, ut potuit contingere: tunc meditantes apud nos, & discurrentes purè intellectualiter circa Mysterium Incarnationis, uteremur his cognitionibus, *Apogæum, Iupiter &c.* & non illis, *Verbum, Unio*; quia tunc primæ essent pertinentes, & hæc secundæ impertinentes, non minùs, quàm de facto sunt impertinentes illæ primæ: est itaque intimum, & essentialè propositionibus vocalibus, non minùs, quàm mentalibus consistere eis terminis, quibus constant, unde vocalis hæc propositio, *Petrus movetur*, non esset eadem,

dem, si in loco illius vocis, *Petrus*, sufficeretur hæc alia, *saxum*; est verò contingens, & accidentale propositionibus mentalibus (nempe his vulgaribus, quas ordinariè habemus, ut monui) non minùs, quàm vocalibus quòd habeant cum sensum, significationem, ac objectum, quod modò habent; quia hæc omnia mutarentur mutato sensu, significatione, ac objecto propositionum vocalium, quibus respondent, quamvis non mutarentur entitates ipsæ cognitionum, sicut nec mutarentur entitates ipsæ vocum.

56. His non obstantibus, quæ in toto hoc capite diximus, cùm opinio contraria docens conceptus formales, id est, cognitiones habere per solam suammet essentiam significare id, quod significant, & non significare id, quod non significant, sit longè frequentior; hæc de causa multoties loquemur, præsertim Disp. III. juxta illam, supponentes illam veram esse; & hæc etiam de causa non diximus supra, rem hanc esse veram; sed non esse prorsùs improbabilem.

C A P U T III.

Quid sit Propositio Vocalis, id est, Humana Locutio:

57. **N**ON suscipimus explicandam locutionem Divinam, quæ vocatur *ad intra*, nempe quæ æternus Pater loquitur ad Filium; *Dixit Dominus Domino meo, sede à dextris meis*: item: *Dominus dixit ad me, Filius meus es tu*: & quæ ad Spiritum Sanctum, de quo inquit Christus Dominus: *Quicumque audiet, loquetur*; ad Theologos enim spectat hæc explicare: nec locutionem, quæ Deus loquitur ad extra cum hominibus in secreta cordis schola: *Ducam eam ad solitudinem, & loquar ad cor ejus*: nec locutionem Angelicam, quia Angeli etiam mutuò colloquuntur, ut constat ex Paulo: *Si linguis hominum loquar, & Angelorum*; nec non ex Zacharia, qui audivit unum Angelum dicentem alteri: *Curre, loquere ad puerum istum*: nec demùm propositionem humanam, quæ non sit locutio, eò quia proferatur ab homine absque omni advertentia: solum igitur disputamus modò propositionem vocalem, quæ externè aliquid affirmamus, aut negamus verbis, aut aliis consuetis signis: & quæ mereatur nomen humanæ locutionis.

58. Locutio igitur humana, est, ut diximus Cap. I. *Productio signi manifestativi rei ex rationali intentione directæ, & absoluta, ut alius judicet, seu credat rem illam, vel aliam*; in primis est *Productio*,

ctio, quia loqui est actus vitalis; non enim loquuntur saxa, vel cadavera præcisè ut talia; de ratione autem actus ut talis, præsertim creati est, quod sit actio, seu productio: & quanquam silentio ipso interdum loquamur, idè est, quia voluntatem habemus illius silentii in illis circumstantiis, quo silentio significare volumus aliquid, ut solet evenire in contractu matrimoniali; ergo semper intervenit productio aliqua. Debet insuper esse *signi manifestativi rei*; quia humana locutio sufficitur in locum internarum nostrarum cogitationum, ad manifestandum aliis rem aliquam; manifestandum inquam, vel *quoad efficaciam*, si res illa nesciebatur: : vel saltem *quoad sufficientiam*, quatenus locutio ex se apta nata est ad manifestandum rem illam; etenim secreta nostri cordis neque Angeli ipsi certò penetrant nisi Deus revelet, quia scriptum est: *Tu nosti solus cor omnium filiorum hominum*; ergo ad hoc ut Angeli, & multò meliùs alii homines noscant, quæ nos taciti cogitamus, opus est signo aliquo manifestativo illius rei.

§ Reg. 4. 3

59. Dicitur *ex rationali intentione*; non quia intentio illa sit semper præcedens, sed quia debet nasci ex potentia rationali; alijs cum bruta non rarò edant signa manifestativa suæ mœstitiæ, vel alacritatis, dici possent *loqui*: absit, quia non operantur ex cognitione ulla rationali adhuc imperfecta, ex qua operantur homines, quando propriè, ac simpliciter loquuntur; sed operantur ex actu phantasie simili eis, quos inter dormiendum habemus plerumque: Ebrii autem, Infantes, Amentes, & similes, licet non habeant intentionem, quæ sit actus rationis plenus, aut semiplenus quantum sufficit ad peccandum; loquuntur tamen, quia edunt signa significativa rerum ex intentione utcumque rationali; non enim consistit hoc in indivisibili; quod si hæ Personæ nulla prorsus fungantur operatione rationis, non possunt dici loqui, sed voces illas edere ex consuetudine instar brutorum: dicitur *directa*, & *absoluta* propter exceptionem datam Cap. I. num. 25.

60. Denique *Intentio debet esse ut alius judicet, seu credat rem illam*. Ob hanc rationem non mentiuntur Poetæ Catholici, licet ex intentione ut alii intelligant, seu sciant tales, & tales fabulas concinnent versus significantes illas; quia non loquuntur, sed materialiter recitant fabulas; non enim habent intentionem, ut alii intelligant res illas ut veras, sed dumtaxat habent intentionem lenocinandi auribus, & placendi ingenio; ergo castigatè loquendo illi pronunciant quidem, sed non loquuntur res illas contra mentem, & consequenter non mentiuntur.

61. Hinc 1. qui consulit suum Confessarium, & ipsi aperit hæresim, in quam incidit, loquitur ei purè materialiter hæresim suam, hoc est, loquitur res illas non ex intentione ut Confessarius judicet res illas esse veras; sed esse verum, se judicare res illas veras esse; unde in ea consultatione, quam rationabiliter adhibet ut instruat, non committit novam hæresim formalem externam. 2. Quando aliqui colloquuntur, & supervenit Excommunicatus non toleratus, quo cum loqui non licet, non tenentur silere, aut abire; quoniam aliud est loqui *coram*, aliud *cum* illo Excommunicato; illud non est prohibitum, sed hoc: atqui homines illi non loquuntur *cum* Excommunicato; nam licet proferant verba indicantia illi talem rem, possunt non proferre illa *ex intentione* ut ille talem rem judicet; & hoc erat necessarium, ut dici possent loqui cum illo; ergo possunt non loqui *cum* illo; tametsi loquantur *coram* illo, immò tametsi revelent illa, seu materialiter doceant illum, ut verè tunc contingeret; quoniam si aliunde urgeret obligatio rem illam celandi ei Excommunicato, non possent *coram* illo invicem colloqui rem illam.

62. Hinc 3. Militaria stratagemmata interdum sunt mendacium, interdum non: vel enim qui fugam simulant, faciunt actionem illam ex intentione absoluta, & directà de eo quod *hostes putent* se impares esse resistendo, & verè atque ex animo fugere: vel ex intentione de eo, quod aliunde ob propriam inadvertentiam hostes decepti *se infectentur*, & sic incident in rete; si primum est mendacium ob rationem datam supra: si secundum non mentiuntur neque positivè, ac directè decipiunt hostes, sed occasionem eis exhibent, ut illi propria inadvertentia, vel furore correpti decipiantur, & sic incident in insidias. Hinc 4. qui prævicens a nemine se observari, & consequenter non habens ullam intentionem de eo, quod alius intelligat rem A, eam exprimit signo aliquo externo. v. g. verbis, scripture, vel alia quacumque actione determinatè indicante rem illam, verum est, quod illam non loquitur *quoad efficaciam*, siquidem intentionem non habet, quod alius illam judicet, aut intelligat: cæterum illam quatenus est ex parte actionis, quam facit, manifestat, ac loquitur; ergo si res illa fuerit hæresis aliqua, jam committit hæresim externam licet occultam, & loquitur illam *quoad sufficientiam*: sed hoc ipso quod hæresim formalem externam loquatur quoad sufficientiam, incidit in peccatum reservatum; ergo incidit in illud.

63. Hinc demùm licet Deus quando a se, & ex se ut causa specialis producit in homine salutarem cognitionem, verè, & propriè loqua-

loquatur ad cor hominis, quia extra se cōtinet signum nempe illam cognitionem ex intentione, ut homo iudicet talem veritatem, (quæ non eo ipso est de fide absolute, quia non constat sufficienter illam cognitionem esse *vocem Dei*) veruntamen quando ut causa universalis producit alias cognitiones in nobis, non loquitur absolute, & simpliciter per illas; quia ad rationem locutionis non sufficit producere signum manifestativum rei indulgendi ergo concursui causarum creaturarum: sed opus est, quod Deus a se, & ex se ut causa specialis specialitate manifestandi rem illam producat signum manifestativum illius: sed hoc non contingit, quando Deus producit in nobis nostras cognitiones, ut causa universalis, atque ob existentiam causarum creaturarum tunc concurrentium; ergo tunc non loquitur nobiscum.

64. Quod si dixeris Deum cum omnibus loqui in scriptura, & tamen non habere intentionem de eo, quod omnes intelligant omnia, quæ ibi dicuntur, alias non dixisset per *Isaiam* *Liga testimonium, signa legem in Discipulis meis*: neque per Gabrielem Archangelum *Tu autem Daniel claudes sermones, & signa librum*, quibus & aliis textibus docemur nolle Deum, quod omnes intelligant, quæcumque dicuntur in Sacris Scripturis: unde fiet quod non sit de ratione locutionis esse signum *ex intentione*, quod res illa intelligatur, aut credatur. Resp. distinguendo assumptum: cum omnibus loqui in Scriptura, a quibus vult intelligi mediate, aut immediate, est verum (& de his non procedunt textus isti) cum omnibus, a quibus intelligi non vult, est falsum: quia certe non loqueretur tecum ille, qui te audiente diceret aliquid idiomate, quod scit esse tibi penitus ignotum; ergo non loquitur tecum, qui non vult intelligi a te.

Isaia 8.

Dan. 12.

CAPUT IV.

Quid, & quotuplex sit Terminus.

65. **A**ristoteles sic definit illum: *Terminus voco, in quem resolvitur propositio ut prædicatum, & de quo prædicatur*. Fateamur non omne, in quod resolvitur utcumque res esse constitutum intrinsecum, id est partem essentialem ipsius: quoniam non inepte dicitur lignum resolveri in cineres, nec non abire in fumum; & tamen neque cineres, neque fumus sunt constitutiva ligni: rursum non omne constitutivum rei est id, in quod resolvitur res: quoniam omne, quod non perseverat, quando res resolvitur, seu destruitur.

2. Prior. c. 1.

struitur, non est id, in quod resolvitur res: resolvi quippe in aliquid, manifeste dicit perseverantiam hujus alicujus: at aliquando non perseverat, quando res resolvitur, seu destruitur illud, quod erat constitutum ipsius: siquidem omnium brutorum animæ sunt constitutiva eorumdē respectivè: & certe non perseverant, quando bruta moriuntur, quia omnes illæ animæ sunt corruptibiles, & sola rationalis est immortalis, & incorruptibilis; ergo non omne constitutum rei est id, in quod resolvitur res.

66. Cæterum cum voces significant ad placitum non cujuslibet; sed Professorum dumtaxat facultatis, quæ utitur illis vocibus: & Professores scholasticæ facultatis utantur hac voce *Terminus* (sicut etiam his *extremum*; *extremitas*) ad significandum subiectum, & prædicatum propositionum, nec non alia sive adverbia, sive obliqua, quæ utrilibet adjunguntur: hac de causa quidquid sit de speculationibus, in quibus aliqui absorbentur hic, contra illas omnes invaluit usus, & terminus stat juxta scholasticam phrasim in omni illo, quod propositionem constituit sive ut subiectum sive ut prædicatum, sive ut affectio alterutrius, sive etiam copulæ, tametsi hæc non soleat vocari *terminus*.

67. Quocirca dum reflectimus supra hanc propositionem *equus hominis est infallibiliter Creatura Dei*, sine scrupulo dicimus, ille terminus *Equus*, ille terminus *hominis*, ille terminus *infallibiliter* &c. quod si vox nullam adhuc habeat statutam significationem, ut hæc *Blitiri*, *seindapsus* &c. quæ fingi possunt, potest etiam esse terminus, non quidem formalis, idest acceptus pro suo significato (quandoquidem nullum habent significatum) sed materialis, nempe acceptus pro se ipso; quoniam vera est hæc enuntiatio *Blitiri est vox* & falsa hæc *Blitiri est seindapsus*.

68. Jam cum enuntiatio, sive propositio dici solet duplex, nimirum *subjectiva*, idest actus ipse affirmans, vel negans aliquid de aliquo, & *objectiva*, idest res ipsæ affirmatæ, aut negatæ & rursus cum propositio subjectiva possit esse interna, & mentalis, nempe judicium illud quo taciti apud nos judicamus *A. esse B.* aut *A. non esse B.*; & possit esse *externa*, scilicet actus ille, quo manifestamus judicium nostrum internum, & demum cum hæc enuntiatio externa possit fieri verbis, literis, hieroglyphicis, nutibus, & multis aliis signis: cum inquam hæc ita sint, jam vides terminos posse esse objectivos, vel subjectivos, & hos multiplices.

69. Termini objectivi sunt res illæ, quæ affirmantur, vel negan-

gan-

gantur de alio, & vocantur *prædicatum*: item res illæ, de quibus aliquid affirmatur, vel negatur, & vocantur *subiectum*. Rursus cum prædicatum, & similiter subiectum multoties non sit una res simplex, sed composita ex multis: & interdum contingat, quod enunciatur de subiecto complexum resultans ex illis omnibus: interdum unum dumtaxat ex illis: hac de causa prædicatum est duplex (idem dic de subiecto) unum dicitur importari *ut quod* sive in recto: & est illud, cujus identitas cum subiecto affirmatur, aut negatur per propositionem: alterum importari *ut quo*, sive in obliquo: & est illud, cujus identitas cum subiecto non affirmatur, aut negatur; est tamen constitutivum illius cujus rectum enunciatur identificari cum subiecto.

70. V.g. in hac enunciatione *Petrus est homo*, cujus prædicatum est res composita ex corpore, & anima, prædicatum in recto non est solum corpus, non sola anima; sed complexum ex utroque: unde utrumque importatur in recto, sive ut quod, licet inadæquatè, quia Petrus non est corpus solum, non est anima sola, non est corpus habens animam, non est anima unita corpori; sed est quoddam totum coalitum, sive compactum ex corpore, & anima unitis: in hac verò enunciatione *Petrus est albus*, & in cæteris, quæ sunt accidentales, prædicatum ut quod & in recto est res illa, quæ habet albedinem, seu cui albedo est unita: quia identitas hujus rei cum Petro est, quæ affirmatur; albedo autem est prædicatum *ut quo*, sive in obliquo, quia non affirmatur identitas ipsius cum Petro (alias falsa esset affirmatio hæc), est tamen constitutivum essentialiale hujus concreti, sive compositi *Album*, cujus rectum identificatur cum Petro.

71. Has phrases rectum. *Venit in recto*. Obliquum. *Venit in obliquo*, *ut quod*, *ut quo*, bene notas habeas, quia frequentissimè occurrunt, & ex prava ipsarum intelligentia pravæ nascuntur consequentiæ. Putant aliqui rem importari *in obliquo*, sive *ut quo* perinde esse, ac rem esse accessoriam, & extra essentiam: dicunt verum si rem illam conferant cum eo, quod venit in recto, sive ut quod: nam huic multoties est accessoria res quæ venit ut quo, atque in obliquo, & patet in exemplo nupero; siquidem subiecto habenti albedinem, hæc accessoria est, atque extra essentiam: dicunt tamen falsum si rem illam conferant cum concreto ipso sive denominatione albi v.g. quoniam hæc intrinsecè atque essentialiter constituitur per albedinem, & hac de causa diximus illud venire, ut quo, sive in obliquo, quod est constitutivum concreti, sive denominationis, cujus

rectum enunciatur identificari cum subjecto.

72. Hæc intelligenda sunt de recto, & obliquo *in sensu scholastico*: in sensu autem *purè grammatico* non ita contingit: quare dicimus quod in hac propositione *Petrus est creatura Dei*, venit Deus in obliquo ex parte prædicati, quin ullatenus sit constitutivum prædicati: quia venit in obliquo purè grammatico, quatenus vox illa *Dei* non est nominativus, qui solus vocatur a Grammaticis *rectum*, sed est genitivus: quod autem constitutiva obliqua, sed in obliquo verè, ac rigorosè sint constitutiva, scies postea in physica, quando audies materiam, formam, & hujus privationem esse principia intrinseca, hoc est constitutiva essentialia, & non mera connotata entis naturalis in fieri per mutationem: cum enim ens naturale sic inspectum dicat in recto solam mutationem, idest solam generationem formæ, fit quod illa tria sint constitutiva tantum in obliquo: & tamen non dicuntur pura connotata, sed principia intrinseca mutationis. Scies item in Theologia, ubi audies auxilium gratiæ, Omnipotentiam Dei, hujusque applicativum decretum non esse pura connotata extrinseca, sed intima, & essentialia constitutiva nostræ libertatis indifferentiæ ad bene operandum; & tamen sunt constitutiva dumtaxat in obliquo: quia libertas illa dicit in recto, & ut quod solam nostram voluntatem, quippe sola hæc meretur, aut demeretur, obedit, aut resistit auxilio, & sola illa vivit per eam operationem bonam, aut malam.

§. II.

73. **S**ed redeamus ad inceptam divisionem. Termini subjectivi propositionis sunt expressiones, sed ipsius propositionis partes, quibus significamus id, quod enunciatur, & id de quo enunciatur: unde resultat secunda divisio: hæc namque expressiones possunt esse vel pure *mentales* (idest cognitiones ipsæ, quas apud nos formamus de rebus) aut *vocales*, aut *scriptæ*, aut alio quovis modo materiali prolata, ut hæc vocabula *Homo est animal*: ubi adverte: quando dicimus prædicatum affirmari, aut negari de subjecto, loquimur de prædicato, & subjecto *objectivis*, idest de rebus ipsis; non autem de *subjectivis*: quoniam unas expressiones vocales, aut mentales non affirmamus de alteris, sed una objecta affirmamus de alteris: quando enim dicimus *Homo est animal*, non dicimus hanc vocem, sed hanc cognitionem *Homo* esse hanc vocem, sed cognitionem *animal*; sed hominem ipsum ut distinctum a verbis, & cognitionibus

nibus esse animal distinctum quoque a cognitionibus, & vocibus : voces ergo, atque cogitationes sunt subiectum, & prædicatum quo, nam sunt id, quo utimur ad enunciandam unam rem de alia; non autem sunt subiectum, aut prædicatum quod.

75. Tertia divisio. Utrique termini dicti solent esse aut *complexi*, aut *incomplexi*. Terminus complexus est ille, qui componitur ex duobus, v. g. *Homo iustus placet Deo*; illud, *Homo iustus*, est terminus complexus: incomplexus est ille, qui non componitur ex duobus in communi usu, quidquid sit de rigore grammatico, v. g. *Petrus*, & etiam *Respublica*, *Proconsul* &c. qui licet in eo rigore ex duobus componantur; in usu tamen philosophico unus terminus sunt.

76. Quarta divisio. Terminus incomplexus solet esse, attenta sua significatione, aut *simplex*, nempe quando significat rem omnis compositionis expertem, ut hic terminus *Deus*; aut *copulativus*, nempe quando significat rem compositam ex multis, ut hi termini, *Collegium*, *Populus*, *Exercitus*; cumque hæc plurium copulatio possit esse purè moralis, quatenus illa plura habent eundem Principem, ut *Regnum*; vel quatenus profitentur eandem Religionem; ut *Ecclesie*; vel quatenus descendunt ab eadem Persona, ut *Familia*. Item cum ea copulatio possit esse purè localis, quatenus illa plura sint in eodem loco, ut *cætus*; vel terminationis, quatenus ex illis pluribus terminetur ad alterum, ut *visum*, *cognitum*, *amatum*, ubi visio, cognitio, amor suapte natura tendunt in rem, quæ dicitur visa &c. vel unionis physicæ accidentalis, ut album, siquidem albedo physicè unitur, sed accidentaliter subiecto; vel unionis physicæ substantialis, ut homo, cujus anima, & corpus physicè substantialiter uniuntur; cum inquam hæc ita sint, jam vides copiosam segetem terminorum copulativorum.

77. Quinta. Terminus simplex solet esse *abstractus*, nempe qui significat formam, aut quasi formam alicujus complexi, ut *albedo*, quæ est forma physica accidentalis; *anima*, quæ est forma physica substantialis; *rationalitas*, quæ est forma metaphysica, eo quod non distinguatur à subiecto rationali; *universalitas*, quæ est forma logica: aut potest esse *substractus*, nimirum, qui significat rem illam, quæ denominatur respectivè per aliquam ex istis formis; cumque quatuor species formarum numeraverimus, & consequenter quatuor species subiectorum, jam habes, quod terminus abstractus potest esse quadruplex, & similiter terminus substractus.

78. Sexta. Terminus Copulativus alius est *merè connotativus*, alius *concretus*, seu *concretivus*. Primus est, qui directè, ac primariè significat unum; propter specialem verò relationem illius cum alio, significat etiam, seu innuit hoc aliud, quatenus in nobis excitat cognitionem hujus aliud, ut *Pater*, qui terminus excitat cognitionem Filii, ut *Magister*, qui excitat cognitionem Discipuli, ut *Creatura*, qui terminus excitat cognitionem Creatoris. Terminus Concretus est ille, qui apertè magis significat ea duo, sed unum tanquam subjectum, sive substractum, & alterum tanquam formam, seu abstractum; v. g. hic terminus *Homo*, qui significat corpus, & animam, illud tanquam subjectum, hanc tanquam formam: item *album*, ubi significatur corpus tanquam res, quæ denominatur alba: & significatur albedo, tanquam forma, per quam immediate corpus est album; & plerumque sunt id generis nomina adjectiva, quoniam plerumque aut semper significant subjectum, & formam, ut *sanctus*, *sapiens*, *doctus* &c. cùmque concretum sit quadruplex, nimirum physicum ex forma substantiali, vel accidentali, metaphysicum, aut logicum, juxta nuper dictam divisionem abstractorum, & substractorum, habebis terminum concretum esse quadruplicem.

79. Septima. Terminus alius est Singularis, alius Communis. Singularis est, qui unum solum significat, ut *Deus*, & *hic Homo*; tametsi enim de singulis hominibus dicere possimus *hic Homo*, unde videtur, quod sit etiam terminus communis multis; sed hoc provenit ex defectu vocum ita præcisarum, & contractarum, ut nonnisi uni aptari possint; loquimur autem de illo termino, quando propter adjunctas circumstantias non potest significare nisi unum; ubi adverte terminum singularem esse incapacem ut ipsi adjungatur immediate ullum ex eis signis, *omnis*, *nullus*, *aliquis*, aut quodvis aliud multitudinè significans; unde fit, quod nonnisi falsa suppositione dicatur, *omnis Deus*, *nullus Deus*, *aliquis Deus*, *uterque Deus*, *neuter Deus*, *alter Deus*; possunt verò adjungi mediatè, id est, possunt adjungi hæc signa termino alii, de quo prædicetur terminus singularis, vel qui prædicetur de termino singulari; nam verè dicimus: *Omnis Persona Divina est Deus*; item: *Deus est omnis perfectio sua*.

80. Terminus Communis est ille, qui significat multa, & est triplex, nempe *Univocus*, *Æquivocus*, & *Analogus*. Univocus est qui significat rem verè convenientem multis, ita ut in illis multiplicetur (& per hoc differt à termino *Deus*, qui liget significet Deitatem

tatem identificatam cum tribus Personis, non tamen multiplicatur in illis, quia non sunt tres Dii) sed non aperit ipsorum multiplici-
tatem, v. g. hic terminus, *Homo*, qui significat naturam huma-
nam, quæ utique est multiplex, sed attenta illa sola voce non dis-
cernimus sint nec ne multi homines. Terminus Æquivocus est, qui
significat *plura ut plura*; quia cùm sit unus, significat res diversas
diversis convenientes, v. g. hic terminus, *Gallus*, qui cùm sit
unus, significat res valde diversas, nempe hominem cujusdam regio-
nis determinatæ, & etiam Marem Gallinaceum. Terminus analo-
gus est, qui significat plura *partim ut eadem*, id est ut similia, *par-
tim ut diversa*, id est ut dissimilia, v. g. hic terminus, *Canis*, qui
significat Canem terrestrem, & marinum, & quandam Stellam:
hæc inquam significat ut similia in aliquo accidente, sed ut prorsus
dissimilia in essentia: singuli ex his tribus terminis sunt capaces,
sed longè meliùs terminus Univocus, ut ipsis adjungantur illa signa,
omnis, nullus, aliquis.

81. Octava. Terminus Univocus alius est amplus, seu non res-
trictus; alius restrictus, seu non amplus: ille dicitur, qui compa-
ratus cum hoc latius patet, licet comparatus cum alio pateat minùs;
v. g. *Animal*; nam hic terminus latius patet quàm homo, cùm sint
plura animalia, quàm homines; sed minùs quàm vivens; quia pati-
ciora sunt animalia, quàm viventia; vivunt namque arbores etiam.
Terminus Restrictus, seu non amplus est ille, qui comparatus cum
alio minùs extenditur, v. g. hic terminus, *Homo*, est restrictus,
seu non amplus respectu animalis; hinc fit, quòd ab amplo ad suum
non amplum arguitur benè negativè: *Non est animal, ergo non est
homo*; item: *Non est homo, ergo non est homo albus*; sed malè affir-
mative: *Est animal, ergo est homo*: è converso à restricto, seu non
amplo arguitur bene affirmative, sed male negative ad amplum, seu
non restrictum: *Est homo, ergo est animal*; bene: *Non est homo,
ergo non est animal*; male.

82. Nona. Terminus Amplus alius est transcendens, alius
non transcendens; hic non invenitur ubilibet, v. g. *Homo, Animal*,
quia non quodvis, quod est, est homo, seu est animal. Transcen-
dens vocatur ille terminus, qui significat rem omnibus prorsus re-
bus possibilibus convenientem, & est quintuplex significatus barba-
ro illo vocabulo, *Reubau*, cujus unaquæque litera significat unum
terminum omnia prorsus transcendentem, videlicet *res, ens, ve-
rum, bonum, aliquid, unum*; non est assignabile quidquam possi-
bile,

bile, quod non sit *res*, quod non sit *verum* (id est, quod non sit capax ut cognosci possit per veram cognitionem enunciantem illius saltem possibilitatem, id est, quod sit verum veritate condistincta à fictione, & idcirco vocari solita *veritas transcendentalis*) item quod non sit *bonum* (id est, quod non fruatur sua essentia, quidditate, ac natura, tametsi aliàs sit malum, quia est contra conscientiam, ut peccatum; aut contra vitam, ut est mors; aut contra honorem, ut est infamia &c. & hæc bonitas vocatur *purè transcendentalis*) item quod non sit *aliquid*, id est, (quod non habeat aliquam essentiam) & demum quod non sit *unum* aliqua specie unitatis; & hæc est, quæ vocatur *unitas transcendentalis*.

83. Inter terminos transcendentis, & non transcendentis est discrimen, quod illi non possunt infinitari: & possunt hi infinitari; namque terminum est, ut jam diximus, quod propter sibi præpositam negationem transeat ad significandum omnes res, quas prius non significabat; ergo quoties terminus sit talis, ut præposita sibi negatione non significet rem ullam, non infinitatur: & quoties fuerit talis ut præposita sibi negatione significet res multas, potest infinitari: at quoties terminus est transcendens, contingit primum, (quoniam hi termini: *Non res*; *Non ens*; *Non verum* &c. non significant rem ullam; sed ad summum carentias, nihila, & chimæras, quæ omnia non sunt *res*, tametsi loquamur de illis quasi de rebus) & quoties non est transcendens, contingit secundum, quia *non homo* significat quidquid non est homo; sunt autem multæ res, quæ non sunt homo; & sic de aliis: ergo terminus non transcendens potest infinitari, secus terminus transcendens.

2. I I I.

84. **D**ecima. Termini præsertim non transcendentis alii sunt *Pertinentes*, alii *Impertinentes*; hi vocantur qui inepti sunt, ut ex uno inferatur quidquam pro, vel contra alterum, v. g. *album*, *dulce* quia ex neutro horum sequitur alterum, aut alterius exclusio. Pertinentes dicuntur, qui apti sunt ut ex uno arguamus ad alterum, & sunt in duplici differentia; nam interdum ex unis arguimus contra alteros, v. g. calidum summè, & frigidum summè; ex summe namque calido arguimus non esse summè frigidum ob physicam impossibilitatem harum contrariarum intensiōum; & hi vocantur termini pertinentes *repugantiâ*, seu ob mutuam repugnantiam.

85. Ex aliis verò arguimus positivè ad alios, ut homo, & animal; quoniam ex homine bene infertur animal; & hi vocantur pertinentes *sequela*, id est, propter sequelam unius ex altero; cùmque sequela hæc possit esse mutua, ut inter hominem, & animal rationale, quandoquidem ex uno sequitur alterum: & vicissim: & possit esse non mutua, ut inter hominem, & animal, siquidem ex primo sequitur secundum, & non è converso; idcirco termini pertinentes sequela, bini sunt, nimirum sequela reciproca, vel sequela non reciproca.

86. Denique terminus alius est *Cathegorematicus*, nempe qui adhuc quando est solus, habet perfectam significationem, ut hic terminus *homo*; & *syncathegorematicus*, scilicet qui dum solus est, non habet perfectam significationem; illa tamen fruitur si adjungatur alii termino, v. g. *omnis*; *nullus*; *aliquis*, nec non adverbis, ut *sapienter*; *necessariò* &c. item nomina adjectiva; hinc fit, quod multæ propositiones aliæ veræ evadant falsæ, aut vice versa ratione adjuncti syncathegorematis v. g. *homo est albus*, potest esse verum, *homo necessariò est albus*, necessariò est falsum.

87. Ubi accuratissime notanda est horum syncathegorematum *appellatio*, id est unio; sive societas, quam syncathegoremata habent cum terminis propositionis; passim enim contingit, quod idem syncathegorema cadens, seu appellans supra unum terminum faciat propositionem veram, appellans verò, seu cadens supra alium reddat propositionem falsam: cujus ratio est; quoties mutatur sensus propositionis, potest mutari veritas, aut falsitas: sed quoties mutatur appellatio terminorum, mutatur sensus propositionis, ut patet in his *Petrus albus est Monachus*. *Petrus Monachus est albus*; quarum prima significat Petrum esse album, secunda vero esse albas vestes Monachales, quas induit, (quæ significationes sunt valde diversæ) ergo quoties mutatur appellatio terminorum, seu syncathegorematum, potest mutari veritas, aut falsitas propositionis: & cum aliqui ob incertiam, vel ob præcipitantiam, vel ob astutiam soleant clam mutare dictam appellationem, & ex hac mutatione emergant sophismata, hac de causa oportet attente invigilare, ne fiant hæ mutationes appellationum.

88. Interdum ea mutatio ambiguum relinquit propositionem, quia ambiguum dat sensum, quia ambiguum est, supra quem terminum cadat, seu appellet syncathegorema v. g. *Persona Divina omnis est Deus*: Tunc distinguenda est propositio sic v. g. illo *omnis* appellante supra Personam Divinam, concedo, quia vere omnis Persona Divina est

est Deus; illo *omnis* appellante supra Deum, nego, quia unus solus est Deus, unde non potest dici *omnis* Deus,

89. Hinc cum termini in conclusione debeant habere eandem significationem, quam habebant in præmissis, consequens est, quod habeant eandem appellationem: ergo si hæc mutetur, discursus nihil valet, & est tam disparatus, quam hic *est album: ergo est dulce*, aut quam hic, *est album: ergo non est dulce*; ob hanc rationem fallit hic discursus: *illa avis est Mater; illa avis est tua: ergo illa avis est Mater tua*, quia illi termini *Mater*, & *tua* uniti in consequente habent appellationem, & sensum diversum ab eo, quem habebant in præmissis: quoniam *Mater* appellabat supra pullos, & in consequente appellat suprate; *tua* appellabat supra dominium, & in consequente supra tuam generationem: erit autem bonus idem discursus, si in consequente significatur avim illam esse Matrem, *quæ est tua* propter dominium, non propter generationem.

C A P U T V.

Quid, & Quotuplex sit Suppositio Terminorum.

90. **R**es accurate discenda; quoniam ex ignorantia, oblivione, abusu, & confusione suppositionum, quas habent termini seu vocabula, quibus utimur ad nostros discursus depromendos, multa sophismata, & alia incommoda nascuntur: ex Aristotele colligitur suppositionem definiri: *usus si ð acceptio vocis ad aliquid enunciantum*: quando utimur voce ad aliquid enunciantum de ipsa, est suppositio *materialis*, ut quando dicimus; *Homo est commune dum*: & cum grammatica tota incumbat in voces ipsas, ideo regulæ omnes illius habent suppositionem materialem; quando utimur voce ad enunciantum non de illa, sed de suo objecto, ea, quæ huic competunt a parte rei, hoc est independenter a nostris cognitionibus, ut cum dicimus *Homo est animal*, est suppositio *formalis*, item *directa*, item *primò intentionalis*; & cum Physici utantur vocibus ad explorandum realitates ipsas, & essentias rerum, solet etiam vocari suppositio *physica*, & *realis*.

91. Quando utimur voce ad significandum, quod suo objecto competit dependenter à certo quodam nostro modo cognoscendi, qui vocatur *secundà intentionem*, ut cum dicimus *Homo est species; Animal est genus*, tunc terminus *Homo*, & *Animal* dicuntur habere suppositio-

Quid, & Quotuplex sit Suppositio. 41

fictionem secundò intentionalem, seu reflexam; & quia Logici toti sunt in his secundis intentionibus, per quas natura aliqua constituitur universalis, genus, species &c. ideo solet vocari suppositio logica, idest Logicorum propria: quando utimur voce ad significandum internas nostras cognitiones habere talem, vel talem qualitatem, ut quando dicimus, *Homo est simplex apprehensio, est actus vitalis* &c. tunc etiã est suppositio reflexa, non autè secundò intentionalis (quia secundò intentionalis determinatè alludit ad illas proprietates cognitionum, quas expendunt Logici, jam insinuatæ) sed reflexa, idest retrograda ad significandum nostras cognitiones; & quia Philosophi Animastici utuntur vocibus ad disputandum super natura, & proprietatibus nostrarum cognitionum, idcirco suppositio hæc potest vocari *Animastica*.

92. Hinc 1. dirimitur illalis: an suppositio sit acceptio pro re, quam significat, an pro conceptu formali, idest pro nostris cognitionibus? Resp. quandoque est pro uno, quandoque pro altero, ut constat ex diversis modis, quibus multæ nuper dictæ facultates utuntur circa voces, seu terminos: semper autem voces supponunt subiectivè, atque exercitè pro conceptu formali, quatenus per se derivantur ex nostris cognitionibus, & pro ipsis substituuntur, quandoquidem vocibus utimur ad manifestandum aliis nostros conceptus.

93. Hinc 2. propositio dicitur *de subiecto non supponente* hoc est propositio suppositionis falsæ, quando enunciat prædicatum, quod non potest convenire nisi rei existenti, & subiectum illius propositionis non existit v. g. *Adamus est calidus, est albus*; negatur suppositum: quia quod non est in rebus, neque calidum, neque album est: item quando enunciat prædicatum, quod non potest convenire nisi subiecto possibili, & subiectum illius propositionis possibile non est v. g. *Alter Deus est res, est ens* &c. nego suppositum; item quando subiectum licet simplex videatur, est exercitè implicatorium in terminis, v. g. *incognoscibile est incognoscibile*, quæ videtur identica, sicut *Petrus est Petrus*; & tamen falsa suppositione laborat, quia supponit esse cognoscibile ab intellectu obiectum: quod in se ipso sit incognoscibile: idem de hac *distinctum ad æquatè ab omni possibili, & impossibili est cognoscibile*: nego suppositum, quia supponit obiectum, quod in se neque sit possibile, neque impossibile: omnes ergo ejusdem farinae propositiones negandæ sunt, utpotè de subiecto non supponente, & abotiosis excogitatæ irretiendi ergo incautos.

94. Contradictoriæ igitur assignandæ sunt illis propositionibus
F
fal.

falsæ suppositionis, proponendo negatiuam toti propositioni v. g. *non incognoscibile est incognoscibile*, sumpto illo *non* in sensu negante, secus infinitante; item *non alter Deus nascetur*, quæ propositio (& similiter respectivè de aliis) dat hunc sensum disiunctivum verum: *vel non est possibile quidpiam, quod sit alter Deus, vel illud non nascetur*; si autem negatio non præponatur toti propositioni, sed ponatur post subjectum, hoc restat indemne, quia negatio solum destruit, quod post se invenit, non quod est ante: ergo si subjectum sit falsæ suppositionis, ambæ contradictoriæ erunt falsæ, ut iterum dicemus inter explicandum contradictorias: hæc nota propter multas fallacias, quæ insurgere solent ex huius doctrinæ oblivione: quod si propositio nec expressè enunciet, nec adhuc tacite supponat existentiam subjecti, non erit de subjecto non supponente, etiam quando hoc non existit v. g. *Adamus est cognitus*; est vera tametsi Adamus non existat: item *homo est animal*; est vera, quia reddit sensum conditionatum, nempe si homo existat, necessario erit animal: quod est verum tametsi homo nec existat, nec extiterit, nec extiturus sit.

S. I I.

95. **S**ecunda. Jam suppositio alia est *singularis*, videlicet quando utimur vocabulo ad unum solum significandum v. g. *Hic homo IESUS CHRISTUS sedet ad dextram Patris*, ubi terminus *Homo* habet suppositionem singularem; alia est *communis* juxta explicationes huius termini datas capite antecedenti: suppositio communis alia est *completa*, scilicet quando utimur termino communi ad significandum omnes suas species, atque individua, idest singulas individuorum species, & singula individua specierum v. g. *omne animal est sensibile*, ubi terminus *animal* significat omnia prorsus animalia omnium prorsus specierum; alia *incompleta*, videlicet quando utimur termino communi ad significandum non quidem singula generum, aut specierum, sed genera, aut species singulorum v. g. *omne animal fuit in arca Noe*, ubi terminus *animal* non significat singula individua animalium, aliàs esset falsa illa propositio; sed singulas species animalium, idest significat ibi fuisse aliquod ex singulis speciebus perfectorum animalium, quod verum est.

96. Tertia divisio; suppositio alia est *simplex*; alia *personalis*: hæc contingit quando utimur voce ad enunciandum de suo significato id quod convenit illi a parte rei, hoc est independentè ab illis nostris cogni-

cognitionibus, quæ vocantur *secundæ intentiones logica*, ut cum dicimus *Petrus est homo; homo est animal*: hæc suppositio coincidit cum illa, quam supra diximus *primò intentionalem*, seu *directam*: suppositio simplex accedit quando utimur voce ad enunciandum de suo significato id quod competit dependenter ab eis nostris cognitionibus, quæ vocantur *secundæ intentiones*. v.g. *Petrus est individuum subiectibile: homo est species: animal est genus*. Hæc suppositio coincidit cum ea, quam vocavimus secundo intentionalem: in hac autem *Petrus est cognitus* Petrus supponit personaliter; nam licet prædicatum non competat ei independenter ab omni cognitione, ut patet: competit tamen independenter ab eis cognitionibus, quæ sunt secundæ intentiones; scilicet quæ objectum suum constituunt speciem, genus &c.

97. Quarta divisio: suppositio alia est *distributiva* ac *universalis*: alia *copulata*: alia *disiunctiva* seu particularis, quæ vocari etiam solet *determinata* quando contraponitur suppositioni confusæ; alia denique *confusa*: hæc quatuor explicabimus *disp. 2. cap. 3.*, quando notabimus argumentationes, quas præbent: interim scito 8: legittimas resultare: quia unaquæque ex his quatuor præbet duas: unam quæ vocatur *ascensus*, & alteram, *descensus*: ascensus est quando ex inferioribus legitime numeratis progredimur ad rationem ipsis communem. *Hic homo est animal, & ille homo est animal, & in cæteris simili modo*: sequitur bene: *ergo quicquid homo est animal*. Descensus è converso est progressio ex ratione communi distributa ad singularia *omnis homo currit: ergo hic currit, & ille currit &c.*

98. Similiter in suppositione copulata: *Petrus, & Andreas, & Ioannes, & cæteri sunt duodecim: ergo omnes Apostoli sunt duodecim*: descensus est è converso progressio ex numero duodenario ad omnes simul: *omnes Apostoli sunt 12. ergo Petrus, & Andreas &c. sunt 12.* Ubi jam vides in utraque hac suppositione nullum debere præmitti ex inferioribus *quando fit ascensus*, quia ex uno vel unis tantum male deduces; *omnis, vel omnes*: non tamen est necessarium numerare omnia quando fit descensus ex suppositione distributiva: quia ex eo quod omnis homo currat infertur bene hæc propositio, licet sit sola, *hic homo currit*: oportet vero omnia numerare quando fit descensus ex suppositione copulata: ex eo namque quod omnes Apostoli sint 12. non infertur Petrum, & Andream solos esse 12.

99. In suppositione autem disiunctiva seu particulari arguitur etiam bene per ascensum: *hic homo currit, vel ille homo currit: ergo*

aliquis homo currit: hic non est necessarium numerare omnes homines, quia unus sufficit ad verificandum quod aliquis currit: in descensu vero oportet omnes profus numerare: quia ex eo quod aliquis currat non sequitur hunc vel illum currere (possunt namque ambo hæc esse falsa, licet illud sit verum) sed hunc vel illum, vel illum alium, & sic discurrendo per omnes nullo dempto: in suppositione etiam confusa sit ascensus, *equus A. aut B. aut C. & similiter de reliquis requiritur ad equitandum*: ergo aliquis equus requiritur ad equitandum: fit etiam descensus *equus requiritur ad equitandum*: ergo *equus A. aut B. aut C. & in cæteris simili modo requiritur ad equitandum*: hæc suppositio poscit quod tam in ascensu, quam in descensu numerentur omnia singularia, vel addatur illud & in cæteris simili modo.

100. Quinta divisio. Suppositio alia vocatur per statum, alia per ampliationem: alia per restrictionem, alia per alienationem. seu distractionem: alia per diminutionem: terminus tunc stat seu accipitur per statum quando utimur illo ad significandum rem singularem, vel communem existentem in tempore significato per verbum illius propositionis: cumque verbum hoc possit significare determinatè tempus præteritum *fuit*: vel determinatè præsens: *est*: vel determinatè futurum absolute, *erit*: vel determinatè futurum conditionatè, *esset*: en quatuor status, nempe præteritum, præsens, futurum absolute, & futurum conditionate: quo circa in his propositionibus: *Petrus peccavit*, *Petrus peccaret*: terminus ille *Petrus* sumitur per statum non quidem præsentem, sed præteritum in prima; & futurum conditionate in secunda: quod si dixeris tunc solum sumi terminum per statum quando significat rem existere de præsentem, quando pronunciat propositio; movebis litem de sola voce.

101. Hæc suppositio per statum est duplex; una per statum determinatum, ut in nuperis exemplis contingere potest; altera per statum disjunctivum, ut quando terminus accipitur pro re existente in uno ex quatuor dictis temporibus, & existente, vel non existente in alio; v. g. *Petrus fuit*; nam hoc verificari potest, si modo sit, si modo non sit; item si futurus, si non futurus sit; similiter album in hac propositione, *album fuit dulce*, potest significare id, quod modò de præsentem est album, & olim fuit dulce; vel etiam id, quod olim fuit album, & olim etiam fuit dulce: status determinatus potest item esse duplex; unus simplex, nempe quando terminus accipitur pro re existente in uno solo tempore ex dictis, v. g. *Antichristus erit*, vel *compositus*, scilicet quando accipitur pro re

exi-

existente in duobus, aut tribus ex dictis temporibus, v. g. *Iustus peccat*; nam terminus *Iustus* accipitur pro omni existente nunc, quia alijs non peccaret, & etiam existente olim, quia si vocatur *Iustus*, non est qui modò quando peccat sit *iustus*, sed quia olim *iustus* fuit.

102. Terminus tunc ampliatur quando utimur illo ad significandum rem non solum pro quatuor dictis temporibus, sed etiam pro omni tempore, & casu possibili, v. g. *Omnis homo est animal*; cùm hæc propositio sit æternæ veritatis, id est, indefectibilis veritatis, ille terminus, *homo*, non solum significat homines, qui fuerunt, sunt, erunt, & essent, sed omnes prorsus, qui possibiles sunt, & in quocumque possibili tempore, aut casu existant; terminus autem singularis, licet nequeat ampliari quoad sua inferiora, quandoquidem inferiora non habet; potest ampliari quoad tempus, casus, & circumstantias, v. g. *Dense essentialiter est sanctus*; ille terminus, *Deus*, nequit ampliari ad significandum omnes Deos, quia Dii neque sunt, neque possunt esse, & unus solus est *Deus*; ampliatur verò quoad tempus, & casus, & circumstantias; nam significat Deum in omni, & pro omni casu, loco, & tempore possibili esse sanctum.

103. Terminus tunc restringitur, quando utimur illo ad significandum, non totam suam universalitatem, sed partem dumtaxat, v. g. hæc vox, *homo*, instituta est ad significandum omnes homines; adjuncta verò hac altera, *sapiens*, non significat omnes, sed paucos homines; ubi adverte, quòd restrictio debet immediatè juxta communem usum loquendi adhærere termino, quem restringere velis, aliàs non restringit eum, v. g. *omnis homo est sanctus*, ille terminus, *sanctus*, non restringit *homo*, quia non cadit immediatè supra eum, & idè propositio est falsa, sed restringit in hac, *omnis homo sanctus placet Deo*, non obstante illa universalitate, *omnis*, quia *sanctus* immediatè adhærens termino *homo* restringit illum, & eam universalitatem, nempe quia voces significant ad placitum, & ita placitum fuit prioribus: quomodò autem se habeat in ordine ad argumentationes terminus fungens suppositione ampla, seu non restricta; & terminus, qui fungitur suppositione restricta, seu non ampla, jam diximus cap. 3.

104. Terminus tunc alienatur, seu sumitur per alienationem, quando extrahitur à propria significatione ad impropriad, v. g. *Equi marmorei sunt in Quirinali*; nam terminus *Equi* deferit suam propriam significationem animalis hinnibilis, & induit impropriad, scilicet significationem lapidis quoad apparentiam *Equi* elaborati;

tunc demum terminus diminuitur, quando ratione adjuncti synkategorematis desinit significare rem plenè absolutè, & significat illam secundùm quid, hoc est, partem quandam, v. g. *Æthiops* est albus secundùm dentes; nam *albus* significat absolutè albedinem, sed ratione illius adjuncti, *secundùm dentes*, solùm significat unam partem esse albam; discrimen autem inter diminutionem, & restrictionem, licet non sit magnum, est tamen aliquod, quia restrictio plerumque est quoad numerum; diminutio verò plerumque est quoad partem ejusdem totius.

CAPUT VI.

Quid, & quod simplex sit Enunciatio, seu Propositio.

105. **E**st Oratio, seu compositio terminorum interdum mentalis, interdum vocalis, interdum scripta, vel alio signo externo constans, quâ unum enunciamus de alio (quòd sit aliud, saltem quoad voces, licet non quoad realitatem) enunciamus inquam, vel affirmando, *homo est animal*, vel negando, *homo non est Angelus*; in omni enunciatione debes notare hæc quatuor: 1. Essentiam, 2. Quantitatem, 3. Qualitatem, 4. Materiam, in qua, vel de qua est.

106. Essentia stat in eo, quòd enunciatio sit affirmativa, aut negativa; hoc est, quòd negatio sit, aut non sit immediatè ante præcipuam copulam propositionis; si fuerit, propositio est negativa; si non fuerit, est affirmativa quantumcumque aliis redundet negationibus, v. g. *Petrus non esse Equum est non esse animal binnibile*; hæc propositio est affirmativa, quia licet præcipua illa copula *est* habeat utrinque negationem, nihilominus per neutram afficitur immediatè: ergo restat indemnis, & affirmata; immò quamvis immediatè supra præcipuam copulam cadat negatio, si nimirum supra hanc negationem cadat alia, v. g. *Petrus non non est animal*, est affirmativa; quia sicut clavus clavum trudit, ita una negatio destruit alteram; unde natum est illud adagium: *Dua negationes affirmant*.

107. Quantitas propositionis est extensio, aut coarctatio sue significationis; unde potest esse universalis, aut particularis, aut singularis; Propositio habet quantitatem universalem quando habet ea signa, *omnis, nullus, semper, nunquam, quoties, ubilibet, nullibi, necesse, impossibile* &c. cumque hæc signa possint cadere im-

mediatè supra solum subiectum enunciationis, vel immediatè supra solum prædicatum, vel immediatè supra solam copulam, vel immediatè supra singula hæc tria; vel immediatè supra duo sola, jam vides immensam copiam quantitatum diversarum, quas potest habere propositio, & ex quibus pendet sua veritas, aut falsitas; habet quantitatem particularem quando habet hæc signa, *aliquis, aliquando, aliquoties, alicubi, possibile, contingens &c.* cùmque hæc signa particularia possint multiplicari, sicut modò multiplicabimus universalia, jam habes aliam speciem quantitatum particularium, quibus fungi potest propositio: habet demum quantitatem singularem quando habuerit subiectum, aut prædicatum, aut copulam cum aliquo signo prorsus individuante, & quasi demonstrativo, ut *hic, iste, ille* cùmque hæc signa possint combinari sicut combinabamus universalia, & particularia inter se respectivè: & rursus cùm una possint combinari cum alteris, ita ut subiectum v. g. habeat quantitatem omnino singularem, copula quantitatem particularem, & prædicatum quantitatem universalem; v. g. unus Deus aliqua identitate est omnis Perfectio Divina: cùm inquam hæc ita sint, numerosissima resultat species quantitatum, quas potest habere Enunciatio.

108. Qualitas propositionis est conformitas, aut difformitas cum suo objecto, id est veritas, aut falsitas; regula autem ad hæc duo cognoscenda est neque solum objectum, neque solum quod enunciat propositio; sed simul est copulativè quod enunciat propositio, & quod est, aut non est objectum; unde ad concedendum, vel negandum Propositionem debes bene intelligere quid dicat Propositio, hoc est quid affirmet, aut neget, & postea inspicere objectum, habeat necne quod propositio dicit per præcipuam copulam: si habet, propositio est vera; si non habet, est falsa; v. g. *Hominem esse equum foret hominem esse binnibilem*, est vera; nam licet illa copula, *foret*, utrinque habeat falsitates, verumtamen illa est vera; unde Propositio illa absolute est vera.

109. Materia propositionis, sunt res illæ, de quibus loquimur per illam propositionem: est duplex: una vocatur *remota*, seu *impossibilis*, videlicet quando prædicatum penitus repugnat subiecto v. g. *Homo est lapis*, aut quando prædicatum est de essentia subiecti, & ipsi negatur; homo non est animal: est in materia *naturali*, sive *necessaria*, quando prædicatum necessario convenit subiecto, ut *Homo est animal*, vel quando ipsi repugnat, & de ipso negatur; Homo non est lapis: est denique in materia *contingente*, quando prædicatum

tum potest convenire, & potest non convenire subiecto, sive de facto conveniat, sive non conveniat v.g. *Petrus est albus*, sive sit vera, sive falsa, est in materia contingente, quia sine ulla contradictione potuit ille esse albus, licet modo non sit: & potuit non esse, licet modo sit: ubi ne confundas *propositionem esse necessariam veram*, & *esse in materia necessaria*: quoniam fieri potest quod talis, aut talis individua propositio propter specialem rationem sit necessarii vera, & tamen quod materia ipsius sit ex se contingens: omnis enim propositio, quæ est ex fide, necessarii ex sua specie est vera, quia innititur infallibili verbo Dei; & tamen multoties materia ipsarum ex se est absolute contingens v.g.: potuit Adamus non peccasse: potuit Judas non vendidisse Christum Dominum; ergo non est idem propositionem aliquam esse *necessarii veram*, & *esse in materia necessaria*; idem propter eandem rationem dicendum de propositione necessarii falsa, qualis esset hæc *Adamus non peccavit* in quantum hæresis formalis, quæ non semper est in materia remota, sed impossibili.

110. Hic adverte propositionem indefinitam, hoc est, quæ nulla afficitur quantitate expressè æquivalere universali, quando est in materia naturali v.g. homo est animal, æquivalet huic, omnis homo est animal; item homo non est equus, æquivalet huic, nullus homo est equus: item quando propositio est in materia doctrinali, sed de fide; hoc tamen indiget explicatione in Theologia danda: quando autem est in materia contingente, æquivalet particulari; nam *Homo currit*, æquivalet huic, aliquis homo currit.

§. II.

111. **P**ropositio, seu enuntiatio est multiplex; alia namque est *simplex*, nimirum in qua unum solum de solo uno affirmatur, aut negatur, *Petrus currit*; *Petrus non currit*: altera *composita*, illa videlicet quæ imbibit multas enunciationes *Petrus est homo*, & *homo est anima*, vel saltem illis æquivalet, *Petrus*, & *Ioannes sunt homo*: rursus utraque posita potest esse absoluta, quæ vocatur *de in se*, illa scilicet in qua simpliciter sine ullo additamento enunciat de altero, *Petrus currit*, vel modalis, nempe in qua enunciat prædicatum, & etiam modus, quo illud competit subiecto: *Petrus necessarii est animal*; hæc modalis potest esse de modo logico: aut de modo non logico: illa est, in qua inveniuntur modi ii, de quibus agit Logica, & sunt quatuor soli, *necessarii impossibile*; *possibile*:

Quid, & Quotuplex sit Enunciatio. 49

contingens, quosexponemus disp. 2. cap. 5. modalis modo alio est in qua enunciatur modus ab his quatuor distinctus, v. g. *Petrus currit velociter; anima operatur supernaturaliter*: illa de in esse est duplex: una vocatur de secundo adjacente, & est quæ non habet aliud prædicatum, nisi quod imbibitur in copula v. g. *Petrus est* intelligitur *ens*; altera dicitur de tertio adjacente; & est, quæ aliud habet prædicatum v. g. *Petrus est albus*, intelligitur *ens album*.

112. Secunda divisio; enunciatio composita est quintuplex; copulativa, disjunctiva, causalis, conditionalis, rationalis: illa est copulativa, cuius partes uniuntur copula, & vel alia simili v. g. *Petrus studet, & Ioannes ludit*; in his copulativis debes advertere tria: primum quod præcipua earumde copula est illud &, quapropter, ex eo quod illud habeat, vel non habeat ante se negationem pendet, quod copulativa propositio sit affirmativa, aut negativa: hæc est affirmativa *Petrus non studet, & Ioannes non ludit*; hæc autem negativa *Non Petrus studet, & Ioannes ludit* quia licet negatio non cadat immediatè immediatione materiali supra illud &, quandoquidem inter unum, & aliud est integra enunciatio; nihilominus cadit immediatè immediatione logica (& sic intelligendum quod dicebamus num. 105.) quia quod negat directè & simpliciter ea negatio est illud &; secundum quod contradictoria his propositionibus assignanda est ponendo *non* in initio: quoniam si ponatur post primam partem propositionis, si ea fuerit falsa, sequetur duas contradictorias esse simul falsas; quod est chimæra,

113. V. g. esto Petrum non studere: tunc est falsa hæc *Petrus studet, & Ioannes ludit*; falsa item est hæc *Petrus studet non, & Ioannes ludit*; restat ergo quod negatio præponatur toti propositioni, & sic erit impossibile, quod ambæ sint simul falsæ; tertium est quod huiusmodi propositiones copulativæ ut sint veræ requirunt, quod sint veræ omnes illæ partes, quibus constant, & insuper quod simultas earundem sit etiam vera: unde prædicta propositio erit falsa, si Petrus non studeat, licet Ioannes ludat: item si Ioannes non ludat, licet Petrus studeat: item licet ambo hæc contingant sed in diversis temporibus: quia illa copula & significat simultatem in eodem tempore; si ergo ex hoc triplici latere potest ingruere falsitas in propositionem copulativam, sequitur quod ex eodem triplici titulo possit esse vera sua contradictoria: modos arguendi hinc oriundos dabimus ad finem disp. 2.

114. Propositio disjunctiva est illa cuius partes afficiuntur copula *vel*, aut quavis alia simili: ea est copula præcipua harum propositionum

tionum: ergo quod sint affirmativæ aut negativæ pendet ex eo quod illud *vel* præposita negatione afficiatur, aut non afficiatur: quam obrem hæc est affirmativa *vel Petrus non studet vel Ioannes non ludit*, quia licet audiantur duæ negationes hic, neutra afficit primariam illam copulam *vel*: è converso hæc est negativa *non vel Petrus studet, vel Ioannes ludit*; similiter his propositionibus assignanda est contradictoria præponendo negationem toti propositioni juxta regulam dandam disp. 2. ubi agemus de contradictoriis.

115. Quod attinet ad veritatem propositionis disjunctivæ, adverte, ut sit vera, unius solius suæ partis veritate contenta est; nam hoc solum dicit, qui dicit Petrum studere, vel Joannem ludere: nempe unum ex his duobus esse verum, quodcumque illud fuerit (disp. 2. amplius explicabimus hoc, inter exponendum modos legitimos, & illegitimos arguendi sumptos ex veritatibus disjunctivis) hinc fieri potest quod disjunctiva sit æternæ, indefectibilis, atque necessariæ veritatis, tametsi unaquæque pars ipsius sit contingenter vera; nam prorsus necessaria est hæc veritas *Petrus studet, vel non studet*: & tamen est contingens quod studeat: & contingens etiam quod non studeat: imò quamvis una pars ipsius disjunctivæ sit chimærica, disjunctiva potest esse vera, quoniam studente Petro verum est *vel existit chimæra, vel studet Petrus*; imò etiā licet partes, quibus constat, sint invicem essentialiter oppositæ, ut constat in illo exēplo *vel studet vel non studet Petrus*, nec non in hoc *Deus existit, vel non existit*, quæ est necessariò vera, licet unum extremum sit chimæricum, & essentialiter oppositum alteri.

116. Adverte insuper quod interdum utimur illa particula *vel* non in hoc sensu disjunctivo, quem modò explicavimus; sed in sensu contentivo v. g. *vel petas, vel non petas*, non dabo librum: tunc sensus est, rem illam, de qua fuerit sermo, æque se habituram, aut æque se non habituram sive contingat unum, sive alterum: qua propter particula *vel* æquivalet tunc huic alteri *sive*: & hac de causâ vocamus sensum illum *contentivum*.

117. Propositio Causalis est illa, quæ enunciat unum esse causam alterius: cumque multifariam possit hoc contingere, id circo propositio causalis est multiplex; alia enim est causalis *negativè*, quatenus enunciat unum esse causam negativam alterius seu esse removens prohibens, seu esse conditionem sine qua non est alterum v. g. quia lignum est aridum comburitur: ariditas est removens prohibens combustionem, unde solum est causa negativa illius; alia est causalis *in sensu logico*, quatenus significat unum movere intellectum ad assentiendum al-

alteri propter artificium, quo dispositum est illud unum v. g. *quia præmissæ sunt in Barbara sequitur conclusio*; alia est causalis metaphysicè, quatenus significat unum esse ultimam differentiam specificam, ex qua resultat alterum tanquam proprietas v. g. *quia homo est rationalis, est admirativus*; alia est causalis physicè quatenus significat unum esse principium physicum alterius v. g. *quia ignis est applicatus calefacit*; & cum sint tot species causarum physicarum, quæ explicantur in Physica, multiplex hinc resultat propositio causalis; alia est causalis moraliter quatenus significat unum esse causam moralem alterius: & cum multiplex sit causa moralis, multiplex hinc etiam resultat propositio causalis.

118. Alia demum est causalis connexivè quatenus significat unum esse connexum cum altero sive sit causa, sive effectus, sive neutrum respectu illius v. g. *quia ignis non comburit non est applicatus si enim esset applicatus combureret*, cumq; multæ sint species connexionum, quas suo loco exponimus; hinc etiam multiplex resultat propositio causalis; hæc diximus ut videas quàm æquivocum sit illud verbum *quia* in propositionibus causalibus: atque ut inter disputandum discernas unas causalitates ab alteris, concedasque, quæ sint veræ, & neges quæ sint falsæ.

119. Una quæque ex his speciebus potest esse quadruplex; potest namque propositio causalis esse affirmativa utriusque sui objecti: *quia præcepisti, feci hoc*; vel negativa utriusque: *quia non præcepisti, non feci*; vel affirmativa illius quod apparet instar causæ, & negativa illius quod apparet instar effectus: *quia præcepisti, non feci*; vel negativa illius, & affirmativa huius *quia non præcepisti, feci hoc*; cæterum, cum præcipua copula in omni propositione causali sit illud *quia*, vel alia æquivalens: ideo tunc solum est absolute, & simpliciter negativa propositio causalis, quando illud *quia* est affectum negatione sibi præcedente, sicut diximus de aliis; & consequenter contradictoria debet assignari ex propositionibus præponendo negationem toti propositioni; quoniam si aliqua huius pars restet affirmata, potest contingere quod ambæ propositiones sunt falsæ v. g. *Feci hoc quia præcepisti. Feci hoc non quia præcepisti*; ambæ erunt falsæ quando non fecerim hoc.

120. Quod attinet ad veritatem tria indispensabiliter poscunt propositiones causales, quorum si vel unum tantum deficiat, evadent falsæ; primum quod sit verum illud, quod assumitur ut causa; si secus, causalis supponet falsum v. g. *quia homo est equus, est animal*; supponet falsum, nam licet homovere sit animal, & hoc inferatur bene ex eo

quod subiectum sit equus; attamen homo non est equus: secundo illud, quod assumitur ut causa habere re ipsa speciem causalitatis, quæ enunciat ut v.g. *quia sol lucet mars est retrogradus*; est falsa, nam licet sol luceat modo, & mars sit retrogradus, illud non habet ullam proportionem cum hoc: tertio quod verum sit id, quod enunciat ut causatum; aliis erit falsa causalis, tametsi cætera sint vera v.g. *quia præcepi facis hoc*; est falsum quando non facis illud, licet ego verè præceperim, & licet præceptum meum esset causa proportionata, seu motivum ad faciendum illud: cum igitur propositio contradictoria negat ista tria disjunctivè, non autem distributivè aut determinatè inde est quod contradictoria propositionis causalis est vera, quoties causalis ipsa est falsa.

§. III.

121. **O**perosior multò est propositio conditionalis, quia circa eam maxima pars Theologiæ occupatur, unde oportet bene notam habere: propositio conditionalis est illa, quæ enunciat unum pro casu alterius: illud enunciatum dicitur *conditionatum obiectivum*: enuntiatio illius *conditionatum formale*: illud pro cuius casu enunciat ut dicitur *conditio* seu *hypothesis obiectiva*; unde fit quod propositio conditionalis vocetur *hypothetica* v.g. *si petis dabo librum*; petitio tua est conditio, sive hypothesis obiectiva: illud *si petis* est hypothesis seu conditio formalis: mea traditio libri est conditionatum obiectivum: illud *dabo* est conditionatum formale.

122. Propositio conditionalis potest habere quantitatem universalem, aut particularem, aut singularem, ut alibi exponemus disp. 2. cap. 8. rursus potest esse affirmativa ex parte conditionis, & ex parte conditionati: *si petis dabo*: & negativa ex parte utriusque *si non petis non dabo*: & affirmativa ex parte conditionis; negativa autem ex parte conditionati, *si petis non dabo*: & demum negativa ex parte conditionis, affirmativaque ex parte conditionati: *si non petis dabo*: veruntamen cum præcipua copula harum propositionum sit illud *si*, hinc pendet quod propositio sit affirmativa, aut negativa absolutè ac simpliciter; nempe ex eo quod illud *si* afficiatur nec ne per præcedentem negationem: & contradictoria assignanda est semper his propositionibus præponendo negationem toti propositioni juxta sæpe dicta, & dicenda disp. 2.

123. Præterea si has propositiones inspicias quoad modum enunciandi

ciandi, possunt esse in quadruplici differentia: alia namq; est conditionalis *illativa*, nempe quæ enunciat illationem conditionati objectivi ex hypothesi, seu conditione objectiva, id est quæ enunciat hanc connecti cum illo, *si peccas, id videt Deus*: cumque connexio unius cum alio possit esse multiplex, ut suo loco dicimus, hac de causa conditionalis illativa multiplex est: alia conditionalis est *purè conjunctiva*, nempe quæ enunciat futurum unum pro casu aliterius præcindendo ab eo quod hoc alterum connectatur nec ne, sit nec ne conditio proportionata ut detur illud alterum v.g. *si peccas mare turbatur*: potest esse vera in sensu mere conjunctivo, quem etiam vocant *temporalem*, quia fieri potest ut in eodem instanti in quo peccas mare turbetur, hæc vocatur conditionalis disparata, alia conditionalis *strictè conditionalis*, nempe quæ enunciat unum pro casu, seu quod idem est, sub hypothesi alterius, quod vel est conditio utilis, & conducing, ut sit illud alterum v.g. si Deipara interponat suas preces, obtinebis à Deo istud beneficium; vel pro casu aut sub hypothesi alterius quod est plena, & adæquatà facultas ponendi in rebus conditionatum objectivum v.g. *si homo habeat libertatem A. integram, & perfectam constitutam per gratiam Dei, resistet tentationi A. v. g.*

124. Ubi adverte quod illa altera strictè conditionalis revocanda est ad hanc: nam quod existat, una res utilis, ac conducing, ut existat conditionatum, non sufficit ad existentiam hujus neque illa sola est plena, & totalis facultas ponendi in rebus conditionatum: quo circa illa conditionalis si Deipara interponat suas preces &c. reddit hunc sensum si Deus habeat libertatem quandam individua constitutam per visionem precum Deiparæ, ab hac ipsa individua libertate Divina obtinebis tale beneficium: licet enim possit etiam contingere quod existente libertate indifferentiæ ad conditionatum objectivum, hoc non existat, veruntamen ea libertas est plena, & totalis sufficientia ut existat illud conditionatum: ergo ea libertas potest ponere in rebus conditionatum: ergo quando illud positura est, verè dicemus si existat hæc libertas, faciet hoc, ut frequentibus exemplis sacræ Scripturæ suo loco dandis constat.

125. Hoc nisi alte insigatur menti æquívocationes absurdas patieris in Theologia; ubi passim audies Authores, qui brevitatís causa sic loquuntur, si homo habeat inspirationem A. consentiet: licet habeat non consentiet; cave ne intelligas pro hypothesi objectiva solam inspirationem A. sed intelligere debes totam, integram; plenam, adæquatam, sed individua atque singularem libertatem A. intrinsecè con-

suetu-

stitutam per eam inspirationem sicut constituitur per multa alia, quæ modo non veniunt ad rem: illa autem brevis in loquendo, *fidetur auxilium A.* potest æquivocationibus multis aniam præbere: cave item ne intelligas consensum utcumque, sed determinatè consensum oriundum ex illa individua, & singulari libertate *A.* in illo individuo, & singulari instanti: hæc modo sufficiant. Denique propositio conditionalis solet esse disparata, scilicet quando *hypothesis* objectiva, quæ auditur in propositione nullam penitus habet proportionem, sed positivam improportionem respectu conditionati; *si gallus cantat Romæ, Turca convertitur Constantinopoli*; hæc facile coincidit cum conditionalis in sensu mere conjunctivo, & temporali, sed hæc conditionales disparatæ possunt esse veræ quia possunt reduci ad conditionales non disparatas, sed strictè conditionales, ut constat ex aliquibus sacre Scripturæ v.g. *si Eliseus videret Eliam quando hic rapiebatur, adipisceretur spiritum duplicem ipsius; si Rex Ious baculo percussisset terram quinquies funditus delivisset Siriam*; sed de hoc alibi.

126. Quod attinet ad veritatem propositionis conditionalis, advertet hæc quinque 1. *conditionalem nihil ponere in esse* juxta verum axioma idest ut conditionalis sit vera, non requiritur quod conditio sit, fuerit, aut futura sit: item non requiritur quod conditionatum sit de præsentis, fuerit, aut futurum sit: quia sicut hæc propositio Petrus est albus, ut sit vera non postulat Petrum currere; siquidem hoc non dicit, sed solum quod Petrus sit albus, & potest esse albus quin currat: ita hæc conditionalis v.g. *si esset A. esset B.* non dicit conditionem aut conditionatum esse modo de præsentis, non dicit fuisse olim, non dicit futura esse aliquando; sed purè, & præcisè dicit futurum *B.* pro casu quo existat *A.* atqui fieri potest quod futurum esset *B.* pro casu quo existeret *A.* tametsi neque de præsentis, neque de præterito, neque de futuro sint *A.* aut *B.* ergo illa conditionalis potest esse vera, tametsi *A.* & *B.* nunquam fuerint, aut sint, aut futura sint: sic præmonuit Deus Davidem oraculo infallibili tradendum esse à Ceilitis in manu Saul, si perseverabat in ea Urbe, & ob hoc ipsum neque perseveravit, neque traditus fuit.

127. Est ergo purè hypotheticus, & purè suspensivus modus enunciandi, quem habet propositio conditionalis: & ob hoc nihil ponit in esse; sed poneret idest *dicit quod foret*: & quamvis videatur hic modus enunciandi aridus, abstractus, purè speculativus, & inutilis; nihilo tamen minus experientia ipsa quotidiana docet quàm utilis ac necessarius sit ad prudentiam, & providentiam, & certu-

itudinem rationalium actionum : multa inopinatè , ac de repente obtingunt nobis quia non prævidimus quod alius sponte sua , atque liberè facturus erat si nos faciebamus talem , vel talem actionem : multa faceremus si prævideremus optimos effectus , qui futuri erant *si illam rem faceremus* : à multis rebus tanquam à vivis carbonibus manus abstineremus , si prævideremus effectus infelices , qui futuri erant si res illas faceremus : Denique nihil magis notum , quàm hoc : *Nolo id facere , quia si faciam , imminet &c. Volo id facere , quia si faciam , obtinebo &c.* ergo hic modus cognoscendi purè conditionatus non est aridus merè speculativus , & inutilis ; sed prorsùs necessarius ad prudentiam rationalium actionum .

128. Adverte 2. Omisimus consultò conditionales de hypothesi impossibili , quia suo loco dicimus cum Aristotele : *Data una absurda cætera accidunt* ; hoc est , *ex impossibili quodlibet sequi* ; quamobrem inutiles putamus istas propositiones in sensu directo , quem præferebunt , licèt utiles sint in sensu reflexo , v. g. *Præscindendo ab eo, quòd A. sit , aut non sit , detegimus rationem efficacem , ut asseramus B.* hic sensus utilis est ad indagandum veritatem ; & in hoc sensu intelligenda est famosa illa propositio Florentina : *Si Spiritus Sanctus non procederet à Filio* (en hypothesim chimæricam) *non distinguere- tur ab illo* .

129. Adverte 3. Ut illæ propositiones strictè conditionales , quas meminimus num. 122. sint veræ non sufficit , quòd existente ea libertate A. v. g. quomodolibet existat conditionatum ; sed opusest , quòd existat hoc *ab illa* , & *ex illa libertate* , non ratione connexionis hujus libertatis cum illo conditionato , quia aliàs non esset libertas indifferentiæ ; sed ratione domini elicitivi supra illud : quatenus libertas illa indifferentiæ potens pro suo libito ponere conditionatum , & potens pro suo libito non ponere , pro suo libito ponet , quia ponet ; & non est alia ratio strictè à priori , quamvis possint esse multæ motivæ , & impulsivæ ; sicut enim de essentia conclusionis purè probabilis est , quòd non habeat rationem prorsùs evidentem , quia aliàs non esset conclusio obscura ; ita de ratione operationis immediatè liberæ libertate indifferentiæ est , quòd non habeat rationem strictè à priori , hoc est infallibiliter connexam cum ipso , & penitèns antecedentem , ut suo loco explicabimus ; aliàs operatio illa non esset immediatè libera ; igitur illa conditionalis : *Si Deus habeat libertatem individuam A. constitutam per visionem precum &c.* requirit ad sui veritatem , quòd hæc eadem individua libertas Divina concedat illud be-

neficium : ratio à priori est quia hoc , & non aliud enunciant hujusmodi propositiones : in hoc , & non in alio sensu agnoscimus illas ut veras ; quamvis brevitatis gratia non semper utamur inter loquendum hoc rigore .

130. Adverte 4. Ut conditionalis illativa vera sit , sive ut sit vera in sensu illativo , non sufficit , quòd existente conditione utcumque existeret conditionatum ; nec quòd existat utcumque ab illa conditione , & ex illa , ut nuper dicebamus de purè conditionali ; sed opus est , quòd existeret conditionatum ex vi connexionis , quam habet conditio cum illo ; v. g. hæc est conditionalis vera in sensu illativo , *si existat unio physica duorum , existent illa duo* ; nempe quia hypothesis objectiva , idest unio illa physica intime connectitur cum conditionato objectivo , idest cum illis duobus ; hæc autem est falsa in sensu illativo *si Petrus habeat libertatem A. peccabit* , quia hypothesis objectiva nempe libertas A. indifferentiæ non connectitur ullatenus cum peccato , sed est ad utrumlibet indifferens : quare hæc propositio dumtaxat est vera in sensu strictè conditionali : ratio autem hujus advertentiæ est ; omnis propositio ut sit vera indiget eo quod enunciat : nam *ab eo quod res est , vel non est propositio dicitur vera vel falsa* juxta commune principium : sed omnis conditionalis illativa enunciat connexionem suæ conditionis , seu hypotesis objectivæ cum conditionato : quia in hoc differt hæc species conditionalium ab aliis : ergo omnis conditionalis illativa , ut sit vera indiget connexionem conditionis cum conditionato .

131. Adverte demum conditionalem non semper converti in aliam assumentem pro hypothesis *contradictorium* conditionati , & pro conditionato *contradictorium* conditionis , hoc est , non semper est legitima hæc consequentia , *si datur A. datur B. ergo si non datur B. non datur A.* exempla sunt obvia ; si existunt duæ quantitates non sunt penetratæ in eodem loco : ergo si sunt penetratæ in eodem loco , non existunt : malè , quia consequens implicat in terminis : item *si existat libertas A. non resistet tentationi ergo si resistit* (en *contradictorium* conditionati) *non ex fflit* : en *contradictorium* conditionis , & en simul pessima consequentia : ratio autem hinc sumitur : quoties *contradictorium* conditionati sit intime connexum cum existentia conditionis male arguitur ex *contradictorio* conditionati ad *contradictorium* conditionis ; sed aliquando est connexum ut constat in his duobus exemplis : ergo aliquando ex *contradictorio conditionati* male arguitur ad *cōtradictorium* conditionis : ergo propositio conditionalis non semper

con-

convertitur in alteram assumentem pro conditione contradictorium conditionati, & pro conditionato contradictorium conditionis: obli-
vio hujus veritatis impulit multos in fallitates, quas putant eviden-
tes veritates.

§. I V.

132. **P**ropositio sive enunciatio *rationalis* est idem ac *consequens*; & definitur *Oratio in qua unum ex altero consequi enunciat*; quod consequitur vocatur *consequens obiectivum*: oratio quæ id enunciat vocatur *consequens formale*: id, ex quo sequitur, dicitur *antecedens obiectivum*: oratio id enuncians dicitur *antecedens formale*: connexio antecedentis cum consequente dicitur *consequentia obiectiva*: terminus id enuncians dicitur *consequentia formalis*. v. g. *Petrus est homo: ergo est animal*: prima oratio est antecedens formale: humanitas ipsa Petri est antecedens obiectivum: intima connexio humanitatis cum animalitate est consequentia obiectiva: illud *ergo* sive *igitur*, sive aliud simile dicitur consequentia formalis: denique ultima oratio vocatur *consequens formale*, & animalitas vocatur *consequens obiectivum*.

133. Præcipua copula in his propositionibus est illud *ergo*: quo circa ut sint negativæ, illi copulæ debet præponi negatio: atque ut assignetur contradictoria affirmativæ toti propositioni debet præponi; aliis si antecedens fuerit falsum, ambæ contradictoriæ falsæ erunt v. g. *chimæra ambulat: ergo habet pedes*: si assignes hanc contradictoriam *chimæra ambulat: non ergo habet pedes* ambæ orationes sunt falsæ: est ergo contradictoria hæc, *non chimæra ambulat: ergo habet pedes*: illa namque negatio quidquid post se invenit destruit, & dat hunc sensum disjunctivum verum: *vel non ambulat chimæra, vel ex hac non sequitur quod habeat pedes*: quæ disjunctio est vera ratione primi membri.

134. Si hujusmodi enunciationes consideres quoad membra, quibus constant, possunt esse in quadruplici differentia. I. affirmativa antecedentis, & consequentis *est homo: ergo est animal* II. negativa utriusque *non est animal: ergo non est homo* III. affirmativa antecedentis, & negativa consequentis, *est homo: ergo non est equus*. IV. negativa ex parte antecedentis, & affirmativa in consequente: *non est Adam: ergo Deus id scis*: si consideres has enunciationes quoad consequentiam, id est connexionem antecedentis cum consequente, quæ

aliis terminis dicitur illatio consequentis ex antecedente : vel si consideres quoad qualitatem certitudinis, evidentiam, & similibus proprietatum, quibus frui possunt antecedens, & consequens formale, & ipsa formalis consequentia, seu illatio, tot species invenies, quot dicemus postea agentes de argumentatione in genere: quoniam hujusmodi propositiones sunt species quædam argumentationis, quæ vocatur *Enthymema*.

135. Si consideres has propositiones quoad valorem, debes distinguere inter eas ut sunt enunciatio quædam connexionis unius cum alio, sicut aliæ propositiones enunciant res alias: atque ut sunt *consequentia*, seu *illatio* unius ex alio: in hoc secundo sensu non solet dici consequentia vera, aut falsa, sed bona, aut mala, unde quando consequens non sequitur ex antecedenti negamus consequentiam, tamen si antecedens, & consequens sint vera: v.g. *Petrus est animal: ergo est Homo*; male, itaque nego consequentiam, quia licet verum sit Petrum esse animal, & esse hominem, hoc tamen non sequitur ex illo, nam etiam Equus est animal, & tamen non est homo.

136. In primo autem sensu, idest si loquamur de his propositionibus ut sunt enunciatio quædam, tunc non dicuntur bonæ; aut malæ: sed veræ, aut falsæ, sicut cæteræ propositiones: & tunc est necessarium quod antecedens sit verum, quod consequens sit etiam verum, & quod hoc sequatur ex illo, idest quod illud connectatur cum hoc: quolibet autem ex his tribus deficiente propositio rationalis (ita vocata, quia sua præcipua copula est illud, ergo quod est signum discursus, & rationis) erit falsa: plerumque autem utimur his propositionibus non in quantum sunt enunciationes, sed in quantum sunt consequentiæ: & tunc ut bonæ sint ac validæ non desideratur quod antecedens, aut consequens sint vera, sed quod consequens sequatur ex antecedenti, si antecedens verum fuerit, sit nec ne absolute verum.

137. Hinc licet falsum sit lapidem esse animal, & falsum sit lapidem esse vivens, firma tamen valida, & bona est hæc consequentia: *Lapis est animal, ergo est vivens*: adversarius namque debet expendere antecedens quod deglutit; eo autem semel deglutito deglutire debet, *lapidem esse vivens*: quia animal intimè, & essentialiter est connexum cum vivente.

138. Hic nota principium Dialecticum; *Ex vero semper sequitur verum; Ex falso autem aliquando verum, aliquando falsum*: ut in casu dicto, nam ex hoc antecedenti falso; *lapis est animal*, sequitur hoc consequens falsum, *est vivens*: & etiam sequitur hoc consequens verum,

rum, *Lapis est corpus*; quoniam animal trahit secum essentialiter, & esse corpus, & esse vivens: ergo ambo infertur bene ex animalium: unum convenit lapidi, nempe esse corpus, & alterum repugnat, nempe esse vivens: ergo ex illo falso antecedenti: *Lapis est animal*, sequitur unum verum, videlicet *Lapis est corpus*: & alterum falsum, videlicet, *Lapis est vivens*; Idem contingit in Syllogismis: *Omne animal est saxum*; s. d. *omnis arbor est animal*: ergo *omnis arbor est saxum*: omnia hæc sunt falsa, sed consequentia est infallibilis: item *Omne saxum est rationale*; sed *omnis homo est saxum*: ergo *omnis homo est rationalis*: Præmissæ sunt falsæ, sed consequens est verum, & consequentia ineluctabilis: ergo ex falso, aliquando sequitur verum, aliquando falsum.

139. Non ita verum, quoniam ex vero nunquam sequitur metaphysicè falsum, sed semper verum: Disparitas reducit ad illud methaphysicum principium, quod suo loco exponimus, quoties deficit terminus connexionis metaphysicæ deficit fundamentum; sed non quoties existit hic terminus, existit fundamentum: At omne antecedens connectitur metaphysicè cum eo, quod metaphysicè sequitur ex illo, ergo omne antecedens deficeret, seu non esset verum, si deficeret illud quod methaphysicè sequitur ex ipso, idest si esset falsum quod sequitur ex illo: ergo si ex vero sequeretur falsum, verum esset verum ut ponitur, & simul non esset verum, quod repugnat: Ex falso autem potest sequi verum, quia terminus connexionis metaphysicæ potest subsistere deficiente, seu non vero fundamento, ut subsistit Deus, quando deficit quævis creatura, licet Deus sit terminus quocum connectitur omnis creatura: ergo quamvis antecedens non sit verum, quamvis non subsistat, sed sit falsum potest subsistere, & esse verum illud, cum quo methaphysicè connectitur, & consequenter illud, quod ex ipso metaphysicè infertur.

140. Diximus semper *Metaphysicè*, quoniam ex vero potest sequi physicè, ac moraliter id quod est falsum: v. g. *est Mater*: ex hoc antecedente vero, sequitur moraliter, ergo *diligit filium suum*: Et tamen potest esse falsum hoc consequens: rursus ex hoc vero antecedente: *ignis est applicatus pulveri nitratu*, sequitur physicè hoc consequens: *ergo comburitur illam*: & tamen potest esse falsum hoc consequens, eo quia Deus miraculose ignem cohibeat. Quod si dicas in antecedente intelligi debere decretum applicativum Omnipotentie ad producendum combustionem: Aut consequens non debere esse illud, sed hoc disjunctivum: *ergo ignis comburitur, vel Deus facit miraculum*: & in utroq; ca-

su subsistere, quod ex vero sequitur verum: si inquam alterutrum ex his duobus dixeris, neutrum venit ad rem, quia loquimur de sequela, illatione, sive connexione purè *physica*, & naturali: ambo autem istę quas obiicis, sunt metaphysicę, quandoquidem nec divinitus possunt vitari: ergo neutra venit ad rem: denique ex vero potest sequi falsum reflexè, id est potest sequi falsum esse tale aliud: *Est homo ergo falsum est esse canem*: sed non falsum directè.

C A P U T VII.

Quot, Quę, & Qualia sint Instrumenta sciendi.

141. **R** Esp. esse ultra jam exposita, Definitionem: Divisionem: Argumentationem: Conversionem: Æquipotentiam: Contradictionem: Contrarietatem: Subalternationem: Subcontrarietatemque propositionum; quoniam his omnibus tanquam instrumentis nanciscimur veritatem scientificè, hoc est evidenter: veruntamen sola tria priora vocantur absolutè instrumenta sciendi: & ideo de illis solis agemus modo, acturi de cæteris disp. 2. Jure autem vocantur instrumenta sciendi, quia Definitione panditur, seu aperitur essentia, quę latebat, rerum: Divisione sobriè facta evolvuntur involucra, & unaquęqueres ponitur in loco suo: Argumentatione demum eliminamus ex terminis bene definitis, divisis, atque collocatis res, quę sunt verę, & quę sunt falsę.

142. Primum ergo quod in quæstione qualibet, in quolibet discursu seu *materia debes facere*, est subito involare in essentiam, seu naturam, seu quidditatem illius rei, de qua est sermo: aliàs instar cæci parietes tentabis, & tertio quoque passu impinges si nescias quid sit illud, de quo est quæstio: Hoc autem scies per definitionem rei illius: Est ergo definitio *Oratio explicans naturam rei*, ut animal rationale explicat naturam hominis: quamquam autem hæc eadem definitionis definitio sit etiam una ex definitionibus, & consequenter habeat se ipsam pro objecto, & consequenter sit definitio sui ipsius, & sit clarior se ipsa (quibus difficultatibus irretiri solent Tyrones) nullum latet absurdum.

143. Possumus enim loqui de hac data definitione inspecta sic, *Definitio*, aut inspecta sic: *Oratio explicans naturam rei*: hoc secundo modo inspecta est definitio sui ipsius inspecta primo modo, & est clarior se ipsa inspecta primo modo: sed neque est clarior se ipsa, neque definitio sui, ipsius inspecta eodem secundo modo: atqui primus, & se-

secundus modus sunt realiter distincti: ergo ex istis difficultatibus non sequitur quod idem, & eodem modo inspectum sit definitio sui ipsius, aut clarius se ipso: Quod autem prædicta definitionis definitio habeat pro objecto se ipsam mixtam, & confusam cum aliis definitionibus nihil refert, nam etiam hoc iudicium *Omnis cognitio est actus vitalis*, habet se ipsum pro objecto, quia loquitur de omni cognitione: & ipsum iudicium est aliqua cognitio. Idē dicimus de hac voce: *Omnis vox est sonus*.

144. Igitur definitio, alia est *objectiva*: alia *formalis*: Definitio objectiva sunt prædicata ipsa, quæ realiter identificantur cum objecto definito, & per quæ illud explicamus, v. g. Animalitas ipsa, & rationalitas, per quæ explicamus hominem. Definitio formalis est nostra cognitio, aut locutio, qua explicamus essentiam rei, v. g. hæc cognitio, seu hæc vox *Animal rationale*: Cum objecta, voces & cognitiones, eodem modo insonent auribus, facile confunderis, nisi reflexè ad veritas distinctionem. Hæc definitio formalis non est secunda illa operatio intellectus, quæ vocatur iudicium, v. g. non est totum hoc *Homo est animal rationale*: nam hic includitur ut subiectum ipse homo, qui est definitum; Definitum autem sub ista voce, seu expressione, sub qua est definitum, non debet ingredi suam definitionem.

145. Est igitur definitio apprehensio tantum, & consequenter ad primam operationem intellectus spectat, quia definitio est illud, quod intellectus terminorum conscius primò apprehendit in objecto; cumque illud quod primo apprehendimus in objecto, quando ipsum bene penetramus, sit genus, & differentia: hoc est sit unum quo objectum est simile aliis, & alterum quo est prorsus dissimile, & quod est prima origo cæterorum attributorum, sive proprietatum objecti: iude est quod definitio debet constare genere, & differentia: genere inquam infimo, ut est animal respectu hominis, & differentia infima quoque, ut est rationale: Et hinc nascitur, quod definitio dicatur *Oratio explicans ipsum quod quid erat esse rei*, nam querenti, *Quid est hæc res*, resp. per naturam, & essentiam illius: & ideo natura, & essentia vocantur *Quidditas*, hoc est id, per quod respondetur ad illud *Quid*: cumque intra essentiam cuiuslibet rei imbibantur illa duo genus, & differentia, hæc de causa omnis definitio quippe quæ constat genere, & differentia est oratio explicans ipsum quod quid erat esse rei.

146. Secunda Divisio. Definitio alia est nominis, nempe quæ explicat definitionem nominis, v. g. *Dux qui alios ducit*: magnanimus *qui magnum habet animum*: ad huiusmodi definitionem spectant omnes ethimologiæ, & nomenclaturæ: alia est definitio rei: nempe quæ

★

quæ explicat essentiam objecti nihil curando de nomine v. g. animal rationale: Tertia definitio rei; alia est accidentalis, alia essentialis: accidentalis est illa, quæ explicat rem per effecta, aut causas extrinsecas: cumque causa extrinseca possit esse aut *efficientis*, aut *finalis*, aut *exemplaris*, aut *materialis*: inde est quod definitio accidentalis possit esse per causam efficientem, v. g. definitio tonitruum *fragor ab exhalatione impacta in vapores*: & possit esse per causam exemplarem v. g. animal factum *ad imaginem Dei*, quod competit homini: & possit esse per causam finalem, ut *animal factum ut fruatur Deo in æternum*, quod etiam competit homini: & possit esse per causam materialem ut *impossibile existere, ac operari sine corpore*, quod competit animabus brutorum.

147. Tertia: Definitio essentialis alia est descriptiva, nempe quæ explicat rem per essentialem proprietatem, quæ nec est genus, neque differentia infima, ut animal risibile: hoc namque prædicatum est quidem essentialiter homini, sed nec est genus neque differentia infima: item omnipotens, sapiens, iustus, &c. quæ sunt prædicata essentialia Deo, sed non instar generis, aut differentię, atque idcirco definitio Dei data per hæc attributa est definitio descriptiva: alia est definitio essentialis *strictè*, & *proprie talis* nimirum quæ explicat immediatè essentiam rei: cumque hæc soleat esse duplex (non quia vere duplex sit, quia unaquæque res una sola fruitur essentia; sed quia dupliciter consideratur inter disputandum) una metaphysica altera physica: ideo definitio strictè essentialis est duplex, una *metaphysica*, scilicet illa quæ explicat genus infimū, & infimam differentiam rei ut *animal rationale*, quæ duo prædicata vocantur partes metaphysicę hominis, quia verè nō sunt duo neque sunt partes; sed apprehendimus illa, ut duo, atque ut partes, ut possumus super illis philosophari: altera *physica*: illa nimirum quæ explicat essentiam rei per causas intrinsecas ipsius, per partes essentielles, per essentialia constitutiva, v. g. *complexum ex corpore, & animali rationali physicè unitis*: est definitio essentialis physica hominis nam corpus, & anima physicè realiter inter se distinguuntur, & sunt partes essentielles hominis.

2. I I.

148. **Q**uod attinet ad regulas, seu qualitates bonæ definitionis sunt quatuor: prima quod sit clarior suo definito: quia omnis explicatio debet esse clarior re explicata: sed omnis definitio est explicatio: ergo omnis definitio debet esse clarior definito: ob hanc rationem solet exprobrari, *definis idem per idem*, hoc est ponis definitum in definitione, quod vitium est contra hanc regulam: tamen non sit vitium quod definitum ponatur tanquam subiectum, de quo prædicatur definitio, sed quod ponatur tanquam pars ipsius definitionis: hæc regula intelligenda est non de definito, & definitione *objectivis*, sed de formalibus: quia quod est clarum vel obscurum non sunt objecta in se ipsis; sed cognitiones, aut vocabula, quibus utimur ad exprimendum illa: non est res ulla, quæ non possit exprimi obscurissimis terminis nec res ulla, quæ non possit exprimi clarissimis: hoc nota, ne decipiaris frequentibus locutionibus appingentibus rebus ipsis modò claritatem modò obscuritatem, quæ castigatè loquendo solis cognitionibus inhærent, aut verbis.

149. Secunda, quod definitum, & definitio sint termini convertibiles, id est ex uno sequatur alter, & è converso *est homo: ergo animal rationale: est animal rationale: ergo homo*: hic adverte duo: unum est quod hæc regula procedit de definito, & definitione *objectivis*, ut in nupero exemplo; non de formalibus, quatenus hæc cognitio *homo* v. g. sit hæc cognitio *animal rationale*, quæ est definitio formalis, aut viceversa (patet enim hoc esse falsum) sed quatenus ex eo quod una cognitio sit vera, inferatur alteram quoque esse veram, & viceversa.

150. Alterum est quod hæc regula procedit de definito *adequatè & finito*: hinc licet animal rationale sit adæquata definitio Petri inspecti secundum rationem communem hominis; non tamen inspecti secundum totam suam realem essentiam, quia de essentia illius absolutè, & simpliciter non solum est esse hominem, sed esse talem singularem, atque individuum hominem: quia vero definitiones non solent esse de singularibus, sed de universalibus, ideo passim dicimus totam essentiam Petri esse *animal rationale*, & differentiam individualement esse exera essentiam; sed intelligendum hoc de essentia *specificè tantum sumpta*: igitur licet valeat *est Petrus: ergo animal rationale*; non valet è converso *est animal rationale: ergo est Petrus*.

151. Tertia, quidquid prædicatur, aut negatur de definito debet

bet prædicari etiam, aut negari de definitione, & vicissim: hæc regula intelligenda est de definito, & definitione objectivis; non verò de formalibus, quia, ut jam diximus, definitum, & definito formalis sunt cognitiones, aut verba invicem realiter distincta, ergo non est necessarium quod quidquid convenit uni conveniat alteri. Quarta: definitio debet convenire omni, & soli definito: quia ut diximus debet converti cum illo: si autem non conveniret omni, ex definito non sequeretur definitio: si non conveniret soli, ex definitione non sequeretur definitum: ergo debet convenire omni, & soli suo definito: & hæc est species definitionis, qua plerumque sumus contenti in rebus passim occurrentibus, & quæ non sunt ita notæ sicut homo: si invenimus definitionem omni, & soli ei definito convenientem, quiescere solemus in rebus præsertim supernaturalibus.

152. Denique vitium fugiendum in definitione est notissimum illud, *abundare in superfluis, & deficere in necessariis*: id est omittere differentiam specificam, aut quasi specificam rei, de qua est sermo, quæ differentia est ultimum constitutivum rei, & primum distinctivum ipsius: & ex alia parte farcire definitionem terminis aliis.

153. Secundum instrumentum sciendi est *Divisio* utilissima, & necessaria ad aperiendum involutas res, & veritates. Definitur sic: *Oratio totum in suas partes distribuens*; est triplex, *Logica, Physica, & Metaphysica*, quas disp. 2. cap. 2. exponemus. Divisio logica alia est substantiæ per substantias, nempe quando id, quod dividitur, (quodque vocari solet *Divisum*) & ea, inter quæ dividitur (quæ vocari solent membra dividendi) omnia sunt substantia, ut animal aliud rationale, aliud irrationale. 2. Accidentis per accidentia, *album aliud dulce, aliud amarum*, ubi divisum, & membra dividendi includunt aliquid accidentale. 3. Subjecti per accidentia, ut *homo alius albus, alius niger*. 4. Accidentis per subjecta, ut *album aliud homo, aliud equus*.

154. Divisio physica alia est in partes essentielles, ut *hominis una pars corpus, altera anima*. Alia in partes integrantes, id est in partes, quæ component rem, sed non sunt de ipsius essentia, & hæc est duplex; una in partes integrantes primarias, nempe sine quibus non potest naturaliter existere illa res, ut *hominis una pars cerebrum, altera cor*. Altera in partes integrantes secundarias, ut *hominis una pars est manus, altera est pes*: quando autem, & quomodò arguatur bene inter divisum, & membra dividendi dicemus loco citato.

155. Leges bonæ divisiones sunt. 1. Quod unum membrum divi-

dividens præcisè ut dividens non imbibatur in altero; quia si imbibitur, non dividitur ab illo; & licèt in hac divisione, *substantia alia est completa, alia est incompleta*; hæc secunda imbibatur in illa ut pars illius; verumtamen distinguitur realiter ab illa, sicut anima ab homine; & hæc species non inclusionis in altera sufficit ut sit bona divisio hæc. 2. Lex, quòd divisum inveniatur in membris dividendis ut inveniatur in hac, *homo alius Petrus, alius Ioannes*; sed hæc lex solùm viget in divisione totius logici; 3. Quòd omnia membra dividendia simul sumpta, non autem unum singillatim adæquent divisum; quia membra dividendia sunt partes divisi: partes autem collectivè sumptæ, sed non distributivè debent esse æquales toti. Denique adverte: quando inter arguendum dividit, seu distinguit importunè alter propositiones, ut pulvere, ac fumo excitato non videatur veritas, quatuor tibi aperit vias, per quarum aliquam potes eum invadere 1. Refutando terminum, quem ille concedit. 2. Inferendo tuam conclusionem ex illo eodem, quod concedit. 3. Probando terminum, quem negat. 4. In sistendo veritati tuæ conclusionis non obstante falsitate illius quod negat.

2. I I I.

156. **A**rgumentatio, quæ est scopus cæterorum instrumentorum sciendi est *Oratio, in qua ex argumento explicato altera pars contradictionis concluditur*. In omni argumentatione, sive discursu possumus hæc quinque inspicere. 1. Qualitatem, & conditionem propositionum ibi intervenientium. 2. Illationem ex illis. 3. Medium, seu argumentum, seu quod idem est, ratio ibi assumpta ad probandum. 4. Artificium, seu dispositio, quâ instruitur ratio. 5. Fontes, seu origines argumentationum.

157. Quoad qualitatem illarum propositionum possunt esse 1. *Evidentes*, (si nimirum clarè omnino proponant suum objectum, & clarè etiam connexionem illius cum obiecto consequentis formalis) & evidentia potest esse *metaphysica*, aut *physica*, aut *parrè moralis*. 2. Possunt esse obscuræ, si non multa claritate expriment suum objectum, aut connexionem hujus cum consequente. 3. Possunt esse purè probabiles, si ratione tantum prudente, sed non innegabili fulciantur. 4. Possunt esse certæ, quòd continget quando propositiones ipsæ, licèt arduæ, obscuræ, ac difficiles, connexionem tamen habeant cum veritate consequentis, ut experimur in actibus

Fidei, qui quanquam sint obscuri, & consequenter non sint evidentes; nihilo tamen minùs sunt certissimi, quia infallibiliter connectuntur cum suis objectis ex suppositione, quòd illa significant, quæ revelata sunt per Deum. 5. Possunt esse incertæ, nimirum quando non habent connexionem cum veritate consequentis. 6. Possunt esse fallaces, nempe quando veritas ipsarum, & connexio cum consequente apparent esse evidentes; sed sunt falsæ. 7. Possunt esse affirmativæ, aut negativæ. 8. Possunt esse naturales, aut supernaturales.

158. Si in argumentatione consideres illationem consequentis ex antecedenti, illa potest esse logica, aut metaphysica, aut physica, aut moralis; quia his omnibus modis potest esse connexio unius cum altero: item illatio potest esse evidens, obscura, certa, incerta, probabilis, aut fallax, ut nuper dicebamus.

159. Si 3. consideres rationem, seu medium terminum assumptum, potest argumentatio esse triplex, nempe à priori; à posteriori; à comitanti; argumentatio à priori est quando medium præter connexionem est aliquatenus priùs objecto consequentis; non quia absolute, ac simpliciter existat in rebus ante illud (ut minùs bene interpretatus fuit Godoy Arriagam) sed quia tale medium saltem ratione nostra sit causa, & radix cæterorum, ut conceptis verbis loquitur Arriaga; unde hæc argumentatio est à priori, *homo est rationalis, ergo est admirativus*.

160. Argumentatio à posteriori fit quando ratio assumpta est posterior saltem ratione nostra respectu objecti consequentis, & insuper est connexa cum illo, v.g. *ignis comburit, ergo habet virtutem combustivam*; combustio, quæ est medium, seu ratio assumpta, est effectus virtutis combustivæ, & hoc est esse posteriorem respectu ipsius. Argumentatio à comitante fit quando medium neque est causa, neque effectus consequentis; intimè tamen cum illo connectitur, ut contingit in multis attributis Divinis. Rursus argumentatio à priori potest esse quadruplex. 1. A priori *moraliter*, scilicet quando medium est principium morale rei, quam probare intendis, v.g. *Pater suus jubet Petrum assistere Sacro; ergo ille cum sit ingenuus indolis, assistet Sacro*. 2. A priori *physico*, nempe quando medium est causa physica consequentis, v.g. *Ignis applicabitur huic sulphuri, ergo hoc ardebit*. 3. A priori *logico*, ut quando medium est logicè prius, seu universale, sub quo continetur conclusio, v.g. *Omnis mortalis degit sub Luna; sed Henoc, & Elias sunt mortales; ergo degunt sub*

M. Godoy
disp. 3. de
Deo n. 49
P. Arriaga
disp. 2.
de Deo
sect. 2.
§ Fatcor.

sub Luna. 4. A priori metaphysico, ut quando medium, seu ratio fumitur ex definitione metaphysica rei.

161. Licet enim definitum, & definitio utpote convertibilia, videantur se habere comitanter; verumtamen cum definitio sit illud, quod primario apprehendimus in re definita, sitque prima radix, & origo omnium proprietatum ipsius, non improprie vocatur definitio *prior definito*; unde argumentum à definitione est argumentum à priori: v. g. Omne rationale est capax liberi arbitrii, sed omnis homo est rationalis, ergo omnis homo est capax liberi arbitrii. Hæc species argumentationis à priori est quadruplex, 1. A prædicato generico, v. g. *Omne animal est sensibile; sed omnis homo est animal, ergo omnis homo est sensibilis.* 2. A proprietatibus prædicati generici, v. g. *Nihil quod movetur progressivè est ubique; sed omnis homo utpote animal movetur progressivè; ergo nullus homo est ubique.* 3. A prædicato specifico infimo, v. g. à prædicato rationalis. 4. A proprietatibus hujus, v. g. à risibilitate.

162. Si 4. consideres in argumentatione dispositionem, seu artificium, quo armantur propositiones, est quadruplex, videlicet *Enthymema, Dilemma, Inductio, Syllogismus*, præter illos sex modos, quos dabimus disp. 2. cap. 1. Enthymema est argumentatio, in qua ex una propositione infertur altera: *Est homo, ergo est animal*; prima vocatur *antecedens*; secunda *consequens*; & quando est æquivocum, ne dicas, distingo consequentiam, (hæc enim nunquam est æquivoca, sed semper bona, aut mala; & vox *ergo* nunquam est æquivoca) sed distingo consequens; quia consequens ipsum formale constare solet terminis æquivocis: hoc genus arguendi nunquam concludit ex vi formæ, aliàs in quacumque materia, sive vera, sive falsa concluderet, ut syllogismus formalis; concludere tamen solet ex vi materiæ, eò quod antecedens objectivum sit intimè connexum cum objectivo consequente; & tunc licet argumentatio hæc non sit formalis, non potest negari consequentia concessio antecedente.

163. Quia concessio fundamento connexionis non potest negari terminus, nisi quando connexio est purè moralis, aut purè physica, quam aliæ causæ naturales fortiores, vel saltem Deus infringere potest. Contingit interdum, quod consequens sit verum, sed consequentia mala; v. g. *Existit Deus; ergo Sol lucet*; tunc sine præjudicio veritatis consequentis negatur consequentia, sed nunquam potest negari consequens ut falsum (tamen si aliàs falsum sit) ab eo qui

concedit antecedens, & fatetur bonam esse consequentiam, quia ex vero reali, aut existimato non potest sequi metaphysicè, nisi verum reale, aut existimatum.

164. Dilemma, quod etiam vocatur argumentum bicornè, solet esse efficacissimum, & fit assumendo duo extrema, vel contradictoria, vel saltem contraria ex numero illorum, quæ non habent medium, & ex unoquoque concludendo aliquid contra adversarium, v. g. Vel vidisti Regem, vel non vidisti; (ecce duo brachia stringentia adversarium, à quibus non potest se se explicare, quia non potest negare simul duo contradictoria) si vidisti; ergo falsum dicis, quando dicis te non vidisse Regem. si non vidisti; ergo falsum dicis, quando dicis talia, & talia, quæ non possunt contingere quin Regem videris.

165. Ut hæc argumentatio sit efficax, requiritur 1. Quòd extrema, quæ assumis, non habeant medium, hoc est, non possint simul deficere, saltem juxta sententiam tui adversarii; aliàs impune ille negabit dilemma, inquiens: imò esse falsa. 2. Quòd ex uno extremo bene sequatur quod infers; aliàs ille concessio dilemmate negabit consequentiam primam. 3. Quòd ex altero extremo sequatur etiam illud quod infers; aliàs concessio dilemmate, & primo membro, negabit ille secundum; est ergo complexa hæc argumentatio resultans ex illa disjunctiva, in qua stat dilemma, & ex duplici enthymemate; unde irrita erit, si aliquod ex his tribus deficiat; ubi adverte, quòd licet duo tantum extrema posuerimus, possunt poni tria, quatuor &c. sed oportet nullum prætermittere, quia aliàs per hiatum illum elabatur adversarius; v. g. Hoc elementum vel est terra, vel est aqua; si terra &c. nihil valet, quia dicet adversarius esse ignem, aut aerem.

166. Inductio coincidit cum assensu supra explicato, & est argumentatio à singularibus sufficienter enumeratis ad universalialia; v. g. Terra est corpus; Aqua est corpus; Aer est corpus; Ignis est corpus: ergo omne elementum est corpus: ut hæc argumentatio valeat, necesse est numerare omnia singularia, aut expressè, aut saltem illis terminis, & in cæteris simili modo, v. g. Petrus suscepit Spiritum Sanctum, Andreas suscepit, & similiter de reliquis; ergo omnes Apostoli susceperunt Spiritum Sanctum. Cùm enim falsitati propositionis universalis sufficiat falsitas unius singularis contenti in illa universali, si tu omittas hoc singulare, concedet adversarius cætera omnia, & negabit conclusionem universalem.

167. Syllogismus est argumentatio, in qua quibusdam positis alterum quid à positis necessariò sequitur eo quod hæc sint malus enim syllogismus est syllogismus sicut homo pictus: itaq; in omni syllogismo debent esse tres propositiones: ultima vocatur *conclusio*: duæ priores dicuntur *præmissæ*: & prima dicitur *major*, secunda autem *minor*: præterea in omni syllogismo debent esse tres termini: unus qui vocatur *medium*, & est ille qui ponitur in majore, atque minore, sed non in conclusione: alii duo dicuntur *extremities*: & una dicitur *extremitas major*, nimirum ea, cujus identitas, vel distinctio cum medio solet enunciari in majore; altera *extremitas minor*, cujus identitas, aut distinctio cum medio eodem solet enunciari in minore: & denique hæc eadem extremities debent poni in conclusione v.g. omne animal est vivens: omnis homo est animal: ergo homo est vivens: est syllogismus perfectus: prima propositio est major: secunda minor, & ambæ dicuntur præmissæ: tertia dicitur conclusio, quæ necessariò sequitur ex illis duabus: & cum ab illis sit distincta, subsistit quod *quibusdam positis*, hoc est concessis illis duabus præmissis alterum quid à positis, hoc est illa tertia propositio, *necessariò sequatur eo quod hæc sint*, hoc est propter vim, & connexionem veritatis præmissarum cum veritate conclusionis: ille terminus *animal* est medium, nam vide illum in majore, & minore, sed non in conclusione: illi autem *vivens*, & *homo* sunt extremities: vivens extremitas major, quia est in majore: homo extremitas minor quia est in minore: ambo autem coeunt in conclusione illa omnis homo est vivens.

168. Similiter in syllogismis negativis: nullus animal est lapis: omnis homo est animal: ergo nullus homo est lapis: *animal* est medius terminus sonans in majore, & minore: *lapis* est extremitas major sonans in majore: *homo* est extremitas minor sonans in minore: & homo a lapis concurrunt in conclusione, quæ negat unum de altero quin audiat ibi terminus *animal*: porro vis, energia, robur, atque efficacia hujus argumentationis stat in eo quod præmissæ formales proponant intellectui rem ineluctabiliter, irresistibiliter, infallibiliter, idest metaphysicè connexam cum veritate conclusionis formalis: unde fit quod intellectus non rudis, sed terminorum conscius concessis semel præmissis debeat concedere conclusionem, vel saltem non negare illam (de quo est quæstio inter autores infra resolvenda) cum enim nequeamus colloqui aut disputare cum aliis de re ulla, nisi utentes cognitionibus, & verbis, ut extorqueamus ab alio tale, aut tale esse à parte rei, compellimus ipsum ut concedat esse veram illam propositionem,

quæ

quæ vocatur conclusio formalis : ea autem jam concessa jam habemus rem esse, aut rem non esse independentem à nostris cognitionibus tanquam à constitutivis objectivæ realitatis, licet non independentem à nostris cognitionibus, & verbis tanquam necessariis, ut loquamur, & disputemus.

169. Syllogismus est multiplex : alius de medio singulari nempe quando medium multiplicari non potest v. g. *Deus est pius; hæc Persona divina est Deus : ergo hæc Persona divina est pia* : medium est ille terminus *Deus* : & jam vides Deum neque esse neque posse esse multiplicem : alius est de medio communi quales sunt quos nuper dabamus : ambo possunt esse in quadruplici differentia : uni quippè syllogismi sunt *copulativi* : alii *disjunctivi* : alii *conditionales* (quos fusè exponemus ad finem dis. 2.) alii *Aristotelici*, idest fabricati juxta regulas hujus Philosophi, quales sunt illi duo affirmativus, & negativus, quos nuper dabamus : denique syllogismi possunt esse *demonstrativi* nempe quando præmissæ, ac ipsarum metaphysica connexio cum conclusione sunt metaphysicè evidentes, & possunt esse *probabiles*, nempe quando ambæ præmissæ, vel una, vel illarum connexio cum conclusione est prudenter credibilis, sed non est evidens, & possunt esse fallaces, ac sophistice, nempe quando ambæ præmissæ, vel una, vel connexio dicta apparent certissimæ, vel sunt falsæ, aut æquivocæ.

170. Hi syllogismi Aristotelici tripliciter possunt fabricari juxta trinam figuram, quam dedit hic Philosophus : ex quorum combinatione sexdecim resultant modi arguendi efficaciter, uni perfecti, atque directi : alteri indirecti atque imperfecti, sed legitimi : hæc omnia aperiemus eadem dis. 2.

§. I V.

171. **G**Ravis occurrit hic difficultas, in cujus resolutione non conveniunt Authores : & est, *an præmissa necessitent ad assensum conclusionis* : siquidem Aristoteles in definitione syllogismi nuper data posuit *alteram quid à positis necessariò sequitur* : ut autem statum, & quidditatē quæstionis capias adverte sex pro difficultatibus solvendis : 1. non est quæstio de præmissis obscuris, incertis, aut merè probabilibus : quia hæ per se præcisè non rapiunt intellectum ad assensum conclusionis, sed tantum movent aliquando magis, aliquando minus rationaliter : & non est idem *movere*, ac *necessitare* : in hujusmodi igitur præmissis, ut intellectus assentiatur conclusioni
opus

opus est imperio voluntatis , idest , ut assentiamur necesse est *quod velimus* assentiri : constat ex principiis fidei , quæ licet sint penitus certa , & infallibilia , verumtamen quia sunt obscura non corripiunt necessarium intellectum ad credendum , sed est necessarium quod gratia Dei adjuti *velimus* credere , & ut credamus .

172. Secundo nec est quæstio de quavis evidentia , & claritate : quoniam evidentia tantum physica non necessitat per se præcisè intellectum , quia potest Deus illam falsificare faciendo quod non sit in rebus id de quo habemus evidentiam tantum physicam : sic post consecrationem Missæ datur evidentia physica saltem mediata panis , & vini : sensu namq; percipimus accidentia propria aliarum substantiarum , puta ignem lapidem &c. & ob hanc causam dicimur habere evidentiam physicam saltem mediatam ignis lapidis &c. & tamen non sumus necessitati ad judicandum ibi esse substantiam panis , & vini ; imò tenemur credere ibi jam non esse , quia Deus operans ut Author supernaturalis sicut miraculosè infringere solet connexiones naturales , ita naturales evidencias purè physicas : est ergo quæstio de præmissis prorsus evidentibus metaphysicè , v. g. *omne animal est vivens : omnis homo est animal* .

173. Tertiò nec de his utcumque , sed respectivè ad intellectum , qui clarè , evidenterque percipiat non solum illarum veritatem , sed insuper connexionem hujus veritatis cum veritate conclusionis v. g. *ergo omnis homo est vivens* : quod enim unis est clarum , & evidens , aliis solet esse obscurum , aliis falsum : est igitur quæstio an præmissæ metaphysicè evidentes necessitent intellectum intimè percipientem illas , & illarum connexionem cum conclusione ad assensum hujus : & quidem non est sermo de necessitate metaphysica , sed tantum physica , & naturali , qualis est necessitas de eo quod videas objectum quando illud est præsens , adest lux , & oculos attentos habes : quia non sequentur duo contradictoria ex eo quod habitis illis duabus præmissis negaret Deus suum concursum , ut prorumperes in eam conclusionem : *ergo omnis homo est vivens* , quam utique sine adjutorio , & concursu Dei concipere non valemus .

174. Quartò nec est quæstio de quolibet assensu conclusionis : nam certe præmissæ ipsæ necessitant ad se ipsas : & etiam est certum quod ipsæ sunt aliquis assensus conclusionis , nempe assensus virtualis , & mediatas : est ergo quæstio an necessitent ad assensum alium distinctum ab ipsis , qui sit assensus expressus . Quintò nec est quæstio de quovis assensu expresso ; sed de directo , ac formali : ex illis enim præmissis

missis non solum sequitur sic : *ergo omnis homo est vivens* : sed etiam sic , *ergo aliquod vivens est homo* : & etiam sic , *ergo aliquis homo est vivens* : cæterum hoc non est quia illæ præmissæ solæ , ac per se præcisè ad hoc necessitent ; sed quia ex aliis principiis logicis constat quod ex illa universalis *omnis homo est vivens* sequitur sua subalterna , nempe *aliquis homo est vivens* , & sua convertens *aliquod vivens est homo* .

175. Sextò nec est quæstio de quovis directo assensu conclusionis ; sed de hoc determinatè *omnis homo est vivens* his , vel æquivalentibus terminis quia ex illis præmissis non solum sequitur *omnis homo est vivens* : verum etiam sequitur *omne animal rationale se movet ab intrinseco* : sed hoc non est quia illæ solæ præmissæ ad hoc necessitent ; sed quia aliunde scimus ex definito bene sequi definitionem : & insuper animal rationale esse definitionem hominis , & *movere se ab intrinseco* esse definitionem viventis .

176. Casus itaque ac status quæstionis est an quando intellectus evidenter judicat evidentiâ metaphysicâ veritatem præmissarum , & ipsarum connexionem cum veritate objectivâ conclusionis , & consequenter quando sic evidenter apprehendit hujus veritatem (non enim possumus cognoscere intimam connexionem rei *A.* cum *B.* quin apprehendamus saltem rem *B.* ut suo loco probamus) sit physicè necessitatus ad assensum jam dictum objecti conclusionis , vel dicendo sic mentaliter *ita est* : vel sic *omnis homo est vivens* : vel sic : *verum est quod omnis homo est vivens* : vel alio modo huic quoad hoc æquivalenti : ubi jam vides quod non loquimur de præmissis per quas *judicemus* , sed per quas evidenter *apprehendamus* veritatem conclusionis : non enim omnis apprehensio est iudicium .

177. Divisi sunt Authores : uni absolutè affirmant : alii absolute negant : alii distinguunt inter syllogismos innitentes identitati extremorum cum medio , & syllogismos innitentes connexioni metaphysicæ antecedentis cum cōsequente : concedunt hos , & negant illos necessitare ad assensum conclusionis : alii distinguunt inter necessitare *positive* , & *quoad exercitium* ad assensum conclusionis : & necessitare *negative* solum , & *quoad speciem* : concedunt hoc , & negant illud : res est gravis , & quæ non raro rearsurgit in Philosophia , & Theologia maxime ad tractatum de fide , ubi quæritur an evidentiâ Divinæ revelationis stet cum merito fidei .

178. Sit conclusio : præmissæ juxta sex illas jam datas explicationes necessitant intellectum ad assensum conclusionis , non solum negative , seu quoad speciem : sed etiam positive quoad exercitium : probatur .

batur 1. part. præmissas necessitare negativè, seu quoad speciem ad assensum conclusionis nihil aliud est à parte rei, quàm quod intellectus terminorum conscius non possit naturaliter dissentire conclusioni in sensu composito assensus præmissarum: hoc est quod non possit judicare sic *non minus homo est vivens* quando ut evidens judicat omne animal esse vivens, & omnem hominem esse animal: hoc, & non aliud significant illa verba, necessitare negativè, seu quoad speciem: at quoties intellectus judicat evidenter illa duo, & insuper connexionem illorum cum veritate conclusionis, naturaliter nequit judicare conclusionem esse falsam, seu judicare *non omnem hominem esse viventem*: quamvis possit judicare aliud, ex quo per consequentias sequatur *non omnē hominem esse viventem*; possit inquam judicare, quia non bene advertit naturam oppositionis, & connexionis rerum: ergo præmissæ necessitant negative, seu quoad speciem ad assensum conclusionis.

179. Probatur minor: quoties objectum evidenter apparet intellectui, ut verum, nequit naturaliter illud judicare ut falsum: sicut nequit illud judicare ut verum quando sibi evidenter apparet ut falsum: nempe quia sicut objectum formale assensus est veritas: ita objectum formale disensus est falsitas, & nulla potentia valet operari contra suum objectum formale v. g. oculi non possunt videre sine luce, & colore, aures non possunt audire sine sono &c. at quoties intellectus evidenter judicat illam veritatem, & connexionem præmissarum, contingit quod objectum conclusionis ipsi evidenter apparet, ut verum: nam apparet ut scientificum, idest ut habitum per demonstrationem: ergo quoties intellectus evidenter judicat illa duo, naturaliter nequit judicare illam conclusionem esse falsam: potest quidem illam ore negare contumaciter; potest item illam mente negare distrahendo intellectum ad alia, vel claudendo oculos ne videant veritatem præmissarum, & infallibilem connexionem cum veritate conclusionis, alterutrum namque ex his duobus passim fit à pervicacibus: ceterum durante, ac præsentē metaphysica evidentia præmissarum, & earumdem connexionis metaphysicæ cum conclusione, hanc negare ut falsam, tam non potest fieri naturaliter ab intellectu, quàm fieri non potest, quod durante dolore potentia sensitiva non distracta non sentiat, durante luce, & colore potentia visiva non distracta, non videat &c.

180. Tria possunt objici 1. objectum præmissarum, & objectum conclusionis apparent tanquam si essent diversa: ergo potest intellectus assentire uni & dissentire secundo: distinguo ant. ita tamen ut

K

pri-

primum evidenter appareat ut metaphysicè connexum cum secundo conc. (& hoc sufficit , ut rationalis intellectus assentiens primo non possit dissentiri secundo) ita ut non sic appareat connexum; nego aut. & consequentiam : quia esset contra statum questionis .

181. 2. In sensu composito hujus evidentie, *quæ sunt eadem uni tertio sunt eadem inter se* : Pater , & filius identificantur cum uno tertio, nempe cum Deitate : dissentitur intellectus huic conclusioni ergo Pater , & filius identificantur inter se. Resp. aut illa major, quæ sunt eadem uni tertio &c. ponitur in sensu prorsus universali nullam admittente explicationem : aut in sensu particulari : si primum , conclusio quidem esset bona, sed major illa est falsa : ergo non apparet nobis ut evidenter vera : si secundum , major est vera , sed conclusio non sequitur , quia ex puris particularibus nihil sequitur .

182. 3. In sensu composito evidentiæ probabilitatæ præmissarum potest excitari evidens apprehensio falsitatis conclusionis; ergo possumus dissentiri conclusioni : transeat totum : quia nos loquimur de præmissis metaphysicè evidentibus quoad veritatem & etiam quoad connexionem cum veritate conclusionis : in sensu autem composito geminæ hujus evidentiæ non potest excitari nisi in intellectu ignaro terminorum evidens apprehensio falsitatis conclusionis : præter quam quod cum probabilitas , & veritas sint res valde diversæ , non est difficile quod detur evidentia unius , & non detur evidentia veritatis , sed potius falsitatis : sic quando multi graves & pii homines unanimiter dicunt , & ponderosis rationibus probant Petrum non venisse (nempe quia ut homines falluntur) quem tamen tuismet oculis vidisti , habes evidentiam probabilitatis de eo quod ille non venerit , & simul evidentiam falsitatis .

§. V.

183. **P** Robatur jam secunda pars conclusionis , videlicet præmissas utramque evidentiam metaphysicam jam dictam habentes necessitare positivè quoad exercitium ad assensum conclusionis : & in primis non obscure docuit hoc Aristoteles in definitione syllogismi supra data per illa verba , *alterum quid à positis necessario sequitur eo quod sint* : atqui non sequeretur necessario illud alterum quid , idest conclusio , si intellectus posset suspendere illam , & habere se neutro modo , idest neque assentiendo neque dissentiendo : ergo positis præmissis dicto modo evidentibus nequit intellectus suspen-

pendere assensum conclusionis ; ergo illæ præmissæ necessitant positivè quoad exercitium : fatemur , quodd idem contingit in syllogismo legitimo , licet præmissæ sint pure probabiles ; immò licet sint falsæ ; sed hoc ideo est , quia semel concessæ periùde se habent ac si evidentes forent ; unde qui illas concessit , debet positivè concedere conclusionem si non est terminorum ignarus , vel retrogredi , & negare aliquam ex præmissis ; item nec obscure sequutus est hanc sententiam S. Ignatius scribens in Epist. Obedi. *Voluntatem non posse intellectum in hunc , vel illam partem defectere , ubi in unam partem cogit illum evidentia veritatis* ; verbum namque illud , *cogit* , satis indicat evidentiam veritatis necessitare intellectum , qui cum non sit potentia libera , non dat locum aliis explicationibus illius verbi , quas in aliis locis habet quando agitur de potentia libera .

184. Sed habemus argumentum a ratione ; quoties potentia non est libera , licet aliis subiecta sit voluntati , & habet omnia prærequisita ex parte sui ad operandum , necessariò necessitate naturali operatur positivè quoad exercitium , velit , nolit voluntas : at intellectus non est potentia libera , sicut nec potentia visiva , nec sensitiva , nec reliquæ distinctæ a voluntate : ergo quoties habeat omnia prærequisita ex parte sui ad judicandum v. g. *omnem hominem esse viventem* his , vel aliis æquivalentibus terminis , necessariò necessitate naturali id judicabit positivè quoad exercitium ; at quoties evidentia metaphysica judicat veritatem præmissarum , & metaphysicam illarum connexionem cum eo , quod omnis homo sit vivens , habet omnia prærequisita ex parte sui ad judicandum hominem esse viventem , (& quidem sub terminis distinctis ab ipsis præmissis formalibus , quia de hoc est quæstio) : ergo quoties evidentia metaphysica judicat veritatem præmissarum , & metaphysicam earundem connexionem cum eo , quod omnis homo sit vivens , necessariò necessitate naturali debet judicare per aliud novum iudicium his , vel illis terminis constans *omnem hominem esse viventem* ; ergo prædictus assensus præmissarum necessitat positivè quoad exercitium ad prædictum assensum conclusionis .

185. Major hujus discursus constat inductione omnium aliarum potentiarum , quæ non sunt liberæ ; quamvis aliis voluntati subiectæ v. g. quoties potentia visiva habet omnia prærequisita ex parte sui ad videndum , nempe quod oculi sint aperti , sani , & attentæ , quod objectum sit præsens , perfusum luce , & colore ; positivè quoad exercitium videt illud , velit , nolit voluntas : similiter quo-

ties potentia sensitiva habet omnia praequisita ex parte sui ad sentiendum, puta, quod ignis sit applicatus carni vivæ, sentiet, velit, nolit voluntas, & similiter de reliquis potentiis non liberis quantumcumque subiectæ sint voluntati: ergo quoties potentia non est libera &c.; potest quidem voluntas facere quod oculi claudantur, & sic non videbunt; potest item facere, quod spiritus sensitivæ potentia aliò distrahantur, & sic nullum vel non tantum sentiet dolorem, & similiter in aliis potentiis; cæterum quod apertis oculis, atque attentis, præsentemque objecto cum luce, & colore, objectum non videatur, hoc non potest facere voluntas; item quod valida inflicta plaga carni vivæ, & cum spiritibus ad sentiendum, caro non sentiat, hoc non potest facere voluntas, tametsi potentia sensitiva, & visiva aliis sint subiectæ voluntati: idem impræsentiarum; intellectus est subditus voluntati, quatenus hæc potest illum distrahere ad alia cogitata; verumtamen non est subditus voluntati, quatenus hæc possit facere ut habens intellectus omnia praequisita ex parte sui ad iudicandum per conclusionem formalem *omnem hominem esse viventem*; id non iudicet per conclusionem formalem: ratio autem est discrimen ipsum inter potentiam liberam, & non liberam: illa est quæ præsentibus omnibus præquisitis ad operandum, potest operari, & potest non operari: potentia autem non libera positis omnibus præquisitis ex parte sui ad operandum, non potest non operari, nisi agens creatum fortius tollat de medio aliquod ex illis præquisitis.

186. Probatur jam minor subsumpta in syllogismo scripto num. 183. si aliquod deficeret prærequilitum ad iudicandum per conclusionem formalem, *omnem hominem esse viventem*; maximè imperium voluntatis: idest quod voluntas velit intellectum id iudicare per conclusionem formalem; ad hoc confugiunt adversarii: sed hoc non subsistit, tum quia imperium istud non est prærequilitum ex parte intellectus ipsius, quia nec est cognitio neque principium physicum cognitionis, neque species objecti; sed dumtaxat est prærequilitum ex parte voluntatis; & nos loquimur de præquisitis ex parte intellectus; tum quia istud imperium solum est prærequilitum, quando objectum apparet obscure, ut contingit in rebus Fidei: at quando apparet solum probabiliter, ut in plerisque humanis negotiis: quia cum veritas obscura, aut mere probabilis non sit sufficiens per se præcise rapiendo intellectum in sui assensum: & cum ex alia parte intellectus ipse nequeat sese pro suo libito determinare, quandoqui-

dem

dem non est potentia libera: idcirco necesse est, quod ab alio determinetur ad assensum, vel determinetur ad dissensum: sed hoc aliud non potest esse nisi imperium voluntatis; ergo quando res sunt obscuræ, aut tantum probabiles est prærequisitum imperium voluntatis, verumtamen quando res apparet prorsus metaphysice evidens, est sufficiens per se præcise ad rapiendum intellectum in sui assensum, aut intuitivum, si evidentia fuerit intuitiva, aut abstractivum, si fuerit abstractiva.

187. Quemadmodum licet infinita Dei bonitas obscure a nobis cognita non rapiat nos necessariò in sui amorem; verumtamen si eam cognosceremus evidentia prorsus clara, & penetrante, licet abstractiva, ut forsitan cognita fuit ab aliquibus hominibus, ineluctabiliter corripere voluntatem in sui amorem: jam ratio sumitur ex eisdem exemplis aliarum potentiarum, quæ libertate non funguntur, sed voluntati sunt subiectæ; quoties omnes aliæ potentiæ non prærequirant istud imperium voluntatis ad operandum positivè quoad exercitium, quando ipsarum objectum est ipsis physicè præsens, & ipsæ non sunt aliunde impeditæ: idem dicendum est de potentia intellectiva, nisi speciale privilegium specialis exceptionis specialiter probetur: nimirum dicendum est, quod neque potentia intellectiva prærequirit imperium istud voluntatis ad judicandum per conclusionem formalem *omnem hominem esse viventem*, quando hæc veritas est illi metaphysicè præsens, seu evidens, & intellectus ipse non est aliunde impeditus per ignorantiam terminorum, aut per distractionem ad alia: at certum est, quod omnes aliæ potentiæ non liberæ, sed subiectæ voluntati non prærequirunt istud imperium, quando ipsarum objectum est ipsis physicè præsens, & ipsæ non sunt aliunde impeditæ, ut constat in potentiis visiva, sensitiva, auditiva, nutritiva &c. quo ergo jure, qua ratione, aut titulo eximitur intellectus ab hac regula generali? est ille quoad hoc, sicut potentia loco motiva, quæ sine imperio voluntatis nequit movere tibias, quando aliunde non urget irresistibilis impulsus; sed quando hic urget, non est necessarium, quod velis moveri; moveberis enim, velis, nolis: sic quando intellectum movet obscura, aut probabilis veritas, opus est imperio voluntatis, secus quando premit metaphysica veritas.

188. Obii. Quoties intellectus jam satisfecit objecto conclusionis, non rapitur necessariò, ut de novo ipsi satisfaciatur, alijs tenetur semel, & iterum repetere conclusionem formalem quamdiu
du-

duret evidentia præmissarum; sed per assensum harum jam satisfecit objecto conclusionis: quia satisfecit huic, & in hoc imbibitur objectum conclusionis v. g. veritas illa omnis homo est vivens, imbibitur in eis duabus, omnis animal est vivens; omnis homo est animal: ergo non est necessarium, quod de novo per alium actum, qui sit conclusio formalis, satisfaciatur objecto conclusionis. Confirmatur: positis eis præmissis possumus elicere conclusionem directam, vel indirectam: ergo illæ præmissæ non ita rapiunt intellectum, ut hic non maneat pendens ab imperio voluntatis, ut unam ex illis conclusionibus eliciat potius, quam alteram: alia leviora invenies apud Oviedo contrav. 9. logicæ puncto 4.

189. Ad objectionem respondeo: in primis non est absurdum, quod tandiù duret, aut repetatur in mente, licet non in ore illa conclusio formalis quamdiù durat, vel repetitur evidentia præmissarum; sicut tandiù durat, vel repetitur sensatio in corpore, quamdiù durat, vel repetitur plaga; & motus localis, quamdiù durat irresistibilis impulsus; deinde distinguo majorem: quoties jam satisfecit satisfactione debita ex vi præmissarum, non rapitur necessario &c. conc. ma. satisfactione alia nego: & proportionatè distincta minore, nego consequentiam: ex vi præmissarum debetur assensus objecto conclusionis distinctus ab ipsis præmissis juxta nostram rationem hic repetendam; præmissæ fundant debitum satisfaciendi objecto conclusionis, & nemo satisfacit debito per debitum ipsum; sed per illud, ad quod obligat debitum, quod semper est distinctum a debito ipso.

190. Ad confirmationem distinguo ant. Possumus elicere ore conclusionem directam, vel indirectam conc. (sed ad conclusionem vocalem non necessitant præmissæ); possumus elicere mente, nego ant.; quia nolumus, velimus, eliciemus mente illam conclusionem determinatè, cum qua determinatè appareant nobis evidenter metaphysice connexæ præmissæ; ergo eliciemus conclusionem directam, si eum hac determinatè appareant connexæ: eliciemus indirectam, si cum hac determinatè: eliciemus disjunctivè directam, aut indirectam, aut copulativè utramque, si præmissæ appareant nobis evidenter connexæ cum ea veritate copulativa, aut cum disjunctiva: ubi semper repetenda est ratio scripta num. 46.

CAPUT VIII.

Explicantur octo Locutiones. valde frequentes.

191. 1. **E**st *formaliter*: hoc syncategorema est valde æquivocum; quand oque nihil addit termino, cui adjungitur, sed solum removet æquivalentiam, aut virtualitatem: v. g. *ignis est formaliter calidus*, significat ignem esse calidum non æquivalenter, seu virtualiter, sicut piper, mel, vinum &c. sed verè, ac propriè: similiter *Petrus est formaliter Rex*, aut *formaliter Episcopus*, significat Petrum non esse æquivalenter, aut virtualiter regem, sicut Prorex, aut Episcopus, sicut est Vicarius generalis, sed verè, ac propriè sine ulla limitatione: aliquando significat idem, quod *immediatè* v. g. *essentia physica hominis stat formaliter in corpore, & anima*, idest stat immediate; non verò in alio trahente secum esse virtualiter corpus, & animam.

192. Aliquando significat rationem, seu motivum, seu fundamentum affirmandi, aut negandi verè rem aliquam v. g. *res formaliter ut vera*, non autem *formaliter ut bona est objectum intellectus*, è *converso formaliter ut bona*, non autem *formaliter ut vera est objectum*, *pro specificatione voluntatis* significat hoc, & nihil aliud, quod movet intellectum ad iudicandum, est *cognitio veritatis*, non autem *cognitio bonitatis*, è *converso*, quod movet voluntatem ad amandum, est *cognitio bonitatis*, non autem *veritatis*.

193. Aliquando significat idem, quod *ratione nostra*; cùmque ratio, seu consideratio nostra possit esse logica, id est spectans ad Logicam; aut metaphysica, hoc est, spectans ad Metaphysicam, aut alia quævis spectans in genere ad Philosophiam animasticam: hac de causa illud syncategorema *formaliter* quandoque alludit ad sensum logicum, v. g. *Homo formaliter est species: Universale formale est unum aptum esse in multis*; quandoque facit sensum metaphysicum, v. g. *Homo est formaliter animal rationale*, significat hominem definiri metaphysice per hæc duo prædicata; quandoque facit sensum purè animasticum, id est significantem aliquam aliam cognitionem, v. g. *Veracitas, & sapientia sunt objectum formulæ Fidei*, rectè hunc sensum, *Cognitio veracitatis, & sapientia est quæ movet, vel id quo Deus movet nos ut credamus ipsius verba*; quando autem habeat unum, quando alium ex his sensibus deprehendes ex circumstantiis: quæ si æqui-

æquivocæ fuerint, debes distinguere prædictum terminum *formale*, aut *formaliter*, & concedendo illum in sensu vero, negare in falso.

194. 2. Locutio *Primo intentionaliter*; *secundo intentionaliter*; scito tres esse quæstionum classes in tota Philosophia, & Theologia; una est earum, in quibus tractamus, disputamus, evolvimus res, prout sunt in se ipsis coram Deo independentes à nostris cognitionibus, reflexionibus, considerationibus, speculationibus; & tunc dicimur disputare in sensu directo, seu *primo intentionaliter*; & tunc tam improprium, & absonum est recurrere (excepto si fiat per modum extranei exempli) ad nostras præcisiones, reflexiones, & considerationes, quàm esset recurrere ad quæstiones architectonicas, sutorias, vel sartorias quando disputantur res astronomicæ, seu Divinæ: alia classis est quæstionum, in quibus agimus de rebus, non prout sunt in se ipsis; sed prout à nobis cognitis; & tunc dicimur disputare in sensu reflexo, seu *secundo intentionaliter*; & tunc tam dissonum est recurrere ad realitates, & ad id quod contingit independentes à nostris cognitionibus, quàm recurrere ad has quando disputamus de realitatibus ipsis.

195. Cùm autem inter nostras cognitiones unæ spectent determinatè ad Logicam, aliæ ad alias scientias, hinc resultat tertia classis quæstionum, in quibus agimus de rebus, non prout sunt in se coram Deo: non item ut à nobis cognoscuntur per cognitiones proprias Logicorum; sed prout à nobis cognoscuntur per cognitiones spectantes ad alias scientias, ut quando dicimus: *Actio ut consona, ut dissona conscientiæ*: hic etiam est sensus reflexus, & tunc etiam tam absurdè confugies ad realitates, vel ad illum alium sensum reflexum Logicorum, quàm nuper dicebamus: hoc diligenter nota, quia frequenter inter disputandum magna caligo excitatur, & magna fraus committitur ab alterutris, quia incautè, vel subdolè transeunt ex quæstione in uno horum sensuum ad quæstionem in alio penitus impertinente.

196. 3. Locutio est de *Constitutivis*, & *Connotatis*; Constitutiva sunt illa, quæ sunt partes essentialiter componentes rem, de qua fuerit sermo. Connotata sunt illa, quæ non sunt partes essentielles rei, sed sunt id, sine quo res non potest existere vel ex sua natura, vel ex aliena institutione; sic corpus non est connotatum, sed constitutivum creaturæ humanæ completæ, quia est pars essentialis hujus; Creator verò non est constitutivum, sed connotatum ejusdem Creaturæ; quia Creatura sub his terminis, sub hac luce, & expressione

Cre-

Creatura ostendit nobis intimam, & essentialem connexionem cum Creatore; sed non constituitur essentialiter per Creatorem sicut per corpus, animam, aut unionem, quandoquidem omnis *Creatura* distinguitur adequatè à Creatore.

197. Hic nascitur 4. Locutio de *Recto*, & *Obliquo*; quod obliquum perperam confundunt aliqui cum connotato, & detorquent quæstiones de re ad quæstiones de voce: igitur multoties contingit, quod aliquod complexum, seu concretum, seu denominatio, seu aggregatum, seu effectus formalis (ne terrearis multitudine vocum, quia hæ omnes solent significare idem) essentialiter imbibat duo, sed equivocè, atque inequaliter: unum tanquam id, quod immediatè, ac directè affirmatur, aut negatur quando affirmatur, aut negatur illud complexum: vel tanquam id, de quo affirmatur, aut negatur, quod affirmatur, aut negatur de illo complexo (& hoc est quod vocatur *rectum*, seu *ut quod*;) alterum tanquam rem hoc, aut illo modo adjacentem ei, quod affirmatur, aut negatur, vel ei, de quo aliquid affirmatur, aut negatur; & hoc vocatur *obliquum*, sive *ut quo*.

198. Sic *Album* ut tale non connotat, sed essentialiter constituitur per subiectum, & albedinem, sed inæqualiter; nam subiectum est constitutivum ut quod, atque in recto; albedo autem ut quo, atque in obliquo; quando enim dicimus, *homo est albus*, solum affirmamus immediatè, ac directè subiectum, quod habet albedinem, de homine; albedinem autem enunciamus ut physicè inherentem ei subiecto: similiter quando dicimus, *album est rationale*, rationalitatem affirmamus de subiecto, cui albedo inhæret: sed hic cave æquivocationem; nam interdum utimur his terminis concretis ad significandum in recto, tam id, quod aliàs esset obliquum, ut quando dicimus *album* est complexum quoddam ex subiecto, & albedine ipsi unita; igitur ex predicato plerumque dignoscas quid veniat in recto ex parte subiecti, quid in obliquo, & vicissim ex subiecto quid veniat in recto, quid in obliquo ex constitutivis prædicati, nempe inter utriusque constitutiva quænam adequatè, vel inadequatè affirmantur, aut negentur inter se. Ista sunt, quæ veniunt in recto, atque ut quod adequatè, vel inadequatè; cetera in obliquo; quod si res adhuc fuerit æquivoca, utere distinctione.

§. I I.

199. **Q**uinta locutio est de *signis*, *sive prioritatibus*: in primis adverte signum rei non esse aliquod cubile, aliquam bursam, aliquam speciem, ubi lateat res illa: signum rei nihil aliud est, quam res ipsa sive complexum intrinsecè constitutum per rem illam simul cum alia: unde quando audias, *A. & B. sunt in eodem signo*, intellige unum ex his duobus; aut *A. & B. esse prorsus idem*, sicut animal, & rationale, aut *A. & B. constituere unam causam respectu alicujus effectus*, licet si *A. & B. inter se sola comparantur*, unum sit causa, aut quasi causa alterius: illa verò, quæ distinguuntur invicem sed neutrum est ullatenus causa alterius dicuntur etiam esse in eodem signo non absolutè, & simpliciter, quia esset locutio valde impropria; sed in eodem signo *collectivo*, hoc est posse formari numerum, seu collectionem quandam ex illis: sicut ex quibuslibet arenis maris, quæ invicem distinguuntur, & nullæ sunt causa aliarum, potest formari aliquis numerus, seu aliqua collectio: & ob hanc causam omnes arenæ maris sunt in eodem signo *collectivo* & sunt etiam negativè in eodem signo causalitatis quatenus nullæ sunt causa, aut effectus aliarum.

200. Igitur quando audieris: *in priori*; *in eo priori*; *in signo priori* aut *prioritatis*, nihil aliud intelligas, quam causam, sive principium rei illius, de qua fuerit sermo, nec non prærequisitas condiciones ad rem illam producendam v.g. *In priori ad rem A. seu in signo priori ad A. est res B. non est res B. præscinditur à re B.* Hæ phrasæ significant quando sunt affirmativæ rem B. esse causam, principium, aut prærequisitam conditionem ad A. quando sunt negativæ significant rem B. nec esse causam, neque principium ullatenus, neque prærequisitam conditionem ad rem A. cumque passim contingat quod ex duobus contradictoriis neutrum sit causa, principium, aut conditio prærequisita respectu alius tertiæ rei (v.g. neque equus, neque carentia equi; neque lapis, neque carentia lapidis sunt causa, principium, aut prærequisita conditio ad producendum lucem; ad producendum metallum &c.) idcirco passim contingit quod ex duobus contradictoriis neutrum sit in priori ad tertiam aliam rem: quia hoc non est deficere à rebus duo contradictoria simul; sed solum est duo contradictoria esse disparata respectu alius tertiæ rei.

201. Hic duocaveas: 1. est non putare illud, quod est in priori ad

ad aliud existere in rebus sicut modò existit hæc charta , antequam existat illud aliud : quoniam in eodem momento temporis , in quo incepit sol , refulsit : non enim fuit aliquando tenebrosus ; & tamen sol fuit in priore ad suum fulgorem , quia fuit causa ipsius : item Æternus Pater est principium Verbi , & tamen nunquam fuit Pater sine Verbo , & ratio est : nihil intimè connexum cum alio potest adhuc in primo instanti suæ existentie esse sine illo : at multæ causæ sunt intimè connexæ cum suis effectibus , ut constat : ergo multæ causæ nequeunt adhuc in primo instanti suæ existentie esse sine suis effectibus : ergo multæ causæ non possunt existere in rebus antequam existant sui effectus ; & tamen omnis causa est prior , seu est in priori ad suum effectum , ut modò diximus : ergo per hanc locutionem non debes intelligere quod res prior semper existat in rebus antequam existat suis effectus : nimirum quia prioritas à quo seu causalitatis non semper est prioritas in quo , seu temporis : sicut è converso non omne quod est prius tempore est prius natura sive causalitate ; aliàs essent causæ nostræ vitæ quotquot entitates fuerunt in Mundo antè nostram conceptionem .

202. 2. Est non putare quod eo ipso , quod duæ res sint in diversis signis , possint coexistere in eodem momento , aut loco : nam certè duo contradictoria , & duo contraria essentialiter opposita , sunt in diversis signis , seu sunt signa diversa , seu sunt res diversæ , (quæ omnia sunt idem) , & tamen nec divinitus possunt esse in eodem instanti , aut loco ; ergo duo esse in diversis signis impar est conjungendo illa in eodem tempore . Pessima intelligentia bonæ hujus Philosophiæ signorum impulit aliquos in absurdas propositiones ; hinc in eodem indivisibili momento temporis sunt verè a parte rei innumera signa , una priora , altera posteriora ; altera nec priora , nec posteriora , quia hoc nihil aliud est a parte rei , quàm quod in eodem momento sint simul multæ res in mundo , quarum unæ sunt causæ aliarum , alteræ effectus earundem , alteræ neque causa , nec effectus : sed hæc omnia constat esse vera : ergo in eodem momento indivisibili temporis sunt simul a parte rei independentes a nostris considerationibus multa signa , una priora , altera posteriora &c. Decipit Tyrones apprehensio de eo , quod signa sint quasi particulæ instantis : item quod hujusmodi prioritas , & posterioritas sit quasi successiva quædam existentia ; unde egre , aut in sinistro sensu intelligunt , quod in eodẽ instanti sint multa signa , una priora , & altera posteriora , & cõsequenter successiva successione causalitatis ; sed arceatur a mēte duæ istę apprehensiones .

203. 6. Locutio est; *præscindendo: abstrahendo*; hæc & similes phrasæ non significant, quod non sit in rebus id, a quo præscindimus, seu abstrahimus; sed quod sive sit, sive non sit, *de illo nolumus loqui; illo uti nolumus* ad probandum, aut improbandum, ad explicandum rem, de qua tunc agimus v. g. *præscindendo, abstrahendo ab eo, quod homo sit rationalis subsistit ne illum esse creaturam?* certè quæsitum hoc nec explicitè, nec implicitè negat hominem esse rationalem; sed solum quærit, an quando uti nolumus ea ratione suppetat ne alia, qua probemus hominem esse creaturam; quam ob rem ne confundas sensum merè præcisivum, nempe modo dictum, cum sensu positive exclusivo, sive negativo.

204. 7. Locutio; *specificativè, secundum se: ut quod, & secundum rectum præcisè*; hæc ex una parte: ex altera; *reduplicativè: formaliter ut tale: ut quod & quo; secundum rectum, & obliquum*; his locutionibus utimur inter disputandum de concretis, sive logicis, sive physicis, sive metaphysicis; primæ phrasæ ut insinuavimus cap. 3. significant nos affirmare, aut negare immeditè, ac directè de solo subiecto illius denominationis, non solitudine excludente unionem sive physicam, sive metaphysicam cum forma, sed excludente affirmationem, ac negationem de illa forma.

205. Secundæ phrasæ significant nos loqui non solum de subiecto, verum etiam de forma, non solum de substracto, verum etiam de abstracto v. g. *coloratum specificativè materialiter, secundum se præcisè inspectum, ut quod, atque secundum rectum præcisè non est visibile; est autem visibile formaliter, ac reduplicativè ut coloratum, id est sumptum ut quod, & ut quo, secundum rectum, & obliquum*; tota hæc propositio cum caterva suorum terminorum nihil aliud significat, quàm quod res non est visibilis, quando non habet colorem, & est visibilis, quando illum habet; idem intellige de illis particulis, *ut, quatenus: in quantum; qua*; quippe omnes istæ sunt de genere reduplicationum.

206. Sed oportet notare rem, de qua fuerit sermo: nam interdum significat formam physicam physicè unitam subiecto v. g. *album qua album, in quantum album &c.* Interdum formam physicam, sed non physicè in hærentem subiecto v. g. *visum, cognitum, amatum, quatenus visum, quatenus cognitum &c.* significat visionem, cognitionem, & amorem, quæ sunt formæ physicæ, & non purè ideales; aut non in hærent physicè illis subiectis: quia visio, cognitio, & amor, quæ tu habes respectu Regis, non sunt in Rege, sed in te;

in-

interdum significant formam, quæ est secunda intentio logica v. g. Natura in quantum universalis; homo qua species; animal ut genus: hæ phrasæ significant determinatè specificas illas cognitiones, & non alias, per quas natura fit universalis, fit species, fit genus; hæ autem specificæ cognitiones vocantur secundè intentiones logicæ, quia soli Logici agunt de illis: interdum significant rem, quæ est titulus, argumentum, & ratio ad suadendum alia v. g. Homo in quantum rationalis, est risibilis, est admirativus, est apprehensivus, est discursivus &c. significat nos uti hac ratione, seu argumento, seu titulo rationalitatis ad probandum ista omnia.

207. Interdum dictæ reduplicaciones significat rem, quæ est motivū, seu impulsus ad aliud v. g. Deus qua bonus est amabilis, quā verax est credendus significat bonitatē esse motivū amoris, veracitatē esse motivum fidei &c. Interdū denique significant formā metaphysicam, id est quæ nō distinguitur a subiecto; sed apprehenditur a nobis per speciē rei distinctē a subiecto; sicut Angeli nō sūt corporei Juvenes, sed apprehēdimus illos ad similitudinē, seu per speciē Juventū, v. g. loquendo de hominibus; *hoc animal in quantum rationale est discursivum*; rationalitas, quæ hic reduplicatur, est forma dumtaxat metaphysica huius animalis: quando autem reduplicaciones prædictæ significant unum, quando aliud ex dictis debes colligere ex contextualiarum rerum tunc concurrentium; quod si adhuc res maneat ambigua, debes distinguere propositionem, & concessam in sensu vero, negare in falso.

208. Ultima locutio est de hypothesi, seu casu impossibili; quam explicare solemus his verbis *si per possibile, vel impossibile*: adverte omnem casum, seu hypotesim, seu conditionem impossibilem importare in suis visceribus duo contradictoria; ex hypothesi autem gravida duorum contradictoriorum, quid nisi chimæra, discordia, & hallucinatio nasci potest? quamvis enim initio dissimuletur impossibilitas, sensim, & pedetentim solemus redire ad illam; atque si contradictoria ex uno latere obstruantur, erumpunt ex altero; solum ergo debent admitti istæ locutiones non in sensu directo, & objectivo; sed in reflexo ac mentali,

209. Sic: Hæc propositio, *si per possibile, vel impossibile Homo non esset rationalis, adhuc esset vivens*; hæc propositio in sensu directo, quem præfert, est falsa, & simul vera, hoc est, non ipsa, sed ipsius veritas impossibilis, quia fundatur in hypothesi chimærica; in sensu autem reflexo, & mentaliter præcisiivo est vera, quoniam æquivalet huic: *etiamsi obliviscamur, etiamsi relin-*
qua-

quamvis mente rationalitatem, etiamsi præscindamus ab illa: (hæc hypotheses non sunt impossibiles, sed practicè possibiles); adhuc subsistit titulus, ratio, & argumentum ad probandum hominem esse viventem; in hoc solo sensu admitti debent istę locutiones: & in hoc solo utiles sunt ad disputandum, explorandumque essentias rerum: alias scholasticorum locutiones usus te docebit.



DISPUTATIO II.

In qua quindecim Quæstiones tractantur.

1. *An, quomodo, & quando ex opposito consequentis ad oppositum antecedentis?* Cap. 3.

2. *Quæstio. An conversiones juxta illas regulas, simpliciter feci &c. sint formules, atque legitime?* Cap. 5. *Ubi: An sit bona consequentia ex conversu ad convertentem?*

3. *Quæstio. Qualis est conversio formalis, & legitima in omni materia etiam Beatissimæ Trinitatis. Ibid. Ubi: An subsistant in Divinis regulæ conversionum?*

4. *Quæstio. An omnis homo currit, aliquis homo non currit, sint contradictoriæ formales, & legitime.* Cap. 6.

5. *Quæstio. An duæ contradictoriæ possint esse veræ saltem in diversis instantibus. Ubi: An, & quomodo duo contradictoria objectiva possint existere in diversis instantibus?* Ibid.

6. *Quæstio. An, & quo sensu deficere unum contradictorium sit semper existere alterum?* Ibid.

7. *Quæstio. An, & quando ex negatione copulativæ, & assertionis unius extremi sequatur contradictorium alterius?* Cap. 7.

8. *Quæstio. An, & quando ex veritate disjunctivæ, & exclusionis unius sequatur alterum?* Ibid.

9. *Quæstio. An syllogismi conditionales concludant ex vi formæ, & quando non?* Cap. 8.

10. *An, & quando ex conditionali, & contradictorio conditionati sequatur contradictorium conditionis?* Ibid.

11. *Quæstio. An, & quando ex puris negativis nihil sequatur?* C. 9.

12. *Quæstio. An, & quando ex puris particularibus nihil sequatur?* Ibid.

13. *Quæstio. An, & cur ab indistributo ad distributum non valent?* Ibid.

14. *Quæstio. An, & quando syllogismus non debeat constare nisi tribus terminis?* Ibid.

15. *Quæstio. An, & quo sensu medium debeat esse idem in syllogismis?* Ibid.

De Modis legitimis, & illegitimis arguendi.



hic est proximus Dialecticæ scopus, nimirum docilem intellectum instruere, ut rectè ratiocinetur super quacunque materia occurrente, modò affirmando, modò negando. Igitur supra viginti fontes, quasi digito ostendimus, ex quibus fermè tercenti fluunt legitimi, atque efficaces argumentandi modi, quorum occasione illegitimos etiam, & sophisticos notabimus, ut scias reprobare malum inter philosophandum, & eligere bonum.

CAPUT I.

Sex Modi legitimi argumentandi.

1. **P**rimus est argumentatio negativa, seu indirecta, scilicet illa, quæ immediatè, ac directè tendit in subversionem rationis contrariæ, & inde quasi retrogrado motu resilit in sententiam ipsam contrariam. Ut hic arguendi modus valeat, debet assumi in *maiore*, non quidem omnis, sed tota ratio contraria; non *omnis*, quoniam rarò unicà ratione confutabis discursus omnes contrarios; debet assumi *tota*; nam si vel unam prætermiseris partem ex iis, in quibus stat nervus rationis contrariæ, negabit adversarius tuam Majorem, aut eam distinguet assuetis illis terminis, *ided, præcisè, nego: idèd, & quia &c. concedo*; qua distinctione malè utetur ille, ex eo, quòd argumentum tuum non adoriatur omnes illius rationes; quia non teneris ad hoc, quando unam solam impugnandam suscipis.

2. Trifariam potest instrui hæc species argumentationis. Primò supposita in Majore tota ratione contrariâ, ponendo in Minore contradictorium illius, & inferendo contradictorium opinionis contrariæ: v. g. *Idèd per te existit A. quia existit B. sed non existit B. ergo non existit A.* Secundò repetendo in Minore eandem rationem contrariam, quam posuisti in Majore, addendo tamen illam imparem esse evincendo sententiam illam; v. g. *ided per te existit A. quia existit B. sed quanquam existat B. hoc non sufficit ut existat A. ergo non existit A.* Tertiò suppositâ eâdem Majore, dividendo in Minore eam rationem contrariam, & prætermissa in sensu non veniente ad rem
præ-

presentem, negando illam in sensu favente sententię contrarię; v. g. *Eutenus per te existit A. quia existit B. sed quanquam existat B. in tali vel tali sensu (qui sit impertinens) non tamen existit in hoc sensu, quem modò disputamus; ergo non existit A.* Ratio horum trium est. Hęc species argumentationis negativę est reipsa solutio argumenti contrarii: at legitimus modus solvendi argumentum contrarium est unus è tribus, videlicet aut negare Antecedens, aut negare Consequentiam, aut distinguere Antecedens, concedendo illud in uno sensu, & negando in altero; ergo hęc triplex species argumentationis negativę est legitima.

3. Secundus est argumentatio *per distractionem* ab una re ad aliam, nempe quando adversarium revocas in aliud, quod cum ille probare, aut explicare non possit aut nolit, concludis tu mirum non esse quod rem presentem explicare nequeas, aut nolis: hac argumentationis specie usus est Christus Dominus contra Judæos pravo animo percurrentes *in qua potestate hæc facis?* quibus respondit *interrogabo vos,* & ego unum sermonem scilicet super Baptismo Joannis, & cum illi respondere non auderent, nec Christus respondere illis voluit: hæc argumentationis species utilis est, quando adversarius impugnat tuam opinionem circa explicationem alicujus dogmatis obscuri: nam cum ille non minus obscuram, & difficilem dare soleat explicationem, jure ipsum distrahes ad suam ipsius sententiam, ne reprehendat in aliena domo quod fatitur in propria.

Matth.

21.

4. Tertius est argumentatio *per instantiam*, seu per *retorsionem*, seu ad *hominem*, nempe quando adversarium refutas ratione, sive vera sive falsa, sed quam ille putat veram, aut saltem putare debet consequenter ad suam doctrinam: forsitan hac argumentationis specie usus est Christus, quando Apostolos famelicos defendit exemplo Davidis qui panes sacros olim manducavit: nam forsitan Christus Dominus factum illud Davidis non approbavit absolute utpote aliàs seivissimè prohibitum in lege; sed cum illi Pharisei probarent actionem illam, ideo Christus *ad hominem*, hoc est ex ipsorum doctrina probavit, actionem Apostolorum non esse reprehendendam ab ipsis Phariseis.

Lucæ 6.

Exodi

29.

5. Quartus est *ab autoritate*: ut argumentatio hæc sit legitima opus est primò Authorem, quem objicis, loqui juxta easdem prorsus circumstantias, juxta quas fuerit controversia: si vel una deficiat, aut supersit, aut mutetur, illi hac impune aufugit adversarius: quocirca consulendus est contextus totus verborum, perpendendus finis Authoris, nec sententia mutilanda, sed integra est proferenda. Quia re-

M

gulam

gulam hanc arguendi ab auctoritate Macharius Patriarcha Antiochenus non observavit, summa ignominia affectus est, atque depositus à sua dignitate coram tota Synodo sexta generali: lege miseram illam catastrophem, & exclamationes illorum Patrum coram Imperatore clamantium, restituendum non esse in pristinam dignitatem, hominem *testimonia sanctorum, & probabilium Patrum falsantem, & quendam quidem abscedentem, quendam verò addentem, & secundam quod ei videbatur in devia mittentem.*

Sexta
Synodus
a. d. 8. 9.
c. 12.

Luc. 20.

Iob. 19.

1. 24.

Dan. 12.

2. Mach.

12.

Exodi 3.

Hieronymus.

Can.

sup. 22.

Matth.

6. Opus est secundò: contrarium revereri Authorem, quem illi objicis, aliàs enim irridebit tibi, & nihil evinces: ob hanc rationem disputans Christus Dominus cum Saducæis negantibus resurrectionem mortuorum, & subdola quandam eorum questionem rescindens, non objecit illis celebre testimonium Jobi *in novissima die de terra surrecturus sum & rursum &c.* nec clarum illud Isaïæ *excitabuntur mortui, & resurgent qui in sepulcris sunt*, neque illud æque clarum Danielis: *multi de his qui dormiunt in terræ pulvere, evigilabunt, alii in vitam æternam, & alii in opprobrium* neque famosum illud Machabæorum bene, & religiose cogitans de resurrectione, sed obscurissimum quendam exodi protulit illis textum quia vero resurgant mortui, & Moyses ostendit fecus rubrum, sicut dicit Dominus Deus Abraham &c. nempe quia ut docet Hieronymus illi Saducæi Hæretici quinque tantum libros Moysi recipiebant, Prophetarum vaticinia respicientes: stultum ergo fuisse inde proferre testimonia, cujus auctoritatem non sequebantur.

P. Bellarminus.

lib. 1. c.

2. de Ver.

D. 1.

Concil.

Florent.

sess. 1. c.

6.

Mag.

baz. 1. c.

8. cap. 9.

c. 12. 9.

cap. 9.

Ad Colos.

1.

7. Hinc male argumentaberis primò adversus ethnicos testimoniis erutis ex sacra Scriptura, quam illi non suscipiunt: secundò adversus Hæreticos scripturis illis, quas temere, ac sceleratè à canone expungunt, quorum catalogum texit Bellarminus. Tertio adversus Græcos textibus octavæ synodi, quia solas septem amplectuntur, ut constat ex Concilio Florentino. Quarto adversus Lutheranos auctoritate ullius Concilii præter prima sex, quibus solis fidem præstant. Quintò adversus Asiaticos Concilio ullo præter prima tria, quoniam Hæretica pravitate reliquis fidem negant. Sextò adversus Nestorianos definitione ullius Concilii præter prima duo. Septimò adversus nefarios illos Sanctissimæ Trinitatis hostes, qui nullum Concilium admittunt.

8. Ob oppositam rationem bene disputabis ab auctoritate, quando illa tamen si imbecillis suscipiatur ab adversario: sic Paulus, qui nihil sciebat, nisi Christum, & hunc crucifixum, quique hac doctrina

na imbutos volebat suos Discipulos *videte nequis decipiat vos per Philosophiam, & inuicem fallaciam, secundum traditionem hominum, secundum elementa mundi, & non secundum Christum*: quandoque tamen Arati Poetæ Græci autoritate argumentatus est: *sicut, & quidam vestrorum Poetarum dixerunt: ipsius enim, & genus sumus; genus ergo cum finis Dei &c.* quandoque Menandri *volite seduci: corrumpunt mores bonos colloquia mala*: quandoque Epimenidis: *dixit quidam ex illis proprius ipsorum Propheta Cretenses semper mendaces, mala bestia, ventres pigri: testimonium hoc verum est*: imo præclara de Christo Domino vaticinia voluit Deus inferi carminibus Sybillarum, ut ex libris ipsis gentium haurirent Doctores nostri argumenta, quibus Christum annuntiarent, atque idcirco Paulus, teste Clemente Alexandrino, ad lectionem Sybillarum et hnicos hortabatur.

Ad 1.
17.
1. ad Cor.
15.
Ad Tit. 1.
Lib. 6.
Serm. mat.
amic me-
dium.

2. I I.

9. Quintus est argumentatio *ab absurdo*, quæ omnium utilissima videtur: multoties namque contingit ut adversarius ob ignorantiam, vel proterviam rationes à priori parvi pendat, & sola ratione deducente ad impossibile vel ad absurdum deterreatur, ut bene advertit P. Suarez: quapropter non abs jure scripsit Averroes, *sine illo principio*, impossibile est rem simul esse, & non esse, *neminem posse Philosophari, disputare, aut ratiocinari*: hoc autem principium est quod energiam infigit argumento ab absurdo: ut hæc species argumentationis sit legitima, duo indispensabiliter poscit: primum, quod absurdum verè sit tale apud omnes, vel saltem apud tuum adversarium, unde si alicujus scotistæ sententiam impugnares sic: *si hæc sententia esset vera sequeretur dari formam corporeitatis, aut dari distinctionem formalem ex natura rei*, immeritò irrideret ille. Secundum, quod absurdum re ipsa sequatur sequela aut metaphysica, quæ est inviolabilis, aut physica, vel morali, quæ violatæ non sint, ut else possunt: aliàs negabit adversarius sequelam.

P. Sua-
rez. disp.
3. Met. 1.
6. & 2.
Averr. 2.
Met. cap.
10.

10. Sextus est argumentatio à *paritate*, seu exemplo: si paritate utaris in rebus practicis, vim habet hæc argumentatio: *in operationibus enim, & passionibus humanis* (loquitur Sanctus Magister Thomas) *in quibus experientia plurimum valet, magis movent exempla, quam verba*: hæc species argumentationis requirit tria: primum quod paritas, id est exemplum ipsum adductum admittatur ab adversario: alioquin paritatis suppositum negabit, & respondendi onus rejiciet in eum,

2. 2. 9. 34.
4. 1.

qui paritatem admiserit: secundum quod ratio eadem, quæ antecedenti militat, militet quoque adequatè sumpta pro consequente, aliàs adversarius promptam habebit disparitatem: tertium quod paritas non formetur ex quidditate ipsa, & natura rerum v. g. *Homo ex natura sua est rationalis: ergo etiam canis, aut cedo disparitatem* est argumentatio frivola; nam cum quidditatis, & naturæ rei ut talis nulla sit dabilis ratio stricte à priori, quandoquidem ipsa quidditas est prima radix, & origo cæterarum proprietatum rei, & primæ originis non datur alia nova origo (aliàs non esset prima) idcirco non est dabilis disparitas quæ sit formalis, & à priori, inter quidditates ipsas rerum: ergo qui hujusmodi petit disparitatem, petit quod non est dabile.

11. Hęc argumentationis species, quæ ad impugnandum contrarios non magno pretio haberi solet si conferatur cum argumentis à ratione, utilissima esse solet ad defendendum propriam sententiam: exempli gratia: sint centum homines in obscura aula diverfarum ætatum, vestium, colorum &c. duobus modis possumus hoc ostendere contradicentibus: uno agglomerando rationes, quibus probetur numerus, & diversitas earum personarum, & iste est longus, obnoxiusque cavillationibus contradicentis; alio modo aperiendo fenestram, per quam lux illapsa patefacit numerum, & diversitatem earum personarum; sic contingit, quòd aliqua opinio ex se sit valde obscura, & consequenter ardua, & consequenter acriter negetur ab aliis: producis unam, vel duas bonas paritates, unum, vel duo bona exempla, per quæ tanquam per fenestras illabitur lux in eam opinionem obscuram, & pandit latentem veritatem, & hęc manifestata intellectui per se immediatè movet ad assentiendum sicut bonitas manifestata voluntati movet ad amandum; illa namque paritate, seu exemplo videt Adversarius opinionem tuam non esse ita arduam, & amoto obice obscuritatis disponitur ad assentiendum; sunt ergo argumentationes à paritate optima arma defensiva.

12. Sed incipiamus jam aperire fontes argumentationum, quæ sint prorsus infallibiles, & quarum energia negari nequeat nisi à non intelligente terminos: sunt autem hi. Primò ex definitione. Secundò ex divisione. Tertio ex consequentia. Quarto ex suppositione. Quintò ex conversione. Sextò ex oppositione. Septimò ex connexionè metaphysica absoluta. Octavò ex oppositione metaphysica absoluta. Nonò ex connexionè terminativè conditionali. Decimò, ex oppositione itidem terminativè conditionali. Undecimò, ex connexion-

nexione terminatiuè disjunctiua . Duodecimò , ex oppositione terminatiuè disjunctiua . Decimotertiò , ex veritate copulatiua . Decimoquartò , ex conditionali . Decimoquintò , ex disjunctiua . Decimosexto , ex identitatibus realibus . Decimosseptimò , ex distinctionibus realibus , quæ omnia diligenter discussa patefacient sophismata , quæ sub umbra harum veritatum latere solent , ut incautos adorianatur .

§. III.

13. **P**Riùs tamen memento , quòd quando non suppetunt principia , seu rationes physici , aut metaphysici evidentes , ut multoties contingit , recurrendum est ad principia prudentialia , ut facimus in omnibus , vel ferè omnibus disputationibus , & controuersis super rebus Fidei : ratio prima est : stultissimum est , nolle credere nisi evidentiis physicis , quales sunt illæ , quæ percipiuntur oculis , tactu , vel alio sensu externo , aut metaphysicis , qualis est , *bis tria sunt sex* ; ergo quivis mediocriter rationalis debet contentus esse evidentiâ morali , ex principiis prudentiæ eruta , & ei cedere quando aliunde non insurgat potentior ratio .

14. Probatur antecedens , quia aliàs 1. abjicienda esset omnis Religio , vel de omnidubitandum esset , & consequenter redire possent homines impunè ad priscam barbariem , sive ad novum phanatismum (quandoquidem in nulla Religione datur evidentiâ prorsus irresistibilis omnium suorū articulorum) & unusquisque esset sibi Dux , ac Magister . 2. Omnes hæreditates negandæ essent , vel revocandæ in dubium , quandoquidem nusquam datur evidentiâ physica , aut metaphysica apud alios de eo , quod hic homo sit filius legitimus talis Regis , talis Dynastiæ , talis Equitis privati , in cujus hæreditatem vult ingredi , quibus argumentis usus fuit olim Augustinus c. 22. de utilitate credendi , inquiens : *Si quod nescitur credendum non est , quomodò seruiant Parentibus Liberi , eosque mutua dilectione diligant quos Parentes suos esse non credunt ? non enim ratione sciri ullo pacto potest , sed interposita Matris auctoritate de Patre creditur : de ipsa verò matre , plerumque nec Matri , sed obstetricibus , nutricibus , famulis ; nam cui furari potest Filius , aliisque supponi , nonne potest decipere decipere ? credimus tamen , & sine ulla dubitatione credimus , quod scire non posse confitemur .*

15. Explicatur : negotium maximi momenti , & omnium grayissimum ,

anum, quod tractat intellectus noster, est fides, quæ immobilis assensus est illis, quæ voluit Deus, & tamen ab ea disjunctus Deus omnem evidentiam physicam, & metaphysicam, ut constat, nempe quia rationalis intellectus debet esse docilis, juxta petitionem Salomonis 3. Reg. cap. 3. *Dabis ergo Servo tuo cordocile*; & juxta regulam Pauli 2. ad Timotheum cap. 2. *Servum autem Domini non oportet litigare, sed mansuetum esse ad omnes, docibilem*: unde cum Isaias 54. dixisset: *Univerfos Filios tuos doctos à Domino*, proferens Christus apud Joan. 6. hoc testimonium dixit: *Est scriptum in Prophetis, & erunt omnes docibiles Dei*; & quia hanc docilitatem arcet nimis timor, & nimia protervia, quæ duo non cedunt nisi ineluctabilibus evidentiis, idcirco ambo damnantur ad Infernum: *Timidis autem, & incredulis &c. pars illorum erit in stagno ardenti*. Apocalyp. 21. si ergo in assensu omnium firmissimo debet intellectus non aspirare ad evidencias, multò minùs in aliis.

16. 3. Omnes prorsus humani contractus, matrimonia omnia essent rescindibilia, vel in dubium revocanda, siquidem nunquam datur evidentia physica, vel metaphysica de interno alterutrius partis consensu, qui sanè indispensabiliter requiritur ad valorem contractus cujuslibet. Omnium Subditorum obligatio obediendi suis Superioribus, & omnium filiorum obligatio reverendi suos parentes revocanda esset in dubium, quia nullus filius habet evidentiam irresistibilem de eo, quod tales personæ sint sui parentes: & nullus Subditus de eo, quod talis, aut talis persona sit suus Judex, suus Princeps &c. nec habet evidentiam de eo, quod illa verè præcipiat, aut velit talem rem, quoniam non habet irresistibilem evidentiam de eo, quod non sit spectrum aliquod, seu phantasma, seu aliquis diabolus transfiguratus in personam sui Superioris, ille, qui velle, aut præcipere videtur talem, aut talem rem.

17. His ergo, quæ sunt cardines humanæ societatis, ac commercii, loco motis, totum humanum commercium rueret, & societas humana dissolveretur, & genus humanum non formaret Rempublicam, sed *non bene junctarum discordia semina rerum*; ergo stultissimum est nolle cedere, nisi evidentiis physicis, aut metaphysicis; ergo multoties oportet inter argumentandum recurrere ad sola principia prudentialia, & his succumbere debet quivis mediocriter rationalis.

18. Explicatur. Per se loquendo, non habemus sensum æquè perspicacem, ac visum; & tamen non habemus sensum, qui toties
decid-

decipiat nos; si enim oculis credas, dices cæruleum esse Cælum, cæruleos esse montes distantes, vicinos inter se esse colles, inter quos magna solet esse distantia, vicinum esse oppidum in quod pergis, & similia multa, quæ ratio deprehendit falsa esse: è converso fere nil est apud Rempublicam civilem tanti momenti, quanti legitimitas filiorum, (quot, & quanta hinc pendent) & tamen nihil est æquè obscurum, atque ignotum; dumtaxat enim constat ex testimonio unius personæ, quæ quia est scæmina, quia est una sola, quia est testimonium in causa propria, nempe proprii honoris, & proprii filii, in nullo alio tribunali haberet fidem; ergo natura ipsa, & constitutione rerum constat rationalem disputatorem veritatis amantem, tricas, contentionesque exosum, debere contentum esse inter ratiocinandum argumento ex prudentia eruto, & non debere contendere, atque tergiversari, donec evidentia irresistibili obruatur.

19. Profecto si humani ingenii procacitati permittitur negare, aut dubitare donec irresistibilis evidentia opprimat ipsum, potuissent Hæbrei, qui inter-fuerunt signis, & portentis Ægypti, maris rubri, & Montis Sina, dubitare an illa omnia essent vera, vel potius spectra, aut phantasmata; an à vero Deo, vel à Diabolo fierent, & quamvis ipsi non possent, tamen sui filii, & nepotes, qui talia miracula non viderunt: unde necesse esset, quod singulis generationibus mitteret Deus Angelos, qui evidentia simili huic *bis tres sunt sex* panderent hominibus suam legem, ac præcepta: absit decumana stultitia.

20. Secunda ratio est: si non, nisi evidentiis irresistibili bus succumbendum est, cum non probentur per metaphysicam evidentiam duo contradictoria in his ridiculis speciebus, quas subijcimus, sequetur illas esse possibles v. g. speciem quamdam equorum, qui per se ab intrinseco, ac essentialiter determinati essent ad ter in die verberandum calcibus aerem: ostende per metaphysicam evidentiam in hoc duo contradictoria, aut repugnantiam cum animalitate, & hinnibitate secundum positivum: item speciem hominum, qui sint essentialiter determinati ad ridendum bis in die, & bis in nocte, ad canendum quater in hebdomada, ad dormiendum 12. horas singulis diebus (loquendo semper de tempore merè possibili) ostende per metaphysicam evidentiam duo contradictoria, vel oppositionem cum animalitate, ac rationalitate secundum positivum, & sic frivolus quisvis, & otiosus intellectus posset comminisci species varias, & protervè illas defendere eo quia non probetur in illis geminum contradictorium per metaphysicam evidentiam, absit.

C A P U T I I.

*Quot modi arguendi eruantur ex Definitionibus,
& Divisionibus.*

20. **R**espondeo ex loco definitionis tredecim legitimas erui argumentationes: cumque definitio soleat esse duplex, una physica v.g. *Homo est compositum quoddam ex corpore, & anima rationali*: altera Metaphysica v.g. *Homo est animal rationale*, inde fit quod ex definitione sere viginti sex solent elici convincentes, & infallibiles modi argumentandi. Primò ex affirmatione definiti ad affirmationem totius definitionis. Secundò ex negatione illius ad negationem hujus. Tertio ex affirmatione definitionis ad affirmationem definiti. Quarto ex negatione definitionis ad negationem definiti, ut videri potest in duabus definitionibus nuper datis: & horum ratio est: definitum, & tota definitio sunt termini convertibiles, quia definitio debet convenire omni suo definito, & illi soli: ergo quoties verè affirmatur unum est verè affirmabile alterum, & è converso: item quoties verè negatur unum est verè negabile alterum, & è converso.

21. Quintò ex affirmatione definiti ad affirmationem uniuscujusque ex illis duobus prædicatis quibus constat definitio v.g. est homo: ergo est animal: est homo ergo est rationalis: est homo: ergo *habet corpus est homo* ergo habet animam rationalem. Sextò ex affirmatione prædicati differentialis, secus prædicati generici, ad affirmationem definiti: *est hinnibile ergo est equus*: non autem *est animal ergo est equus*: disparitas, est quia prædicatum differentiale infirmum debet convenire omni soli & semper suo definito: ergo si illud affirmatur, affirmabile etiam est definitum, aliàs non conveniret illi soli: prædicatum verò genericum convenit multis aliis: ergo ex eo quod affirmatur illud non sequitur quod possit affirmari definitum: Septimò ex negatione definiti ad negationem prædicati differentialis v.g. non est equus: ergo non est hinnibilis: non verò ad negationem prædicati generici, quia hæc est mala consequentia, non est equus: ergo non est animal.

22. Octavò ex negatione uniuscujusque prædicati definitionis ad negationem definiti v.g. non est animal: ergo non est equus; non est hinnibilis: ergo non est equus: præterea cum unumquodque ex iis duobus prædicatis, quibus constare debet definitio, habeat suas proprietates

prietates in quarto modo, idest proprietates, quæ omni, & soli, & semper ei competunt, sequitur quod benè arguatur. Nondè ex definito ad omnes illas proprietates simul v. g. est homo: ergo est sensitivus (ecce proprietatem genericam) & simul est risibilis (ecce proprietatem prædicati differentialis, Decimò ex definito ad unamquamque seorsim ex his proprietatibus. Undecimò ex negatione definiti ad negationem proprietatum prædicati differentialis v. g. non est homo: ergo non est risibilis: secus ad negationem proprietatum genericarum: nam malè argues non est homo: ergo non est sensitivus. Duodecimò ex negatione omnium proprietatum simul ad negationem definiti v. g. nec est sensitivus, nec est risibilis: ergo non est homo. Decimotertio ex negatione uniuscujusque seorsim proprietatis ad negationem definiti v. g. non est sensitivus: ergo non est homo: non est risibilis: ergo non est homo.

24. Ut autem firmi sint hi modi arguendi, oportet primò quòd definitio sit prorsus adæquata, ut advertimus disp. I. cap. 6. alioquin irrita erit convertentia cum definito, in qua convertentia nituntur pleraque dicta: ob hanc rationem quanquam *animal rationale* sit definitio Petri, eo quod sit tota essentia metaphysica illius, nullæ sunt hæ consequentiæ: *est animal rationale: ergo est Petrus: non est Petrus: ergo non est animal rationale*: quia animal rationale solum est definitio Petri quoad speciem; seu quoad essentiam metaphysicam; ille autem ultra essentiam metaphysicam habet à parte rei suam differentiam individualement (siquidem Petrus non solum est essentialiter homo, sed etiam talis individuus, & determinatus homo) ergo definitio illa præscindit à quodam intemè imbibito in Petro, nempe à ab hujus differentia individuali: ergo non est definitio adæquata illius secundum totum quod ille habet à parte rei: quid mirum quod nullæ sint illæ consequentiæ?

25. Oportet secundò quòd definitum, & definitio sumantur secundum eandem acceptionem, sive suppositionem terminorum: si namque definitum juxta diversas suppositiones, diversas habeat definitiones, malè argues suppositiones transmutando v. g. homo sumptus primò intentionaliter sic definitur *animal rationale*; sumptus verò secundò intentionaliter definitur *prædicabile de multis* tanquam tota essentia metaphysica illorū: male igitur argues sic: talis res est homo: ergo est prædicabile de multis tanquam tota essentia metaphysica, quoniam Petrus est homo, & non est prædicabile de multis: item sic: hæc res non est prædicabile de multis tanquam tota essentia: ergo non est homo, ob ean-

N

dem

dem rationem; necesse igitur est definitum, & definitionem sumi in eadem terminorum acceptione ut valeant ad convertentiam.

26. Oportet tertio quoddam definitum, ac definitioni non adjungantur illa syncategoremata, seu adverbia *formaliter, de fide*, aut alia quæ mutant sensum propositionum: quia cum Authores soleant variè opinari circa illa, non argumentaberis omnino efficaciter à definito ad definitionem illis terminis adjunctis: hinc non valet: *salis res est formaliter animal rationale; ergo est formaliter homo*; quoniam homo ipse est formaliter animal rationale, & non est formaliter homo; hæc enim prædicatio *homo est homo* non est formalis, sed identica: similiter non valet ob eandem rationem *non est formaliter homo: ergo non est formaliter animal rationale*; similiter non sunt firmæ hæc consequentiæ *de fide est Noe emisisse Columbam ex arca: ergo de fide est emisisse animal sine felle*; esto quoddam hæc sit à parte rei definitio Columbæ: neque valet hæc *non est de fide emisisse animal sine felle; ergo non est de fide emisisse Columbam*: ratio est: licet testimonium Divinum faciens de fide definitum faciat de fide *absolutè*, & *in se* definitionem, imò, & respectivè etiam quoad nos quando definitio est aliunde nota: non tamen facit illam de fide quoad nos, quando est omnino ignota vel dubia: de quo Theologi ad tractatum de fide: ergo non semper sequitur esse de fide definitionem ex eo quod sit de fide definitum respectivè quoad nos.

§. I I.

27. **E**X capite divisionis plura emergunt argumentationis genera. Triplex ut jam diximus est divisionis species. Prima totius physici in suas partes essentielles, ut hominis una pars est corpus, altera est anima, omittimus divisionem in partes integrantes, quales sunt manus, caput &c. Secunda totius metaphysici in partes metaphysicas, ut *essentia hominis una pars animal, altera rationale*, ubi ne intelligas esse partes sicut sunt corpus, & anima, hoc est realiter distinctas, sed solum sunt partes mentaliter ratione nostra, qui ut possimus philosophari, & uni intelligi ab alteris circa essentias rerum, discernimus inter cognoscendum, & loquendum cum aliis hominibus varia prædicata, quæ etiam vocantur *attributa, gradus, formalitates, rationes*, quæ verè, & simpliciter identificantur inter se, unde non sunt verè, & simpliciter *multa, varia*, sed unum quid simplicissimum; cognoscimus tamen illa per speciem multitudinis, sicut Angelos, qui verè, & simpliciter non sunt pueri, aut juvenes, cognoscimus per speciem, hoc est

est per similitudinem puerorum , aut juvenum : & sicut ~~eternum~~ Patrem , quem credimus , & confitemur non esse corporeum , senem , cognoscimus per speciem , ac similitudinem gravissimi alicujus senis : & sicut Spiritum Sanctum , quem credimus , & confitemur non esse Columbam , cognoscimus per speciem seu similitudinem Columbe : & sicut nostras ipsas animas , quas credimus , & confitemur non esse puellas ; aut auram ternam , aut volucrem flammam (quia ista omnia sunt corporea , & animas nostras sunt spiritus) nihilominus cognoscimus ad modum , seu per speciem , hoc est per similitudinem puellarum &c. hoc jam ab initio illico capias ne vocibus deceptus aduectas pravis apprehensionibus , ex quibus prava judicia , & discursus postea descendant .

28. Tertia est totius Logici in partes Logicas , seu potestativas , quod contingit quando genus dividitur in suas species , *ut animal aliud rationale , aliud irrationale* : vel species in sua individua ut homo alius Petrus , alius Joannes : est tamen discrimen inter has species divisionum , quod in prima , & secunda non multiplicatur divisum in membris dividendis : solum namque corpus non est homo , & solum animal non est essentia metaphysica hominis : ceterum in tertia divisione multiplicatur divisum , quoniam solus Petrus est homo , & ipse cum Joanne sunt duo homines : igitur ex hoc loco divisionum , ad quem spectant etiam argumentationes *ab amplo* , seu *non restricto* ad *non amplum* , seu *restrictum* , siquidem amplum , seu non restrictum est divisum quoddam respectu non amplius seu restricti : ex hoc inquam loco viginti sex emergunt legitime atque infallibiles argumentationes .

29. Nam primo ex affirmatione totius permanentis (non autem successivi , ejus scilicet partes nequeunt in eodem instanti existere , qualis est hora , dies , mensis , tempus &c.) arguitur efficaciter ad affirmationem copulativam omnium suarum partium ut *existit homo ergo existunt materia , forma , & unio* ; Secundo ad affirmationem uniuscujusque membri dividendi ut *existit homo : ergo existit materia : existit homo ; ergo existit sua anima* . Tertio ad affirmationem vagam alterutrius , ut *existit homo : ergo vel existit materia , vel anima* . Quarto ad similes affirmationes definitionis tum omnium , tum singularum partium dividendum , item tum omnium , tum singularum proprietatum in quarto modo genericarum , & specificarum partium earundem vide quantam segetem argumentationum . Ratio est : quoties antecedens est infallibiliter connexum cum consequente , infallibilis est

argumentatio : sed hoc contingit in omnibus his casibus : nam totum permanens infallibiliter connectitur cum omnibus suis partibus essentialibus, & cum unaquaque, & cum aliqua, & cum definitionibus, ac proprietatibus in quarto modo earundem, ut rem perpendenti constabit : ergo.

20. Quintò ex negatione divisi ad negationem *simultatis* suarum partium : omnes enim partes totius permanentis existere simul simultate sibi proportionata (id est quoad idem tempus, quoad eundem locum &c.) trahit secum infallibiliter existentiam totius illius : ergo si verè negatur hæc existentia, verè quoque negabilis est illa simultas, quoniam ex vera negatione termini connexionis infallibilis evincitur vera negatio fundamenti, ut suo loco dicemus. Sextò ex negatione divisi ad negationem vagam alicujus partis essentialis, ut *homo non existit ; ergo vel non existit materia, vel non existit forma, vel non existit unio* : si enim nulla pars deficeret, omnes prorsus existerent, ergo existeret totum ipsum : ergo si hoc non existit ; evidens est, quod aliquod ipsius constitutivum, hoc est pars essentialis non existit ; ex hoc sexto argumentandi genere sumimus frequenter in Philosophia, & Theologia argumentum contra illos, qui vocantur *Connosatores* : at verò ex negatione totius non arguitur per se negatio omnium partium distributivè sumptarum, neque alicujus determinatæ ; quandoquidem mortuo homine permanet aliqua ipsius pars essentialis, nimirum corpus, & anima. Septimò ex affirmatione omnium partium simul sumptarum simultate sibi proportionata arguitur affirmatio ipsius : nam hoc est complexum, seu integritas omnium suarum partium, & nihil aliud : ergo si omnes suæ partes essentialis, si omnia sua constitutiva existunt, nullo dempto, necesse est quod ipsum totum existat : cæterùm nec ex affirmatione vaga omnium, nec ex determinata alicujus partis inferitur affirmatio totius (nisi forte ipsæ partes inter se habeant intimam connexionem) potest enim deficiente toto illo perleverare aliquod constitutivum ipsius.

31. Octavò ex negatione omnium partium simul arguitur negatio totius. Nonò ex negatione cujusvis partis determinatæ. Decimò, ex negatione vaga omnium partium inferitur similiter negatio totius ; quorum ratio est : essentia divisi consistit in complexione, seu integritate suarum partium ; ergo quoties complexio hæc defecerit, deficit ipsum totum, seu ipsum divisum sed quoties deficient omnes partes simul, aut una determinata, aut aliqua disjunctivè, deficit complexio omnium, cum sit evidens non esse omnes quando deficit una ; ergo.

§. I I I.

32. **E**X divisione totius Metaphysici decem aliæ efficaces emanant argumentationes. 1. Ex affirmatione divisi ad affirmationem utriusque membri dividendi simul; ut, *est homo; ergo est simul animal, & rationale*. 2. Ad affirmationem uniuscujusque distributivè, ut *est homo; ergo est animal: est homo; ergo est rationalis*. 3. Ad affirmationem definitionis omnium, & singulorum membrorum dividendium, nec non ad affirmationem omnium proprietatum in quarto modo tum specificarum, tum genericarum eorum membrorum. 4. Ad affirmationem vagam alterutrius membri dividendi; quorum rationem jam accepisti; ex omni quippe infallibiliter connexo cum alio infallibiliter arguitur hoc aliud: at divisum, seu totum metaphysicum est infallibiliter connexum cum similitate omnium suarum partium metaphysicarum, & cum unaquaque, & cum aliqua (quia ad veritatem disjunctivæ propositionis sufficit veritas unius partis determinatæ; unde si datur una, datur aliqua, quando res est capax multiplicationis; secùs quando est incapax, & propter hoc una Deitas non infert aliquam Deitatem), & cum definitionibus, ac proprietatibus horum omnium; ergo. Cæterùm ex affirmatione hujus totius metaphysici, sicut etiam totius physici, & negatione unius partis nihil conficies, quoniam antecedens erit impossibilis veritatis, cùm negatio illius partis sit impossibilis cum affirmatione totius; unde nullæ sunt hæ consequentiæ: *est homo, & non est animal*; (ecce hoc contradicit illi) *ergo est rationalis: existit homo, & non existit suum corpus* (ecce hoc quoque contradicit illi) *ergo existit sua anima*.

33. 5. Ex negatione totius, seu divisi argues ad negationem similitatis suarum partium; ut *non est homo; ergo non est simul animal, & rationale*. 6. Ad negationem disjunctivam alicujus partis, ut *non est homo; ergo vel non est animal; vel non est rationale: sed non arguitur ex negatione totius ad negationem ullius partis determinatæ semper; ideo non valent hæ consequentiæ, non est homo, ergo non est animal: non est homo; ergo non est rationalis; quia Angelus non est homo, & tamen est rationalis; sed hoc intelligendum est, nisi forte pars aliqua metaphysica sit convertibilis cum ipso toto, ut contingit differentis aliarum specierum ab humana: tunc quippe valet consequentia à negatione divisi ad negationem illius partis determinatæ,*
ut .

ut *non est equus*; ergo *non est hinnibilis*. 7. Ex affirmatione omnium partium simul ad affirmationem ipsius totius, seu divisi metaphysici, ut, *est animal*, & *simul rationale*; ergo *est homo*; sed non ex affirmatione unius tantum ad affirmationem divisi; quia non valet, *est animal*, ergo *est homo*, nisi pars illa fuerit convertibilis cum diviso, ut hinnibilis cum equo; nec ex affirmatione vaga partium ad affirmationem divisi, ut *est animal*, vel *rationale*, ergo *est homo*. 8. Ex negatione omnium partium simul ad negationem ipsius divisi metaphysici. 9. Ex negatione uniuscujusque partis determinatæ ad negationem ipsius divisi. 10. Ex negatione disjunctiva earundem partium ad negationem divisi, ut *vel non est animal*, vel *non est rationale*; ergo *non est homo*; quorum ratio est pervia: divisum omne metaphysicum est intimè connexum cum omnibus, & singulis suis partibus metaphysicis; ergo si deficiant omnes, aut una determinata, aut aliqua disjunctivè, necesse prorsus est quòd deficiat ipsum divisum: attamen ex una parte metaphysicæ, neque affirmativè, neque negativè argui potest ad alteram, excepto quando fuerit convertibilis cum ipso diviso.

34. Ex divisione totius Logici sex confurgunt argumentationes. 1. Ex affirmatione divisi ad affirmationem disjunctivam alicujus ex membris dividendis, ut, *est animal*; ergo *vel est rationale*, vel *est irrationale*: aut non arguitur ad affirmationem omnium distributivè, aut copulativè, aut alicujus determinati; idcirco non valent hæ consequentiæ, *est animal*; ergo *est rationale*: *est animal*, ergo *est simul rationale*, & *irrationale*. 2. Ex affirmatione divisi, atque definitionis suæ, & simul negatione unius membri, aut negatione definitionis membri hujus arguitur ad affirmationem alterius membri, necnon ad definitionem hujus, ut *est animal*, seu *principium sentiendi*; & *non est rationale*, seu *principium discursus*; ergo *est irrationale*, seu *vivens non discursivum*. 3. Ex affirmatione cujusque membri dividensis, aut suæ definitionis arguitur ad affirmationem divisi, & definitionis suæ. 4. Ex affirmatione unius membri, aut suæ definitionis arguitur, quando divisum est essentialè membris dividendis ad negationem alterius, atque suæ definitionis, ut *est animal*, & *non est irrationale*; ergo *est rationale*; quando autem divisio non sit id generis, non bene arguitur v. g. in hæc divisione accidentali, *corpus aliud est album*, aliud *dulce*, non bene arguitur sic, *est corpus*, & *non est album*; ergo *est dulce*; quia illa membra dividenda non opponuntur invicem. 5. Ex negatione divisi ad negationem omnium membrorum dividendum, &

cujusque determinati, & etiam alicujus disjunctivæ, ut *non est animal*; ergo *neque est omne animal, neque est aliquod animal, neque est hoc animal in individuo*. 6. Ex negatione omnium membrorum dividentium, aut suarum definitionum ad negationem divisi, ac suæ definitionis. Ecce illos viginti sex modos promissos.

C A P U T III.

Quot Modos Arguendi offerat bona Consequentia, ubi an ex opposito Consequentis inferatur semper oppositum Antecedentis.

35. **R**espondeo, offerre undecim. 1. Ab antecedenti ad falsitatem illius, quod opponitur cum consequente: sic quia est bona hæc consequentia *est homo: ergo est animal*, etiam est bona hæc *est homo: ergo falsum est esse quidquam oppositum essentialiter cum eo, quod sit animal*, quoniam primi consequentis veritas infert necessarîo falsitatem sui oppositi: ergo omne inferens illam veritatem infert aliquid inferens hanc falsitatem: ergo infert hanc falsitatem; sed in omni bona consequentia antecedens infert veritatem consequentis: ergo infert falsitatem illius, quod essentialiter opponitur cum ipso consequente. 2. Ex antecedenti arguitur ad disjunctivam vagantem inter illud consequens, & quodcumque aliud, ut *est homo: ergo vel est animal, vel truncus, vel chimæra*; nam cum hæc disjunctiva sit contenta uno extremo, sequitur quod unius solius extremi veritas infert veritatem disjunctivam; sed in omni bona consequentia antecedens infert veritatem consequentis: ergo infert veritatem disjunctivæ, cujus una pars sit illud consequens. 3. Ex antecedenti illo arguitur ad definitionem consequentis. 4. Ad propositionem æquipollentem hujus. 5. Ad convertentem ejusdem; quia consequens ipsum trahit secum infallibiliter veritatem harum trium: sicut etiam veritatem cujuslibet propositionis disjunctivæ vagantis inter quodlibet ex iis tribus, & quodcumque aliud; ergo si antecedens infallibiliter infert veritatem consequentis, infallibiliter etiam infert veritatem illorum omnium.

36. 6. Licet ex opposito antecedentis non sequatur per se loquendo oppositum consequentis, quia solidum sequitur quando antecedens, & consequens sunt mutuo connectæ; attamen ex opposito

con-

consequentis sequitur cum moderationibus mox dandis oppositum antecedentis; nam quoties deficit a rebus terminus connexionis essentialis debet deficere fundamentum, nempe illud, quod essentialiter connectitur cum eo termino: sed quoties consequentia est infallibilis, consequens ipsum est terminus, cum quo essentialiter connectitur antecedens, aliàs consequentia non esset infallibilis: ergo quoties infallibilis est, debet deficere antecedens, si deficit consequens: ergo ex defectu, seu ex opposito hujus sequitur defectus, seu oppositum illius. 7. Ex opposito consequentis arguitur ad definitionem oppositi antecedentis. 8. Ad *convertentem* ejusdem oppositi. 9. Ad *aquipollentem*. 10. Ex eodem opposito consequentis sequitur disjunctiva quæcumque, cujus unum extremum sit illud oppositum antecedentis, aut unum ex nuper dictis. 11. Ex eodem opposito sequitur falsitas ipsius antecedentis: quorum ratio est: omnia hæc, & singula infallibiliter sequuntur ex illo opposito antecedentis: ergo si oppositum consequentis infert oppositum antecedentis, necesse est, quod inferat omnia ea, & singula.

P. Ribaden. lib.
de Impos.
9. 19.

37. Sed quia in hoc principium *ab opposito consequentis ad oppositum antecedentis* acriter invehuntur quidam Doctores Complutenses, antequam ipsorum argumenta diluamus, oportet septem advertentias ipsi adjungere, ex quarum oblivione nasci solent importuna sophismata: 1. est, *modò oppositum consequentis non sit evidenter apud omnes impossibile*; tunc enim utpote connexum cum gemino contradictorio tam infert oppositum antecedentis, quàm antecedens ipsum: ob hanc rationem fallit ille arguendi modus quo aliqui definitionem possibilitatis repellunt, scilicet *possibile est illud quod si existat non involvet duo contradictoria* dicentes illam convenire chimære: quoniam hæc est bona consequentia *chimæra includit duo contradictoria*: ergo *non existit*: ergo ab opposito consequentis ad oppositum antecedentis etiam erit bona hæc consequentia *chimæra existit ergo non includit duo contradictoria*: sed hoc ipso est vera hæc conditionalis illativa si chimæra existat non involvet duo contradictoria: ergo illa definitio possibilitatis convenit chimære, fallit inquam; oppositum enim primi consequentis est evidenter apud omnes impossibile, quia est existentia ipsa chimære: ergo ex illo opposito non solum infertur in sensu reali oppositum primi antecedentis, videlicet chimæram non includere duo contradictoria, sed etiam infertur antecedens ipsum, scilicet chimæram includere duo contradictoria: quia *ex impossibili quodlibet*, ut postea dicemus: sed hoc est chimæram involvere duo contradictoria.

tradictoria reflexa : ergo fugiens à directis incidit in reflexa .

38. 2. Est: modò antecedens sit connexum logicè, aut metaphysicè cum consequente: quoniam si connexio fuerit purè physica aut naturalis, ut connexio ignis cum calore, fieri potest quod res formaliter immediatè opposita consequenti, tam longe absit ab inferendo adhuc illatione naturali oppositum antecedentis, ut potiùs metaphysicè infallibiliter inferat antecedens ipsum: hæc enim est bona consequentia in vi solius connexionis naturalis *existunt duæ quantitates: ergo non sunt mutuo penetratæ*, quia non potest fieri absque miraculo quod duæ quantitates sint in eodem puncto loci: & tamen est mala hæc consequentia inversa adhuc in vi illationis naturalis *sunt penetratæ mutuo duæ quantitates: ergo non existunt simpliciter in rebus*, quoniam duarum quantitatum penetratio, quæ est oppositum primi consequentis, metaphysicè connectitur cum existentia absoluta utriusque, siquidem omnino repugnat existere in eodem loco illa, quæ non sunt in rebus: hoc est unum ex eis, quibus postea probabimus non omnem oppositionem naturalem esse reciprocam: ergo quando consequentiæ rectitudo sit purè physica, & naturalis non semper arguitur ex opposito consequentis ad oppositum antecedentis.

39. 3. Ex opposito consequentis non arguitur ad oppositum antecedentis *distributive sumpti*, idest non arguitur defectus singulorum partium antecedentis; sed dumtaxat defectus alicujus partis, qui defectus interdum trahit secum, interdum non trahit defectum aliarum, sic in hoc syllogismo *omnis homo est animal: omnis arbor est homo: ergo omnis arbor est animal*: oppositum, seu falsitas hujus consequentis contenta est falsitate minoris, & indemnem relinquit veritatem majoris. 4. Si antecedens non fuerit *per se* connexum cum consequente, sed *per aliud*, quod rectitudinem fundet consequentiæ, tunc ex opposito consequentis non inferitur determinatè oppositum illius antecedentis, sed oppositum illius alterius, quo antecedens reddebatur connexum cum consequente: v. g. quando datur promissio divina concedendi Beatitudinem homini morienti in gratiâ, est infallibilis hæc consequentia: *hic mortuus est in gratiâ; ergo habet, vel habebit beatitudinem*: oppositum hujus consequentis non infert metaphysicè absolutè oppositum illius antecedentis, quoniam sine ullo absurdo potuit Deus negare gloriam decedentibus in gratiâ; sed solum inferit disjunctivè, scilicet *vel hominem non esse mortuum in gratiâ, vel Deum non promisisse gloriam*.

40. 5. Non ex omni opposito cum consequente, sed ad summum

ex contradictorio formali, & immediato ipsius inferitur semper oppositum antecedentis: fieri namque potest, quod aliquid oppositum cum consequente tam longe absit ab inferendo oppositum antecedētis, ut potius infallibiliter inferat antecedens ipsum v.g. *ignis existit cum omnibus prærequisitis ex parte sui, & ex parte passi: ergo Deus præbet illi suum concursum ad cumburendum*; tunc sic; esto Deum habere hoc decretum efficax *voluisse existere ignem cum omnibus illis prærequisitis, & non præbere illi mentem concursum*: en decretum metaphysicè oppositum cum consequente illo, & metaphysicè simul inferens illud antecedens: ergo non ex omni metaphysicè opposito cum consequente. inferitur oppositum antecedentis: verum exceptio hæc intelligenda est consentaneè ad secundam, nempe quando antecedens fuerit connexum tantum naturaliter cum consequente, secus quando metaphysicè: nam licet connexum metaphysicè cum fundamento connexionis physicæ non sit eo ipso connexum cum termino, ut constat exemplo nuper dato, subindeque pateat locus, ut possit opponi cum illo: ast omne metaphysicè connexum cum fundamento connexionis metaphysicæ est eo ipso connexum cum termino, ut suo loco expoñemus: ergo repugnat quod sit illi oppositum, ergo repugnat, quod res opposita metaphysicè cum consequente sit metaphysicè connexa cum antecedente, quando hoc est metaphysicè connexum cum consequente.

41. 6. Nec ex contradictorio consequentis arguitur *semper ad omne* oppositum cum antecedente, sed directè & immediatè ad solum contradictorium formale illius: v. g. *Petrus habet amorem ardentissimum Dei super omnia; ergo non habet odium efficacissimum ejusdem Dei*: tunc sic contradictorium hujus consequentis, nimirum Petrum ardentissimè odisse Deum non inferit *omne* oppositum illius antecedentis. Probatur, unum ex oppositis cum illo antecedente est carentia ipsa Petri, repugnat quippe, quod amet Deum super omnia ille, qui non est in rebus; sed odium illud non inferit carentiam Petri, quinimò inferit existentiam, ut patet: ergo oppositum consequentis non semper inferit *omne* oppositum antecedentis, sed dumtaxat contradictorium immediatum illius: 7. Neque semper inferit *omne* contradictorium formale, & immediatum, sed sufficit quod inferat aliquod: v. g. hæc consequentia est infallibilis existit Petrus: ergo non habet Deus efficacem absolutam nolitionem existentie illius: oppositum hujus consequentis, scilicet efficax absoluta nolitio Divina de eo, quod Petrus existat, non inferit *omne* contradictorium illius existentie Petri; quia cum hic constituatur essentialiter corpore, animâ, & unio-

ne

ne, contradictorium uniuscujusque ex his est contradictorium immediatum ipsius Petri: atqui illa nolitio Divina non infert contradictorium uniuscujusque ex his, quippe solum infert Petrum non existere in rebus, & ad hoc sufficit, quod non existat unio corporis cum anima, licet perseverent cum existentia corpus, & anima, ergo.

§. II.

42. **H**is positis audiamus argumenta contraria. Primum est in hac infallibili consequentiâ *Petrus actû producitur: ergo actû existit*: contradictorium consequentis est illud quod fuerit obiectum propositionis contradictoriæ, nimirum *Petrus non existit actû*; sed obiectum hujus propositionis non infert oppositum, seu defectum illius antecedentis: ergo contradictorium illius consequentis non infert contradictorium, seu defectum, seu oppositum antecedentis. Probatur minor; obiectum hujus propositionis, *Petrus non existit actû*, est obiectum hujus, *existit actû*, nam cum ambæ sint contradictoriæ, debent habere idem obiectum; sed obiectum hujus affirmativæ est existentia Petri: ergo hæc eadem est obiectum illius negativæ; sed existentia Petri non infert defectum illius primi antecedentis, nam illud est actualis ipsa productio Petri, cujus defectum certè non infert existentia Petri, ut patet; ergo oppositum illius consequentis non infert oppositum, seu defectum illius antecedentis.

P. Ribadeneira
quæst. cit.
prop. 9.

43. Scito implexam valde disputari difficultatem a Philosophis, scilicet an dentur ex parte rerum carentiæ, seu contradictoria, seu defectus, seu quædam nihila, seu negationes? (omnia hæc significant idem) Affirmant plerique, & alii negant agentes obiectum omnis penitus humanæ, Angelicæ, atque Divinæ cognitionis esse physicas ipsas, & reales existentias rerum, quas intellectus tractat jam sub velamine unarum cognitionum, jam aliarum; istud argumentum, sicut & reliqua, quæ modò sequuntur, tacite unit has duas oppositas opiniones, & in hoc stat sua fallacia. Nostrium principium *ab opposito consequentis ad oppositum antecedentis*, cum sit principium universale, præscindit ab utràque opinione: quapropter non habet sensum directum circa contradictoria ipsa consequentis, aut antecedentis, quia ut dixi, de hoc dubitant Philosophi; sed habet hunc sensum reflexum, *quotiescumque intellectus admisit propositionem contradictoriam consequentis, quod cumque fuerit ob-*

Itum talis contradictoria, debet admittere propositionem contradictoriam antecedentis: unde ad objectionem distinguo majorem: si sint contradictoria objectiva, seu ex parte rerum, concedo: si non sint; nego suppositum: & distinguo minorem, non infert, si sint contradictoria objectiva; nego minorem: si non sint; concedo: & distinguo similiter consequens; ad probationem minoris distinguo majorem: objectum ambarum illarum propositionum contradictoriarum est idem, si non sint contradictoria objectiva; concedo: si sint, subdistinguo: objectum est idem distributione accommodata, concedo: distributione non accommodata, nego majorem: & distinguo minorem; objectum affirmativæ est sola existentia, nego: est existentia, & carentia, sed diversimode, nempe illa affirmata, & hæc negata, concedo minorem; & similiter explicantur cætera. Itaque si non sint contradictoria, seu negationes ex parte rerum; totum istud argumentum procedit bene; sed non impugnatur nostrum principium, quippe quod non habet sensum directum, sed reflexum illum, quem dedimus; sui verò dentur ex parte rerum carentiæ, seu contradictoria dicimus quod propositio affirmativa, & negativa habent idem objectum, non quatenus tendant in *salam* existentiam; sed quatenus ambe tendant in existentiam simul, & carentiam, licet diversimodè, quia propositio affirmativa adstruit existentiam, & destruit carentiam; negativa autem contratio adstruit carentiam, & negat existentiam.

44. Eodem modo solvenda sunt, quæ sequuntur. Objicit 2. hæc consequentia est infallibilis. *Deus decernit Petrum non existere: ergo Petrus non existit*; tunc sic; objectum hujus consequentis negativi est objectum hujus propositionis affirmativæ. *Petrus existit*: sed objectum hujus est existentia Petri: ergo etiam est objectum illius consequentis objectivi; sed contradictorium hujus existentie est carentia Petri: ergo contradictorium illius consequentis est carentia Petri; sed hæc carentia non infert defectum decreti, quod Deus decernat Petrum non existere, cum potius videatur inferre existentiam illius decreti: ergo contradictorium illius consequentis non infert defectum hujus decreti: sed hoc decretum est, quod assumitur in eo antecedente; ergo contradictorium consequentis non infert defectum antecedentis: & ratio est: eatenus ab opposito consequentis itur bene ad oppositum antecedentis, quatenus in omni bona consequentia objectum antecedentis deberet connecti cum objecto consequentis; sed hoc est falsum: probatur; ut intellectus firmiter procedat a propositione asserente præfatum decretum ad propositionem negantem

tem existentiam Petri, non requiritur, quod tale decretum conne-
ctatur, sed potius quoddam opponatur cum existentia Petri; sed tale
decretum est objectum illius antecedentis, & existentia Petri est
objectum illius consequentis, quia est objectum propositionis con-
tradictoris, scilicet Petrus existit: & propositiones contradictoriæ
debent habere idem objectum; ergo. Ecce redit ad idem, unde
respondemus idem, si non sint carentiæ, negationes, ac contra-
dictoria ex parte rerum concedimus totum discursum, sed non
nocet nostro principio; quia in hac suppositione habet sensum
illum reflexum, quem dedimus, & ille sensus stat firmus inde-
pendenter ab istis defectibus, seu contradictoriis: si verò ex par-
te rerum dentur carentiæ seu contradictoria, jam diximus, quod
propositio affirmativa, & negativa non dicuntur habere idem
objectum quatenus ambæ tendant in solam existentiam; sed qua-
tenus ambæ tendunt diversitate jam dicta in existentiam & in
carentiam objectivam.

2. III.

45. **O**bjicit 3. hæc consequentia est legitima, *Petrus non exi-*
stis; ergo Deus habet nolitionem existentia Petri, defe-
ctus seu contradictorium hujus nolitionis est contradictorium hujus
consequentis objectivi, ut patet: item contradictorium existentia
Petri est contradictorium illius antecedentis objectivi, quoniam exi-
stentia ipsa est objectum illius antecedentis negativi, cum sit obje-
ctum hujus propositionis *Petrus existit*, quæ est contradictoria illius
antecedentis; sed contradictorium illius nolitionis de existentia Petri
non infert contradictorium ipsius Petri, ut patet: ergo contradicto-
rium consequentis objectivi non infert contradictorium antecedentis
objectivi: Adversarius redit ad idem, & tu ad idem redeas, nempe
principium nostrum *ab opposito consequentis &c.* non habere sensum
directum circa ipsa contradictoria his argutiis obnoxium (quamvis
indulgentes modo communi loquendi nos etiam utamur illo in sensu
directo, quando sumus extra has cavillationes) sed reflexum illum
jam dictum: & adde quo sensu propositiones contradictoriæ habent,
ac non habent idem objectum.

46. Objicit 4. hæc consequentia est legitima, *Petrus non existis:*
ergo productio A. Petri non existis: objectum hujus consequentis est
productio A. & objectum illius antecedentis est existentia Petri: ergo
con.

contradictorium consequentis objectivi est contradictorium productionis *A.* & contradictorium antecedentis objectivi est contradictorium existentiae Petri: sed defectus, seu contradictorium *A.* non infert defectum, seu contradictorium Petri, siquidem deficiente productione *A.* potest Petrus existere ex vi productionis *B.* ergo ex contradictorio consequentis non semper arguitur ad contradictorium antecedentis. Juxta jam dicta distinguo hoc consequens ex contradictorio objectivo, seu in sensu directo non semper arguitur &c. permitto consequentiam, quia si non dantur talia contradictoria objectiva, certe non arguitur ex illis quidquam: ex contradictorio in sensu reflexo, nego consequentiam: quia quidquid sit de objecto, quod habent, aut non habent propositiones contradictoriae ex capite carentiarum, quas multi agnoscunt ex parte objecti, & multi negant, firmum stat, & inconcussum, quod si semel concedis propositionem contradictoriam alicujus consequentis infallibiliter illati ex antecedente, debes concedere propositionem contradictoriam illius antecedentis.

47. Objicit 5. haec consequentia est infallibilis: *existit creatura, ergo existit Deus*: sed defectus hujus consequentis objectivi non infert defectum antecedentis objectivi: probatur; nullus defectus purè fictus, & apparens infert essentialiter defectum realem, & verum, sicut quoddam homo habeat meram apparentiam mortui non probat illum esse mortuum, imò si est mera apparentia, certum est illum esse vivum: sed omnis imaginabilis defectus illius consequentis objectivi est defectus purè fictus, & apparens, quia Deus non potest verè, & realiter deficere ab existendo: ergo nullus defectus, seu contradictorium illius consequentis objectivi infert defectum verum, & realem illius antecedentis, sed ad summum inferet defectum fictum, & apparentem: redit hic Author ad rem similem: disputant enim Philosophi sit necne cognoscibile ab intellectu objectum, quod in se sit chimæra, quod in se sit ens rationis, unis affirmantibus, & alteris negantibus.

48. Principium nostrum ab hoc præscindit, quia dignitate non fungeretur principii universalis, si opinionibus istis privatis se ingereret: habet ergo sensum reflexum dictum, scilicet quoties intellectus concedat propositionem contradictoriam consequentis, sive objectum illius sit purè fictum, & apparens, sive verum, & reale; debet concedere contradictoriam antecedentis quomodolibet sit suum objectum: unde distinguo minorem, defectus reflexus hujus consequentis objectivi, hoc est propositio contradictoria illius consequentis non infert contradictoriam antecedentis nego: quia si semel concesseris hanc,

Deus

Deus non existit, debes concedere hanc, *Creatura non existit*, quodcumque sit objectum ambarum, quia hoc spectat ad alias quæstiones: defectus directus, & immediatus non infert &c. permitto minorem: & similiter explicantur reliqua. Alia argumenta, quæ fieri possunt contra hoc principium solvemus propriis in locis.

C A P U T IV.

Quor Argumentationes præbeat suppositio Terminorum.

49. **S**uppositio argumentationibus opportuna est quadruplex: *distributiva: copulata: determinata: confusa*, cumque omnes poscunt terminum universalem, ne falsa suppositione laborent: dixi *cui immediate adherent*, quippe non significant directè aut indirectè multipliciter terminum, quem mediater solum afficiunt, ut constet in his prædicationibus veris *omnis Persona divina est Deus: nullus lapis est Deus*; utrobique enim ille terminus *Deus* prorsus singularis, & multiplicationis incapax afficitur mediater, seu à longe illis distributivis signis *omnis, nullus*; & tamen non significatur multipliciter Dei, alioquin falsæ essent ambæ propositiones.

50. Igitur subjectum v. g. propositionis tunc supponitur *distributivè*, quando prædicatum enunciat de singulis contentis sub illo subjecto: & tunc prædicatum supponitur *distributivè*, quando prædicatum enunciat de singulis contentis sub illo subjecto: & tunc prædicatum supponitur *distributivè*, quando singula contenta sub illo enunciantur de subjecto eodem: quam ob rem terminus *distributivè* acceptus non est resolvendus, seu applicandus per unicam propositionem, sed per multas, in quarum singulis enuncietur prædicatum de uno: v. g. *omnis homo peccat* exponitur sic: *hic Homo peccat: & hic homo peccat &c.* hæc autem cujus prædicatum supponitur *distributivè*; *Deus est omnis sua perfectio* resolvitur sic: *Deus est hæc sua perfectio immensitas &c.* quod si subjectum, & prædicatum suppositione afficiantur *distributiva*, propositio implexa satis erit: quoniam explicanda est duplici classe propositionum, in quarum una erunt propositiones, quarum singulæ enuncient unum contentum sub prædicato de uno contento sub subjecto: & in classe altera erunt propositiones, quarum singulæ enuncient unum contentum etiam sub subjecto v. g. hæc propositio, *omnis Persona divina est realiter omne attributum divinum*

vinum, resolvitur sic *Pater est realiter omnipotentia, & est realiter immensitas &c. & etiam Filius est realiter omnipotentia, & est realiter immensitas: & etiam Spiritus Sanctus est realiter omnipotentia, & est immensitas*: cùmque propositio, cujus subiectum, & prædicatum supponuntur distributivè, resolvatur in tot, & tot alias propositiones, quarum si una sola sit falsa, erit quoque falsa copulatio omnium, hac de causa multifariam est obnoxia falsitati propositio, cujus tam subiectum, quàm prædicatum supponantur definitivè, & idèd paucissimæ sunt veræ.

51. Hinc infertur 1. Propositionem, in qua datur suppositio distributiva, fore falsam simul, ac una sola ex eis, in quas resolvitur, falsa sit; quoniam omnis propositio copulativa requirit ad sui veritatem, quòd singula membra, quibus constat, sint vera, quia hoc est, quod enunciat, nimirum simultatem veritatum membrorum suorum: sed quoties propositio habet suppositionem distributivam æquivaleret, seu resolvitur in propositionem copulativam coalescentem ex omnibus eis singularibus propositionibus jam dictis; ergo requirit ad sui veritatem omnes, & singulas omnes propositiones esse veras; ergo si vel una sola sit falsa, erit quoque falsa ipsa propositio, in qua est terminus supponens distributivè.

§. I I.

52. Infertur 2. Enodatio illius sophismatis: *Omnis homo est homo; sed Petrus est homo, ergo Petrus est omnis homo*; cujus major est identica supponens eodem modo in subiecto, & in prædicato ille terminus *homo*, unde illa major videtur tam vera, quàm hæc, *Hic homo est hic homo*: rursus minor est certa, & tamen consequens illud legitime illatum est falsum. Neque prodest dicere minorem debere esse hanc, *Petrus est omnis homo*, ut hic terminus habeat in minore eandem suppositionem distributivam, quam in majore, aliàs ut hic etiam syllogismus esset rectus, *Omnis homo est animal, Petrus est homo*; hæc minor dicere debebat, *Petrus est omnis homo*, ut in minore perseveraret eadem suppositio distributiva, quæ est in majore.

53. Solvitur autem negando illam majorem, quæ videtur identica; etenim ponamus duos tantum esse homines, Petrum, ac Joannem; illa major reddit hunc sensum, *Petrus est Petrus, & Petrus est Joannes*: & *Joannes est Joannes, & Joannes est Petrus* (cùm enim sub-

subiectum, & prædicatum supponantur distributivè, utrumvis resolvendum est per integras propositiones juxta nuper dicta; sed in eo sensu, sive resolutione, sive explicatione deteguntur duæ propositiones falsæ, ut vides; ergo legitima explicatio illius majoris, quæ dicitur identica, imbibit propositiones falsas; ergo illa major non est identica, sed falsa: hæc intellige sumpta illa majore in sensu directo, in quo licet sit falsa, hæc tamen est vera: *Omnis homo est aliquis homo*, siquidem Petrus est aliquis homo, & Joannes est aliquis homo &c. si autem sumatur illa major in sensu reflexo, ita ut suppositio distributiva, quam præferet, admisceatur cum suppositione copulata reflexa, vera erit illa major, quia dabit hunc sensum: *Complexum ex omnibus, & singulis hominibus est complexum ex omnibus, & singulis hominibus*, seu hunc: hic terminus, *Omnis homo significat idem quod hic terminus omnis homo*; & ambæ sunt illæ propositiones identicæ, quæ hic quæri possunt: verum illius syllogismi consequentia erit falsa; quia *homo* in majore fungitur suppositione reflexa, aut copulata, & in minore suppositione directa; variatis autem hoc modo suppositionibus nihil concluditur.

54. Infertur 3. Solutio similis sophismatis, nempe: *Omnis homo est subiectum adæquatum hujus propositionis: Omnis homo est animal*; sed Petrus est homo; ergo Petrus est subiectum adæquatum illius propositionis, quod aperte est falsum. Respondeo, aut sumitur in majore illud subiectum *omnis homo* in sensu directo, ac juxta suppositionem purè distributivam, aut in sensu reflexo, & juxta suppositionem copulativam reflectentem supra illam distributivam, quam præferet propositio ipsa? Si primum, nego majorem, quoniam significabit *Petrum esse subiectum adæquatum illius propositionis, & Joannem esse subiectum adæquatum illius propositionis*; sed hoc est planè falsum; ergo falsa est illa major in hoc sensu. Si secundum, concedo majorem, & minorem, sed nego consequentiam; quia *homo* non habet in minore sensum reflexum, sed directum; ergo mutatur hujusmodi suppositio; ergo nihil concluditur.

55. Quod si replices, subiectum adæquatum illius propositionis non esse hunc solum hominem, neque aliquem præcisè, ut patet; ergo est omnis homo. Hoc distingo, omnis homo distributivè sumptus distributione pura, & directa, nego: distributione admixta sophistice cum suppositione copulativa reflectente supra ipsam distributivam, concedo; sensus enim, in quem verti oportet ea propositio, est hic, *Petrus, & Joannes, & Paulus, & reliqui sunt subiectum*

adæquatum hujus propositionis, omnis homo est animal, ubi prædicatum, nimirum esse subiectum adæquatum ejus propositionis, non enunciatur de unoquoque, sed de complexo ex cunctis hominibus. Quodnam igitur est contradictorium illius propositionis? Respondeo, si homo supponatur distributivè distributione pura, & directæ, hæc erit contradictoria: Aliquis homo non est subiectum adæquatum &c. quod est verum, imò nullus homo: & consequenter altera est falsa; si autem sumatur distributivè distributione reflexè affecta per suppositionem copulativam, æquivalet propositioni singulari, quoniam subiectum illius est singulare, scilicet complexum ex cunctis hominibus; (non autem est dabile multiplex complexum ex cunctis hominibus) ergo instar singularium assignanda est contradictoria præponendo negationem toti propositioni sic: Non omnis homo est subiectum adæquatum &c. hæc autem propositio est falsa in hac suppositione, & consequenter illa altera est vera.

56. Infertur 4. Solutio hujus similis nodi: *Aliquis homo est individuum vagum; ergo vel Petrus est individuum vagum, vel Ioannes &c.* quod est falsum, cum antecedens sit verum. Respondetur, illud esse verum in sensu reflexo, & secundo intentionali; quia de singulis hominibus propositis sub ea expressione, *aliquis homo*, verificatur esse individuum vagum, idest esse illud, de quo enunciare possumus esse hominem, non autem esse hunc determinatè, aut illud determinatè; quia licet reverà sit unusdeterminatè, hoc nobis non panditur ex vi præcisè illius expressionis, *aliquis homo*. Cæterùm antecedens illud est falsum in sensu directo, seu primo intentionali, in quo solo idoneum erat inferendo consequens; quippe de nullo sub propria singulari, & característica expressione verificatur esse individuum vagum, quandoquidem de unoquoque homine sub proprio suo nomine possumus, dicere esse talem hominem determinatum, & singularem.

57. Infertur 5. Solutio Paralogysmi probantis omnes partes hominis distributivè sumptas esse partes ejusdem hominis collectivè sumptas, idest unamquamque esse omnes, quod jam vides falsum esse. Paralogysmus est, omnes partes hominis distributivè sumptæ non sunt corpus solidum; non sunt anima sola; non sunt unio sola; quæ tria vera sunt: ergo sunt simul corpus, anima, & unio: sed hæc tria simul sunt omnes partes hominis collectivè sumptæ; ergo omnes distributivè sumptæ sunt omnes collectivè sumptæ; ergo unaqueque pars alicujus totius est ipsum totum. Distinguo antecedens: non
sunt

sunt corpus solum, non sunt anima sola *in una sola propositione*, concedo; quia, ut diximus, terminus distributivè supponens non resolvitur per unicam propositionem, sed per multas; non sunt corpus solum *in una propositione*, & anima sola *in alia propositione*, nego antecedens, & consequentiam; etenim prædicatum illud enunciatur de omnibus partibus distributivè acceptis, enunciatur de singulis partibus, & quidem distributione accommodata *per propositiones distinctas*, v. g. *Omnes partes distributivè sumptæ distinguuntur inadæquatè à toto*, reddit hunc sensum complexum ex multis propositionibus: *Corpus distinguitur inadæquatè à toto, & etiam anima distinguitur inadæquatè à toto*: ubi non fit mentio solius corporis, neque solius animæ, sed utriusque; verùm in propositionibus diversis, ita ut *distinctio inadæquata à toto* non enuncietur de utraque simul, sed de unaquaque seorsim.

§. III.

58. **H** Actenus de suppositione distributiva, quæ abutitur solent Sophistæ: eam important semper omnia, & sola signa universalia, sive sint quoad numerum, ut *Omnis*, *Nullus*, *Utervis*, *Uterque*, *Neuter*: (nam etiam hæc distribuunt illa duo, quæ significant) sive sint universalia quoad tempus, ut *Semper*, *quotiescumque*, *Nunquam*; sive quoad locum, ut *Ubivis*, *Ubilibet*, *Nulibi*, *Nusquam*; sive denique sint universalia quoad illos modos, quos tractat Dialectica, ut *Necesse*, *Impossibile*; quocirca omnes propositiones, in quibus audieris aliquod ex his vocabulis, vel aliud equivalens, intelligere debes juxta explicationem suppositionis distributivæ paulò antedatam.

59. Suppositio copulata tunc datur in subiecto propositionis, quando prædicatum enunciatur per unam, eandemque tum formaliter, tum æquivalente propositionem, non de una tantùm parte subiecti, sed de cunctis simul impartitè, atque indivisè v. g. *omnes Planetae sunt septem*: ubi septenarius numerus non enunciatur de Saturno solo aut de Saturno, & Jove solis, sed de cunctis nullo dempto, & quidem per unicam propositionem, non multas, sic v. g. *Saturnus, Iuppiter, Mars &c.* sunt septem: idem dic de hac, *omnes Apostoli sunt duodecim*; quod si aliquando contingat prædicatum distingui adæquatè ab aliqua parte subiecti, provenit ex eo quod pars illa non significetur in recto, sed in obliquo, ut contingit in hac, & similibus *Album est rationale*, di-

stinguitur utique adæquatè rationalitas ab albedine, sed ideo vox illa *Album* non significat in recto albedinem, sed in obliquo.

60. Tunc afficit suppositio copulata prædicatum, quando cunctæ partes hujus, nullâ exceptâ, enunciantur simul impartitè, ac indivisè de subiecto: v.g. homo est *corpus*, *anima*, & *unio*, ubi de subiecto neque per unicam, eandemque propositionem affirmatur corpus solum, neque anima sola, neque solum corpus & anima, sed simul atque quasi unico impetu corpus, anima, & unio. Tunc demum hæc suppositio afficit subiectum, ac prædicatum, quando per unicam tum formaliter, tum æquivalenter propositionem complexum ex omnibus, quæ sonant ex parte prædicati enunciatum de complexo ex omnibus, quæ sonant ex parte subiecti: v.g. *omnes partes collectivè sumptæ sunt omnes partes collectivè sumptæ*: quæ propositio est vera, & identica, quando vertitur in hanc, *complexum ex omnibus partibus est complexum ex partibus omnibus*: unde clara fluit disparitas ad hanc *omnes partes distributivè sumptæ sunt omnes partes distributivè sumptæ*, quæ, tametsi videatur identica, est sophistica, & falsa, ut supra diximus de illa, *omnis homo est omnis homo*: reddit enim hunc sensum complexum *corpus est corpus*, & *corpus est anima*, & *anima est anima*, & *anima est corpus*, ubi jam detegis duas falsas enunciationes: ecce involucra, quæ imbibit illa propositio, quæ identica videbatur, quorum ratio est: suppositio distributiva æquivalet multis propositionibus, in quarum singulis enuncietur unumquodque contentum sub prædicato distributo de unoquoque contento sub distributo subiecto: suppositio verò copulata uni dumtaxat æquivalet propositioni, in qua acervus, seu multitudo, seu complexum ex omnibus, quæ sonant ex parte prædicati affecti suppositione copulatâ enunciatum uno quasi impetu de multitudine, seu complexo ex omnibus, quæ sonant ex parte subiecti affecti suppositione copulata; sin verò has suppositiones decussaveris affigens subiecto suppositionem copulatam, & prædicato distributivam, aut vice versâ, magnam confusionem, & non necessariam induces: oportet tamen has duas species suppositionum benè notas habere, quia prava earum intelligentia est origo multarum captionum.

61. Suppositio *determinata* tunc afficit subiectum commune, quando prædicatum enunciatum de aliquo determinato singulari, quin modus ipse enunciandi explicet potiùs unum, quam alterum singulare, & quin ad sui veritatem requirat potiùs unum, quàm alterum: v. g. *aliquis homo peccat*, ut hoc sit verum, opus est aliquem deter-

determinatum singularem hominem peccare, & propter hoc vocatur hæc suppositio *determinata*, cum aliquin sit vaga, & disiunctiva in suo modo tendendi, quoniam falsa esset si nullus peccaret; cæterum non explicat quisnam sit ille, nec requirit ad sui veritatem quod potius Petrus, quàm Joannes, aut è converso, peccet: quocirca reddit hunc sensum: *vel hic homo peccat, vel ille homo peccat*, & sic divagando per cunctos homines, nam si vel unus solus omittatur fieri potest ut ille sit, qui peccat, & cæteri non peccent. Tunc hæc suppositio afficit prædicatum, quando aliquod singulare determinatum contentum sub illo enunciat de subiecto, sed non aperitur quodnam sit illud singulare: v.g. *Petrus est aliquis homo*: ut sit vera hæc propositio necesse est aliquam determinatam humanitatem convenire Petro; sed non potius hanc, quàm illam: unde sic resolvitur, *Petrus est vel hic homo, vel hic homo*, & sic divagando non per duos, vel tres, quia resolutio exponetur periculo fallitatis, sed per cunctos homines possibiles.

62. Tunc demum afficit subiectum, & prædicatum, quando determinatum aliquod singulare contentum in termino communi enunciat de determinato alio singulari, sed neutrum clarè exprimitur, neutrumque determinatè requiritur formaliter ex vi solius propositionis ad hujus veritatem, v.g. *aliquis homo est aliquod animal*; ad veritatem enim hujus propositionis requiritur, quod unus individuus homo sit unum individuum, & singulare animal; sed propositio hæc neque aperit quis sit ille homo, neque quodnam sit illud animal, neque formaliter ut talis ad sui veritatem requirit potius hunc hominem, quàm illum, aut potius hoc animal quàm illud. Exponitur hic casus triplici propositionum serie, in quarum una sint propositiones divagantes per cuncta individua humana sic; *vel hic homo est aliquod animal, vel ille homo est aliquod animal &c.* in alia classe sint propositiones vagantes per cunctas species, atque individua animalium, nulla & nullo omisiss v.g. *aliquis homo vel est hoc animal, vel est illud animal &c.* in tertia demum classe sint propositiones per utraque individua nullo dempto vagantes sic; *vel hic homo est hoc animal, vel est illud animal: vel ille homo est hoc animal, vel est illud animal &c.* quam ob rem jam vides descensum, seu explicationem exactam diſt. propositionis debere fieri per infinitas alias propositiones nexas illà particulā, *vel*.

63. Suppositio confusa datur ex parte subiecti v.g. quando prædicatum ita enunciat de subiecto aliquo communi, ut non sit necesse

cessè, quod conveniat absolutè ulli singulari in dividuo contento in illo subiecto communi iv.g. *Equus requiritur ad equitandum. Navis est necessaria ad navigandum. Oculus requiritur ad videndum. Penna ad scribendum*, & in similibus propositionibus: etenim in prima (item respectivè de cæteris) illud prædicatum *requiritur*, ita enunciatur de natura equina, ut non sit necessarium ad veritatem, quod ulli singulari, & individuo equo absolutè conveniat, siquidem re vera nulli convenit in particulari; quod non accidit in suppositione determinata, seu disjunctiva nuper explicata: quoniam si est verum aliquem hominem peccare, est prorsus necessarium, quod aliquis individuus, & singularis peccet.

64. Hæc suppositio confusa non invenitur, nisi quando aliqua res connectitur vagò, seu disjunctivè cum multis, ut navigatio cum navibus, visio cum oculis, terminus cum actionibus, materia cum formis; semper autem resolvenda, atque explicanda est per connexionem absolutam, atque determinatam sic. *Equus requiritur ad equitandum; ergo quoties datur equitatio, & nullus alius sit præter equum A, hic requiritur*; & similiter resolvuntur illæ aliæ propositiones. Hucusque convenit suppositio confusa cum illa altera determinata, seu disjunctiva, quia etiam illa sic explicanda est; differt tamen, quia quando subiectum supponit confusè, prædicatum pro uno solo casu, potest verè convenire uni singulari, nimirum pro casu, quo cætera omnia absint, quapropter *requiri ad equitandum* solum pro casu, quo nullus alius sit equus, potest verè convenire equo A. quando verò datur suppositio determinata, seu vaga, seu disjunctiva, prædicatum potest convenire uni individuo, & singulari, tametsi etiam sint alia, quibus conveniat: quoniam aliquem hominem peccare potest esse verum, etiamsi multi peccent, quanquam non requiratur hoc, sed sufficiet, quod unus solus homo peccet; unde inferitur, quod suppositio confusa tunc solum datur, quando sunt illæ voces significantes connexionem, *requiritur; est necessarium; oportet*, & similes.

S. IV.

65. **H**is positis ex suppositione distributiva affirmativa octo eruuntur modi efficaces arguendi, & totidem in distributione negativa: quod intelligendum est, quando distributio cadit supra subiectum dumtaxat propositionis: nam si cadat supra

pra copulam etiam, aut supra prædicatum, aut supra omnia, innumer alii resultabunt; igitur ex termino distributivè supposito arguitur infallibiliter. Primò ad unumquodque singulare solum, v.g. *omnis homo peccat: ergo hic homo peccat*: quoniam si hic non peccaret, esset verum, *aliquis homo non peccat*, quæ est contradictoria illius primæ; ergo illa prima esset falsa: ergo si non est falsa, sed vera, verè quoque est, *hic homo peccat*.

66. Secundò ad disjunctivam vagantem inter unumquodque singulare, & quodvis aliud sive verum, sive falsum sive possibile, sive impossibile v.g. *omnis homo peccat: ergo vel hic homo peccat, vel Gallus cantat, vel chimæra ridet*. Tertio ad disjunctivam vagantem inter omnia illa singularia, v. g. *omnis homo peccat: ergo vel hic homo peccat, vel ille homo peccat &c.* Quartò ad eadem singularia affecta per quantitatem particularem v.g. *omnis homo peccat: ergo aliquis homo peccat: ratio est plana: omne ex quo infallibiliter sequitur aliquid, ex quo infallibiliter sequitur aliud, est id ex quo infallibiliter sequitur illud aliud, ut declarabimus agentes de connexionibus rerum: sed ex illo antecedente omnis homo peccat infallibiliter sequitur huic hominem peccare: & ex hoc infallibiliter sequuntur secundum, tertium, & quartum, quod diximus iam illa omnia sunt disjunctiva, & ad veritatem cujusvis disjunctivæ sufficit veritas unius partis, tametsi reliquæ sint falsæ aut impossibiles, ut constat in hac propositione vera *Deus existit, vel non existit*, cujus hæc ultima pars manifestè est chimerica: ergo.*

67. Arguitur. Quintò ad singula inferiora, enunciando prædicatum de unoquoque per distinctas propositiones unitas invicem v. g. *omnis homo peccat: ergo hic homo peccat, & ille homo peccat, & ille alius homo peccat &c.* Sextò ad definitionem tum subjecti tum prædicati, tum utriusque horum omnium v.g. *omnis homo peccat: ergo hoc animal rationale peccat: item ergo hic homo avertitur à Deo, & convertitur ad creaturam: sic solet definiri peccatum: item ergo hoc animal rationale avertitur à Deo &c.* en definitiones subjecti, & prædicati. Septimò ad propositionem convertentem horum omnium distributione accommoda v. g. *omnis homo peccat: ergo aliquid, quod est peccans, est homo*. Octavò ad falsitatem omnium propositionum contreriarum, & contradictoriarum suarum v.g. *omnis homo peccat: ergo falsum est, nullam hominem peccare: en contrariam: item ergo falsum est aliquem hominem non peccare: en contradictoriam: similiter de cæteris, & similiter etiam quando suppositio distributiva est in prædicato, ut, *Deus est omnis sua perfectio*: & similiter etiam quando suppositio distributiva est negativa, ut *nullus homo est lapis*.*

68. Suppositio *copulata* cū faciat propositionem singularem tamen si constantē termino aliās communi quatuor solas perhibet argumentationes. Primò ad omnia imbibita in subiecto vel prædicato (si suppositio copulata afficiat illud) quin ullum ex eis omittatur coniungendo illa omnia in unica propositione, & enunciando prædicatum non de singulis, sed de omnibus v. g. *omnes Planetae sunt septem: ergo Saturnus, Iupiter, Mars &c. sunt septem*: quod si vel unum omittas, falsum erit consequens, & mala consequentia, ut in hoc eodem exemplo constat: nisi fortè prædicatum eo quod sit ex transcendentalibus conveniat unicuique illorum, quæ habent suppositionem copulatam v. g. *omnes partes hominis collectivè sumptæ existunt*: quia hinc non modò inferitur *ergo materia, & forma, & unio existunt*: sed etiam, *ergo materia existit, & forma existit*, quod ex peculiari natura nascitur illius prædicati, nequeuntis convenire absolute ac sine limitatione toti, quin etiam conveniat singulis partibus illius quando totum non est successivū, sed permanens. Arguitur secundo ad definitiones eorum omnium coniungendo similiter illas in unica propositione, & enunciando prædicatum de omnibus simul. Tertiò ad definitionē prædicati enunciando illam de cunctis illis, quæ sunt in subiecto, aut de cunctis definitionibus illorum. Quarto ad falsitatem contrarii, vel contradictorii horum omnium consequentium.

69. Ex suppositione determinata, seu disjunctiva (quæ duo vocabula non esse opposita jam explicavimus) quinque depromes legitimas argumentationes. 1. ad omnia singularia nullo dempto enunciando prædicatum de quolibet in propositionibus distinctis, sed colligatis particulā aliquā disjunctivā v. g. *aliquis homo peccat: ergo vel hic homo peccat, vel ille homo peccat &c.* Ratio est pervia: si falsum esset hoc consequens disjunctivum vagans per omnes homines, esset verum nullum hominem peccare: ergo esset vera contradictoria illius, *aliquis homo peccat*: sed hoc est impossibile quando illa est vera: ergo quando est vera est impossibile quod sit falsum illud consequens: ergo necessario est verum. Diximus *nullo dempto*: quoniam si non numerantur omnia singularia, mala erit argumentatio v. g. *aliquis homo peccat: ergo vel Ioannes peccat vel Petrus peccat*: absit, quia potest esse alius distinctus ab his duobus.

70. Arguitur 2. ad unumquodque singulare sub hypothefi tamen defectus cæterorum omnium v. g. esto tres solos esse homines, hæc consequentia est legitima, *aliquis homo peccat: sed non hic, neque ille: ergo ille alius*: quoniam si neque ille alius peccaret, nullus ex tribus pec-

peccaret, & consequenter esset falsum: *aliquis homo peccat: ergo vel hoc animal rationale peccat, vel illud peccat &c.* 4. Ad definitionem prædicati enunciatam similiter de illis singularibus v. g. *ergo vel hic homo avertitur à Deo, vel ille homo avertitur à Deo &c.* 5. Ad definitionem prædicati enunciatam similiter de definitionibus singularium v. g. *ergo vel hoc animal rationale avertitur à Deo, vel illud animal rationale avertitur à Deo &c.* 6. Ad falsitatem contrariorum omnium, & contradictoriorum cujuslibet ex his. Modos arguendi ex suppositione confusa oriundos attingemus, quando connexionem terminativè disjunctivam, in qua illi fundantur, exponemus.

C A P U T V.

Quot Argumentationes eliciantur ex conversione Propositionum.

71. **C**onversio Logica propositionum est *unius ad aliud per extremorum transpositionem consequentia necessaria*: unde conversio idonea est, ut in illa formentur modi omnes arguendi efficaciter, quos dedimus agentes de consequentia: convertitur propositio, quando assumitur pro subiecto illud, quod erat suum prædicatum, & pro prædicato illud quod erat subiectum v. g. *nullus homo est Angelus*, (en propositionem, quæ vocatur conversa) *ergo nihil quod est Angelus est homo* en quæ vocatur convertens, quia hæc secunda assumit pro subiecto prædicatū alterius, & pro prædicato subiectum, unde posset vocari *invertens*: similiter *omnis homo est animal ergo aliquid, quod est animal* (ecce pro subiecto prædicatum alterius) *est homo*: harum consequentiarum energia est infallibilis, quia fundantur in eo quod omnis identitas realis adæquata, & omnis realis distinctio est mutua, quod suo loco ostendemus: unde fit quod si *A.* est *B.* realiter adæquatè (ecce conversam) prorsus necessarium est quod *B.* sit *A.* (ecce convertentem:) item si *A.* non est *B.* seu distinguitur realiter à *B.* est prorsus necessarium quod *B.* non sit *A.*

72. Sed hic occurrit gravis quæstio, scilicet, an sint formales hæc conversiones, & similes: Nullus homo est lapis, ergo nullus lapis est homo: Omnis homo est animal; ergo aliquod animal est homo? Major Logicorum pars affirmat, sed reverà non videntur conversiones formales, seu legitimæ ex vi formæ, sed tantum ex vi ma-

Q

terim.

teriz. Probatur. Quemadmodum argumentationem esse formalem, seu concludere ex vi formæ, stat in eo quoddam tale habeat artificium, ut in quacumque materia servetur nulla penitus excepta concludat, quod si non contingat, dicimus illam argumentationem non esse formalem, seu non concludere ex vi sui artificii, sed ad summum ex vi materiæ, de qua procedit ille discursus.

73. Ita conversionem esse formalem stat in eo, quoddam eam habeat inversionem, sive transpositionem terminorum, ut ubilibet, in quacumque materia servetur, infallibiliter sequatur veritas convertentis, si semel conceditur veritas conversæ: ergo quoties hoc non contingat, conversio non erit formalis, seu non concludet ex vi sui artificii, seu non erit principium prorsus universale, & metaphysicum: sed hoc ita contingit in istis conversionibus. Probatur. Loco illorum terminorum, *homo*, *lapis*, *animal*, qui sunt universales, pone terminum omnino singularem, & deprehendes conversam esse veram, & convertentem falsam, & consequenter deprehendes conversionem non esse legitimam, seu non concludere, quandoquidem inconcussum stat, quoddam ex vero nunquam potest sequi falsum, v. g. *Nullus lapis est Deus; ergo nullus Deus est lapis*: en conversam veram, & convertentem falsam, quia hæc secunda supponit multipliciter Deorum. Similiter: *Omnis Persona Divina est Deus; ergo aliquis Deus est Persona Divina*: ecce idem. Similiter. *Aliqua Persona Divina est Deus, ergo aliquis Deus est Persona Divina*: ecce idem: ergo istud artificium, seu iste modus transponendi terminos non est universalis in omni penitus materia; ergo non est formalis, seu legitimus ex vi formæ, sed tantum ex vi materiæ, nimirum quando hæc fuerit capax multiplicationis.

74. Quando igitur conversio erit formalis, & in omni prorsus materia universalis? Respondeo. Quando signa illa innuentia multipliciter non afficiant immediatè prædicatum conversæ, sed illud quod est illud prædicatum, v. g. *Nullus lapis est Deus; ergo nihil quod est Deus* (v. g. *Pater*, ac *Filius*, ac *Spiritus Sanctus*) *est lapis*. En convertentem veram legitimè illatam ex vera conversa. Similiter: *Omnis Persona Divina est Deus; ergo aliquid quod est Deus* v. g. *Pater est Persona Divina*; conversio est legitima, & ambæ sunt veræ: similiter: *Aliqua Persona Divina est Deus; ergo aliquid quod est Deus*; v. g. *Pater, est Persona Divina*; alias conversiones difficiliore in Divinis explicuimus in Præludio ad Scholasticam disciplinam disp. 1. cap. 5. Idem dico quando subiectum, & prædicatum sunt universalia,

lia, v. g. Nullus lapis est animal; ergo nihil quod est animal, est lapis. Omnis homo est animal; ergo aliquid quod est animal, est homo: sed cum Logici plerumque absorpti sint in iis suis universalibus; & in eis bene procedat ratione materiæ illæ conversio, hac de causa apud illos invaluit ille modus convertendi tanquam formalis, & universalis, & postea hærent quando conversio fit in materia Trinitatis.

75. Hinc capies non spernendam utilitatem, scilicet principia logica extendi etiam usque ad Mysterium Trinitatis, & hoc non ad-
versari regulis conversionum bene, & formaliter factarum, ut vidisti in exemplis datis; etenim sicut conversiones non sunt excogitatæ pro casu, quo inter subiectum, & prædicatum detur tantum identitas, aut distinctio inadæquata, sed adæquata: & non adæquata per rationem, sed adæquata physicè à parte rei, ut dicemus suo loco: ita regulæ, principia, & firmitas conversionum logicarum non sunt restringenda ad casum, in quo non detur distinctio virtualis, aut formalis ex natura rei (postea explicabimus ambas) inter prædicatum, & id quod est prædicatum, sed concipienda sunt cum præcisione ab isto casu, sive materia particulari; atqui si conversiones fiant prout à nobis factæ sunt modò, erunt firmæ, & universales, sive dentur, sive non dentur illæ distinctiones inter prædicatum, & id quod est prædicatum; si autem fiant, & concipiuntur modo Logicis solito, non sunt firma, quando datur aliqua ex illis distinctionibus, ut ostendimus, siquidem ex conversa vera sequetur convertens falsa; ergo solæ conversiones, quas dedimus sunt formales, & quas plerumque dant Logici sunt purè materiales.

S. II.

76. **C**onversio trifariam fieri solet. 1. *Simpliciter*. 2. *Per accidens*. 3. *Per contrapositionem*. Propositio convertitur simpliciter quando in convertente perseverat eadem quantitas, (id est idem signum universale, aut particulare *Omnis*, *Nullus*, *Aliquis* &c.) quæ erat in conversa; eadem inquam quantitas quoad numerum, quoad tempus, quoad locum, quoad modum, & sic convertuntur universalis negativa, & particularis affirmativa, v. g. *Nullus homo est lapis; ergo nihil quod est lapis est homo. Aliqua Persona Divina generatur; ergo aliquid quod generatur est Persona Divina. Impossibile est hominem esse lapidem; ergo impossibile est id, quod est lapis, esse hominem.* Convertitur per accidens, quando quantitas

universalis, quæ erat in conversa mutatur in particularem; & sic convertuntur universalis affirmativa, & universalis negativa; v. g. *Omnis Persona Divina est Deus; ergo aliquid quod est Deus est Persona Divina. Nullus homo est lapis; ergo aliquid quod est lapis non est homo.* En in utraque quantitatem illam universalem, *Omnis, Nullus*, mutatam in particularem *Aliquid*.

77. Convertitur per contrapositionem, quando servata in convertente quantitate eâdem conversæ transmutantur subiectum, & prædicatum, sed ex finitis evadunt infinitata: hoc modo convertuntur universalis affirmativa, & particularis negativa; v. g. *Omnis homo est animal; ergo omne quod est non animal* (ecce infinitatum *animal* ratione negationis præpositæ) *est id, quod est non homo*; ecce infinitatum similiter illum terminum *homo*. *Omnis Persona Divina est Deus; ergo omne, quod est non Deus est id quod est non Persona Divina.* Item, *Aliquis homo non est lapis; ergo aliquid quod est non lapis non est id, quod est non homo.* Has tres conversiones redegerunt præfati Logici ad hos rudes versus:

Simpliciter feci, convertitur Eva per Acci;

Asi O. per contra; sic fit converso tota.

78. *A.* in his regulis logicis significat universalem affirmativam *Omnis*, *Quoties*, *Ubicumque*, *Necesse*. *E.* universalem negativam; v. g. *Nullus*, *Nunquam*, *Nullibi*, *Impossibile*. *I.* particularem affirmativam, v. g. *Aliquis est*, *Aliquando*, *Alicubi*, *Possibile est*. *O.* particularem negativam, v. g. *Aliquis non*, *Aliquando non*, *Alicubi non*. *Possibile est non*. Quapropter hi versus docent, quodd *E.* atque *I.* idest universalis negativa, & particularis affirmativa, quæ sunt in illa voce *Feci* convertuntur simpliciter, & quodd *E.* atque *A.* quæ sunt in illa voce *Eva*, convertuntur per accidens; & quodd *A.* & *O.* quæ sunt in illa voce *Asi*, convertuntur per contrapositionem.

79. Ex hoc loco conversionum multa sophismata erui solent, ad quæ extricanda regula generalis esto. Propositio non est cæco impetu convertenda, ne ex conversa vera descendat convertens falsa; sed examinandus est sensus, quem reddit conversa, & juxta illum danda est convertens; in hac poni debent jam affirmative, jam negative iidem prorsus termini, qui erant in conversa, & in eodem sensu, & in iisdem suppositionibus, excepta quantitate, quæ, ut vidisti, interdum mutatur: ob hanc regulam violatæ malæ sunt, prout jacent hæ undecim conversiones, & consequenter malæ, atque fallaces hæ consequentiæ, quibus alias similes considerare potes.

80. 1. *Aliqua species est homo; ergo aliquis homo est species*: malè, quia homo in prima accipitur secundò intentè onaliter prout est unum quoddam universale; in secunda accipitur primò intentionaliter, nempe procedit ea propositio circa hominem prout est à parte rei; ergo mutatur suppositio; ergo nihil habetur: convertendà igitur est: *ergo homo est aliqua species*, ita ut illa vox *homo* sumatur etiam secundò intentionaliter, prout significat unum individuum, & singulare ex numero universalium; sunt enim multa universalia, sicut multi lapides: & homo sumptus reflexè, ac secundò intentionaliter est unum ex universalibus. 2. *Aliquod generans* (scilicet Pater Æternus) *est Essentia Divina*: ergo Essentia Divina generat, seu est aliquid generans; malè, quia Essentia Divina nec generat, nec generatur; quapropter sic debet converti; *ergo Essentia Divina est aliquid, quod est generans*, quod verum est, quoniam illa est Paternitas, quæ est aliquid, quod est generans Filium; neque putes esse idem *Essentia est generans*, & *Essentia est id, quod est generans*; quemadmodum non sunt idem, Pater est Filius; Pater est id, quod est Filius; nam primum est falsum, secundum verum; nam Pater est Essentia Divina, quæ etiam est Filius; ratio autem est: Essentia Divina, & id quod est generans, nempe Paternitas, distinguuntur invicem ea distinctione, quam infra explicabimus, & quæ vocatur distinctio virtualis; ergo ex eo, quòd Essentia sit illud, quod est generans, & id, quod est generans generet, non sequitur Essentiam generare; ergo non sunt idem, *Essentia est id quod est generans: Essentia generat*.

81. 3. *Nullam corpus est album; ergo nullum album est corpus*: aut *ergo aliquod album non est corpus*: malè ambæ; nam illa prima negat unionem albedinis cum corpore; secunda, & tertia tacitè supponentes existentiam albi, supponunt quoque hanc unionem; ergo non manet suppositio eadem; quomodò ergo convertenda est? Respondeo. Quando conversa negativa unicè est vera ob defectum formæ, quam connotat prædicatum, non est convertenda in propositionem tacitè supponentem illam formam, v. g. *Nullus equus existit existens equina* (nempe quia omnis equus sit mortuus, subindè quæ neque hac, neque illa, neque ulla existentia existat) non sic convertitur; *ergo aliquod existens existentia equina non est equus*; neque sic, *ergo nihil existens existentia equina est equus*; quoniam illa prima unicè ob defectum existentia equina potest esse vera: hæ autem duæ tacitè supponunt hanc existentiam; ergo non sunt bonæ conversiones; quocirca

circa ejusmodi propositiones, convertendæ sunt in disjunctivam vagantem inter negationem illius formæ, & negationem illius prædicati de illo subjecto; v. g. Nullus equus existit existentia equinâ; ergo vel nulla datur existentia equina, vel nihil existens per illam est equus; aut sic; ergo, *vel nulla datur existentia equina, vel aliquid existens per illam, non est equus*; quæ disjunctiva est vera ratione primæ partis, quamvis secunda sit falsa. Similiter itaque convertitur illa: *Nullum corpus est album*; ergo, *vel nullum datur album, vel illud non est corpus*; quæ secunda pars, licet necessarîo sit falsa, illa prima potest esse vera.

82. 4. Nullus senex erit puer; ergo nullus puer erit senex: malè, quia in prima, senex supponit de præsentî, & puer de futuro; in secunda è contra, puer de præsentî, & senex de futuro: convertitur itaque sic: ergo nullus qui erit puer est senex. 5. Omnis puer erit senex; ergo aliquis senex erit puer: malè, quia in prima accipitur puer de præsentî, & senex de futuro: in secunda, puer de futuro, & senex de præsentî: convertitur itaque, ergo *aliquis, qui erit senex est puer*. 6. Aliquis homo est mortuus; ergo aliquis mortuus est homo: malè, quia homo in priore accipitur de præterito, (non enim est modò, sed fuit antea homo ille, qui modò est mortuus) & in posteriore de præsentî; unde sic convertitur, ergo *aliquis mortuus fuit homo*. 7. *Aliquod animal non est Petrus*; ergo *Petrus non est aliquod animal*: est ambigua; si namque negatio in hac ultima distribuat terminum *animal*, quem post se invenit, falsa erit, & consequenter mala conversio, quippe significabit Petrum non esse ullum ex cunctis animalibus; sin. verò terminum illum relinquat cum sua vaga, & disjunctiva suppositione, conversio erit bona, & convertens vera; quia Petrus reipsa non est equus, & consequenter non est aliquod quoddam animal.

83. 8. Possibile est nullum corpus esse album: ergo possibile est nullum album esse corpus; malè: prima namque non supponit existentiam alibi; secunda hanc existentiam supponit tacitè, quia rededit hunc sensum: *possibile est nullam, quod sit album, esse corpus*, qui sensus est falsus: convertitur itaque; ergo possibile est vel non existere subjectum album, vel illud non esse corpus; quæ disjunctiva est vera ratione primi membri. 9. Necesse est omne album esse corpus: ergo necesse est aliquod corpus esse album, quod falsum est; sed conversio est mala: etenim vel prima supponit absolutam existentiam *alibi* (& sic est falsa, cum non sit necesse existere in rebus subjectum album).

album), vel solum enunciat identitatem illius cum corpore pro casu, quo album existat. & tunc convertens debet esse hæc: *ergo necesse est aliquod corpus esse album casu, quo detur album in rerum natura; quæ vera est.*

84. 10. *Impossibile est omne animal esse hominem: ergo impossibile est aliquem hominem esse animal;* mala conversio per accidens: quoniam veritas antecedentis non consistit in repugnantia animalis utcumque cum homine, sed *omnis animalis cum homine*: ergo idem terminus ponendus est in convertente, & dicendum. *ergo impossibile est aliquem hominem esse omne animal*: ob eandem rationem fallit hæc; *non est necesse omne corpus esse arborem: ergo non est necesse aliquam arborem esse corpus*, quod est falsum: igitur cum veritas conversæ constet in illo termino complexo *omne corpus*, & propter illud solum sit vera, ille idem debet poni in convertente sic: *ergo non est necesse aliquam arborem esse omne corpus.* 11. *Impossibile est nullum hominem esse animal; ergo impossibile est aliquod animal non esse hominem*, est ambigua: vel enim convertens distribuit animal, & dat hunc sensum, *impossibile est dari ullum animal, quod non sit homo*; quod cum sit falsum, non potest esse convertens illius prioris, quæ vera est; vel non distribuit animal, sed dumtaxat reddit hunc sensum: impossibile est aliquod, idest quoddam determinatum animal non esse hominem; & hoc est verum, & conversio legitima, quoniam impossibile est animal rationale non esse hominem.

S. I I I.

85. **H**Is præmissis segregare oportet propositiones *absolute* enunciantes identitatem, aut distinctionem inter subiectum, & prædicatum ab enunciatis *conditionate* connexionem, aut oppositionem, aut coexistentiam, aut separationem conditionis a conditionato: de harum conversione agemus, quando argumentationes conditionatas evolvemus; in præsentī verò de illis solis.

86. Igitur ex conversione septem descendunt legitime argumentationes. Prima ex conversa ipsa ad convertentem; etenim ut supra insinuavimus, & infra ostendemus infallibilis, atque universalis est reciprocatio identitatis realis adæquatæ, atque distinctionis: si enim A. adæquatè identificatur cum B., necessarium est, quod B. adæquatè identificetur cum A.; quoniam vel ita identificatur A. cum B. ut
si.

simul distinguantur virtualiter, vel non; si primum cum distinctio virtualis, & etiam formalis ex natura rei trahant secum identitatem eorum extremorum, quæ sic distinguuntur, ut suo loco exponemus, palam fit, quod si A. ita identificatur cum B., ut ab eo distinguatur virtualiter, A., & B. identificantur realiter inter se: ergo A. cum B., & B. cum A., si ita identificatur A. cum B., ut nulla inter ipsa detur distinctio virtualis: ergo omnia penitus, quæ conveniunt uni, conveniunt alteri, sed rei A. competit identificari secum ipsa; ergo etiam rei B. convenit identificari cum A. Hoc modo sufficiat; cum ergo in conversa enunciatur identitas, aut distinctio subiecti cum prædicato; in convertente autem identitas, aut distinctio prædicati cum subiecto, sequitur, quod si est vera conversio debet esse vera convertens.

87. Sed non modica occurrit questio. An scilicet conversa, & convertens valeant ad convertentiam, id est an sicut ex conversa semper infallibiliter sequitur convertens, ex hac etiam semper infallibiliter sequatur illa? Et videtur omnino affirmandum juxta nuper datam rationem ex reciprocatione identitatis prædicati cum subiecto; sed respondemus negativè; etenim vel conversio est inter subiectum, & prædicatum omnino singularia, v. g. *Petrus est hic homo: ergo hic homo est Petrus. Verbum Divinum est Deus: ergo Deus est Verbum Divinum*: & tunc conversa, & convertens reciprocè se inferunt ob rationem datam numero antecedenti.

88. Vel conversio est inter terminos universales, ut esse solet; & iterum oportet distinguere; vel enim conversio est simpliciter, aut per contrapositionem: vel per accidens? si primum æque bene arguitur ex convertente ad conversam, atque ex hac ad illam: quapropter sicut est bona hæc consequentia, *nullus homo est lapis: ergo nullus lapis est homo*; ita est bona hæc, *nullus lapis est homo: ergo nihil quod est homo, est lapis*: & sicut est bona hæc; *aliquis homo est animal: ergo aliquod animal est homo*: ita est bona hæc; *aliquod animal est homo: ergo aliquis homo est id, quod est animal*, & similiter de aliis. Ratio autem est; conversio est consequentia: ergo quoties conversio sit reciproca, consequentia est reciproca; sed omnis conversio simpliciter, vel per contrapositionem est reciproca, quia ut insinuavimus, conversa vertitur in convertentem, & convertens in conversam: ergo in omni conversione simplici, & per contrapositionem consequentia est reciproca.

89. Ob oppositam rationem non est reciproca consequentia in conversione per accidens; quocirca licet firma sit hæc: *Omnis homo est*

est animal ; ergo aliquod animal est id , quod est homo ; hæc tamen nulla est , aliquod animal est homo ; ergo omnis homo est animal ; quia ad veritatem prioris sufficit identitas *alicujus* hominis cum animali ; ad veritatem posterioris requiritur identitas *omnium* , & ex identitate alicujus non sequitur formaliter , & universaliter identitas omnium , quanquam hæc reverà detur ; similiter licet hæc sit bona , *nullus homo est sanctus ; ergo aliquis Sanctus non est homo* : mala est hæc , *aliquis Sanctus* (puta Angelum) *non est homo ; ergo nullus homo est Sanctus* ; quorum ratio est : tametsi veritas universalis inferat particularem , utpotè partem sui ipsius , & intrà sua viscera imbibitam ; attamen veritas particularis non infert universalem : sed in conversione per accidens propositio conversa est universalis affirmativa , aut negativa , & propositio convertens est particularis , ut constat ; ergo quanquam conversa per accidens inferat convertentem , hæc non infert illam ; ergo in conversione per accidens consequentia non est reciproca ; ergo falsum est ; quod sicut ex conversa semper , ac infallibiliter sequitur convertens ; ita ex hac semper , & infallibiliter sequatur illa .

90. Arguitur 2. ex conversa ad reflexam convertentem ipsius convertentis , nisi fortè conversa ipsa sit hæc reflexa convertens , quia tunc non datur locus consequentiæ formali . 3. Ad æquipollentem convertentis , v. g. *Nullus homo est lapis ; ergo omnis lapis non est homo* ; quia cum *omnis non* perinde valeat ac *nullus* , hæc , quam posuimus , æquipollet huic alteri : *Nullus lapis est homo* , quæ est immediata convertens illius primæ . 4. Ad subalternam convertentis , si eam habuerit . 5. Ad subalternam quoque æquipollentis , v. g. *Nullus homo est lapis , ergo aliquis lapis non est homo* . 6. Ad propositionem , in qua sint definitiones horum omnium , vel aliquorum . 7. Ad falsitatem propositionis contrariæ , aut contradictoriæ uniuscujusque ex his ; quorum ratio est . Ex conversa sequitur infallibiliter convertens , ut manet probatum ; ergo sequuntur etiam omnes illæ propositiones , quæ sequuntur ex convertente : sed omnes hæc , quas meminimus , sequuntur ex convertente , ut eas consideranti constabit ; ergo omnes hæc sequuntur ex conversa ; ergo ex illa arguitur benè ad omnes has .

§. I V.

91. **L**ongè plures argumentationes præbet conversio modalium. Propositio modalis est illa, in qua non solum enunciat unum de alio, verum etiam modus, quo illud unum convenit, vel repugnat huic alii; v. g. *Necesse est omnem hominem esse animal. Impossibile est omnem hominem esse lapidem.* Illud, quod enunciat affirmativè, aut negativè, vocatur *dictum*; alterum verò, nempe *Necesse*, *Impossibile*, vocatur *Modus*, & licet modi, quibus unum potest enunciari de alio, sint innumeri; Dialectica tamen de solis tribus agit, scilicet, *Necesse est*; *Impossibile est*; *Possibile est*; ad quod interdum reducitur quartus alius, scilicet *Contingens est*.

92. Hæ propositiones modales possunt esse universales ex parte *Modi*, & *Dicti*, ut sunt illæ duæ, quia *Necesse* correspondet ei signo universali *Omnis*; & *Impossibile* illi alteri *Nullus*. Possunt etiam esse particulares ex parte modi, & dicti, v. g. *Possibile est aliquem hominem currere. Possibile est aliquem hominem non currere.* Possunt etiam esse universales ex parte modi, sed particulares, aut singulares ex parte dicti, v. g. *Necesse est aliquem hominem esse animal. Impossibile est aliquem hominem non esse animal. Necesse est hunc hominem esse animal. Impossibile est hunc hominem non esse animal.* Possunt item esse particulares ex parte modi, sed universales, aut etiam particulares, aut etiam singulares ex parte dicti; v. g. *Possibile est omnem hominem esse animal. Possibile est aliquem esse animal. Possibile est Petrum esse animal.*

93. Cæterum, sicut quoddam sint affirmativæ, aut negativæ non taxatur per id, quoddam habeant dictum affirmatum, aut negatum, sed per id, quoddam *Modus* sit affirmativus, aut negativus: atque idcirco hæc modalis est affirmativa, *Necesse est nullum hominem esse lapidem*; & hæc est negativa: *impossibile est omnem hominem esse lapidem*; ita quoddam modalis sit quantitatis universalis, aut particularis, non est definiendum penes id, quoddam dictum sit universale, aut particulare, sed penes modum; quocirca hæc est universalis, *Necesse est aliquem hominem esse animal. Impossibile est hunc hominem esse lapidem.* Et hæc sunt particulares, *Possibile est omnem hominem esse animal. Possibile est nullum hominem esse lapidem.* Ratio autem est, quod præcipuè, directè, ac primariò enunciat per has propositiones est ille modus *Necesse, Impossibile &c.* ubi præcipua copula applicatur; ergo

hinc.

hinc , & non aliunde sumendum est , quod hæc propositiones sint affirmativæ , aut negativæ , sint universales , aut particulares .

94. Igitur ex conversione propositionis modalis de *necesse* , v. g. septem supra decem validas consequentias depromes (tuum erit similes meditari circa conversionem propositionum de *impossibili* , ac de *possibili*) Etenim vel subiectum dicti est affectum signo universali affirmativo , vel universali negativo : vel particulari affirmato , vel particulari negato ; vel est prorsus singulare ? Si primum , ecce tres validas consequentias ; necesse est omnem hominem esse animal : ergo 1. necesse est aliquod animal esse hominem : ergo 2. possibile est aliquod animal esse hominem ; ergo 3. possibile est omnem hominem esse animal : cùmque hæc tres consequentiæ multifariam possint multiplicari juxta supra datas argumentationes ex definitione , ex consequentia , & juxta infra dandas ex contradictione , ex æquipollentia propositionum , jam vides copiosam segetem consequentiarum nascentem ex his tribus . Quod si dixeris secundam illam consequentiam non tam esse convertentem , quàm subalternam primæ convertentis : concedimus hoc , & negamus illud ; nam etiam hæc absoluta universalis *nullus homo est lapis* , convertitur per accidens in hanc , *aliquis lapis non est id , quod est homo* ; & tamen hæc est subalterna alterius illius , *nullus lapis est homo* , inquam convertitur simpliciter illa *nullus homo est lapis* : ergo aliquam propositionem esse subalternam alicujus convertentis non tollit eam esse quoque convertentem per accidens ejusdem conversæ .

95. Si secundum , ecce quinque consequentias ; necesse est nullum hominem esse lapidem : ergo 1. necesse est nullum lapidem esse hominem ; ergo 2. necesse est aliquem lapidem non esse hominem ; ergo 3. possibile est nullum hominem esse lapidem ; ergo 4. possibile est nullum lapidem esse hominem ; ergo 5. possibile est aliquem lapidem non esse hominem : omnes sunt infallibiles attento capite conversionis .

96. Si tertium , ecce tres consequentias : necesse est aliquem hominem esse animal ; ergo 1. necesse est aliquod animal esse hominem : ergo 2. possibile est aliquem hominem esse animal ; ergo 3. possibile est aliquod animal esse hominem . Si quartum , ecce alias tres : necesse est aliquem hominem , non esse lapidem : ergo 1. necesse est aliquid , quod non sit lapis non esse id , quod non est homo , (hæc est conversio per contrapositionem) ; ergo 2. possibile est aliquem hominem non esse lapidem : ergo 3. possibile est aliquid , quod non sit la-

pis non esse hominem. Tandem si contingat quintum, ecce alias tres: necesse est Petrum esse hunc hominem; ergo 1. necesse est hunc hominem esse Petrum; ergo 2. possibile est hunc hominem esse Petrum; ergo 3. possibile est Petrum esse hunc hominem.

97. En septendecim promissas argumentationes ex conversione solius modalis de *necesse* erutas; quod si prædicato *disti* affigas aliquod ex illis signis *nullus*, *omnis*, *aliquis*, & illud detrahas subiecto v. g. necesse est Patrem Æternum esse omnem perfectionem absolutam: item si tam subiecto, quàm prædicato apponas ea signa, v. g. necesse est omnem Personam Divinam esse omnem perfectionem absolutam Dei, multæ aliæ pullulabunt legitimæ argumentationes ex conversione: huiusmodi combinationes percallere oportet: ex angulis quippe iis erumpunt interdum sophistæ, sicut latrunculi ex lateribus, & pudendas infligunt plagas non sine adstantium risu veteranis aliquibus, qui præ nimia gravitate subtilitates temunt, quas non didicerunt: *videndi quidem parallogysmi sunt*, prudenter aiebat Doctor Ribadeneira homo rei scholasticæ peritissimus *simul tamen solvendi: hic enim risus, vel irrisio haud semel est cum Adversarium dolose contemnere, quem superare non potes, quoddamque ni fallor ignorantia propria diverticulum.*


98. Hinc habes quod sicut signum universale *nullus*, & particulare affirmativum *aliquis* convertuntur simpliciter, nempe servando in convertente eandem quantitatem, quæ erat in conversa; ita modus negativus *impossibile*, qui est universalis, & etiam modus particularis affirmativus *possibile* convertuntur simpliciter, perseverantes nimirum ambo respectively in convertente; & sicut idem signum universale negativum *nullus*, & universale affirmativum *omnis* convertuntur per accidens transeuntia nimirum in signum particulare *aliquis*; ita modus universalis affirmativus *necesse*, & universalis negativus, *impossibile* convertuntur per accidens transeuntes in modum particularem *possibile*, jam cum affirmatione, jam cum negatione: & similiter respectively de aliis.


P. Ribadeneira
disp. 19.
de Affib.
Human.
cap. 2.

CAPUT VI.

Quot Argumentationes ministrat Logica Habitudo Propositionum.

99. **L**ogicam Habitudinem vocamus eam combinationem, seu correspondentiam propositionum tum amicarum invicem, tum inimicarum, ex qua multi nascuntur argumentationum fontes. Systema Logicis antiquum est hoc pro absolutis propositionibus





100. Sed primum illud quadratum non videtur plenum, & perfectum pro re presenti, quia in eo non habent locum propositiones de subiecto singulari, quæ strictissime sunt contradictoriæ, v. g. *Petrus currit, non Petrus currit*. Secundò quia nec habent locum propositiones oppositæ privativè, aut relativè. Tertio quia, ut mox dicemus *omnis*, & *aliquis non*, non faciunt contradictorias formales, seu quæ in omni prorsus materia ex vi suæ dispositionis sibi contradicant; sed duntaxat faciunt contradictorias materiales, idest quæ contradictoriæ sint ratione materiæ universalis, in qua semper fiunt à Logicis; cum tamen attendere debuissent omni alii materiæ capaci contradictionis; unde sequitur subalternam unius contrariæ non semper esse contradictoriam alterius contrariæ, ut dici solet.

101. Igitur omnes illas combinationes in septem classes redigimus: in prima sunt propositiones, quæ opponuntur *contradictoriè*: in secunda, quæ sunt *contrariæ*: in tertia quæ sunt *subcontrariæ*: in quarta, quæ sunt *subalternæ*: in quinta quæ opponuntur *privativè*: in sexta quæ opponuntur *relativè*: in septima quæ sunt *æquivalentes*, seu æquivalentes, idest quarum una perinde se habet ac altera.

102. Propositiones contradictoriae, quæ semper debent esse *eiusdem* de eodem secundum idem sunt illæ, quorum una præcisè negat quidquid affirmat, & supponit altera: si enim non neget saltem disiunctivè quod altera supponit, ambæ erunt falsæ absolute, & simpliciter, quidquid sit de partitionibus, & præcisionibus mentalibus, si falsum fuerit illud suppositum v.g. hoc album est dulce: hoc album non est dulce signando subiectum nigrum, sunt falsæ ambæ, quia ambæ supponunt subiectum esse album: contradictoria ergo illius affirmativæ est hæc, *non hoc album est dulce*: quia cum negatio sit semper malignantis naturæ, ut a jure destruit, seu distribuit quidquid post se invenit: unde illud *non* propositum toti propositioni est in causa ut propositio negativa reddat hunc sensum disiunctivum, *vel non est hoc subiectum album, vel non est dulce*, qui sensus potest esse verus vel quia non sit tale subiectum: vel quia non sit album, vel quia non sit dulce.

103. Et hinc nascitur quæstio an scilicet sint contradictoriae formales, seu, ex vi præcisè suæ constructionis illæ *omnis homo currit, aliquis homo non currit*, & consequenter an subalterna unius contrariæ sit semper contradictoria alterius contrariæ? Respondemus negativè juxta ea, quæ diximus de conversione: probatur quemadmodum syllogismus formalis est ille solus qui in omni prorsus materia concludit, si servetur suum artificium, & semel concedantur præmissæ: & quemadmodum conversio formalis est illa sola, quæ in omni prorsus materia elicit convertentem ex conversa, si servetur suum artificium: ita contradictio formalis, & ex vi solius artificii est illa sola, quæ in omni penitus materia facit propositiones contradictorias, si servetur suum artificium, seu dispositio terminorum.

104. Ergo quæcumque non fuerit id generis, non erit contradictio formalis, seu ex vi solius sui artificii: at *omnis*, & *aliquis non*, non sunt id generis. Probatur: si materia propositionum fuerit prorsus singularis, ut multoties est, illa signa non faciunt contradictorias absolute, & simpliciter tales, quidquid sit de frigidis præcisionibus mentalibus, quas non curamus agentes de realitate: etenim huic propositioni falsæ *omnis Deus est omnipotens* non contradicitur per hanc, *aliquis Deus non est omnipotens*, quia hæc etiam est falsa, cum etiam supponat multitudinem Deorum: unde haberemus duas contradictorias absolute, & simpliciter tales esse simul falsas: ergo illa dispositio non facit contradictorias in omni materia: idem dic, quando materia est impossibilis v.g. *omnis chimæra est nigra: aliqua chimæra non est nigra*: ambæ falsæ: idem, quando subiectum est possibile, & uni-

ver-

versale, sed falsę suppositionis, v. g. casu quo nulla esset albedo: *omne album est dulce: aliquod album non est dulce*, ambę falsę in casu illo.

105. Et ratio est: nullę propositiones, quę in suo modo enunciandi expressę supponunt objectum idem, sunt contradictorię formales (quod supponant subiectivę idem principium, nil refert, nam certę possunt duę contradictorię esse cognitiones ortę ab eodem intellectu, & huiusmodi convenientia mutua non tollit, quodd sunt contradictorię, sicut hoc non tollitur per id, quod ambę sint creaturę, sint actus vitales) quia ut nuper dicebamus, contradictorię sunt illę, quarum una negat disjunctivę saltem quod altera affirmat, & supponit: sed ambę dictę propositiones in suo modo enunciandi expressę supponunt idem: nempe multipliciter subiecti, quia hæc signa *omnis, nullus, aliquis*, expressę innuunt multipliciter illius termini, quem immediatę efficiunt, ut constat: ergo dictę propositiones non sunt contradictorię formales ex vi sui artificii. Neque prodest quod nequeant esse simul verę, aut simul falsę: quoniam etiam multę propositiones contrarię, nimirum illę, quę non admittunt medium, nequeunt esse simul verę, aut simul falsę; & tamen non sunt contradictorię v. g. *Petrus existit: Deus scit Petrum non existere* quę duę propositiones nec possunt esse simul verę, nec simul falsę.

106. Quęnam igitur est contradictoria formalis illius: *omnis Deus est omnipotens*? Respondeo esse hanc solam: *non omnis Deus est omnipotens*, quę dat hunc sensum disjunctivum verum: *vel non sunt multi Dii: vel non sunt omnipotentes singuli*: est inquam contradictoria, non *physicę*, sicut Petrus, & sua carentia sunt invicem contradictoria, quia in hoc sensu uniuscujusque contradictorium est sua carentia; sed *logicę*: quatenus una negat quod affirmat, & supponit altera: quamobrem fatemur in illo quadrato propositionum: *omnis Deus est omnipotens: nullus Deus est omnipotens: aliquis Deus est omnipotens: aliquis Deus non est omnipotens*, duas priores esse contrarias, & ambas falsas, duas posteriores esse subcontrarias: primam, & tertiam, secundam, & quartam esse subalternas: sed negamus primam, & quartam, secundam, & tertiam esse contradictorias: quia subalterna unius contrarię tunc solum est contradictoria alterius contrarię (& quidem purę materialis, quippę nunquam est contradictoria formalis, ut diximus) quando licet supponat idem quod ille, suppositum hoc aliunde constat esse certissimum: at prima, & quarta, secunda, & tertia supponunt omnes idem, scilicet multipliciter Deorum: & hoc suppositum certę est falsum: ergo.

107. Quamobrem Logicorum quadratum circa propositiones universales sic videtur formandum: *omnis homo currit: nullus homo currit: non omnis homo currit: non nullus homo currit*: contradictio verò formalis, idest universalis pro quacumq; materia sine ulla exceptione, & pro quacumque propositione, quemcumq; habeat modum tendendi, est præponere negationem toti propositioni: quia ex vi hujus dispositionis, seu artificii fiet contradictio in omni materia: cum enim illud *non* sit malignantis naturæ, destruit quidquid post se invenit: ergo siue falsitas insit subjecto propositionis, siue suppositioni, siue copulæ, siue prædicato, siue alicui alii voculæ his annexæ, negatio illa omnia hæc destruit: & non faciendo sensum copulativum, sed disjunctivum, ad cujus veritatem sufficit, quod una pars sit vera: similiter si illa negatio inveniat propositionem negativam, reddit eam affirmativam, quia duæ negationes affirmant eo quod prima destruat secundam, nam destruit quidquid post se invenit, licet non destruat quidquid habet ante se: hac regula solvuntur captiones, quibus aliqui irretiri solent Logici circa propositiones contradictorias: quoniam præponendo negationem toti propositioni, & quidem non in sensu infinitante, sed in sensu negante, nunquam ostendentur duæ contradictoriæ simul veræ aut simul falsæ *in materia possibili*: quamvis ostendi soleant in materia impossibili, seu implicante contradictionem: non est autem absurdum quod in tali materia essent simul veræ, & simul falsæ duæ contradictoriæ.

108. Hinc si fingatur omnem propositionem naturalem hodie habendam ab hominibus esse falsam, contradictoria hujus, *omnis propositio hodierna est falsa*, erit quidem hæc, *non omnis propositio hodierna est falsa*: & licet ambæ sint veræ, non est absurdum data illa suppositione, quoniam si supponis omnem propositionem esse falsam, & postea submittis duas propositiones contradictorias hodiernas, consequenter supponis duas contradictorias esse falsas: quid ergo mirum, quod, dato uno absurdo, ista alia sequantur: similiter contradictoria hujus propositionis, *ego semper mentior*, est hæc, *non ego semper mentior*, quæ utique reddit sensum disjunctivum sæpe insinuatum, scilicet, *vel non sum ego; vel non semper mentior*.

109. Sed adverte propter sophistas, qui abutuntur hac propositionem, ut probent duas contradictorias posse simul esse veras, aut simul falsas: tamen si propositiones possint, & soleant reflectere supra se ipsas modo illo, quem dedimus disp. 1. cap. 6. agentes de definitione: ceterum ista non potest supra se reflectere tali speciali reflexione, ut de se quoque dicat se esse mendacium; quoniam nil, ex quo sequitur eandem propositionem esse simul absolute veram, & absolute falsam, est

possibile: sed ex eo quod ea propositio reflecteret supra se ipsam hac speciali reflexione enunciandi de se ipsa, se esse mendacium, sequeretur illam esse simul veram, & falsam: ergo illa specialis reflexio non est possibilis. Major est certa: quia nil, ex quo sequitur impossibile, est possibile: & omne, ex quo sequitur unam, eandemque propositionem esse simul veram, & falsam, est id, ex quo sequitur aliquod impossibile, nempe hoc idem, esse simul veram, & falsam. Probo minorem: si reflectit supra se ipsam hac speciali reflexione, rogo: quando illam profers, vel censeres illud esse falsum: vel non? Si 1. illa propositio erit tunc vera, quando quidem tunc e tiam mentiris proferendo eam cum iudicio de eo, quod est falsa: & simul erit falsa, quandoquidem non est mendacium, sed conformis iudicio, quo illam profers, & quo iudicas illam esse mendacium: at ipsa dicit se esse mendacium, & consequenter se esse contra mentem, seu contra iudicium, quo profertur, ergo tunc erit etiam falsa. Si 2. illa tunc est falsa, quia enim non sit contra tuum iudicium, non est mendacium, ergo si dicit se esse mendacium, est falsa, & simul est vera, quia non est mendacium dicere illam esse mendacium, quando scit illam non esse contra mentem, seu iudicium, tuum, ergo si reflecteret supra se ipsam, esset simul vera, & falsa, ergo est impossibilis hæc reflexio.

110. Igitur ex loco *contradictionis* octo sumi possunt legitimæ argumentationes. Primum ex veritate unius contradictoriæ ad falsitatem alterius, & viceversa. Secundò ex falsitate unius ad veritatem alterius: quia ut explicabimus postea in prima appendice: *impossibile est eandem rem simul esse, & non esse*: ergo si est verum rem esse, necessariò est falsum, rem non esse, & viceversa: item si est verum, rem non esse, necessariò est falsum, rem esse, & viceversa: ceteræ pendent ex principiis suo loco dandis circa rerum connexiones, ac oppositiones, ibi eas invenies.

111. Ubi adverte primò: quando dicimus veritatem unius contradictoriæ trahere secum essentialiter falsitatem alterius, ne intelligas falsitatem *formalem*: quia hæc sicut etiam veritas formalis, constituitur essentialiter per ipsam propositionem mentalem, aut vocalem, ut dicemus in libris de Anima; certum autem est veritatem unius contradictoriæ non trahere secum essentialiter existentiam propositionis vocalis aut mentalis: debes ergo intelligere falsitatem *obiectivam*, hoc est veritatem unius contradictoriæ trahere secum essentialiter, quod non sit illud, quod enunciat sua contradictoria, unde trahit secum, quod sua contradictoria sit formaliter falsa, *si existat in rebus*.

112. Adverte secundò. Aliud est verificari duas propositiones con-
tra-

tradictorias : & hoc est prorsus impossibile, ut insinuavimus: aliud verò longè diversum, verificari duo *prædicata contradictoria* : & hoc passim contingit, quando subiecta, de quibus loquimur, sunt distincta : esse *namque discursuum* : non *esse discursuum*, licet non sint duæ propositiones contradictoriæ, quia non sonat subiectum, sunt tamen duo prædicata contradictoria, quia unum negat idem, quod enunciat alterum : & non est necesse, quod prædicata sint enunciatio tota : sed primum verificatur de homine ; & secundum verificatur in eodem instanti de belluis: ergo duo contradictoria prædicata verificantur simul non utique de eodem subiecto, sed de diversis : hoc notatum habeto pro distinctione virtuali suo loco explicanda, quia illa non est capacitas ad verificandum duas propositiones contradictorias; sed ad suscipiendum duo prædicata contradictoria, qua capacitate fungitur etiam distinctio realis.

§. II.

113. **H**ic occurrit questio 2. An duæ contradictoriæ possint

esse veræ saltem pro diversis instantibus; non quia asserunt, aut negent pro diversis instantibus (nam hoc modo non essent de eodem, secundum idem, & consequenter non essent contradictoriæ) sed quia respicientes idem penitus instans existerent ipsæ, seu conciperentur in diversis temporibus : & hinc nascitur alia, scilicet an rei semel existentis possit unquam dari contradictorium, seu defectus, seu carentia *absoluta* ipsius rei secundum se? Utrumque negant Lynce, & Ribadeneira, cum multis : affirmant Izquierdo, & Quiros cum aliis.

114. Prima conclusio : duæ propositiones contradictoriæ necdivinitus possunt esse veræ pro diversis instantibus, idest si una fuit aliquando vera, altera nunquam potest esse vera v. g. *Adamus fuit in initio Mundi* : non fuit Adamus in initio Mundi, & idem respectivè de quibusvis aliis. Probatur : si prima propositio sit hodie vera, est prorsus necessarium quod Adamus tunc fuerit, quia in hoc stat, quod illa sit vera. Rursus si secunda esset vera cras, esset prorsus necessarium quod Adamus non fuerit tunc in initio Mundi ; quia hoc est, quod enunciat illa negativa, & in hoc stat sua veritas, ergo si illæ duæ propositiones essent veræ in diversis instantibus, hoc est una hodie, altera cras ; infallibiliter sequeretur, Adamum fuisse, & non fuisse in eodem initio Mundi: ergo sequerentur duo contradictoria pro eodem instan-

P. Lynce
l. 7. Tractat. 2. c.
4.
P. Ribad
l. de conting. qu.
6. & Dispositio. de
sci. De
c. 12. Izquierdo
Tract. de
Deo dis.
8.
P. Quiros
p. 1.
dis. 48.

ti ex eo, quòd duæ propositiones contradictoriæ, pro diversis instantibus essent veræ: atqui est prorsus impossibile, quòd duo contradictoria existant pro eodem instanti, nam *impossibile est rem simul esse, & non esse*: & licet duæ propositiones contradictoriæ conceptæ ab eodem vel à diversis intellectibus possint existere in eodem instanti, hoc ideo est, quia neutra est contradictorium physicum alterius, sicut Petrus, & sua carentia, sed utraque habet pro contradictorio in hoc sensu defectum suum, carentiam suam: ergo impossibile est, quòd duæ contradictoriæ sint veræ adhuc in diversis instantibus.

115. Dices 1. Si Petrus hodie vivit, hodie est verum dicere, *Petrus nunc vivit*: si cras moriatur, cras erit verum dicere, *Petrus nunc non vivit*: sed *Petrus nunc vivit*, *Petrus nunc non vivit* sunt duæ contradictoriæ. Distinguo, si respiciant idem *nunc* id est idem instans, permitto: si secus, nego minorem: quia contradictoriæ debent esse ejusdem, de eodem, secundum idem: ergo debent respicere idē instans: ergo si una respiciat diem hodiernum, & altera crastinum, ut contingeret in isto casu, non erunt contradictoriæ. Transeat ergo quod posito unam esse veram, altera sit quoque vera: hoc bene nota, quia sunt multæ propositiones, quæ videntur contradictoriæ, & tamen non sunt, quia non sunt *eiusdem de eodem secundum idem*: quapropter hæ & similes propositiones, *Petrus existit*, *Petrus non existit*: per se præcisè non sunt contradictoriæ, sed indifferentes, ut sint, vel non sint contradictoriæ: si adjungas illis terminum significantem idem tempus, eundem locum, easdem prorsus omnes circumstantias erunt contradictoriæ: si secus, contradictoriæ non erunt: v. g. *Petrus existit, sed Romæ: Petrus non existit, sed Matrini*.

116. Dices 2. Ut aliqua propositio sit vera, solum requiritur, quòd detur sua veritas, *quando ipsa existit*, non autem *quando non existit*, quòd multis exemplis amplificarì potest: ergo ut hodie sit vera illa propositio, *Adamus fuit*, sufficit quòd hodie detur, *Adamum fuisse*: & ut altera sit vera cras, sufficit quòd cras non detur, *Adamum fuisse*: sed fieri potest, quòd detur hodie, & non detur cras *Adamum fuisse*: ergo fieri potest, quòd ex illis duabus contradictoriis una sit vera hodie, & altera sit vera cras. Nego majorem, quia ut propositio sit vera in aliquo tempore non exigit, quòd sua veritas objectiva id est objectum, ex quo verificatur, detur quando ipsa datur, sed in illo tempore, pro quo illud dari enunciat ipsa propositio: quemadmodum, ut sit vera in aliquo loco non exigit, quòd in eo loco detur sua veritas objectiva; sed quòd detur in eo loco, quicumque fuerit, pro quo

quò enūciatur v. g. in hoc loco est vera hæc propositio *Deipara est in Cælo*, & tamen in hoc loco neque datur *Deipara*, neque sua præsentia, quam habet in Cælo: nempe quia hoc non enūciatur per eam propositionem: similiter illæ propositiones non enūciant dari hodie, dari cras hoc, quod est *Adamum fuisse*; sed simpliciter, directe, ac sine involucris una dicit *Adamus fuit in instanti A.* v. g. altera dicit *non fuit in eodem instanti*: ergo veritas primæ poscit, quòd fuerit *Adamus* in instanti *A.* & veritas secundæ poscit, quòd non fuerit in eodem instanti *A.* sed est chimæra, quòd fuerit, & non fuerit in eodem instanti *A.* ergo quod una sit vera hodie, & altera sit vera cras poscit chimæram.

117. 2. Conclusio. Impossibile est, quòd duo contradictoria physica, & objectiva existant adhuc pro diversis instantibus *in sensu positivo*: possunt tamen existere pro diversis instantibus *in sensu merè negativo*; & sic conciliari possunt duæ illæ propositiones. Explicatur, & probatur: duo contradictoria physica, & objectiva existere pro diversis instantibus *in sensu positivo* staret in eo, quòd ex hypothese, quòd *Petrus* v. g. fuerit, sit, vel futurus sit in instanti *A.* datur aliquid, quod in se ipso sit *Petrum non fuisse, aut non esse, aut non futurum esse in instanti A.* sicut datur aliquid, quod in se ipso sit *hominem esse animal*; & aliud, quod in se ipso est *lapidem non esse animal*; rursus dari duo illa contradictoria pro diversis instantibus *in sensu merè negativo* stat in eo, quòd ex hypothese, quòd *Petrus* aliquando fuerit in instanti *A.*, non detur in instanti *B.* quidpiam, quod in se ipso sit, *Petrum fuisse in instanti A.*

118. Sed ex hypothese, quòd *Petrus* fuerit in *A.* prorsus repugnat, quòd unquam sit, fuerit, aut futurum sit quidpiam, quod in se ipso sit, *Petrum non esse in A.*, quoniam illud quancumque sit, haberet per suam essentialitatem, quòd *Petrus* non sit in *A.* (sicut revelatio divina de peccato Antichristi, in quocumque instanti totius æternitatis existat talis revelatio infallibiliter connectitur cum eo peccato); unde sequeretur *Petrum esse in A.*, ut ponimus: & non esse in *A.*, quia esset, aut fuisset aliquid essentialiter habens, quòd *Petrus* non sit in *A.*; ex hypothese autem, quòd *Petrus* fuerit in *A.* potest contingere, quòd non detur in instanti *B.* aliquid, quod in se ipso sit *Petrum fuisse in instanti A.*, quia juxta principia suo loco danda, futuritiones, & præteritiones non sunt aliquid physice de presenti existens, sicut existit hæc charta; ergo tamen duo contradictoria physica, & objectiva non possint existere pro diversis instantibus *in sensu positivo*, possunt *in sensu merè negativo*.

119. Explicatur non obscuro exemplo : aliud est , quòd posito *Regem vivere Matrìti* detur in hoc loco aliquid , quòd realiter in se ipso sit *Regem non vivere Matrìti* (& hoc benè vides esse impossibile) ; aliud autem longè diversum , quòd in hoc loco non detur quidpiam , quòd in se ipso sit *Regem vivere Matrìti* : & hoc vides esse possibile ; quòd de loco , dicimus de tempore ; posito quòd res aliquando fuerit , impossibile est , quòd unquam detur aliquid , quòd in se ipso sit , *rem non esse in eo tempore* : & in hoc sensu dicimus , esse impossibile , quòd rei semel existentis unquam detur carentia , seu contradictorium absolutum , seu defectus ipsius rei secundum se : quia hoc esset dari pro diversis instantibus duo contradictoria absoluta , & objectiva , dari inquam in sensu positivo . Cæterum ex hypothesi , quòd res aliquando fuerit , potest contingere , quòd aliquando non detur aliquid , quòd in se ipso sit , *rem esse in eo tempore* , sicut non daretur aliquid , quòd formaliter in se ipso foret , *hominem esse animal* , casu quo nullus esset homo ; & hoc vocamus dari duo contradictoria pro diversis instantibus *in sensu merè negativo* ; & in hoc sensu rei semel existentis potest dari carentia , seu contradictorium absolutum , idest rei secundum se non ut separatæ , sed *ut distincta* a suo tempore , sive duratione .

120. Obijcies ex hac eadem doctrina : deficere unum contradictorium est existere alterum , ut est evidens apud Philosophos : ergo deficere , seu non esse in B. res , quæ in se ipsa sit *Petrum existere in A.* ; est existere in B. contradictorium hujus rei : sed contradictorium hujus rei *Petrum existere in A.* est hoc *Petrum* non existere in A. ergo si in B. non datur res , quæ sit *Petram* existere in A. , necesse est , quòd in B. detur aliquid , quòd in se ipso sit , *Petrum non existere in A.* ; ergo si concedimus posse existere pro diversis instantibus duo contradictoria in sensu merè negativo , concedendum est , posse existere in sensu positivo : & confirmatur exemplo eis Authoribus solenni ; ut Petrus modò non sit in hoc loco , non requiritur , quòd modò detur in hoc loco , vel alibi carentia , mors , defectus , sive contradictorium ipsius Petri secundum se ut distincti a sua præsentia ; sed sufficit mera , pura , & sola carentia *præsentia romana* : ergo ut Adamus non sit hodie , non est necesse , quòd hodiè detur carentia , seu contradictorium ipsius Adami secundum se , ut distincti a sua duratione hodierna , sed sufficit mera , & sola carentia hodiernæ durationis , quæ sicut carentia præsentia vocatur defectus respectivus , non autem absolutus rei ; sicut enim se habet præsentia ad locum , ita duratio ad tempus .

121. Ad objectionem respondeo; si illud antecedens sine ulla explicatione esset evidens, ut vulgò jactatur, sequeretur, carentiam hujus chartæ esse causam solis: nam deficere unum contradictorium est per vos existere alterum; sed in signo priori ad solem non datur, seu deficit hæc charta, quia hæc non est causa solis: ergo in illo eodem signo priori ad solem existit carentia hujus chartæ; sed existere in signo priori, est esse causam hoc, vel illo modo; ergo carentia hujus chartæ est causa solis; similiter deficere unum contradictorium est existere alterum: sed in hoc loco romano deficit, seu non datur aliquid, quod sit formaliter in se ipso *Regem existere Matrivi*: ergo in hoc loco datur aliquid, quod in se ipso sit formaliter, & quidem non in sensu infinitante, *Regem non existere Matrivi*; ergo in eodem tempore licet pro diversis locis datur duo contradictoria objectiva, & absoluta.

122. Itaque vel nega antecedens illud propter hæc duo exempla, si objiciatur instar regulæ sine ulla acceptione; vel potius distingue illud: Deficere *intentionaliter* unum contradictorium est existere *intentionaliter* alterum, id est esse falsam unam contradictoriam est, esse veram alteram si existat, concedo antecedens. Deficere *objective* unum contradictorium est existere alterum, subdistinguo: Est existere alterum in sensu merè negativo, concedo; in sensu positivo, nego illud antecedens cum consequentia: in primis hoc argumentum supponit cognoscibile esse ab intellectu objectum, quod in se ipso sit carentia, seu defectus, seu contradictorium rei positivæ: quod postea dicemus esse falsum: ergo hoc argumentum, id est antecedens illud supponit falsum: sed hoc dissimulato dicimus, quod deficere unum contradictorium, quod sit entitas positiva, v.g. Petrus, est existere alterum *in sensu merè negativo*, id est non dari quidquam, quod in se ipso sit formaliter, *Petrum existere in rebus*; & in hoc sensu antecedens illud est penitus evidens; verumtamen non est existere alterum *in sensu positivo*: quia non est existere aliquid, quod in se ipso sit formaliter *Petrum non esse, aut non fuisse, aut non futurum esse in instanti A.* ut constat exemplo illo præsentis; etiam supponendum est contradictoria ut talia constitui essentialiter per ordinem ad idem tempus reale, vel imaginarium: quia ut talia debent esse *eiusdem, de eodem, secundum idem*: ergo si præscindas ea. ab omni tempore, præscindes à constitutivo contradictionis; ergo jam non relinquis illa contradictoria; ergo si postea inferas, illa posse coexistere, implicas in terminis, quoniam redis ad simultatem temporis, aut loci, à qua similitate præscindis.

123. Ad illud exemplum confirmationis dicimus, quod inter explicandum conclusionem dicebamus: concessio antecedenti, distinguo consequens: non requiritur, quod modò detur in sensu positivo in hoc loco, vel alibi carentia, mors &c. concedo consequentiam: in sensu negativo, nego consequentiam: & sanè non est leve discrimen inter exemplum istud, & rem præsentem; quoniam repugnat existere essentiam, seu defectum, seu contradictorium absolutum rei secundum se in eodem momento, in quo hæc in rebus existit: at quando Petrus non est in loco, in eodem momento potest ille existere in rebus, nimirum Matrìti v. g. quando ille non est in hoc loco, potest non dari sua carentia, defectus, sive contradictorium absolutum in hoc loco; ergo non requiritur, quod detur. Cæterum, cum Adamus neque sit in hoc loco, neque in hoc tempore in rerum natura, potest in hoc tempore existere, ac requiri defectus, sive carentia, non solum respectiva, hoc est, suæ durationis; sed etiam absoluta, hoc est, ipsius ut distincti à sua duratione.

S. III.

124. **H**Atenus de contradictione propositionum quantum modò sufficit: jam oppositio contrarietatis est duplex; una purè physica, & naturalis; altera metaphysica: contrarietas purè physica inest eis propositionibus, quæ enunciant adhærere eidem subiecto pro eodem tempore, & eisdem omnino circumstantiis formas, aut qualitates invicem sibi relictantes, v. g. hæc res est intensè calida; hæc res est intensè frigida: item hoc subiectum habet formam ligni: hoc subiectum habet formam ignis.

125. Hæc species contrarietatis semper admittit medium, hoc est, fieri potest saltem de potentia Dei, quod utraque propositio sit falsa, ut constat in propositionibus nuper datis; quocirca ex falsitate unius non potest argui pro, aut contra veritatem, aut falsitatem alterius; quandoquidem unaquæque ex dictis propositionibus potest esse modò vera, modò falsa in sensu composito falsitatis propositionis alterius: quod si aliquando contingat, quod ex defectu unius formæ inferatur metaphysicè existentia alterius, hoc non est quia defectus ille per se præcisè importet hanc existentiam; sed quia coniungitur cum alia re, & ex amborum veritate inferitur illa existentia; sic defectus solus eductionis quantitatis non infert per se existentiam creationis, quantitatis ejusdem, quia fieri potest, quod illa quan-

quantitas non existat, unde nec existet per creationem, nec per educationem: at verò ille defectus educationis conjunctus cum quantitate ipsa infert metaphysicè existentiam creationis: quoniam si existit quantitas, & non per educationem, necesse est quòd existat per creationem.

126. Igitur ex sola veritate unius harum contrariarum sumi possunt argumentationes respectu alterius. 1. Ad falsitatem illius alterius, v. g. hæc res est summè calida: ergo falsum est, quòd sit summè frigida: hæc autem illatio est violabilis per potentiam Dei, & interdum per agentia quoque naturalia fortiora, ut patet in hac consequentia purè naturali; *est aqua: ergo habet frigus*: quòd si consequenti addas vocem illam *connaturaliter*, jam illatio erit metaphysica: intensus namque calor est metaphysicè connexus cum eo, quod quando ipse occupat subjectum non sit connaturale intensum frigus. Rursus ex veritate eadem multæ aliæ possunt erui argumentationes, & bonæ & malæ, quibus parcimus modò, quia pendent ex principiis postea dandis circa connexiones, & oppositiones purè physicas, & naturales.

127. Oppositio contrarietatis metaphysicæ inest eis propositionibus, quæ nec divinitus possunt esse simul veræ v. g. omnis homo peccat, nullus homo peccat: si enim prima esset vera, etiam vera esset hæc subalterna *Aliquis homo peccat*: item si secunda esset vera, etiam esset vera hæc sua subalterna *aliquis homo non peccat*: ergo omnes quatuor hæc propositiones essent simul veræ: sed in eis sunt duo binaria contradictoriarum saltem materialium, nempe *omnis homo peccat*, *aliquis homo non peccat*: item *nullus homo peccat*, *aliquis homo peccat*; ergo si illæ duæ contrariæ essent simul veræ, sequeretur quòd duo binaria contradictoriarum essent simul vera: hæc contrarietas invenitur etiam in propositionibus de subjecto singulari, v. g. *Petrus peccat in A.*: *Deus scit Petrum non peccare in A.* repugnat; quòd simul sint veræ, quia falleretur Deus.

128. Hæc contrarietas metaphysica est duplex; una, quæ admittit medium; quod contingit, quando ambæ contrariæ sunt simul falsæ, v. g. omnis homo, est Sanctus: nullus homo est Sanctus; altera, quæ non admittit medium, quod contingit, quando duo contraria sunt ejus conditionis, ut non possint simul deficere, ita ut propositiones non possint esse simul falsæ, v. g. *existit Petrus*, *scit Deus Petrum non existere*: hæc namque duo ita sibi adversantur, ut neque possint simul esse vera (aliàs Deus haberet aliquam scientiam falsam) neque possint simul deficere, aliàs aliqua veritas fugeret mentem Divinam.

129. Igitur ex contrarietate metaphysica non admittente medium tot sumi possunt argumentationes, quot ex propositionibus contradictoriis: his enim æquivalent quoad repugnantiam essentialem ut simul sint veræ, aut simul sint falsæ: in contrariis autem admittentibus medium multifariam arguitur benè. Primò ex veritate unius ad falsitatem alterius, quia ut ostendimus, nec divinitus possunt esse simul veræ; ergo si una est vera, necesse est, alteram esse falsam. Secundò ad eas omnes veritates, atque falsitates, cum quibus falsitas alterius connectitur, idest quo inferuntur necessariò ex falsitate alterius; sed non semper arguitur ad veritates vel falsitates, quæ connectuntur essentialiter cum falsitate alterius: hæc, & alia exponemus inter explicandum, & combinandum connexiones, atque oppositiones metaphysicas.

130. Oppositio privativa est inter eos terminos, quorum unus negat subiecto formam, & simul capacitatem habendi illam, ut *irrationale*, qui negat discursum, & simul capacitatem discurrendi: alter verò negat formam, sed capacitatem enunciat illius, ut *stultus*: improprie namque lapidem vocares stultum, cum hoc ut vitium rationalium duntaxat: igitur cum hi termini sint implicite copulativi, duas ex unoquoque comparare possumus argumentationes. Primò ex assertionem utriuslibet ad simplicem carentiam formæ v. g. *hoc est irrationale: ergo non ratiocinatur: est stultum: ergo non discrit*. Secundò ex assertionem termini negativi ad negationem capacitatis, tum proximæ, tum remotæ ad formam, v. g. *est irrationale: ergo neque proximè, neque remotè est capax philosophandi*. Tertiò ex assertionem termini privativi ad capacitatem remotam, & radicalem subiecti v. g. *est stultus: ergo capax est radicaliter ratiocinandi*: unde arguitur etiam ad illa omnia, quæ ex prædicta capacitate radicali sequuntur v. g. *est stultus: ergo scit Deus, illum frui capacitate radicali ad discurrendum*. Quartò ex veritate unius ex his terminis ad falsitatem alterius v. g. *est stultus: ergo falsum est, quodd sit irrationalis: est irrationalis: ergo falsum est, quod sit stultus*; quoniam prorsus repugnat, quodd idem subiectum sit ab intrinseco capax, & ab intrinseco incapax ejusdem formæ: sed *stultus* enunciat capacitatem radicalem discurrendi; *irrationale* autem negat hanc capacitatem: ergo ex veritate unius horum sequitur falsitas alterius.

131. Oppositionem relativam invenies in terminis eam habitudinem, seu coordinationem significantibus inter duo, ut nequeat unum esse respectu alterius illud idem, quod hoc est respectu ipsius: sic opponuntur

ponuntur relativè Pater, & Filius, Maritus, & Uxor &c. nequit enim fieri ut sis Pater, & simul Filiiusejusdem, Maritus, & simul Uxorejusdem. Quinque ex hac oppositione carpes arguendi modos. Primò ex affirmatione unius ad affirmationem respectivam alterius, *hic est Pater illius: ergo ille est Filius hujus*. Secundò e converso: *ille est Filius hujus: ergo hic est Pater illius*. Tertio ex negatione hujus ad negationem illius: *hic non est Pater Ioannis: ergo neque Ioannes est Filius hujus*. Quartò e converso, *Ioannes non est Filius hujus: ergo neque hic est Pater illius*. Quintò ex affirmatione alterutrius formæ in hoc subiecto ad negationem ejusdem in altero, *hic est Pater illius: ergo ille non est Pater hujus: hic est Filius illius: ergo ille non est Filius hujus*: quòd si propositiones enunciantes objecta relativè opposita fuerint modales, alias quinque argumentationes in uno quoque modo invenies: *impossibile est hunc esse Patrem illius: ergo impossibile est eadem impossibilitate illum esse Filium hujus. Necesse est hunc esse Patrem illius: ergo necesse est eadem necessitate illum non esse Patrem hujus*: cùmque modi Logici propositionum sint quatuor v.g. *necesse, impossibile &c.* concluditur, quòd ex relativa oppositione terminorum viginti eliciantur argumentationes modales.

132. Oppositionem subcontrarietatis habent illæ propositiones, quæ eodem subiecto, copula, atque prædicato, nec non quantitate particulari constant: una autem est affirmativa, altera negativa; *aliquis homo peccat: aliquis homo non peccat*: id generis propositiones possunt esse simul veræ, ut constat in his; at nequeunt esse simul falsæ: quia suæ contradictoriæ deberent esse simul veræ, nempe, *nihilus homo peccat: omnis homo peccat*; sed hæ duæ utpote contrariæ inter se nequeunt esse simul veræ ob rationem paulò ante datam; ergo duæ subcontrariæ non possunt esse simul falsæ; itaque ex veritate unius subcontrariæ neque arguitur falsitas alterius, siquidem ambæ possunt esse veræ: neque veritas, quia una potest esse vera, & altera falsa; v.g. *aliquis homo est animal: aliquis homo non est animal*.

133. Cæterum ex falsitate unius subcontrariæ sex bonas argumentationes deduces. 1. Ad veritatem alterius: quia, ut diximus, repugnat, quòd ambæ sint falsæ; ergo si una est falsa, necesse est, quòd altera sit vera. 2. Ad singularia omnia nullo dempto imbibita in altera subcontraria, sed quæ disjungantur per particulam *Vel*, v.g. *Falsum est aliquem hominem non peccare: ergo vel hic homo peccat, vel ille peccat*; & in cæteris simili modo; cùm enim hæc disjunctiva legitime inferatur ex veritate hujus subcontrariæ, *Aliquis homo peccat*;

& veritas hujus legitimè inferatur ex falsitate alterius, nempe, *Aliquis non peccat*; quia nequeunt esse simul falsæ, palàm fit, quòd ex hac falsitate inferatur veritas illius disjunctivæ. 3. Ad singularia eadem distributivè sumpta, *Falsum est aliquem hominem non peccare: ergo hic homo peccat, & ille homo peccat &c.* quia ex falsitate dictæ propositionis infallibiliter arguitur veritas suæ contradictoriæ etiam materialis; sed sua contradictoria saltem materialis hæc est, *Omnis homo peccat*, ut constat; ergo ex falsitate illius benè arguitur veritas hujus: sed ex veritate hujus arguitur veritas illius distributionis, *Hic homo peccat, & ille homo peccat &c.* ergo ex falsitate uniuscujusque subcontrariæ arguitur distributio respondens propositioni universalis sibi contradicenti.

134. 4. Ex eadem falsitate arguitur singularis propositio de quolibet singulari, *Falsum est aliquem hominem non peccare: ergo hic homo peccat*; quoniam hæc singularis inferitur ex illa universalis, *Omnis homo peccat*; sed hæc universalis inferitur ex falsitate illius, *Aliquis homo non peccat*; ergo. 5. Ex eadem falsitate arguitur quævis alia veritas, atque falsitas, cum qua metaphysicè connectatur aliquid ex dictis. Denique ex omni opposito metaphysicè cum veritate unius subcontrariæ arguitur ad omnia dicta, quia ex omni connexo cum falsitate subcontrariæ arguitur ad illa omnia, quæ inferuntur ex hac falsitate; sed omne metaphysicè oppositum cum veritate alicujus subcontrariæ, est metaphysicè connexum cum falsitate ejusdem, si illa propositio sit in rebus; ergo. Cùmque subcontrariæ sint duæ, & unamquamque comitentur sex legitimi modi arguendi, propterea 12. ministrat tibi logica subcontrarietas, quibus si totidem adjungas emanantes ex subcontrariis modalibus, 24. hinc lucraberis legitimos arguendi modos.

S. I V.

135. **P**ropositiones subalternæ sunt Universalis, & Particularis in ea imbibita, v. g. *Omnis homo peccat: Aliquis homo peccat*; quarum prima vocatur *subalternans*, secunda *subalternata*; similiter sunt subalternæ, *Nullus homo peccat: Aliquis homo non peccat*: prima est subalternans, secunda subalternata; jam si universalem conferas cum particulari, sex modos legitimos arguendi dedimus supra agentes de suppositione distributiva, & parem numerum habebis ex modalibus *Necesse, Impossibile*, quo fit, ut hæc sola habetudo

tudo logica subalternationis 32. subministret efficaces modos arguendi .

136. Sin verò particularem combines cum universali , ex illius veritate ne arguas veritatem hujus , quia ex eo , quòd aliquis homo peccet , non sequitur omnem : item neque falsitatem , quia subalternæ possunt esse simul veræ ; igitur ex *falsitate* subalternæ infertur , 1. *Falsitas subalternantis* , v. g. *Falsum est aliquem hominem esse lapidem : ergo falsum est omnem hominem esse lapidem* ; nam cùm hæc universalis , si vera esset , traheret secum infallibiliter illam particularem , sequitur , quòd si non subsistit illa particularis , sed est falsa , necesse est , quòd non subsistat illa universalis , sed sit falsa . 2. Inferes falsitatem omnis rei metaphysicè connexæ cum veritate subalternantis ; quoniam cùm ejusmodi res nequeat esse verè deficiente illa veritate subalternantis , si falsitas subalternatæ infert , non esse veram subalternantem , necesse est , quòd inferat non esse verum , seu non subsistere ullum metaphysicè connexum cum veritate subalternantis ; est itaque infallibilis hæc consequentia : *Falsum est aliquem hominem esse lapidem : ergo falsum est Deum scire , aut testificari omnem hominem esse lapidem* ; ea quippe scientia , atque testimonium , utpote Divina , & infallibilia connecterentur metaphysicè cum ea subalternante , *Omnis homo est lapis* .

137. 3. Ex eadem falsitate inferes falsitatem propositionis æquipollentis propositioni subalternanti , *Falsum est aliquem hominem esse lapidem : ergo falsum est nullum hominem non esse lapidem* : universalis enim negativa est parallela , seu æquipollens universali affirmativæ , quæ subalternans est illius particularis affirmativæ ; ergo quoties una declinet à veritate , necesse est , quòd declinet altera : sed quoties particularis affirmativa est falsa , universalis affirmativa sua subalternans est quoque falsa , seu declinat à veritate , ut jam ostendimus : ergo . 4. Ex eadem falsitate inferes falsitatem *conversæ* subalternantis dictæ ; quia , ut diximus inter explicandum conversiones , ex *conversâ* infallibiliter sequitur convertens , licèt non semper ex convertente sequatur *conversâ* : ergo quidquid excludit veritatem *conversæ* , excludit veritatem convertentis : sed falsitas subalternatæ excludit veritatem convertentis ; seu infert falsitatem suæ subalternantis , ut diximus ; ergo excludit veritatem , seu infert falsitatem cujusvis propositionis , quæ convertatur in hanc subalternantem ; licèt non semper inferat ex vi solius formæ falsitatem illius , in quam potest converti sua subalternans .

138. Sic valet hæc consequentia, *Falsum est aliquem hominem non esse animal; ergo falsum est, nullum animal esse hominem*; quia subalternans illius primæ est hæc, *Nullus homo est animal*; & hæc convertitur in illam, *Nullum animal est homo*; quoniam simpliciter feci: ergo si ex falsitate illius primæ sequitur falsitas hujus subalternantis, *Nullus homo est animal*; sequitur etiam falsitas hujus, *Nullum animal est homo*; in quam convertitur illa.

139. 5. Ex falsitate eadem inferes falsitatem definitionis uniuscujusque ex dictis, nec non veritatem contradictoriorum, *Falsum est, aliquem hominem esse equum; ergo falsum est, omne animal rationale esse animal binnibile*: item, *ergo verum est, aliquod animal rationale non esse binnibile*. 6. Hæc omnia, & singula inferuntur ex omnire connexa essentialiter cum falsitate subalternæ, & opposita essentialiter cum ejusdem veritate; quia hæc falsitas inferitur necessariò ex omni tali connexo, & opposito; ergo omnia, quæ inferuntur ex hac falsitate, inferuntur ex omni illo connexo, & opposito; similes alias sex formas efficaces arguendi deprehendes, si compares propositionem subalternam modalem cum sua subalternante, servatis servandis; quocirca hæc propositionum subalternatio 44. ineluctabiles suppetit arguendi modos.

140. Tandem equipollentia, seu equivalentia propositionum stat in eo, quòd in ordine ad veritatem, aut falsitatem tanti valeat una, quanti altera, & consequenter mutuo se inferant, valeantque ad convertentiam: loquendo autem de equipollentia illarum quatuor propositionum, quas Logici ponunt in quadratura sua, *Omnis homo currit; Nullus homo currit; Aliquis homo currit; Aliquis homo non currit*; quarum singulæ opponuntur cum aliis contradictoriæ, aut contrariæ, aut subcontrariæ, aut subalternæ, inventus est modus faciendi illas omnes amicas, æquales, equivalentes, seu equipollentes; modus autem traditur illo versiculo:

Præ contradic; post contra; præ, postque subalter.

141. Sensus est: quoties volueris unam propositionem facere amicam, & equipollentem suæ contradictoriæ, præpone illi negationem, quia *non omnis homo currit est* equipollens hujus, *aliquis homo non currit*: & *non aliquis homo non currit est* equipollens hujus omnis homo currit: idem de aliis similibus; & idem de modalibus, quia *non necesse est hominem currere est* equipollens hujus, *possibile est hominem non currere*; & *non possibile est hominem non currere* equipollent huic necesse est hominem currere: id intelligendum universaliter, quando subiectum

jectum non est falsæ suppositionis juxta ea , quæ diximus , quando probabamus hujusmodi propositiones non esse cōtradictorias formales.

142. Quando autem velis idem facere de duabus contrariis, debes uni earum postponere negationem, quia *omnis non valet, nullus, & nullus non, valet, omnis* : quapropter hæc, *omnis homo non currit*, est æquipollens hujus, *nullus homo currit*, & hæc, *nullus homo non currit*, est æquipollens hujus, *omnis homo currit* : idem de modalibus , quia *necesse est Petrum non esse lapidem*, æquivalet huic , *impossibile est Petrum esse lapidem* : & hæc *impossibile est Petrum non esse hominem*, æquivalet huic *necesse est Petrum esse hominem*.

143. Denique si subalternas velis facere æquipollentes , præponas , & postponas negationem uni earum , v. g. *non omnis homo non currit*, æquipollet huic, *aliquis homo currit* : & *non aliquis homo non currit*, huic, *omnis homo currit* : idem de modalibus , quia, *non necesse est hominem non currere*, est æquipollens hujus, *possibile est hominem non currere*, & viceversa : ex arte itaque faciendi æquipollentes propositiones tot elicies arguendi formas , quot eliciimus ex contradictione, ex contrarietate, ex subcontrarietate, & ex subalternatione propositionum , quia, ut diximus unaquæque ex dictis quatuor propositionibus , seu potius octo (numerando etiam modales) potest fieri æquipollens suæ contradictoriæ, suæ subalternatrici, nec non suæ contrariæ, aut suæ subcontrariæ v. g. *omnis homo est animal* : ergo *non aliquis homo non est animal* : item *omnis homo est animal* : ergo *nullus homo non est animal* : tu spatiare per cæteras .

C A P U T VII.

Quot Arguendi modi eliciantur ex veritate copulativa, & disjunctiva.

144. DEbebant nunc aperiri fontes argumentationum juxta seriem scriptam cap. i. num. 12. eruendorum ex connectione metaphisica absoluta, ex oppositione metaphisica absoluta &c. Sed quia hæ omnes legitimæ arguendi formæ pendunt ex notitia eorum omnium, idcirco remittimus illas ad peculiarem disputationem postea dandam circa naturam, & proprietates omnium specierum connexionum, & oppositionum.

145. Itaque ex veritate copulativa 4. eliciuntur efficaces arguendi

di formæ 1. Veritas copulativa rei A. & B. conjuncta cum existentia rei A. & C. inferit coexistentiam rei B. & C. 2. Veritas eadem conjuncta cum coexistentia rei B. & C. inferit coexistentiam rei A. & C. firmi namque sunt hi syllogismi A. & B. *simul coexistunt; sed A. coexistit rei C. ergo B. coexistit rei C. item sed B. coexistit rei C. ergo etiam A.* Ratio est pervia per reductionem ad impossibile : si B. non coexisteret rei C. (quod est contradictorium primi consequentis) inferretur , aut B. non coexistere rei A. quod contradicit majori concessæ : aut A. non coexistere rei C. quod contradicit concessæ minori : ergo ex falsitate prædicti consequentis inferitur falsitas alterutrius præmissæ concessæ : ergo simultanea illarum veritas repugnat falsitati illius consequentis : ergo inferit veritatem ejusdem .

146. 3. Eadem veritas copulativa si jungatur cum eo, quod A. non coexistat rei C. inferit rem B. non coexistere rei C. 4. Veritas conjuncta cum eo quod B. non coexistat rei C. inferit rem A. non coexistere rei C. valent namque hi syllogismi: *existunt simul A. & B. sed A. non coexistit rei C. ergo neque B.* item : *sed B. non coexistit rei C. ergo neque A.* Ratio est eadem: si B coexisteret rei C. (quod est contradictorium primi consequentis) sequeretur aut B. non coexistere rei A. quod contradicit majori concessæ : aut A. coexistere rei C. quod contradicit minori. ergo si ambæ præmissæ conceduntur, necesse est quod B. non coexistat rei C.

147. Si autem veritas copulativa fuerit negativa duos invenies efficaces modos 1. Ex illa negativa , & assertione unius sequitur negatio alterius. 2. Ex eadem negativa , & assertione alterius sequitur negatio unius : v. g. *non existunt simul A. & B. sed existit A. ergo non existit B.* item *sed existit B. ergo non existit A.* quippe in primo syllogismo , si existeret B. (quod est contradictorium consequentis) & simul esset vera minor, sequeretur quod simul existeret A. & B. & consequenter esse falsam illam majorem concessam : excipe tamen quando extrema sunt reciprocè connexa : aut saltem unum est connexum cum altero , & illud unum affirmatur in minore : quia tunc veritas minoris afferens secum formaliter illud unum , & illativè illud alterum , assert secum essentialiter absolute coexistentiam utriusque : ergo minor assert tunc falsitatem majoris negantis hanc coexistentiam : ex præmissis autem invicem pugnantibus quoad veritatem non potest absolute inferri conclusio , quippe quæ innititur ut talis simultaneæ veritati præmissarum .

148. Ob hunc discursum fallaces sunt hi syllogismi; *non coexistunt*
Fe-

Petrus, & scientia, qua Deus videt illum existere: sed existit Petrus: ergo non existit ea scientia: item: non coexistunt unio, & extrema: sed existit unio: ergo non existunt extrema: minores namque arcent formaliter, aut illativè veritatem majorum, tamen hæc possunt antecedenter esse veræ.

149. Excipe 2. quando veritas majoris negativæ fundatur in aliquo privatim opposito cum re affirmata in minore: quia tunc eo ipso quod minor sit vera, destruit fundamentum illud, cui insistit tota veritas majoris: ergo destruit veritatem majoris: ergo sunt præmissæ invicem pugnantes quoad veritatem; v. g. efficax decretum Dei tollendi Petrum de medio fundat immediatè hanc veritatem, *Petrus non existit*: ergo fundat hanc, *non coexistunt Petrus, & Joannes*, quia certè est impossibile, quod coexistant, quando unus non existit: veruntamen cum decretum hoc non connectatur cum eo, quod existente Petro moriatur Joannes, ut per se patet: idcirco quando veritas hujus negativæ propositionis insistit soli decreto dicto, nullus est hic syllogismus: *non coexistunt Petrus, & Joannes: sed existit Petrus: ergo non existit Joannes*: quia veritas minoris opponitur essentialiter cum fundamento unico majoris: ergo opponitur cum veritate hujus majoris: ergo artificium syllogismi nullum est absolute loquendo: jam si prædictos 6. arguendi modos emergentes ex propositione copulativa multiplices per capita generalia supra data *definitionis, consequentia, conversionis* &c. non parvam copiam habebis argumentationum.

150. Ex veritate disjunctiva octo depromi possunt arguendi formæ: nam si illa fuerit affirmativa utriusque extremi (esto inter duo sola extrema vagari) v. g. *vel existit A. vel existit B.* arguitur 1. ex illa, & negatione rei A. ad existentiam rei B. 2. ex eadem, & negatione rei B. ad existentiam rei A. sed cum exceptionibus mox dandis: quam ob rem legitimi sunt per se loquendo hi syllogismi *vel existit A. vel B. sed non existit A. ergo B.* nam si nec existeret B. cum dicatur in minore, quod non existit A. sequeretur, quod nec existeret A. neque B. & consequenter esse falsam majorem concessam: item *sed non existit B. ergo existit A.* Si fuerit negativa utriusque extremi; arguitur 3. ex illa, & affirmatione rei A. ad negationem rei B. 4. Ex eadem, & affirmatione rei B. ad negationem rei A. v. g. *vel non est A. vel non est B. sed est A. ergo non est B.* item *sed est B. ergo non est A.* Ratio est eadem scilicet per reductionem ad impossibile, quoniam si esset verum contradictorium consequentis, & minor jam sit concessa, sequeretur esse falsam majorem etiam concessam; ergo sequeretur esse

veram majorem, & suam contradictoriam.

151. Si fuerit affirmativa rei A. & negativa rei B. arguitur 5. ex illa, & negatione rei A. ad negationem rei B. 6. ex illa, & affirmatione rei B. ad affirmationem rei A. v.g. *vel est A. vel non est B. sed non est A. ergo non est B. item: sed est B. ergo non est A.* Valent ob eandem rationem, quia si contradictorium consequentis adjungas minori, concludes falsam esse majorem: & consequenter esse veram suam contradictoriam, & consequenter contumacem illum, qui negat consequentiam, debere deglutire duas contradictorias. Ratio brevior est. Ut illæ propositiones, disjunctivæ sint veræ, opus est, quod unum ex illis duobus, quibus constant, sit verum: ergo si ex illis eisdem unum negatur in minore, necesse est, quod alterum concedatur in consequenti. Demum si fuerit negativa rei A., & affirmativa rei B., alii duo resultat boni syllogismi, nempe ab affirmatione rei A. ad affirmationem rei B., & a negatione hujus ad negationem illius v.g. *vel non est A.; vel est B.: sed est A. (en exclusum unum extremum illius disjunctivæ) ergo est B. item sed non est B. (en exclusum alterum) ergo non est A.*

152. Præterea cum inter definitiones extremorum disjunctionis liceat discurrere non secus ac inter extrema ipsa; eo quia definitum, & definitio sint termini convertibiles, ecce alias 8. legitimas argumentationes: *vel existit homo, vel existit equus: sed non existit animal binnibile: ergo existit animal rationale &c.* Rursus cum definitionem ejuslibet extremi possimus combinare cum altero, sicut unum ipsum extremum cum altero, en alias 8. transversas formas legitimas: *illud, quod graditur, vel est homo, vel bellua: sed non est animal rationale: ergo est bellua: & similiter de aliis.*

153. Neque objicias fore plures terminos quam oporteat: etenim definitiones, & definita non multiplicant formaliter terminos in ordine ad vitiandum argumentationem, quidquid sit de multiplicatione pure materiali, & grammatica in ordine ad eum, qui terminos non introspecterit: quapropter concludit re ipsa hic syllogismus, qui Tyronibus videbitur constare quinque terminis: *omne animal est corpus: sed omnis homo est vivens sensibile (en definitionem animalis) ergo omnis homo est impenetrabilis: en definitionem corporis, quod erat prædicatum in majore: si enim hujus, & cujusvis alius similis syllogismi consequentiam neges post concessas præmissas, cogeris per legitimas consequentias concedere duo contradictoria. Cujus ratio est, quia definitum, & definitio valent ad convertentiam: ergo quidquid concluditur ex uno, concluditur ex altero, & quoties legitime inferitur unum, legitime*

infertur alterum : ergo illa multiplicatio terminorum est purè materialis, non autem formalis, quæ officiat rectitudni consequentiæ. Denique si connexiones inspicias, oppositionesque utriusque extremi disjunctionis, multas alias tibi comparabis legitimas argumentationes, quas tuæ industriæ relinquimus v. g. hi syllogismi sunt recti : vel est Petrus, vel non est Joannes : sed Deus revelavit esse Joannem (ecce rem oppositam essentialiter cum uno extremo illius disjunctivæ) ergo est Petrus, quod erat aliud extremum : tu meditare alios.

154. Cæterùm syllogismi disjunctivi sunt fallaces. 1. Quando extrema disjunctionis sint mutuo connexa ut talia, & in minore negatur unum, quia tunc minor destruit majorem eo quod destruat ambo extrema illius v. g. *vel Petrus sedet, vel Deus hoc videt : sed non sedet : ergo Deus videt eum sedere* : male, quia cum extrema disjunctionis invicem connectantur, & minor neget unum, sequitur, quod deficiat etiam alterum : ergo sequitur, quod major sit falsa : ergo præmissæ rixantur inter se : ergo sunt inutiles ad conclusionem.

155. 2. Quando licet connexio non sit mutua, ponitur tamen in minore contradictorium illius extremi, cum quo alterum connectitur essentialiter : quia tunc minor negans formaliter illud extremum, negat illative illud alterum, quod connectitur cum eo ; ergo collabitur simultanea veritas præmissarum, in qua simultate stat energia tota inferendi conclusionem : ob hanc rationem fallit hic syllogismus, quo irritari solent Tyrones : *vel deficit alius Deus, vel deficit omnis contradictio : sed non deficit alius Deus ergo deficit omnis contradictio* : ergo si vera esset minor, quæ tamen falsa est, verum esset consequens ; ergo casu quo non deficeret, sed existeret alius Deus (hæc est minor) deficeret omnis contradictio : sed si existente alio Deo deficeret omnis contradictio, hoc est non sequerentur duo contradictoria, alius Deus est possibilis : ergo est possibilis : hac fallacia probari posset quodvis impossibile esse possibile. Est malus syllogismus, quia cum alter Deus, utpotè chimæra, importet constitutive aliquam contradictionem, defectus omnis contradictionis traheret secum infallibiliter defectum alterius Dei : ergo unum extremum istius disjunctivæ connectitur intimè cum altero : sed hoc alterum negatur in minore : ergo minor destruit immediatè unum, extremum disjunctivæ, & mediatè alterum : ergo destruit absolutè veritatem majoris.

156. Ob hanc rationem fallit etiam hic syllogismus : *vel existit Deus, vel nulla est contradictio : sed non existit Deus : ergo nulla est contradictio* : ergo casu quo minor esset vera, nempe casu quo Deus non existe-

ret, verum esset consequens, scilicet non sequi contradictionem: sed in hoc stat, quod sit possibile, Deum non existere, nempe quod ex hoc nulla sequatur contradictio: ergo est possibile, Deum non existere: Absit: nullam quippe esse contradictionem, quod est unum extremum istius disjunctivæ, intimè connectitur cum existentia Dei, quia si hæc deficeret, subito irrumperet aliqua contradictio: sed minor negat existentiam Dei: ergo negat formaliter unum extremum disjunctivæ, & negat illativè alterum: ergo præmissæ non cohærent inter se.

157. 3. Est fallax syllogismus disjunctivus, quando major disjunctiva est vera propter unum solum extremum, & hoc negatur in minore; quia tunc minor etiam destruit veritatem majoris, quæ unico illo fulcro sustentabatur; fallaces itaque sunt hi syllogismi, *Vel existit Petrus, vel dantur duo contradictoria; sed non existit Petrus, ergo dantur duo contradictoria*; ergo casu, quo Petrus non existeret, sequerentur duo contradictoria: ergo est impossibile, quod non existat; & sic probabitur quodvis contingens evadere necessarium: fallit, inquam, quia ista major dumtaxat potest esse vera ratione existentie Petri; sed hæc negatur in minore: ergo si minore esset vera, corrumpit tota veritas majoris; ergo deficit simultanea veritas præmissarum; ergo nihil concluditur. Ob eandem rationem fallit hic, quo probaretur quodvis possibile evadere impossibile: *Vel Petrus non existit, vel datur contradictio; sed Petrus existit; ergo datur contradictio*; erga est impossibile, quod Petrus existat. Non valet, quia illa major solum potest esse vera ratione illius extremi, *Petrus non existit*, & cum hoc opponitur veritas minoris, *Petrus existit*.

158. Hæc doctrina unam exceptionem habet: tametsi major disjunctiva sit vera ratione unius tantum extremi, & hoc negetur in minore; veruntamen si ejus negatio est intimè connexa cum altero extremo, tunc bene arguetur ad illud alterum propter connexionem extremi ut negati cum illo altero, v. g. hic syllogismus est rectus: *Vel existit Deus, vel existit chimæra; sed non existit Deus; ergo existit chimæra*; quia licet illa major dumtaxat sit vera ratione existentie Dei, & hæc negetur in minore: ceterum enim hæc negatio, quippe quæ est negatio entis necessarii, intimè connectatur cum chimæra; hac de causa legitime infertur illud consequens.

CAPUT VIII.

Quæ arguendi formæ eliciantur ex veritatibus conditionalibus.

159. **P**ropositio conditionalis non secus ac absoluta potest donari quantitate universali, aut particulari, aut singulari, v. g. *Si existit A. existit B.* potest habere hunc sensum universalem, *Omnis casus, in quo existat A. est casus, in quo existet B.* vel hunc particularem, *Aliquis casus, in quo existat A. est casus, in quo existat B.* vel hunc singularem, *Individuus, & singularis casus existentia rei A. erit casus existentia rei B.* Hanc distinctionem nota pro Sophistis conantibus nullam propositionem conditionalem esse contingenter veram, sed omnes esse veritatis impossibilis, aut necessariæ. v. g. *Si petis librum, concedetur.*

160. Ajunt enim. Hæc propositio aut reddit hunc sensum universalem, *Omnis casus petitionis est casus concessionis libri*, & sic est veritas impossibilis, quia unus ex casibus possibilibus petitionis est casus, in quo negetur liber: & est impossibile, quod concedatur in illis, & pro illis circumstantiis, pro quibus negatur: vel reddit hunc, *Aliquis casus petitionis erit casus concessionis*; & sic est necessariò vera propositio; quia unus ex casibus possibilibus petendi librum est casus, in quo hic concedatur: & est necessarium, quod liber concedatur in casu, in quo concedatur. Respondetur. Illa propositio neutrum ex istis duobus sensibus reddit; sed hunc prorsus singularem, & contingentis veritatis, *Individuus, & singularis casus petendi librum in instanti A. erit casus concessionis*, quod potest contingere, & potest non contingere, & licet concessio libri non possit fieri, quin dentur omnia requisita ad concessionem, & petitionem, & quin ea omnia cognoscantur saltem à Deo, quem nihil fugit; ceterùm non est necessarium, quod cognoscantur hac specifica cognitione, *Si petas librum, & dentur omnia omnino requisita ad concessionem, concedetur*, quia inter ea requisita potest esse aliquod omnino connexum cum concessione, unde fiet, quod propositio conditionalis non erit contingenter, sed necessariò vera. Quocirca aliud est cognoscere sic, *Erit concessio, ad quam tale, & tale requiruntur*; aliud autem sic: *Si petas librum, & detur tale, ac tale requisitum ad concessionem, eris hæc*;

hæc: propositio conditionalis, quæ sit omnino singularis, habebit ad summum illum primum sensum, sed non est necessarium, quod habeat secundum.

P. Junius
sec. 11. de
Provid.
c. 7. § 9.

161. Sit conclusio cum, & contra P. Junium. Syllogismus purè conditionalis concludit ex vi formæ in prima figura (& eadem proportionem philosophare de reliquis) si præmissæ ambæ habuerint quantitatem universalem, vel una saltem fuerit universalis, & altera particularis; quoniam hic syllogismus conditionalis totus, *Si datur A. datur B. sed si datur C. datur A. ergo si datur C. datur B.* est legitimus, si vertatur in hunc, *Omnis casus, in quo datur A. est casus, in quo datur B. sed omnis casus, in quo datur C. est casus, in quo datur A. ergo omnis casus, in quo datur C. est casus, in quo datur B.* item si vertatur in hunc, *Omnis casus, in quo datur A. est casus, in quo datur B. sed aliquis casus, in quo datur C. est casus, in quo datur A. ergo aliquis casus, in quo datur C. est casus, in quo datur B.* atqui primus ille syllogismus totus conditionalis potest habere unum ex his sensibus, quia, ut diximus, propositiones conditionales possunt habere quantitatem universalem, aut particularem, prout constiterit ex aliis circumstantiis; ergo syllogismus, qui sit totus conditionalis, potest esse legitimus ex vi formæ. Quod si aliquando contingat, ut mox dicemus, consequens deductum ex hujusmodi præmissis purè conditionalibus esse implicatorium; idè est, quia una ex præmissis assumithypothesim contradicentem veritati alterius, ut etiam dicemus.

P. Alphé-
sus lib. 5.
Sum. c. 5.

162. Est quoque legitimus syllogismus ille conditionalis, si præmissæ fuerint omnino singulares: æquivalet enim huic expositioni: *Hic casus individuus existentia rei A. est casus existentia rei B. sed hic casus individuus existentia rei C. est hic casus individuus existentia rei A. ergo hic casus individuus existentia rei C. est casus existentia rei B.* secus dicendum, si ambæ præmissæ habeant quantitatem particularem, quippe *ex puris particularibus nihil sequitur* per se loquendo, tametsi sequatur, quando post copulam negatam præponitur prædicato consequentis signum universale affirmativum, ut bene notat Alphonsus, v. g. *Aliquis homo est animal; sed aliquis equus non est homo; ergo aliquis equus non est omne animal*; Benè; nam licet ambæ præmissæ sint particulares, cum minor constet negatione, & hæc distribuat quidquid post se invenit, sequitur, quod medium jam est distributum.

163. Ceterum ut hi syllogismi sint legitimi, opus est hypothesim, quam

quam assumit minor, non pugnare cum veritate majoris; nam cum hæc eadem hypothesis assumatur in consequenti, procedet hoc consequens sub hypothesis falsitatis unius ex præmissis; quomodo ergo potest deduci consequens esse verum sub hypothesis, quod una ex præmissis sit falsa? Ob hanc rationem est illegitimus hic syllogismus, *Si præcepero Joanni, erit mihi obediens; sed si mihi sit inobediens, præcipiam Joanni* (quia absque præcepto non potest esse inobedientia: unde si datur inobedientia, datur præceptum) *ergo si Joannes sit mihi inobediens, erit mihi obediens*, nempe in eodem, & pro eodem, Ecce consequens implicatorium ex præmissis veris. Fallacia stat in eo, quod hypothesis minoris, nempe quod *sit mihi inobediens*, imbibit falsitatem majoris, scilicet quod conjungantur, & *meum præceptum, & illius non obedientia*, quæ conjunctio falsificat majorem dicentem, *si præcepero, erit obediens*; ergo in isto syllogismo cum consequens assumat eandem hypothesis quam minor, sequitur, quod consequens istud conditionatum assumat pro hypothesis falsitatem majoris; quomodo ergo potest inferri ex istis præmissis? Est ergo similis huic, *Si datur A. datur B. sed si hoc est falsum, existit C. ergo si hoc est falsum, nempe quod existente A. existit B. est verum, quod si datur A. datur C.* Estne bona hæc argumentatio? Similis est ista altera, quia, ut diximus, hypothesis illius minoris trahit secum falsitatem majoris.

164. Quoad syllogismos non purè conditionales, sed mixtos eo, quod habeant unam præmissam conditionalem, & alteram absolutam v. g. *si est A. est B. sed est A. ergo est B.* Dicendum est. Propositio conditionalis potest esse quadruplex. 1. Affirmativa conditionis, atque conditionati. 2. Negativa ex parte utriusque. 3. Affirmativa conditionis, & negativa conditionati. 4. Negativa conditionis, & affirmativa conditionati. Præterea propositio conditionalis potest esse *illativa* (illa nimirum, quæ enunciat connexionem hypothesis objectivæ cum conditionato) *conditionalis stricta*, videlicet, quæ profert hypothesis esse prærequisitam ad conditionatum, seu esse plenam potestatem ad illud: & *purè conjunctiva*, nempe illa, quæ ab his præcindens dumtaxat enunciat conditionatum extitutum in eo instanti, in quo ponatur conditio: quocirca propositio contradictoria potest quoque esse in triplici differentia, negativa scilicet illationis, aut conditionalitatis, aut coexistentiæ conditionis, & conditionati. Ex parte insuper materiæ multiplex confurgit propositio conditionalis, multæque combinationes pullulant: fieri namque

nexum cum ipsa conditione: perperam igitur deducitur ut conclusio contradictorium conditionis; & ratio est, quia veritas istarum, & similium minorum pugnat cum veritate istarum majorum; in primo namque syllogismo v. g. veritas majoris efflagitat, quod non coexistant libertas A, & *hujus* peccatum, sed veritas minoris importat secum, quod coexistent; cum repugnet omnino libertatem A peccare actu formaliter, quin actu formaliter existant libertas A, & peccatum; ergo cum præmissæ se invicem repellant, quid mirum, quod ineptæ sint inferendo consequens? Similiter in secundo: quoniam penetratio, quæ asseritur in minore, intimè cōnectitur cum ipsis corporibus, quæ penetrantur, & quæ sunt hypothesis in majore; ergo connectitur cum coexistentia sui, & illorum corporum; ergo connectitur cum falsitate illius majoris. Desideratur 2. contradictorium conditionati non opponi cum veritate ipsa conditionali: si enim opponantur veritas conditionalis, & contradictorium conditionati, quid nisi monstruosum potest ab illis nasci? Ob hanc rationem fallax est hic Syllogismus: *Si existeret consilium A, existeret scientia media de illius efficacia; sed hæc scientia media non existit; ergo non existit consilium A*; nam cum major sit formaliter, aut illative actus quidam scientiæ mediæ circa efficaciam libertatis A, & minor neget hujusmodi scientiam, fit ut veritas minoris evertat majoris veritatem.

166. 3. Quando hypothesis objectiva propositionis conditionalis est libertas activa A, & conditionatum est exercitium aliquod hujus libertatis, opus esset, quod in minore poneretur contradictorium hujus conditionati, *ut determinatum per eandem libertatem*: nam si per aliam determinatur, nihil concludetur, ut ostendit inutilis hic syllogismus: *Si daretur libertas A, non daretur peccatum; sed datur peccatum per libertatem B; ergo non datur libertas A*. Mala consecutio: debuerat igitur sic efferri: *Si daretur libertas A, ipsa non peccaret; sed ipsa peccat; ergo ipsa non datur*. Veruntamen neque sic concludit, quoniam veritas majoris exulat per veritatem minoris; quapropter in his propositionibus conditionalibus, quarum hypothesis est activa libertas, & conditionatum est negativum exercitium ipsius ejusdem libertatis, nullus potest formari syllogismus à contradictorio conditionati ad contradictorium conditionis: si enim contradictorium illud asseritur ut determinatum ab eadem libertate, minor fugat majorem; si ut determinatum ab alia libertate, præterquam quod non erit contradictorium conditionati propositioni: illius conditionalis (quæ sanè non enunciat fore ut si detur libertas A, omit-

at peccatum disparata alia libertas, sed fore ut si datur libertas *A*. *hæc ipsa* peccatum omittat) præmissæ nullam inter se coordinationem habebunt, & utrolibet modo nihil concluditur; unde habes illegitimum esse syllogismum illum, quem ut concludentem supponuat DD. quidam Complutenses, scilicet: si daretur libertas *A*, peccaret: sed non peccat; ergo non datur. Quo posito ajunt, Deum posse impedire veritatem consequentis, quin possit impedire veritatem præmissarum, & inferunt, non omnem, qui potest impedire terminum connexionis essentialis, posse impedire fundamentum. Sed syllogismus ille non est bonus, & consequenter non datur simultanea veritas præmissarum, quæ sit connexa essentialiter cum eo consequente: quoniam illa minor aut determinatur, & fit vera per illam eandem libertatem *A*, de qua loquitur major: aut per aliam, quæcumque sit? Si primum, minor falsificat majorem, ut patet; ergo non datur simultanea veritas præmissarum: si secundum; minor est disparata respectu majoris, sicut in hoc alio syllogismo: *si existeret libertas A. loqueretur; sed non loquitur libertas B.* quid potest hinc inferri?

167. Sed obicies; hæc duæ præmissæ, *si daretur libertas A, non loqueretur, sed loquitur*. Hæc inquam, vel sunt coniungibiles cum falsitate illius consequentis: *non datur libertas A*, vel non sunt coniungibiles? Si primum; ergo simultanea veritas illarum præmissarum est conjungibilis cum falsitate majoris, quod per se repugnat; etenim falsitas illius consequentis, nimirum, existentia libertatis *A* conjuncta cum veritate minoris, idest cum locutione, metaphysicè infert, quodd coexistunt libertas *A*, & locutio: & consequenter, quodd est falsa illa major. Si secundum; ergo simultanea veritas illarum præmissarum per se repugnat falsitati illius consequentis; ergo per se connectitur cum veritate illius; ergo per regulas reductionis ad impossibile constat, illum syllogismum esse bonum, quandoquidem contradictorium consequentis adjunctum uni ex præmissis concessis infert falsitatem alterius.

168. Resp. eodem modo probare poteras, esse bonum hunc syllogismum, *si existunt duo corpora, non sunt penetrata: sed sunt penetrata; ergo non existunt*. Ecce conclusionem oppositam cum minore; quandoquidem est impossibile, quodd non existant in rebus ea, quæ existunt in eodem penitus loco. Igitur respondeo; cum simultanea istarum præmissarum veritas sit chimærica, quia ut diximus, veritas minoris everit veritatē majoris: quid mirum, esse, & simul non esse conjungibilem cum falsitate consequentis? Est ergo verum utrumque extremum.

Dile-

Dilemmatis; sed absurdum non est, verificari duo contradictoria de simultanea veritate chimærica. Neque reclames, id probare, *ex falso nunquam sequi verum*; cum tamen licet *ex vero nunquam sequatur falsum*, *ex falso aliquando verum*, aliquando falsum sequatur. Concedimus *ex falso nunquam sequi verum*, quando falsitas stat in eo, quod una ex præmissis pugnet cum altera, nam cum totum pondus sequelæ innitatur *simultanea veritati præmissarum*, hæc ruente corruit illud.

169. Hactenus de modis arguendi eliciendis ex propositione conditionali sumpta in sensu conjunctivo: sua contradictoria est illa, in qua præponitur negatio copulæ *si*: v. g. *non si existat A, existit B*. Hæc æquivaleret veritati copulativæ negatæ, scilicet *non coexistent A, & B*; quatenus illa infert hanc, licet hæc non inferat illam; hinc dictæ conditionalis contradictoria ministrabit tibi duos illos arguendi modos, quos supra dedimus inter explicandum veritates copulativas: & præterea unum alium, nimirum ab illa ad negationem connexionis hypothesi cum conditionato: *non si existat A, existit B*; ergo *A. non est connexum cum B*. Sed non semper è contrario, quoniam fieri potest, ut, *non si existat A, existat B*; & tamen quod *si existat B, existat A*; eo quia *B* infallibiliter connectatur cum *A*, licet hoc non connectatur cum *B*. Omnis namque creatura connectitur essentialiter cum existentia Dei, & Deus non connectitur cum existentia illius creaturæ, & consequenter licet non semper sit vera hæc, *si existit Deus, existit talis creatura*; semper tamen est vera hæc, *si existit talis creatura, existit Deus*.

C A P U T I X.

Quot, & quæ Argumentationes deducantur ex identitate, atque distinctione extremorum.

170. **H**ic est frequentissimus arguendi modus: scilicet, *boc est illud*; aut, *boc non est illud*. Pro his argumentationibus reliquit Aristoteles quatuor illa principia, duo affirmativa, & duo negativa, duo universalia, & duo pro singularibus, quæ minutatim explicamus inter explicandum principia, seu axiomata Dialectica. Principia ergo sunt: *dici de omni*: *dici de nullo*; en affirmativum, & negativum pro universalibus: item, *quæ sunt eadem*

medium debet esse prædicatum in majore v. g. *nullus lapis est animal: sed omnis homo est animal: ergo nullus homo est lapis*. Hic est in secunda figura, quia illud medium *Animal* est prædicatum in utraque præmissa: & est in *Cesare*, qui est primus modus secundæ figuræ, quia major est universalis negativa, minor universalis affirmativa, & conclusio universalis negativa juxta distributionem eorum vocalium E. A. E. Tu forma alios syllogismos in *Camestres*, *Festino*, & *Baroco*.

174. In tertia figura medium debet esse subiectum in utraque præmissa v. g. *omne animal est corpus: sed omne animal est vivens: ergo aliquod vivens est Corpus*. Hic syllogismus est in tertia figura, quia medium illud *Animal* est subiectum in utraque præmissa: & est in *Darapti*, qui est primus modus tertiæ figuræ, nam major, & minor sunt universales affirmativæ, & conclusio particularis affirmativa juxta ordinem illarum vocalium A. A. I. Tu forma alios syllogismos in reliquis modis hujus tertiæ figuræ, qui incipiunt à *Darepti* inclusive usque ad *Ferison*. Omnes arguendi modi significati per dicta vocabula *Barbara* &c. sunt directi, quia in conclusione extremitas minor (idest illa, de qua enunciatur medium in prima figura five sit in majore, five in minore) est subiectum, & extremitas major, idest illa, quæ enunciatur de medio, in eadem figura est prædicatum: quod si juxta regulas conversionum, convertas conclusionem horum modorum, ponendo pro subiecto extremitatem majorem, & pro prædicato minorem, resultabunt alii sexdecim legitimi arguendi modi, qui vocantur *indirecti*.

175. Cum enim convertens infallibiliter sequatur ex conversa, ut supra dicebamus; & conversa ipsa legitimè sequatur ex quibuslibet præmissis horum modorum, necesse est, quod ex eisdem præmissis sequatur legitimè convertens: & hæc est, quæ vocatur conclusio indirecta v. g. in *Camestres*, qui est secundus modus secundæ figuræ, *omnis homo est animal: sed nullus lapis est animal: conclusio directa est: ergo nullus lapis* (en extremitatem minorem pro subiecto) *est homo*, en extremitatem majorem: sed etiam potest ex illis præmissis elici hæc conclusio indirecta: *ergo nullus homo est lapis*, quia illa directa, cum sit universalis negativa, convertitur simpliciter, nempe in hanc aliam universalem etiam negativam, quia *simpliciter feci*: atqui in unoquoque ex dictis sexdecim modis: potest fieri idem, ergo resultant 32. modi efficaces arguendi.

176. Addunt aliqui quartam figuram, quam Galeni vocant, nempe in qua medius terminus sit prædicatum in majore, & subiectum in minore, sicut in figura prima est subiectum majoris, & prædicatum mi-

Epist. 1.
cap. 3.

minoris: sed hoc non est revera multiplicare figuras syllogisticas, sed transmutare præmissas primæ figuræ, & minorem facere majorem, & hanc postponere illi, ut non raro fit inter arguendum, & factum fuit a S. Joanne scribente: *omnis, qui odit fratrem suum, homicida est: & scitis quoniam omnis homicida non habet vitam æternam: vis atque energia omnium modorum trium harum figurarum stat in eis principiis, de omni: de nullo*, quæ in Præludio ad scholasticas disciplinas, Prolegomeno 1. explicamus.

177. Quando syllogismus est de medio omnino singulari, & ob hanc causam dicitur expositivus, potest similiter formari in triplici figura: v. g. *hic homo est Rex: Petrus est hic homo: ergo Petrus est Rex*: en medium terminum, scilicet *hic homo*, subjectum in majore, & prædicatum in minore: & consequenter syllogismus est in prima figura. In 2. etiam v. g. *hoc saxum non est hoc animal: sed Petrus est hoc animal: ergo Petrus non est hoc saxum*: ecce assumptam rationem, seu quodd idem est, medium, nempe *hoc animal*, prædicatum in utraque præmissa. In 3. demum v. g. *hic homo est hoc animal: hic homo est Petrus: ergo Petrus est hoc animal*: jam robur, vis, & efficacia harum argumentationum de medio, seu ratione omnino singulari stat in eis principiis, quæ sunt eadem uni tertio: quæ repugnant uni tertio &c. quæ explicamus per otium in præludio citato.

178. Praxis autem, & usus utrorumque syllogismorum hic esto: habes præ manibus aliquam propositionem probandam, quæ quidem non sit evidenter falsa, quia Dialectica non opitulatur ad probandum, sed ad detegendum falsitates istas: in primis debes attentè inspicere subjectum, & prædicatum illius propositionis cum suis annexis: & maximè considerare debes quidditatem, naturam, & proprietates utriusque, quia hinc maximè descendunt puriores argumentationes. Si propositio, quam probare debes, sit affirmativa, debes indagare aliquam rationem, aliquod medium, aliquem titulum universalem, sub quo comprehendatur subjectum tuæ propositionis, & cui conveniat prædicatum ejusdem. Quodd si hoc prædicatum non conveniat illi medio, aut licet conveniat, non comprehendatur sub illo medio; subjectum tuæ propositionis nihil concludet: v. g. vis probare omnem hominem esse capacem nutritionis: assume hanc rationem, seu medium *animal*, sub quo titulo generali comprehenditur homo, & cui titulo animalis competit capacitas nutritionis, & argues sic in in Barbara: *Omne animal est capax nutritionis: sed omnis homo est animal: ergo omnis homo est capax nutritionis*. Sin verò assumes hanc rationem,

Ar-

Arbor, nihil efficies: quia tametsi omni arbori competat capacitas nutritionis; homo tamen non comprehenditur sub ratione arboris: quo circa dices sic, *omnis arbor est cupax nutritionis*; sed *omnis homo est arbor*: hæc tibi negabitur. Similiter nihil efficies si assumes titulum, seu rationem, seu medium hoc *rationale*. quia licet omnis homo sub hoc titulo comprehendatur; attamen non omni rationali competit capacitas nutritionis: quoniam Angeli sunt rationales, & hanc capacitatem non habent: te ergo dicente, *omne rationale est cupax nutritionis*: sed *omnis homo est rationalis*: negabit impunè adversarius majorem.

179. Similiter quando propositionem de subiecto omnino singulari probare velis per syllogismum expostorium (probari etiam possunt hujusmodi propositiones syllogismis de medio communi v. g. *omnis Persona Divina est æterna*: sed *Verbum est Persona Divina*; ergo *est æternum*: sed hi syllogismi non spectant *formaliter*, sed *reductivè* dumtaxat ad ullum ex modis illarum trium figurarum, nam ut vides, omnes præmissæ illorum debent habere aut quantitatem universalem, scilicet *omnis, nullus*, aut particularem, nempe *aliquis*) quando inquam uti velis syllogismo expostorio, debes quærere aliquod medium, aliquam rationem, aliquid prorsus singulare, quod identificetur cum subiecto tuæ propositionis, & cum quo identificetur prædicatum: quodd si alterutrum ex his duobus non subsisterit, nec tuus syllogismus subsistet: v. g. *hoc animal est hoc rationale*: *Petrus est hoc animal*; ergo *Petrus est hoc rationale*: valet; sed non valet hic: *hæc arbor est hoc vivens*: sed *Petrus est hæc arbor*; ergo *est hoc vivens*: licet enim *vivens* competat huic arbori, veruntamen Petrus non identificatur cum hac arbore. Neque valet hic: *hoc rationale est hæc arbor*: sed *Petrus est hoc rationale*: nam licet hoc secundum sit verum, illud primum est falsum. Dicimus autem hos syllogismos non valere; non quia, concessis præmissis, possit negari consequentia; sed quia medium, seu ratio assumpta in illis nihil valet: Damus autem in præsentī regulam ad utendum utriusq; syllogismo ita ut discursus undequaq; sit legitimus, & validus.

180. Hactenus de praxi probandi propositiones affirmativas. Quod si propositio, quam præ manibus habueris, sit negativa, debes similiter indagare aliquam rationem, seu aliquod medium, sub quo comprehendatur tuæ propositionis subiectum, & cui medio, seu rationi repugnet ejusdem propositionis prædicatum (intellectis semper omnibus utriusque appendicibus, seu annexis) Quod si alterutrum ex his defecerit, syllogismus tuus deficiet etiam: v. g. vis probare hanc propositionem, *nullum hominem esse marmor*: assume hanc rationem.

sensu.

sensibile, quia ei repugnat esse marmor, & sub ea comprehenditur omnis homo: argues itaque sic: *nullum sensibile est marmor: sed omnis homo est sensibilis: ergo nullus homo est marmor*: en probatam hanc propositionem per syllogismum in *Celarent*.

181. Malè tamen probandi ergo eandem propositionem assumes rationem *corporis*, quia licet sub ea comprehendatur etiam homo, ei non repugnat esse marmor: si enim dixeris *nullum corpus est marmor: omnis homo est corpus*, adversarius nihil curans de minore negabit impune maiorem. Malè similiter assumes rationem, seu medium supernaturalitatis, v. g. quia licet ei verè repugnet esse marmor, sub ea tamen non comprehenditur homo: quapropter te dicente, *nullum supernaturale est marmor: sed omnis homo est supernaturalis*: adversarius, concessa maiore, negabit minorem.

§. I I.

182. **C**irca omnes hos modos arguendi tam expositorios, quàm de medio communi, tam unius, quàm alius figuræ, de promptos tamen ex capite identitatis, aut distinctionis adverte quatuor: 1. Est, in nullo ex dictis modis possunt esse ambæ præmissæ negativæ: quia *ex puris negativis nihil sequitur*. Ratio est, quia vel conclusio est affirmativa, vel negativa? Si primum; ambæ extremitates debent identificari cum eodem medio in præmissis. Si negativa; una extremitas debet identificari cum medio, & altera negari de eodem medio: ergo una saltem præmissa debet esse affirmativa: ergo si utraque est negativa, conclusio non procedit, sive sit affirmativa, sive negativa. Memineris tamen multas esse præmissas, quæ videntur negativæ, eo quia negationibus refertæ sint, & tamen sunt affirmativæ, & consequenter syllogismi sunt boni v. g. *omne, quod non est animal, non est homo: sed omnis arbor non est animal: ergo omnis arbor non est homo*; malè, quia præmissæ re vera sunt affirmativæ, eo quod præcipua copula est sine negatione; reddunt quippè hunc sensum: *omne quod est illud, quod non est animal, est illud, quod non est homo: omnis arbor est illud, quod non est animal*; ubi iam vides illas copulas *est* non esse negatas: quia licet ipsis præcedat *non*; ast præcedit in sensu infinitante, sed non in negante; idem dic de illo syllogismo solemni: *Stellæ, quæ non scintillant, sunt propè nos: sed Planetæ non scintillant: ergo Planetæ sunt propè nos*: præmissæ videntur negativæ, sed ambæ sunt affirmativæ.

183. Adverte 2. neque ambæ præmissæ possunt esse particulares: quia *ex puris particularibus nihil sequitur*: quia vel syllogismus est de
me-

medio omnino singulari, vel de medio communi, seu universalis? Si primum, utraque erit falsæ suppositionis, quia utraque innuet pluralitatem illius termini omnino singularis, & hac de causa supponunt falsum hæ propositiones, *aliquis Deus est, aliquis Deus non est*. Si secundum, præterquamquod syllogismus non innitetur eis principiis, *de omni, de nullo*, quibus inniti debet omnis syllogismus de medio communi: sequetur, quod non erit medium distributum in præmissis (nam signa particularia, v. g. *aliquis, aliquando* &c. non distribuunt terminum, supra quem immediate cadunt, sed faciunt eum significare disjunctivè sua inferiora) si autem medium non est distributum, arguetur *ab indistributo ad distributum*, qui modus est illegitimus; nam quoties subiectum, & prædicatum conclusionis non identificantur in præmissis cum eodem penitus medio, ex illis non sequitur, quod identificantur inter se.

184. Sed quoties medium est indistributum, subiectum, & prædicatum conclusionis non identificantur in præmissis cum eodem penitus medio; nam prædicatum conclusionis identificatur in maiore *cum aliquo*, subiectum identificatur in minore *cum aliquo*; & fieri potest, quod unum *aliquod* non sit alterum *aliquod*: ergo subiectum, & prædicatum conclusionis non identificantur in præmissis necessario cum eodem omnino, quando medium est indistributum. v. g. licet conclusio huius syllogismi aliunde sit vera, consequentia est mala *aliquod animal est rationale: aliquis homo est animal; ergo aliquis homo est rationalis*: est verum; sed mala illatio, quia non dicitur in minore hominem identificari cum illo eodem penitus animali, cum quo identificatur rationale in maiori, sed solum cum *aliquo* vagè, ac disjunctivè; & apparet in hoc altero syllogismo, cujus præmissæ sunt veræ, & conclusio falsa, *aliquod animal est rationale: aliquis equus est animal; ergo aliquis equus est rationalis*; excipe tamen casum positum cap. 8.

185. Adverte 3. nullus ex prædictis syllogismis debet constare nisi tribus solis terminis (excipe casum scriptum cap. 7.) unde quando syllogismus constat quatuor terminis, non valet; ratio est. In conclusione debent poni illa eadem extrema, quæ aut in præmissis identificabantur cum uno, eodemque medio, si conclusio sit affirmativa: aut uni eidemque medio repugnabant, si conclusio est negativa; ergo in toto syllogismo non debentessen illud medium, quod assumitur ut ratio ad probandum conclusionem, & illa duo extrema, quæ illi eidem medio aut identificantur, aut repugnant, ut postea in conclu-

clufione aut affirmetur, aut negentur de fe; ergo non debent effe nifi tres foli termini; ergo fi fuerint plures, corruptunt artificium fyllogifini, aut funt penitus impertinentes, ut fi quis diceret: *omnis homo eft animal: Petrus eft homo, & gallus cantat; ergo Petrus eft animal.*

186. Hinc 1. cùm termini multiplicentur non folùm fecundùm voces ipfas, fed etiam fecundùm fuppoſitiones, fecundùm appellationes, & fecundùm alias affectiones, quas habuerint, quia hæc omnia & fingula mutant ſenſum, & ſignificationem terminorum: hac de cauſa extremitates concluſionis, ideſt ſubjectum, & prædicatum, imò & copula ipſa debent habere eandem ſuppoſitionem, hoc eſt eundem ſenſum, & ſignificationem, quæ habuerint in præmiſſis; aliàs multiplicabuntur termini. Item cùm medium debeat eſſe idem, quoniam fyllogiſmus, in quo mutatur medium, nihil valet; idcirco medium debet habere in una præmiſſa eandem ſuppoſitionem, hoc eſt eundem ſenſum, & ſignificationem, quàm in altera: aliàs extremitates non identificabuntur, aut repugnabunt eidem proſus medio; excipe tamen quando hoc habuerit ſuppoſitionem diſtributivam in maiori, aut particularem, vel ſingularem, in minore v. g. *omne animal eſt vivens: omnis homo eſt animal*; in qua minore *animal* non habet ſuppoſitionem diſtributivam, quam habebat in maiore: nihil refert, quia non tollit omnem hominem identificari cum aliquo animali; & cùm ex alia parte omne animal dicatur in maiore identificari cum vivente, non tollit, quòd omnis homo, atque vivens identificentur cum eiſdem reſpectivè mediis; ergo non tollit, quòd identificentur reſpectivè inter ſe.

187. Hinc 2. licèt in quovis fyllogiſmo ſint plures voces, plura vocabula, quàm tria, non eo ipſo ſunt *formaliter*, ſed tantùm *materialiter* plures termini, quàm tres; quia terminus in præſentiarum ſignificat extremitates, quæ in concluſione identificantur aut repugnant inter ſe ex eo quòd in præmiſſis identificentur, aut repugnant cum eodem, aut cum eiſdem reſpectivè mediis; at quanquam in uno quoque fyllogiſmo ſint materialiter plures voces, aut plura vocabula, ſubſiſtit, quòd ſi eſt rectus fyllogiſmus, identificentur, aut repugnant inter ſe eadem extremitates, quæ in præmiſſis identificabantur, aut repugnabant cum eodem, vel cum eiſdem extremis reſpectivè; ergo quando fyllogiſmus eſt rectus, licèt ſint plures voces, & plures termini materialiter, non tamen plures quàm tres formaliter.

188. Diximus *medio*, aut *mediis*, nempe etiam materialiter, ut
con-

contingit in syllogismis de medio communi v. g. *omne animale est vivens; omnis homo est animal*. Cùm enim medium, idest subiectum illius majoris, *animal* scilicet, sit immediatè affectum signo universali, non accipitur pro uno singulari animali: sed pro hoc, & pro illo, & pro illo altero, & pro omni: quocirca re vera multiplicatur subiectum illius majoris; ergo multiplicatur medium. Cæterum est multiplicatio purè materialis intimè imbibita in suppositionibus distributivis; non autem est multiplicatio *formalis* impediens in præmissis identitatem uniuscujusque animalis cum vivente, & consequenter illius animalis, quod in minore enunciatur de unoquoque homine; ergo illa multiplicatio medii non impedit, quòd in consequente unusquisque singularis homo identificetur cum vivente. Igitur multiplicatio terminorum, & medii aut impedit extremitates conclusionis identificari, aut repugnare cum eodem in præmissis? Vel non impedit hoc? Si primum, est multiplicatio formalis, quæ perdit valorem syllogismi. Si secundum, est innocens, & purè materialis multiplicatio, quæ non perdit illum valorem.

189. Adverte 4. soli illi quatuor primi modi primæ figuræ sunt ita directi, ita perspicui, & evidentes; ut ad ipsorum conspectum tergiversari nequeat nisi qui fuerit terminorum ignarus: reliqui omnes sunt efficaces; sed non ita evidentes, ut non possit interdum negari consequentia post præmissas concessas ab homine non penetrante ipsorum energiam. Succurrit Dialectica huic necessitati, & præbet regulas reducendi quemlibet ex illis aliis syllogismis ad unum ex illis quatuor perfectissimis, atque evidentissimis *Barbara, Celarent, Darii, Ferio*. Geminus est reducendi modus: unus dicitur *per ostensionem*; est longus, implexus, rarissimè contingens, & qui satiandi ergo curiositatem quæri potest in aliis passim Authoribus: alter dicitur *per reductionem ad impossibile*, & contingit, quando arguens nolentem concedere consequentiam post concessas præmissas, cogit, ut devoret duo contradictoria, quod est pejus, quàm concedere illam consequentiam: cùmque simultanea veritas duorum contradictoriorum sit impossibilis, hac de causa dicitur *reductio ad impossibile*.

190. Praxis est hæc; supposito quòd syllogismus, quamvis indirectus, & imperfectus, sit legitimus (Dialectica non suggerit medium convertendi in bonum eum syllogismum, qui semel est pravus, & illegitimus,) si adversarius concessis præmissis, neget consequentiam; debes tu insurgere. Ergo simultanea veritas harum præmissarum non connectitur cum veritate hujus consequentis: quia propterea
negas

negas consequentiam; ergo simultanea veritas stare potest cum veritate contradictoria hujus consequentis. Tunc debes proponere contradictoriam illius consequentis, & conjungendo illam cum ea præmissa jam concessa, cum qua vides habere proportionem, ut forment syllogismum in uno ex illis quatuor primis modis primæ figuræ, deducere conclusionem; quæ vel formaliter ut talis, vel conversa juxta conversionum regulas, erit contradictoria immediata alterius præmissæ jam concessæ, & sic cogitur Adversarius deglutire duas contradictorias: unam, quæ jam concesserat, alteram, quæ modo venit in syllogismo perfecto primæ figuræ, ad quem reducitur ille alter imperfectus, cujus consequentia fuit tibi negata.

191. Posuisti v. g. hunc syllogismum in *Barocco*, qui spectat ad secundam figuram, & quamvis legitimus, non est ita perspicuus, & evidens: *omne animal est vivens: aliquis lapis non est vivens; ergo aliquis lapis non est animal.* Adversarius non penetrans rectitudinem hujus syllogismi, concessis præmissis, negat consequentiam. Insurge sic: ergo simultanea veritas harum præmissarum stare potest cum veritate contradictoria hujus consequentis, nempe cum hac: *omnis lapis est animal.* Tunc sic: *per te omne animal est vivens: sed omnis lapis est animal; ergo omnis lapis est vivens.* Ecce conclusionem in *Barbara*, quæ est contradictoria illius minoris, quam nuper concessisti, *aliquis lapis non est vivens.*

192. Ponamus syllogismum in *Datifi*, qui spectat ad tertiam figuram: *omne animal est vivens: aliquod animal est rationale: ergo aliquod rationale est vivens;* negat ille consequentiam: insurge tu, non quidem sic de repente: *ergo nullum rationale est vivens;* nam irridebit Adversarius & negabit hanc etiam consequentiam inquires, illas præmissas, neque inferre unam contradictoriam, neque alteram, sicut hæ duæ præmissæ, *omnis homo est animal: Petrus est homo,* neque inferunt hoc, *Gallus cantat,* neque hoc contradictorium, *non Gallus cantat.* Non ergo præcipiti isto modo debes procedere, sed hoc alio: *ergo simultanea veritas istarum præmissarum non connectitur cum isto consequente; ergo hac simultanea veritas stare potest cum contradictorio illius: sed contradictorium illius est, nullum rationale est vivens; ergo simultanea veritas earum præmissarum stare potest cum hac veritate, nullum rationale est vivens: sed hoc est impossibile, quia hæc veritas conjuncta cum una ex præmissis concessis insert evidenter falsitatem illius.*

193. Ostendo sic: *nullum rationale est vivens;* en contradictoriam illius consequentis: *sed aliquod animal est rationale* (en minorem quam

con.

conceptisti) ergo *aliquod animal non est vivens* : en contradictoriam majoris , quam concessisti : ergo contradictorium illius consequentis conjunctum cum una ex præmissis concessis infert contradictorium præmissæ alterius ; ergo non potest stare cum simultanea veritate illarum : ergo cùm omnis oppositio essentialis sit mutua , fiet , quod neque illa simultanea veritas possit stare cum contradictorio illius consequentis : atqui oppositio essentialis cum una contradictorio est essentialis connexio cum altero , ut suppono ex *Metaphysica* ; ergo simultanea veritas earum præmissarum essentialiter connectitur cum veritate illius consequentis : ergo bona est illa consequentia , quam negasti ; en processum totum extensum .

194. Sed ne terrearis accidenti quodam evenire solito ; nimirum contradictorium consequentis conjunctum cum una ex præmissis non semper infert immediatè , & formaliter in uno ex illis quatuor modis primæ figuræ contradictoriam alterius præmissæ : semper tamen infert illam , aut immediatè , & directè , aut mediatè , & indirectè quatenus infert propositionem , quæ si legitime convertatur , erit contradictoria illius præmissæ jam concessæ v. g. ponamus hunc syllogismum in *Dabitis*. *Omne animal est vivens ; aliquis homo est animal ; ergo aliquod vivens est homo* : contradictorium hujus consequentis , videlicet *nullum vivens est homo* , conjunctum cum illa majore , *omne animal est vivens* , infert in *Celarent* , *nullum animal esse bonivem* ; hæc conversâ simpliciter infert , *nullum hominem esse animal* : ecce contradictoriam illius minoris concessæ , *aliquis homo est animal* ; omnia hæc praxi meliùs , & exercitio discuntur , quàm speculatione .

195. Et en liberatam fidem , quam dedimus initio disputationis hujus ; si enim legitimas , & efficaces arguendi formas , quas notavimus , numerare velis ; fermè 300. deprehendes , unde copiosam suppellectilem parare tibi potes ad legitime ratiocinandum in quacunque materia philosophica , theologica , naturalis , supernaturali , civili , politica , militari &c. , modò suffragetur veritas tuo discursui ; infallibiles namque *Dialecticæ* regulæ non sunt ad probandum falsitates , sed veritates .



¹⁷⁴
DISPUTATIO III.

In qua expenduntur hæ Quæstiones.

1. *An omnis habitus docens in Logica sit habitus utens?* Cap. 1.
2. *An Logica sit simplex qualitas?* Ibid.
3. *Quo sensu sit unica?* Ibid.
4. *An sit Scientia simul, & Ars?* Cap. 2.
5. *An Scientia possit esse de singularibus?* Ibid.
6. *An Scientia debeat haberi per demonstrationem à priori?* Ibid.
7. *An, & quomodo Logica sit pratica, & speculativa?* Cap. 3.
8. *An, & quomodo sit necessaria ad Scientias alias?* Ibid.
9. *Quid, & quotuplex sit objectum formale?* Cap. 4.
10. *Quid, & quotuplex objectum materiale?* Ibid.
11. *Quid, & quotuplex motivum?* Ibid.
12. *Quodnam sit, & quodnam non sit objectum materiale utriusque Logicæ?* Cap. 5.
13. *Quodnam sit, & quodnam non sit objectum formale earumdem: ubi de Ente rationis?* Ibid.
14. *An denominationes extrinsecæ includant Ens rationis?* Ibid.
15. *Quodnam sit objectum attributionis Logicæ?* Cap. 6.
16. *An conceptus formales ut dirigibiles juxta regulas Logicæ sint hujus objectum formale?* Cap. 7.



Um omnes quæstiones, quas proemiales vocant, sint circa Dialecticam, seu Logicam minorem, non autem circa majorem, quam seorsim dabimus, hac de causa illi, non autem huic illas quæstiones armetimus: & cùm pleræque nullam, vel levem affinitatem habeant cum corpore Philosophiæ, ac Theologiæ; idcirco breviter ipsas perstringemus, ne tempus, & studentium patientiam ad res altiores necessariam, levioribus absumamus.

C A P U T I.

Quid, & quotuplex sit Logica.

1. **E**st facultas rectè differendi; sicut enim datur facultas quædam rectè pingendi, & facultas quædam rectè ædificandi &c. Ita experientiâ constat dari in hominibus facultatem quandam docentem rectè differere in quacumque materia: & constat insuper ex duabus prioribus disputationibus, quæ totæ sunt Dialecticæ, & totæ incumbunt jam uno modo, jam alio in regulas rectè differendi: hanc vocamus *Dialecticam*, seu *Logicam minorem*, ut enim præmonuimus, omnes hæc proemiales quæstiones de hac procedunt Logica minore, non de majore, quæ aliò tendit, ut postea videbis, quam in præcepta rectè differendi.

2. Illud facultas est genus; cætera verò sunt differentia: dicitur rectè, non quidem rectitudine *moralis*, idest consentanea Legi Dei, quia Logica ab hoc præscindit: non item rectitudine *elegantia*, quia hæc ad Grammaticam spectat; non rectitudine *prudentialis*, seu *mere probabilitalis*, seu *evidentiæ solius moralis, vel physica*; sed rectitudine *evidentiæ metaphysica* ineluctabilis: non demum rectitudine inveniendi medium, sive rationem ad probandum evidenter veritatem, quia hoc ad illas scientias spectat, ad quas spectat illa veritas: dicitur ergo Logica facultas differendi, quatenus medium, seu rationem aliundè quasi confuso, & indigesto modo subministratam docet ita combinare, ac disponere, ut invincibiliter concludat veritatem; & insuper dando regulas definiendi, dividendi, convertendi &c. valde juvat scientias alias ad inveniendum rationem, quam postea artificiosè disponit intellectus regulis Logicæ instructus.

3. Logica est duplex: una *naturalis*, idest vivacitas ipsa, seu capacitas ingenii ad differendum in quacumque materia saltem naturali: hæc capacitas, seu facultas si consideretur in actu primo remoto seu radicaliter est nostra ipsa anima, quæ juxta sententiam postea dandam, identificatur penitus cum suis potentiis; si consideretur in actu primo proximo, & expedito, est partim nostra anima, & partim bona dispositio, seu temperamentum cerebri nostri, ubi fiunt discursus; sicut enim potentiæ visivæ sunt æquales in omnibus hominibus: melius tamen vident uni, quam alii, quia unorum oculi sunt melius

lius dispositi, quàm aliorum, & idem de cæteris omnibus potentiis naturalibus: unde fit, quòd omnes homines sint æquales potentiâ visivâ, auditivâ, nutritivâ, ambulativâ sumptis radicaliter, seu in actu primo remoto; non verò sint æquales, sed valde dispares (ut docet experientia) his eisdem potentiis sumptis in actu primo proximo, atque expedito; ita omnes homines sunt æquales potentiâ intellectivâ, discursivâ: sunt æquales ingenio, seu Logicâ naturalî, sumptis his radicaliter tantum, ac in actu primo remoto; valde tamen inæquales, si hæc considerentur in actu primo proximo: alioquin si per inæqualitatem operationum taxanda foret inæqualitas potentiarum radicalium, & consequenter animarum ipsarum, sequeretur animas Salomonis, & Augustini, & similium plusquam specie physica differre a communi aliarum animarum humanarum: quandoquidem illorum discursus, atque cognitiones plusquam specie superant vivacitate cognitiones, & discursus vulgi humani: omnes ergo sumus pares Logicâ naturali, seu ingenio radicaliter sumpto.

4. Altera est *Logica Artificialis*, nempe facultas, de qua modò agimus, quæ traditur ab unis, & discitur, vel non discitur ab aliis; hæc est item duplex, una *Activa*, nempe regulæ ipsæ, præcepta ipsa docentia modum definiendi, dividendi, argumentandi &c. quæ tradidimus in prioribus Disputationibus; altera *Habitualis*, nimirum facilitas quædam ex crebra repetitione earum regularum genita in intellectu primariò quidem, & immediatè ad possidendum, percellendum, habendumque promptas dictas regulas; secundariò autem, & mediatè ad utendum illis pro nata occasione: quot ut copias adverte; sicut experientiâ novimus, solere corporibus inhærere quandam qualitatem, qua redduntur alba, & vocatur albedo, & quandam aliam, qua redduntur frigida, & vocatur frigus, & sic de aliis: ita ratione deprehendimus esse qualitates quasdam juvantes animam nostram ad *faciliùs* eliciendum tales, aut tales operationes corporales, tales, aut tales imaginativas, tales, aut tales intellectivas, tales, aut tales volitivas: experientiâ rursus novimus, hujusmodi facilitates acquiri ex crebra, & crebra repetitione suorum actuum.

5. Has qualitates facilitantes, & ex frequenti repetitione, atque consuetudine oriundas, vocamus *Habitus acquisitos*: unde primò non quævis facilitas ad aliquid est *Habitus acquisitus* ex actionibus illius speciei: qui enim nunquam jejunavit, quomodo dici potest habere habitum acquisitum jejunandi? Et tamen potest habere facilitatem, si robusto pollcat stomacho. Qui numquam cucurrit, aut phi-

philosophatus est, quo jure dici potest habere *habitu* *acquisitum* currendi, aut philosophandi? Et tamen potest habere facilitatem, si velocibus tibiis, & volucris ingenio fungatur; est ergo de essentia habitus acquisiti, quod sit facilitas non quævis, sed *generata ex crebra repetitione actuum*.

6. Unde 2. patet discrimen inter habitum acquisitum, & *infusum*: quoniam hic non habetur ex consuetudine, sed repetitione suorum actuum; sed a solo Deo producente illum in nobis, ut possimus sublimes illas elicere operationes credendi, sperandi, diligendi, prænitiendi &c. quibus elevamur supra nosmetipsos, & tendimus in Patriam cœlestem: præterea habitus acquisitus juvat tantum, ac faciliat, sed non dat virtutem, aut facultatem sufficientem ad rem illam, de qua fuerit sermo, (licet enim nunquam jejunaveris, potes absolute, & simpliciter jejunare: & licet nunquam scripseris, potes absolute scribere, si regulas nosti) habitus verò infusus non faciliat per se; sed dat virtutem, & facultatem simpliciter necessariam, juxta ordinariam providentiã, ad operandũ: sed de hoc alibi, modò insinuasse sufficit.

7. 3. Divisio. Utraque Logica, nempe actualis, & habitualis est duplex: una *adæquata*, altera *inadæquata*; hæc est unaquæque regula Logicæ distributivè sumpta, vel unusquisque habitus Logicæ genitus ex frequenti repetitione actuum: illa est complexum, sive aggregatum resultans, aut ex omnibus regulis Logicæ (& est Logica actualis adæquata) aut ex omnibus habitibus Logicæ; & est Logica habitualis adæquata, sive completa, & totalis: cum autem raro, vel nunquam sint simul in eodem intellectu præsentia omnia præcepta Logicæ, quia nullus intellectus humanus simul atque in eodem momento cogitat tot, ac tanta: passim autem sint simul in eodem intellectu taciti habitus, sed facilitates relictæ ex crebra repetitione eorum præceptorum; ideo fit, quod Logica habitualis adæquata passim existat in uno, eodemque intellectu; Logica verò actualis adæquata nuspiam existat in rerum natura, nisi vel scripta in libris, vel sparsa per multos homines.

8. Utraque vel est *docens*, vel est *utens*: docens est regula, vel regulæ dictantes modum definiendi, dividendi, argumentandi &c. aut facilitas, sed facilitates ad habendum promptas has regulas, quæ facilitas, aut facilitates acquirantur ex crebra repetitione earundem. Logica utens dupliciter considerari potest, nempe activè, aut passivè. Logica utens activè est una, vel unæ partes ipsius Logicæ exercentes regulas alius partis, sicut illa pars Logicæ, quæ agit de syllogis-

mis, utitur regulis, & præceptis alius partis agentis de definitione, & divisione, ut explicet quid, & quotuplex sit syllogismus: Logica utens passivè est regula, seu regulæ ipsius Logicæ, quæ usitantur ab aliis facultatibus v. g. a Philosophia definiendi ergo, dividendi, atque argumentandi super Ente naturali, & à Theologia definiendi, ergo, dividendi, argumentandi circa Ens supernaturale..

§. II.

9. **H**inc nascuntur duæ quæstiones. 1. *An Logica secundum omnes suos habitus sit docens, & utens*; hoc est an omnis habitus docens sit utens? Non debes intelligere, quod sonant hæc verba, quia cum habitus acquisitus neque sit persona, neque sit regula, sed qualitas quedam relicta in intellectu. ex frequenti repetitione regularum, ut advertimus num. 4., non sunt capaces docendi, aut utendi, si castigatè loquamur: dicuntur ergo habitus docentes, aut utentes, quatenus generantur ex repetitione actuum, qui propriè sunt docentes, aut utentes; sensus igitur quæstionis est, an omnis habitus genitus ex actibus docentibus sit genitus ex actibus utentibus?

10. Resp. omnis habitus docens est utens passivè: sed non omnis habitus docens est utens activè. Prob. prima pars: omnis habitus, quo vel utuntur, vel possunt uti aliæ scientiæ in sua materia, est utens passivè, sive est usitatus, aut usitabilis: sed omnis habitus Logicæ docentis talis est, ut eo utantur, aut uti possint cœteræ scientiæ in sua propria materia: quoniam Philosophia, Theologia, Arithmetica, Jurisprudentia &c. uti possunt, & passim utuntur regulis Logicis ad definiendum, dividendum, & differendum interdum probabiliter, interdum evidenter; ergo omnis habitus docens est habitus utens passivè, idest generatur ex actibus, quibus uti possunt aliæ scientiæ.

11. Prob. secundâ pars. Omnis habitus generatus ex actu purè docente, & minimè utente, activè est habitus docens, & minimè utens activè: sed aliquis habitus Logicæ fuit generatus ex actu purè docente, & minimè utente activè; ergo aliquis habitus Logicæ est docens, & minimè utens activè: ergo non omnis &c. Ma. videtur certa, quia, ut diximus, habitus acquisitus non est quælibet facilitas, sed ea singillatim, ac determinatè, quæ generatur ex repetitione actuum, & hæc de causa vocatur *acquisita*; ergo sicut facilitas ge-

nec

nerata ex crebra consuetudine loquendi, non autem ex consuetudine scribendi, est habitus acquisitus loquendi, non autem scribendi: ita omnis habitus generatus ex repetitione actus docentis, & non utentis est habitus docens, & non utens.

12. Prob. mi. primi syllogismi. Aliquis fuit in Logica primus actus docens: quoniam sine fundamento, & præter humanam consuetudinem dicemus omnes, aut plerisque, aut duos illapso fuisse simul menti primi Logici: sed ille primus actus, seu illa prima regula fuit docens, & non fuit utens activè aliis regulis Logicæ; siquidem ante primam non fuerunt aliæ, ut constat, in illo scilicet eodem intellectu; ergo fatendum est, quodd in Logica est aliquis actus docens, & non utens: ergo habitus generatus ex repetitione hujus actus, quicumque ille fuerit (quia hoc nescimus) fuit generatus ex actu purè docente, & minimè utente; sed habitus generatus ex primo actu, seu regula Logicæ datur in Logica, seu est pars Logicæ: ergo aliquis habitus Logicæ fuit generatus ex actu purè docente, & minimè utente.

13. Unde non negamus multos, aut plerisque actus in multis, aut plerisque partibus Logicæ esse utentes activè: hoc est intellectum ad formandum illos uti regulis, præceptis, & advertentiis aliarum partium Logicæ; solùm igitur negamus omnem prorsus actum docentem esse utentem in hoc sensu: quia juxta humanam consuetudinem inveniendi artes; fatendum est, quodd aliquis fuit primus actus, seu primum præceptum Logicæ: & ante primum non habuit ille idem intellectus aliud præceptum Logicæ, quo uteretur ad formandum illud primum; licet habuerit aliquod, vel aliqua ex primis principiis evidentibus, quæ non tam sunt regulæ, quàm fontes, seu origines regularum definiendi, dividendi &c. v. g. illa principia, *quodlibet est, vel non est: quæ sunt eadem uni tertio &c.*

14. Si autem quæsieris, quem influxum præstet Logica in usum sui ipsius, quem habent aliæ facultates v. g. in definitiones, divisiones, & argumentationes Theologicas factas juxta regulas Logicæ? Resp. illas procedere *physicè* quidem ab habitibus illarum facultatum; *directivè* autem, & quasi remotè à regulis Logicæ: quemadmodum opiniones veraces, quas discipulus discit, concipiuntur *physicè*, immediatè ab intellectu ipsius; *directivè* autem, *moraliter*, & mediatè à regulis, & rationibus, quas audit à suo Magistro.

S. I I I.

15. 2. **Q**uestio est: *an Logica sit simplex qualitas*: id est au-

omnes illi habitus, quos diximus, non sint re-
vera multi, sed unicus tantum simplex, ac in-
divisibilis, qui diversimodè extensus, applicatus, combinatus jam sit
habitus definiendi, jam dividendi, jam argumentandi? *Quemadmo-*
dum intellectus in unoquoque homine non est nisi unicus, qui ta-
men juxta diversos respectus jam est apprehensivus, jam judicativus,
jam discursivus; & quemadmodum anima in unoquoque homine non
est nisi unica, licèt modò dicatur nutritiva, modò sensitiva, modò
rationalis; & quemadmodum gradus metaphysici, hoc est prædicata:
cujusvis individui, non sunt verè multa, licèt numero plurali ex-
plicentur, sed unica simplex, & indivisibilis essentia metaphysica.

16. Aliqui graves Doctores putant, hoc ita evenire, & docent
Logicam esse unam, simplicem, indivisibilem qualitatem in unoquo-
que intellectu Logico; & consequenter docent in Philosophia in-
tensionem qualitatum, v. g. frigoris, caloris &c. non fieri per addi-
tionem gradus ad gradum, sed fieri quatenus idem simplex indivisi-
bilis calor, aut indivisibile frigus magis radicatur in subjecto: & con-
sequenter etiam docent in Theologia, Ordinem Præbyteralem non
constare pluribus partibus, sed esse unum, eundemque in quovis
Clerico magis, aut minus extensum, magis, aut minus perfectum.

17. Sed hæc non sunt vera, & prætermittendo philosophica, &
theologica, quæ modò non veniunt ad rem, probamus sic, Logicam
non esse simplicem qualitatem, sed constare habitibus realiter distin-
ctis. Habitus acquisitus non est quælibet facilitas ad actum, ut se-
mel, & iterum diximus, sed illa determinatè, ac singillatim, quæ
habetur *ex crebra repetitione actuum*. Quo enim jure dicetur habere
habitum acquisitum currendi (aut secundum implicitum, aut secun-
dum explicitum, aut secundum extensum, aut secundum contra-
ctum, aut secundum perfectum, aut secundum imperfectum, his,
ac similibus terminis utuntur aliqui) qui nunquam totà suâ vitâ cu-
rrit, licèt aliàs sit agilis, facilisque ad currendum? *Qua* veritate
dicetur habere habitum acquisitum dandi eleemosinam, qui nun-
quam in tota suâ vita dedit unam, licèt aliàs dives, & misericors, faci-
litatem habeat ad dandum eleemosinam?

18. Fatendum ergo est, nisi vocibus velimus abuti, esse de es-
sen-

sentia habitus acquisiti, quod sit facilitas quædam generata ex suis actibus, hoc est habitus acquisitus currendi, ex cursibus; habitus acquisitus scribendi ex scriptionibus &c. ergo eo ipso, quod quis crebro, & frequenter conceperit regulas definiendi v. g. & nunquam regulas syllogizandi, habebit habitum acquisitum doctrinæ definiendi, & nullo prorsus vero modo habebit habitum acquisitum doctrinæ syllogizandi, sicut eo ipso, quod quis crebro, & frequenter oraverit, nunquam verò jejunaverit, habebit habitum acquisitum orandi, non autem jejunandi: sed fieri potest, & forsitan frequenter fit, quod quis crebro conceperit, idest intellexerit regulas definiendi, nunquam autem syllogizandi, cum sint res valde distinctæ inter se definire, & syllogizare non minùs quàm orare, & jejunare; ergo fieri potest, quod quis habeat habitum acquisitum doctrinæ definiendi, non autem doctrinæ syllogizandi: ergo ille habitus distinguitur realiter ab hoc: sed ambo sunt in Logica; ergo in Logica dantur habitus realiter distincti; ergo Logica non est una simplex qualitas, & indivisibilis.

19. Diximus *habitum doctrinæ*, quia quod est proprium Logicæ, est doctrina ipsa definiendi, dividendi, & argumentandi, non verò definitiones ipsæ, divisiones, aut argumentationes; quia hæc ad illam spectant facultatem, in qua fiunt: unde definitiones, divisiones, & argumentationes circa entia supernaturalia fiunt à Theologia: & hac de causa non diximus *habitum definiendi, dividendi &c.* sed *habitum doctrinæ definiendi*.

20. Exempla verò contraria ratione ipsâ nostræ conclusionis arcentur: intellectus enim noster non generatur ex apprehensione, judicio, aut discursu: Anima nostra non generatur ex nutritione, sensatione, aut ratiocinio. Veruntamen omnis habitus acquisitus, nisi vocum significationes invertere velimus, ex sua essentia habet generari ex repetitione actuum, nisi aliquis putet dari posse habitum, seu consuetudinem illarum actionum, quæ nunquam sunt factæ; ergo eo ipso, quod frequenter fiant unæ actiones, sive materiales, sive spirituales, sive internæ, sive externæ, & nunquam fiant alteræ, dabitur (si cætera adsint requisita, v. g. capacitas subjecti &c.) habitus acquisitus ex unis, & non ex alteris: ergo eo ipso, quod frequenter eliciat actiones circa doctrinam definiendi, & nunquam circa doctrinam syllogizandi, intellectus logicus, qui profectò non est sicut Deus incapax habendi habitus acquisitos, habebit habitum acquisitum circa unam doctrinam, non verò circa alteram: ergo habitus

bitus circa unam est diversus ab habitu circa alteram.

21. Illud alterum exemplum de gradibus metaphysicis supponit probandum; idem namque animal, & rationale in Petro identificatur inter se, & non sunt plura, nisi quoad verba; quia non sunt partes Physicæ, sed metaphysicæ Petri; habitus autem ex doctrina definiendi, & habitus ex doctrina syllogizandi sunt partes logicæ, non quidem metaphysicæ; sed sicut Civitas A. & Civitas B. sunt partes ejusdem Regni.

22. Hinc 1. Si dixerint, non esse multiplicandos habitus sine necessitate, dicent verum; sed ratio nostræ conclusionis probat necessitatem ponendi in Logica habitus distinctos, & consequenter multiplicandi illos. Si dixerint 2. advenientibus regulis circa modum syllogizandi, v. g. non generari novum habitum, sed dumtaxat perfici, extendi, radicari, aut applicari habitum ex doctrina definiendi, v. g. Contra est 1. Eodem jure dicere possunt per crebra jejunia non generari novum habitum, sed dumtaxat perfici, applicari, extendi, aut radicari habitum orandi: & per exercitium scribendi non generari novum, aut majorem habitum; sed perfici, & applicari priorem habitum legendi tantum. 2. Semper subsistit nostra ratio. Quoties per repetitionem actuum acquiritur nova facilitas, hoc est facilitas ad rem novam, & diversam, acquiritur novus habitus, & non tantum extenditur, aut perficitur prior: atqui advenientibus intellectui regulis circa modum syllogizandi, acquiritur nova facilitas, hoc est, facilitas ad rem novam, & diversam à definitionibus, nempe facilitas ad sciendum quomodo fieri debent syllogismi: ergo tunc non solum perficitur habitus ex doctrina definiendi (quod non negamus) sed etiam perficitur, quatenus novus generatur habitus; sicut habitus legendi perficitur per habitum scribendi, quatenus acquiritur exercitio scribendi novus habitus. Sanè qui perpenderit omnes rationes, & solutiones, quibus hi Authores defendunt, Logicam esse simplicem qualitatem, inveniet plerisque illarum posse uti alium ad probandum non esse multas, sed unicam solam scientiam, ita ut infimus habitus v. g. legendi solum perficiatur, radiceatur, applicetur, seu extendatur per novas, & novas notitias, quæ acquiruntur in decursu vitæ.

§. IV.

23. **H**inc 2. Apparet quo sensu Logica sit, ac non sit una scientia. In primis, quemadmodum omnes res possibiles habent inter se unitatem quandam in ratione *entis realis*, quia omnes, & singulæ sunt ens reale; hæc tamen unitas est valde larga, quoniam universalissimum genus *Ens* dividitur in multa alia genera, & hæc in multas species subalternas, & hæc in species infimas, & hæc in individua, ut constabit ex arbore prædicamentali: ita omnes scientiæ humanæ habent inter se unitatem quandam *attributionis* stantem in eo, quod omnes ordinentur ad eundem finem, nimirum ad perfectam cognitionem entis realis; (ordinentur inquam non intrinsecè, sed extrinsecè, juxta dicenda de objecto attributionis) quocirca dici potest illas constituere unam solam scientiam: Sed hæc species unitatis est largissima, & genus hoc valde universale, *Scientia*, dividitur in multa alia genera, & hæc genera in multas species, quippe juxta communem hominum sententiã diversa scientia est Philosophia à Theologia, & sic de reliquis; quamvis unæ possint, & soleant adjuvare ad alias, sicut unæ virtutes morales ad alias.

24. Igitur loquendo in particulari de Logica tam quoad suos actus, regulas, & præcepta comparata invicem, quam quoad habitus relictos ex frequente repetitione, ac intelligentia eorum actuum, habitus inquam comparatos inter se, quam quoad actus comparatos cum habitibus, dicimus: omnes actus, & habitus Logicæ sparsi per cunctos intellectus humanos, sunt una Logica unitate specifica infima, sicut omnes humanitates, quæ sparsæ sunt per cunctos homines, sunt una specifica infima natura humana. Probat. Tametsi homines singuli consent partibus specie, ac genere distinctis, nimirum corpore, & anima; nihilominus omnia complexa ex corpore, & anima rationali sunt invicem similia in specie, & solum distinguuntur numericè, ac individualiter, ut constans est apud Philosophos; ergo tametsi Logicæ singulæ, idest, quam acquisivit Petrus, & illa, quam acquisivit Joannes, & illa, quam didicit Paulus &c. coalescant ex actibus invicem distinctis in specie, & ex habitibus similiter distinctis inter se, & ex utrisque specie, imò & genere reciproce distinctis; nihilominus tota Logica actualis, & habitualis, quæ fruitur Petrus, comparata cum Logica, quæ fungitur Joannes, est quasi unum individuum comparatum cum altero ejusdem speciei.

25. Et quemadmodum licet unusquisque homo possit dividi in corpus & animā, id non probat posse dividi in duas species, quia corpus & anima non sunt duę species completę, ac perfectę, sed in cōpletę ac partiales: ita Logicā Petri v.g. posse dividi in actus, & habitus; & habitus posse esse aut ex doctrina definiendi, aut ex doctrina syllogizandi, qui profectō sunt habitus scientifici, hoc non probat, Logicam Petri posse dividi in multas scientias: nempe quia unusquisque illorum habituum non est scientia integra, & perfectā, sed partialis atque inadequata. Unde solum fiet Logicam unius hominis posse sub dividi in multas scientias inadequatas, & partiales. Similiter quod actus, & habitus logici, qui sunt in Petro, possint esse longē vivaciores, & perfectiores, & magis tenaces; quā illi, quos acquisivit Joannes, probat illos distingui specie physicā ab his; sed non specie logicā: quia perfectiores, ac imperfectiores ordinantur ad eundem finem rectē differendi, ex quo sine sumitur unitas specifica Logicę, ut mox dicemus: stet ergo omnes Logicas actuales, & habituales sparsas per cunctos homines facere unam facultatem, seu Logicam unitate specifica infima; sicut omnes habitus charitatis v. g. sparsi per cunctas animas sanctas faciunt, & constituunt unam solam speciem infimam charitatis, etiam si magna soleat esse inæqualitas physica, & entitativa inter actus, & habitus unorum, & aliorum; siquidem uni solent esse magis intensi, magis perfecti, magis vivaces.

26. Jam si consideremus habitus Logicę (& idem respectivē dic de actibus) qui sunt in uno, eodemque intellectu, dicimus 2. Hi non sunt una scientia, seu facultas unitate *simplicitatis*, ut ostendimus à n. 15. non unitate solius *contiguitatis*, sicut multę guttę aquę faciunt unum fluvium, & multi lapides unam domum: quia cū omnes illi habitus invicem compenetrantur in eodem intellectu, non patet locus contiguitati materiali; sunt enim qualitates spirituales; non item unitate *continuationis*, sicut partes ejusdem ligni constituunt unum lignum: propter eandem rationem.

27. Non item unitate unionis *physicę*, sicut Petrus est unus, quia suum corpus, & anima physicē uniuntur; quoniam licet ea, quę identificantur cum uno tertio singulari, identificentur inter se, ut dicimus in Prodomo disp. 1. c. 3; hinc tamen non potest sumi paritas universalis ad probandum ea, quę uniuntur physicē cum uno tertio, uniri physicē inter se: alijs similiter probari poterat ea, quę penetrantur cum uno, eodemque tertio singulari, penetrari inter se; cūque homo existens Matrī, & homo existens Romę pene-

trentur cum uno, & eodem tertio omnino singulari, nempe cum Deo ubique existente, sequeretur illos duos homines esse penetratos inter se; ergo quanquam omnes habitus logici, qui sunt in eodem intellectu, & consequenter in eodem loco, uniantur physice cum eodem tertio singulari, nimirum cum illo intellectu, hinc non sequitur illos uniti physice immediate inter se; ergo Logica, quæ est in Petro, non est una unitate unionis, seu compositionis physice.

28. Est igitur una unitate *moralis*, & non quacumque; quia etiam sunt multæ species unitatis moralis, v. g. amicitia, consanguinitas &c.; sed unitate morali solius *attributionis* consistente in eo, quod omnes illi habitus ordinentur proxime immediate (licet mediate, ac remote possint, & soleant ordinari ad alia) ad unum, eundemque finem, scilicet ad *rectè differendum*; non quidem ex intrinseca sua natura; quia cum scire optime res definire sit per se optabile, habitus sciendi hoc non ita ordinatur ad syllogizandum, v. g. ut esset violentus suapte naturâ absque scientia rectè differendi, seu syllogizandi, sicut aqua est violenta sine frigiditate; ordinantur ergo ab extrinseco placito hominum, supposito, quod omnes hi habitus sint suapte naturâ valde utiles, ac necessarij ad rectè differendum; habitus autem ipse sciendi rectè differere non ordinatur ad se ipsum, ut patet; sed neque hoc infertur ex nostra doctrina; quia solum dicimus, Logicam esse unam unitate attributionis, non quatenus omnes omnino sui habitus, includendo etiam habitum sciendi rectè differere, ordinentur ad habitum hoc sciendi, sed quatenus coalescit ex multis habitibus, quorum reliqui omnes ordinantur ad unum habitum ejusdem Logicæ proprium.

29. Itaque Logica Petri est una eo modo, quo multæ Civitates licet invicem distinctæ, & ex intrinseca sua natura non destinatæ ad constituendum unam Monarchiam; veruntamen omnes illæ simul cum suo capite, idest cum Rege faciunt, & constituunt unam solam Monarchiam; quia omnes illæ ex mero hominum placito rationali agnoscunt, & reverentur unum, eundemque Regem: & sicut improprie diceretur, omnes illas Civitates constituere *unam Monarchiam* unitate solius *aggregationis* accidentariæ, ac tumultuariæ eo modo, quo multi lapides temerè projecti constituunt unum acervum saxorum; ita improprie, ac per calumniam dicerentur omnes habitus logici informantes eundem intellectum, constituere unam Logicam, seu scientiam unitate solius *aggregationis* tumultuariæ, ac per accidens. Quod si acervus lapidum, seu tritici per extrinsecam hominum vo-

luntatem ordinetur ad aliquem finem particularem, dicemus, quòd tunc aërvus ille jam non est unus unitate solius aggregationis per accidens; sed unitate attributionis in ordine ad eum finem: & fatebimur Logicam in unoquoque intellectu Logicorum esse unam eadem specie unitatis.

30. Jam ratio à priori eorum, quæ diximus circa unitatem Logicæ, est. Totum hoc negotium non est regulandum per *solas naturas habituum* (quia ut diximus, hi, licet ex sua natura sint idonei, ut uni ordinentur ad alios; attamen ex sua natura non habent quòd uni ad alios ordinentur) sed maxima ex parte regulandum est per arbitrium hominum, ad quorum placitum significant pleraque verba humana: atqui homines, ut mutuo se intelligerent, quando docent uni, & discunt alii, diviserunt scientiam in varias classes, & ex unis membris dividendis voluerunt, quòd constaret una scientia, quam tunc volebant docere: & ex aliis membris dividendis constare aliam scientiam, quam seorsim tradere volebant, supposita semper proportionem, atque necessitate utrorumque ad finem, quem sibi præfigebant homines: ergo quod Scientia sit una, vel multiplex maxime pendet ex hoc hominum placito: atqui placitum, & consensus omnium Philosophorum fuit, & est, quòd omnes habitus doctrinæ definiendi, dividendi, argumentandi &c. redigantur ad unam classem, colligantur quasi in uno fasciculo, & faciant per se unam scientiam, seu facultatem: & hoc non temerè, sed propter specialissimam proportionem, & necessitatem unorum habituum ad illum alium *sciendi rectè discernere*: ergo id dicendum est, & in hoc sensu intelligenda unitas Logicæ, & propter hanc rationem.

C A P U T II.

An Logica sit simul Scientia, & Ars.

31. **O**portet explicare priùs quid sit Scientia: quid sit Ars

Multifariam accipitur Scientia, sed extra sensum questionis præsentis, quo circa si aliquis invadat te aliqua ex quinque acceptionibus Scientiæ mox subjiendis, repelle illum tanquam extrachorum saltantem. Igitur Scientia solet accipi 1. pro vehementissima

Mat. c. 1.

Luc. 4.

aliqua suspicione, juxta quam agebat quidam Diabolus ad Christum D. scio quis *Sanctus Dei*; cum tamen nec ille, nec sui hoc certò scirent,

si,

si enim cognovissent, nunquam Dominum gloria crucifixissent. Accipitur 2. pro notitia habita per longum usum, & experientiam: sic moribundus Mathathias alloquens alios filios, dicebat de Simone. *Ecce Simon frater Vester: scio quod vir consilii est* 3. Pro notitia moraliter certa, ac de cujus veritate non ambigimus: sic vulgò dicimus scire hos esse nostros parentes, illum esse nostrum amicum, & similia, de quibus non habeamus evidentiam metaphysicam, aut saltem physicam, 4. Pro infallibili notitia, & prorsus metaphysicè certa, quamvis obscura, cujus generis sunt actus fidei divine certissimi penitus, sed obsecuri, & consequenter minime evidentes. Sic Paulus scribebat: *scio cui credidi, & certus sum &c.*

1. Corin.

2.

1. Mach.

2.

2. ad Ti-

mo. 1.

32. Accipitur 5. pro notitia intuitiva habita sine ullo discursu: *scio enim cogitationes ejus*, aiebat Deus, qui omnia intuetur, & discursus nec indiguus est, nec capax. 6. Pro notitia prorsus evidente ac immediata licet abstractiva, & consequenter non intuitiva, qualis est illa cognitio: *quodlibet est, vel non est*, & similia prima principia. Hæc enim utpote prima, & perse evidentia non indigent prævia ratione nisi ipsorum suavisiva, & in hoc sensu sunt immediatè evidentia; quia tamen neque oculis, neque alio corporali sensu intuemur *quodlibet*, aut cætera universalia, de quibus semper procederent hujusmodi principia, hæc de causa non sunt intuitiva, sed abstractiva, idest habita per species alienas à suo objecto: nulla ex his intelligentiis Scientiæ venit ad rem præsentem; sed hæc alia, *Scientia est notitia certa, & evidens per demonstrationem acquisita*. In primis est notitia, quia Scientia est actus intellectus: debet esse certa, idest infallibiliter connexa cum sua veritate, sicut actus fidei connectuntur metaphysicè cum veritate: unde ad rationem Scientiæ non sufficit evidentia quomodolibet, quia multa apparent multis prorsus evidentia, & tamen sunt falsa: è converso multa apparent multis omnino chimerica, & tamen solent esse vera, quod utrumque passim experimur: non ergo sufficit ad rationem Scientiæ, quòd sit evidens, idest quòd clarissimè, ac sine ullo dubio appareat; sed debet esse *certa*. Sed neque hoc sufficit, quoniam debet esse *evidens*, aliis cum actus fidei v. g. *Verbum caro factum est*, sint certi, infallibiles, ac sine ullo dubio, timore, aut suspitione in intellectu Catholico, sequeretur quòd essent actus scientifici: quod falsum est.

Deuter.

31.

33. Nec sufficit quomodolibet esse hanc evidentiam: debet enim esse *metaphysica*, idest prorsus irresistibilis: & non sufficit evidentia purè moralis aut physica, quia ambæ possunt fallere. Nec oemum

sufficit quævis species evidentia metaphysicæ: v. g. non sufficit evidentia metaphysica immediata, quæ sit aut intuitiva, aut primorum principiorum universalium; sed determinatè debet esse evidentia acquisita *per demonstrationem*, hoc est per discursum, cuius præmissæ sint metaphysicè evidentes, & insuper metaphysicè evidenter connectantur cum conclusione: quæ tunc vocatur, & est *Scientia* rigorosè loquendo: v. g. *omne animal est vivens: omnis homo est animal; ergo omnis homo est vivens*: hæc conclusio, & similes sunt *scientia*; etenim cum Deus ut supremus Dominus naturæ possit hujus connexiones violare, fieri potest, quòd quis habeat evidentiam physicam alicujus rei, & tamen quòd verè non sit talis res: ut contingit in Eucharistia, in qua habemus evidentiam physicam substantiæ Panis, sicut alibi habemus evidencias physicas aliarum substantiarum, propter evidentiam physicam propriorum accidentium illarum; & tamen reflexè cognoscimus illam evidentiam purè physicam esse falsam: quia catholicè fatemur ibi non esse substantiam Panis: opus ergo est ad rationem Scientiæ, quòd præmissæ, & præmissarum connexio cum conclusione plus quam physicè sint evidentes; ergo metaphysicè.

34. Hic adverte duo 1. demonstrationem, per quam acquiritur Scientia plerumque esse a priori: sed hoc non esse necessarium: potest namque esse à posteriori, & ab absurdo: tum quia regulæ, quibus Logica ipsa docet duas contrarias non posse esse simul falsas; item syllogismos secundæ, & tertiæ figuræ esse legitimos, & multa alia id generis, quæ explicavimus Disp. 2. Hæ inquam regulæ verè sunt scientificæ, & immeritò deturbabuntur ab hoc gradu dignitatis; sed hæ regulæ non probantur per aliam demonstrationem, nisi per eam, quæ est *ab absurdo* v. g. si duæ contrariæ essent simul veræ, sequeretur, quòd etiam essent veræ duæ subcontrariæ: & consequenter quadratum totum illarum propositionum, *omnis, nullus, aliquis &c.* esset verum: in quo quadrato imbibuntur duo paria contradictoria: item si duæ subcontrariæ essent simul falsæ, suæ contradictoriæ, id est duæ contrariæ essent simul veræ &c. Item si negatur conclusio syllogismi in secunda, aut tertia figura sequerentur duo contradictoria per reductionem ad impossibile illius syllogismi &c.; ergo ad rationem actus scientifici sufficit, quòd probetur per demonstrationem ab absurdo; ergo non requiritur semper demonstratio à priori.

35. Tum etiam quia non modò habemus scientiam proprietatum rerum multarum; verum etiam quidditatis, atque essentia metaphy-

taphyicæ earumdem : & tamen quidditatem nequimus demonstrare strictè à priori ; quia ipsa quidditas , & essentia metaphysica est prima radix , prima origo metaphysica cæterorum omnium attributorum illius rei : & consequenter nequimus illam quidditatem demonstrare strictè à priori , aliis jam illa quidditas non foret prior cæterorum , sed supponeret aliud ante se ; ergo .

36. Adverte dari posse Scientiam *inadequatam*, idest actum individuum Scientiæ circa singularia , ut *singularia* (scientia quippè *adequata*, idest facultates , quæ vulgò vocantur scientiæ , semper sunt immediatè , ac directè de solis universalibus , ut frequenter dicemus in Logica majore) Scire debes nos in hac vita mortali , idest incarceratos in hac specu corporis , nihil penitus cognoscere intuitivè per species proprias , & prout est in se ipso , nisi *sola accidentia* , & quidem non omnia , sed paucissima : idest illa , quæ oculis percipimus , tactu , aut alio sensu corporali ; cætera omnia , nempe Deum , Angelos , Animas ipsas nostras , substantias omnes etiam materiales , accidentia supernaturalia , nostras cogitationes , amores , odia &c. cognoscimus evidenter quiddè aliquando , sed per cognitiones , quæ vocantur *abstractivæ* , & valdè imperfectæ , & quas habemus per species valdè improprias , & alienas , ut quando consideramus Angelos per modum juvenum quorundam , & nostram animam quasi quandam puellam &c. Species , & modus cognoscendi summè improprius , atque alienus ; sed alium non habemus .

37. Hinc multi occasionem sumunt dicendi non posse dari Scientiam circa singularia ut talia , quia hæc non innotescunt nobis , nisi per sensus corporales , qui testes sunt fallacissimi ; veruntamen etiam circa singularia ut talia possumus habere scientiam , v. g. *omnis creatura vivens intimè pendet à Creatore : sed anima mea est creatura vivens ; ergo anima mea intimè pendet à Creatore* ; hæc conclusio est scientifica , & procedit de singulari ut tali : ratio autem est . Si de singularibus non haberemus aliam evidentiam nisi intuitivam , non possemus de illis habere scientiam , quandoquidem evidentia illa non potest aliundè haberi , quàm ex sensibus , & consequenter obnoxia est falsitati ; ceterùm habere possumus evidentiam immediatam (hoc est ratione sua ipsa non indignam) abstractivam : quoniam licet nunquam intuitus sim Angelum Michaellem , est prorsus mihi evidens sine ulla ratione sua ipsa esse , vel non esse in rebus Michaellem ; sed evidentia abstractiva sufficit ad rationem scientiæ : siquidem habemus scientiam de universalibus ut talibus , & illorum ut talium non habemus evidentiam intuitivam , ut constat : ergo possumus

mus habere circa singularia ut talia evidentiam, quæ sufficit ad scientiam.

38. Sed hoc intelligendum est de homine, qui sit capax, & intelligat terminos, seu grammaticam, quia si vel significatum vocum non capit, vel mentem habet infra mediocritatem, certè non habebit scientiam de singularibus; sed neque de universalibus: & non dicimus alterutram ex his duabus scientiis esse in hoc sensu independentem à sensibus, idest independentem ab ingenio, & ab intelligentiâ vocum; requirere namque ad rationem scientiæ, hujusmodi etiam independentiam à sensibus, est, arcere à toto genere humano omnem Scientiam, & opinari Scientiam in sensu philosophico esse figmentum quoddam, aut ideam quandam Platoniam non habentem locum inter homines, quandoquidem nullus eorum potest quidquam scire, nisi dependenter ab intelligentiâ vocum, quas auditu, vel alio sensu percepit. Igitur quando vulgò dicitur, & meritò, Scientiam non esse de singularibus, sed de universalibus, sermo est de scientia sumpta pro facultate ex eis, quæ vulgò trahuntur, atque discuntur scientificè, quia hæc nunquam procedunt de solo triangulo A. v. g. sed de omnibus triangulis, de sola domo A. sed de omnibus domibus &c. sed non est sermo de scientia sumpta pro quolibet actu scientifico, nam multi ex his possunt esse de singularibus ut talibus: quæ contingentia sunt quoad existere, aut non existere; sed non quoad essentiam, & verificationem actus scientifici.

39. His præmissis sit conclusio. Logica est scientia in eo sensu, quem scripsimus n. 2. Prob. omnis facultas; in qua per demonstrationem probantur qualitates, proprietates, & conditiones, quæ dicuntur de suo subiecto, est Scientia in ea ultima acceptione: sed talis est Logica Minor, seu Dialectica; quia ut constabit legenti disputationem secundam, & maximam partem primæ, evidenter per demonstrationem jam a priori, jam ab absurdo probantur, quæ ibi dicuntur de definitione, de divisione, de consequentia, de aliis argumentationibus, de reductione syllogismorum per impossibile, de conversione, oppositione, æquipollentia propositionum &c. ergo Dialectica, seu Logica Minor verè est Scientia.

40. Ubi jam vides nos non loqui de Logica Magna postea danda; quia ibi multa dicuntur de universalibus in communi, de quinque prædicabilibus, de prædicamentis, quæ non sunt scientifica, quia jure disputantur hinc inde, affirmantibus unis, & negantibus aliis. Nec 2. loquimur de hac ipsa Dialectica quoad illa omnia, quæ pri-

primis capitibus disp. 1. diximus, v. g. de terminis, suppositionibus, appellationibus &c. Quia illa proprius sunt Grammaticæ, cuius est aperire sensum, & significatum vocum, quam Dialecticæ, cuius est uti illis vocibus in sensu legitimo. Nec 3. loquimur de hac ipsa Dialectica reflexa, quam in hac disputatione tractamus; quia hæ conclusiones reflexæ supra Dialecticam ipsam, quas modò damus, non sunt scientificæ, sed opinativæ, affirmantibus unis Authoribus, & aliis negantibus illas: solum ergodicimus, esse scientiam Dialecticam ipsam directam pressè sumptam.

41. Obji. Una pars principalis Dialecticæ est, quæ vocatur Topica, nimirum illa, in qua dantur regulæ ad argumenta tantum probabilia v. g. illæ, quas dedimus cap. 1. disp. 2. Rursus alia pars est sophistica, nempe in qua agitur de argumentatione fallace: sed neutra ex his duabus partibus est scientia. Hoc negatur: nam quemadmodum Deus modo divino, Angelus modo Angelico, Homo modo humano cognoscit res, quæ neque sunt divinæ, nec Angelicæ, nec humanæ, v. g. Cælum, Terram, Elementa, bruta &c. Ita in Logica modo scientifico, & prorsus evidente tractant Magistri res, aut falsæ, aut merè probabiles: quia in parte Topica scientificè probantur qualitates, & conditiones argumentationis merè probabilis: & in parte sophistica qualitates, ac conditiones sophismatum.

§. I I.

42. **Q**uod attinet ad Artem, scito prius. *Intellectus, Sapientia, Scientia, Prudentia, Ars*, sunt quinque classes, in quas Aristoteles redegit omnes habitus. Intellectus non significat hic, quodd alibi, nimirum potentiam intellectivam, hæc enim non acquiritur usu, & exercitio sicut habitus, qui vocantur acquisiti, nec post animæ creationem donatur ipsi supernè sicut habitus, qui vocantur infusi; sed est potentia penitus identificata cum substantia animæ, ut suo loco dicemus, vel saltem ipsi naturaliter congenita, aut ex ipsa naturaliter resultans, ut loquuntur alii; significat ergo Intellectus in hac divisione habitum circa prima principia.

6. Ethic.
c. 8.

43. Quod ut capias adverte: in unaquaque Scientia, Arte, seu Facultate sunt quædam propositiones, quædam quasi dogmata, quædam maximæ universales, quæ multis ab hinc sæculis in mentem venerunt primis inventoribus, & professoribus earum scientiarum: quæque ita sunt perspicuæ atque evidentes, ut probatione non

in-

indignant saltem respectu intellectus docilis : & insuper sunt quasi matrices , quasi fontes , ex quibus manant , proportionē servata , pleræque conclusiones illarum scientiarum ; hæc propositiones , seu dogmata universalia vocantur prima principia in eis scientiis : sic in Metaphysica est primum principium , *quodlibet est , vel non est* , & alia id generis ; sic in Logica , *quæ sunt eadem uni tertio sunt eadem inter se* , & alia : sic in Arithmetica , *sicut se habet simpliciter ad simpliciter , ita magis ad magis* , & alia ; sic in Christiana Philosophia , *nunus Deus super omnia colendus , ac diligendus* , & alia .

44. Habitum ergo acquisitum ex crebro usu , atque intelligentia horum principiorum , idest plenam possessionem eorundem , atque promptitudinem utendi illis pro data occasione , est , quod impresentiarum vocatur *Intellectus* : juxta quam orabat David inquires , *da mihi intellectum &c.* Non utique poscebat intellectivam potentiam , quam ut homo naturaliter habebat . Juxta eandem acceptionem promittit Deus , *Intellectum tibi dabo , & infirmam te &c.* Atque exprobrat aliquibus , *nolite fieri sicut equus , & mulus , quibus non est Intellectus* . Certè hic non loquitur Deus de potentia ipsa intellectiva quoad entitatem ; sed de primis illis principiis in ordine ad tendendum in vitam æternam , ex quibus in hoc , & in illo casu particulari emanant practicæ cognitiones , ac volitiones declinandi a malo , & faciendi bonum ; stet ergo hanc vocem *Intellectus* accipi etiam pro habitu , idest possessione ac facilitate circa prima principia .

45. *Sapientia* trifariam potest intelligi : 1. pro scientia omnium perfectissima , qualem solam metaphysicam censet Aristoteles , eo quod sola metaphysica per principia omnium universalissima , certa , atque evidentissima tractet de omnibus . 2. Pro multitudine cognitionum in aliqua arte , certarum , & perfectissimarum ; sic Je quodam dicit Deus , *Impreci enim Spiritu Dei , Sapientiâ , intelligentia , & Scientia in omni opere ad excogitandam quidquid fabrefieri pot. st ex auro &c.* Ubi jam vides terminum illum *Sapientia* contractum ad unam singularem ac determinatam artem , nempe fabrilem . 3. Pro complexo ex omnibus perfectissimis cognitionibus , quæ humanitus interdum habentur , & circa omnia objecta , circa omnes Artes , & Scientias , quæ humanitus aliquando habentur ; cùmque hæc sit rara avis in terris , hac de causa *Sapientia* in hac tertia acceptione rarissima est inter homines . Unde meritò queritur : *unde ergo Sapientia venit ? & quis est locus intelligentiæ ?*

46. *Scientia* est , quam supra definivimus . Potest sumi adæquatè ,

tè, scilicet pro complexo omniū actuum scientificorum, qui sunt in aliqua facultate (& de Scientia in hoc solo sensu, dicitur, quòd non est de singularibus, sed de univèrsalibus, ut jam advertimus) vel inadæquatè, scilicet pro unaquaq; regula seu conclusione demonstrata in ea facultate: & in hoc sensu Scientia potest esse de singularibus, ut etiā advertimus.

47. *Prudentia* est, juxta Aristotelem, *habitus cum vera ratione actiōis circa ea, quæ bona vel mala homini sunt.* Ars verò, *habitus cum vera ratione effectiuius*: discrimen inter hæc duo notatum inuenies apud S. Thomam. *Prudentia*, & *Ars* dicuntur spectare ad intellectum *practicum* non verò *speculatiuum*: non quia in homine dentur duo intellectus, quorum alter sit practicus, alter speculatiuus, sed quia habere solemus duo genera cognitionum, quarum unæ sistant in contemplatione objecti, quin præscribant modum faciendi illud, ut cognitiones, quas habemus de Deo, & hæ cognitiones dicuntur actus speculativi: alteræ, quæ docent modum faciendi objectum, & hæ vocantur actus practici; tametsi quando objectum est factibile, actus etiam illi speculativi iuvent valde ad illud faciendum: nam certius, & securius curat Medicus, qui novit quidditatem, ac proprietates morborum, ac Medicinarum, quam qui alterutra ignorat: sed quia ista conducentia non est signata, sed exercita, non est talis, ut actus illi directè præscribant modum faciendi rem, sed talis, ut homo utatur ex placito suo notitiā illā speculatiuā ad meliūs rem faciendam, ideo actus illi simpliciter, & absolutè vocantur speculativi.

6. Erb.
c. 3. & 4.
1. 1. qu.
5. 2. 4.

48. Jam qualitas hæc cognitionum adscribitur per figuratam locutionem intellectui ipsi, & vulgò dicitur duplex intellectus, unus practicus, alter speculatiuus; sed duplicitas non est in ipsa potentia intellectiva, sed in ejus exercitiis: & quanquam in intellectu habeamus etiam cognitiones affirmativas, & negativas, cognitiones apprehensivas, judicativas, & discursivas; veruntamen usus invaluit hujus phrasos *intellectus practicus*, & *speculatiuus*; non verò hujus, *intellectus affirmatiuus*, & *negatiuus* &c. & non est alia ratio.

49. Conveniunt ergo *Prudentia*, & *Ars* 1. Quòd ambæ tendunt in praxim (non quatenus cum hac connectantur sicut materia cum forma; sed quatenus aperiunt modum faciendi rem, fiat necnè) & ideo in utriusque definitione ponitur *actiōis* aut *factiuius*, inter quæ nullum, aut leve est discrimen illud, quòd aliqui excogitarunt, nimirum actiuium esse illud, quòd docet effectiōnem post quam nihil manet operis: & effectiuium illud, quòd docet effectiōnem, postquam aliquid manet operis: hæc enim doctrina, licet aptetur artibus

mechanicis, quarum opus est ad extra, siquidem post effectiōem domūs perseverat domus, post effectiōem navis perseverat navis &c. non tamen artibus liberalibus, quarum exercitia sunt cognitiones intellectuales, & consequenter sunt res transeuntes, post quas licet perseveret habitus seu facilitas repetendi illas; non tamen est opus factum per illas; sed qualitas naturaliter resultans ex illis: igitur Prudentia & Ars tendunt suapte naturā purē directivē *in aliquid faciendum*; & non sunt res merē speculativæ, infœcundæ, ac aridæ.

50. Conveniunt 2. in eo *cum veratione* seu *cum iudicio* vero: quoniam regulæ, ac præcepta, quæ sunt in Prudentia, atq; in Arte talia sunt, ut si homo eis perfectē obediat, opus evadat perfectum, jam hac jã illa perfectione ex multis, quæ solent esse in arte: quodd autem multoties opus evadat difforme, sive sit externum ex mechanicis, sive internum, & purē intellectuale, ut solet contingere in malis syllogismis, hoc non nascitur ex regulis artis; sed ex ignorantia, aut malitia, aut calliditate hominis: in his duobus conveniunt Prudentia, & Ars; differunt verò in eo, quodd Ars dirigit ad opus non spectans ex se ad mores, tametsi reflexē ex bona aut mala intentione hominis possit opus illud extrinsecē ordinari ad bonum, aut malum finem.

51. Prudentia verò determinatē tendit in ea, *quæ bona, & mala homini sunt*, nempe arcendo hæc, & conando in illa. Hæc Prudentia est duplex; una imperfecta, quæ versatur circa res caducas, & potius est *calliditas* juxta illud, *Filii hujus sæculi prudentiores Filiis lucis in generatione sua sunt*: altera, quæ verē est prudentia, & versatur circa bona, & mala animæ, declinando ab his, & faciendo illa juxta illud, *Estote ergo prudentes sicut serpentes, & simplices sicut COLUMBÆ*. Advertē deniq; his quinque habitibus acquiritis alios quinque longe nobiliores, sicut Cælum respectu terræ, posse respondere habitus infusos, qui sunt qualitates supernaturales, quas Deus ut misericors Pater, quando vult, quibus vult, quando vult, & quomodo vult imprimit hominibus, ut longē melius quàm per viam usūs, exercitii, ac doctrinæ humanæ sciat, & penetret hæc omnia: est ergo Intellectus infusus, Scientia infusa, Sapientia infusa, Prudentia infusa, Ars infusa: quod breviter ostendi potest ex textu illo citato Exod. 31. Veruntamē sicut Deus, quamvis possit facere, quodd terra producat fructus sine labore, ac industriā hominum, id tamen non facit ordinariā providentiā, quia non vult, quodd homines otientur, & ipsum tentent aspirantes ad miracula: ita prædictos habitus non infundit per ordinariam providentiam

Luc. 16.

Matth.
10.

tiam hominibus: unde restabunt hi sine arte, sine prudentia, sine sapientia &c. nisi studio, labore, usu, atque exercitio hoc nanciscantur adjuti supernè.

52. His præmissis conclusio esto: Logica habitualis est ars: unde habebis, quodd ex illis quinque membris dividendis habituum, duo sola conveniunt Logicæ, nempe Scientia, & Ars; & consequenter Logica non est intellectus, nec Sapientia, nec Prudentia. Probatur conclusio: omnis habitus cum vera ratione effectivus operis ex se non spectantis ad mores est Ars, juxta definitionem datam num. 17. Ars inquam, vel adæquata, si fuerit complexum ex omnibus habitibus illius facultatis, vel inadæquata, si fuerit unus, vel uni tantum habitus: at Logica est habitus cum vera ratione effectivus operis ex se non spectantis ad mores: ergo. Probatur minor: in primis est *habitus*, quia loquimur in conclusione de Logica artificiali habituali acquisita, non autem de Logica, aut naturali, aut actuali, aut supernè infusa: deinde cum *veraratione*, quoniam regulæ, seu præcepta Logicæ talia sunt tam circa definitionem, quam circa divisionem, conversionem, æquipollentiam, argumentationem demonstrativam, aut probabilem dumtaxat, aut sophisticam etiam, ut si homo regulis eis perfectè obediat, proculdubio eliciet definitionem, divisionem &c. optima, & prout debent esse à parte rei, & juxta lumen naturale: sed in hoc solo stat, quodd sit habitus *cum veraratione*; ergo est. Demum *effectivus operis* &c. quia in Logica sunt regulæ dirigentes ad efficiendum definitiones, divisiones, & reliqua, quas operationes licet homo pro libito suo dirigere possit in bonum, vel malum animæ suæ: illæ tamen ex sua natura, ac secundum solam suam naturam inspectæ, neque vergunt in malum, neque in bonum animæ, sed sunt indifferentes in specie sicut multæ aliæ actiones humanæ.

53. Sed cave duas æquivocationes 1. *Habitus* sive Prudentiæ, sive Artis, sive Scientiæ, sive Logicæ non sunt *effectivi physice*, sicut ignis est effectivus caloris: sed *moraliter* dumtaxat, ac directive: eo modo, quo præceptum Heri, & preces amici efficiunt tuum consensum: vel potius eo modo, quo doctrina, & explicatio Magistri efficiunt profectum discipuli, nimirum quatenus docet, instruit, monet, ac dirigit discipulum ad illud, quod discere vult: definitiones enim, divisiones, ac argumentationes efficiuntur physice ab intellectu ipso, cujus sunt vitales operationes, coadjuvantibus habitibus illius facultatis, in qua sunt illæ.

54. 2. Cum instrumenta hæc sciendi possint fieri ore, aut alio ex-

teriori modo: & possint fieri sola mente, magnum est inter utrumque modum discrimen: illa, quæ sunt externæ, possunt corrigi, aut vitiari, & de bono transire in malum: cæterum illæ definitiones seu divisiones (de argumentationibus est alia regula juxta caput sequens) quæ sunt purè mentales, cum habeant *persuammet essentiam* esse tales, quales sunt juxta magis communem opinionem (quam tamen minus veram esse diximus disp. 1. cap. 2.) vel saltem esse tales, quales sunt supposita institutione significationis vocum: hac de causa si semel sint bonæ, non possunt vitiari, si semel sunt malæ, non possunt illæ eadem mutari in bonas. In artibus mechanicis, & externis solet materia esse ex se indifferens, ut benè, aut malè formetur, v. g. faxum, lignum, & similia, quæ uno modo secta, atque unis partibus detractis, alteris relictis, formant statuatam bonam, & alio modo secta, & coordinata, malam exprimunt figuram. Cave ne ita intelligas fabricam nostrorum actuum internorum, sive intellectûs, sive voluntatis: quasi habeamus in cerebro massam aliquam cognoscitivam, aut volitivam, ex qua juxta regulas Logicæ formemus instrumenta sciendi: absit.

55. Dirigitur ergo intellectus per Logicam ad definitionem v. g. mentalem fabricandam, quatenus ex una parte benè habitualiter sciens ex regulis Logicæ modum, quo definitio est bona: & ex altera apprehendens (sicut passim apprehendimus alia multa, quin illa positivè judicemus) hanc definitionem hominis, *Animal implume, bipes*, eam non concipit mente; apprehendens verò hanc, *animal rationale*, hanc concipit; quo circa directio Logicæ non est ad emendandum definitionem mentalem, neque ad formandum illam potius bonam, quàm malam, ex aliqua massa indifferente, sicut ex marmore formatur statua; sed tota est ad primo, & quasi uno impetu concipiendum potius actum illum intellectûs, qui per se essentialiter, aut per institutionem vocum est rectus, quàm illum, qui per se essentialiter, aut juxta institutionem vocum non est rectus, & consequenter est incapax, qui emendatur.

56. Hoc idem contingit in omnibus aliis habitibus non mechanicis, idest quorum objecta immediata non sunt res exteriores, ac materiales: sed res internæ, hoc est operationes intellectûs, aut voluntatis; v. g. Prudentia non dirigit nos, ut illum eundem actum voluntatis, qui semel est malus, emendemus per additionem, aut deductionem, aliquarum particularum sicut emendatur statua, aut pictura: neque dirigit nos ad faciendum rectum actum voluntatis, qui semel est rectus, quoniam hic per se essentialiter est rectus, unde, ut rectus sit, non indiget

dirigit directione Prudentiæ: hæc ergo dirigit nos, ut liberè, vel necessariò prout fuerint aliæ circumstantiæ, concipiamus actum voluntatis, qui est essentialiter bonus, & omittamus eum, qui est essentialiter malus: sic respectivè Logica dirigit intellectum ad definitionem, divisionem &c. quatenus dirigit ut liberè vel necessariò, prout fuerint aliæ circumstantiæ, concipiamus definitionem v. g. quæ est essentialiter bona, absolutè, vel supposita tali vocum institutione, & omittamus illam, quæ alterutro modo est essentialiter mala: quod terminis brevioribus explicabis inquires, *dirigit antecedenter, & absolutè; sed non consequenter aut conditionatè*, ex suppositione, quòd mentalis definitio ex sua essentia, vel institutione vocum jam significet, quod significat.

57. Porro quando dicimus, prædictos actus intellectus, aut voluntatis esse essentialiter bonos, aut esse essentialiter malos, aut absolutè, aut supposità vocum institutione; ne intelligas de bonitate, aut malitia artificiosa, *ut absolutè existente*: quia hæc constituitur essentialiter per ipsas regulas Logicæ, aut Prudentiæ, cum quibus non semper conæctuntur essentialiter illi habitus intellectus, aut voluntatis, qui sunt boni: sed debes intelligere de bonitate, aut malitia artificiosa, sumpta *radicaliter*, sive conditionatè. Id est bona definitio per se essentialiter est absolutè, vel ex suppositione, quòd significet id, quod significat, consona regulis definiendi, *ex suppositione, quod sint tales regulæ*; mala autem per se essentialiter est eodem modo dissona eisdem regulis *ex suppositione, quòd illa sint*: similiter hucusque dicta intellige de instrumentis sciendi verbo, aut scriptis, aut alio signo externo factis, nam ista omnia licet sint materialia, & externa, & constituta in essentialium per voluntatem hominum utentium eis signis externis ad manifestandum suos internos conceptus; verum tamen ex suppositione, quòd semel habeant significationem, quam habent, sunt essentialiter bona, nec sunt essentialiter mala.

C A P U T III.

An, & quomodo Logica sit practica, & sit necessaria.

58. **P**Racticum est, cuius finis est opus, seu quod versatur circa rem operabilem modo operabili. Speculativum est, cuius finis est veritas. Si inter Authores conveniret de sensu harum definitionum,

tionum, non essent usque adeo divisi in quæstione præsentē. Cognitio speculativa est illa, quæ licet extrinsecè possit, ac soleat ordinari ad suum objectum efficiendum (quia ut advertimus valdè juvat scire, quid sit res, & quibus polleat proprietatibus, ad ipsam faciendam, quando aliàs factibilis est) verumtamen ipsa ex se sistit in contemplatione objecti aperiendo dumtaxat ipsius naturam, aut proprietates,

59. Cognitio practica in artibus est illa, quæ aliquam vel aliquas præscribit regulas, seu modum faciendi objectum, sive etiam modum, quo faciendum non est: quia certè hæc cognitio non est purè speculativa, id est præscindens à factibilitate sui objecti: ergo est practica saltem negativè: sicut in *Prudentia* cognitio practica est non solùm illa, quæ hic, & nunc movet ad actionem faciendam, verùm etiam quæ hic, & nunc movet ad actionem non faciendam: & sic ultimè illud judicium conscientiæ, quo operamur, aut non operamur, vocari solet *conscientia practica*. Habitus, dominium, possessio, seu facilitas generata ex crebra repetitione cognitionum practicarum vocatur habitus, sive facultas practica: generatus verò ex repetitione speculativarum vocatur habitus, seu facultas speculativa: & id quæritur impræsentiarum, utrum actus proprii Dialecticæ sint practici, an potius speculativi? Si primum; Dialectica ipsa habitualis erit Scientia practica, utpotè genita ex actibus practicis? Si secundum; erit Scientia speculativa, utpotè genita ex actibus speculativis: jam enim monuimus cap. 1. habitum acquisitum sapere naturam actuum, quorum usu, ac consuetudine acquiritur: id est habitum acquisitum ex consuetudine canendi esse habitum musicum, non autem militarem, & habitum acquisitum ex frequentia orandi esse habitum seu virtutem orationis; non autem jejunii v. g.

60. Ubi advertè duo 1. Licet speculatio, & actus speculativus sint idem, quia ambo hæc nihil aliud sunt, quàm cogitatio illa, qua intellectus inspicit, aut probat naturam, quidditatem, proprietatem, aut proprietates objecti abstrahendo tunc ab eo, quodd sit, vel non sit factibile; verumtamen *praxis*, & *actus practicus* non sunt idem: quia nihil, quod sit aut est factibile ex directione alicujus regulæ sive positivæ, nempe docentis modum, quo fieri debet: sive negativæ, id est docentis modum, quo fieri non debet, est regula ipsa, ut patet: sed *praxis* omnis est opus factum, vel factibile ex directione alterutrius regulæ dictæ: actus verò practicus est ipsa regula; ergo nulla *praxis* est speculatio respectu ejusdem. Cæterùm fieri potest, quod illud idem, quod

quod respectu unius est praxis, respectu alius sit speculatio: & patet in ipsa Logica, quoniam definitiones, divisiones, & argumentationes, v. g. circa hominem, vel Angelum, quæ respectu Logicæ sunt praxis utpotè factæ ex directione Logicæ; respectu suorum objectorum sunt mera speculatio, quia certè definitio, divisio, aut argumentatio super Angelis non præscribunt regulas, aut modum faciendi Angelos.

61. Adverte 2. praxim, & practicum posse esse aut *Mechanicum*, idest extra potentias animæ (in quo solo sensu intelligenda est illa maxima, qua utitur Scotus, scilicet; *Intellectum extensione fieri practicum*, idest quando docetur fieri aliquid, quod est extra intellectum: est hoc verum de solo practico mechanico) aut posse esse praxim, vel practicum *liberale*, idest, quod manet in anima ipsa, quatenus sit actus intellectus, aut voluntatis: qui fanè non sunt aliquid extra nos, sicut est statua, pictura, ædificium &c. sed quid intra nos metipfos manens, cum sint actus nostri vitales. Quod autem species hæc cognitionis practice & liberalis, idest docentis aliquid fieri intra nos metipfos, verè sit cognitio practica, certum videtur. Quoniam omnis cognitio, quæ non est purè speculativa, est verè practica (non enim datur medium inter præscribere, & non præscribere modum efficiendi objectum. Si primum; cognitio est verè practica: si secundum; est purè speculativa) sed omnis cognitio præscribens regulam, seu modum concipiendi intra nos metipfos aliquid, quod sit actus intellectus, aut voluntatis, non est purè speculativa, quandoquidem non sistit in mera contemplatione sui objecti: ergo omnis talis cognitio verè est practica: ergo divisio in practicum mechanicum, & practicum liberale, idest cujus opus manet in nostro ipso intellectu, non est arbitraria: sicut nec divisio ab omnibus admissa in artes mechanicas, & liberales, quæ divisio coincidit cum hac alia: ergo principium illud, *intellectus extensione fit practicus*, non est prorsus universaliter verum, sed solum subsistit, quando practicum est Mechanicum: Denique hic repete doctrinam totam capitis antecedentis à num. 54., quia illa tota est hic necessaria, & illi eidem insistimus modò, & oportet illam benè notam habere pro resolutione questionis.

§. I I.

62. **S**It 1. Conclusio : Logica est absolutè ac simpliciter practica : & secundùm quid speculativa . P. 1. pars. omnis facultas, cujus finis , (nempe ad quem suapte naturâ est utilis , & ad quem extrinsecè ordinatur per Professores ipsius facultatis) seu objectum attributionis, quod idem sonat, est opus facti vel factibile media positiva directione ipsius facultatis, est absolutè, ac simpliciter practica : sed talis est Logica : ergo . Major est certa, tum quia juxta definitiones datas num. 1. Practicum est illud, cujus finis est opus, factibile utique media directione ipsius practici, non verò alius distinctæ facultatis : tum quia omnis facultas, quæ non sistit in mera contemplatione sui objecti attributionis, est absolutè practica , siquidem non est purè speculativa : sed omnis facultas, cujus finis , seu objectum attributionis est opus factum aut factibile media positiva directione ipsius facultatis , certè non sistit in mera contemplatione illius ; quoniam omne, quod sistit in hac mera contemplatione, non dirigit per se formaliter positivè ad illud efficiendum, ut patet in definitione merè speculativa Angeli, animæ rationalis , materiæ primæ , & similium : ergo omnis facultas &c.

63. Probatur jam minor primi syllogismi . Finis , seu objectum attributionis Logicæ (non quidem intrinsecum, ac naturale , ut infra dicemus capit. 6. sed ex rationali placito hominum attenta intrinseca proportionem, quam habent regulæ Logicæ juxta ibidem dicenda) Finis inquam in hoc sensu est demonstratio , hoc est syllogismus evidenter concludens , ut infra dicemus ; at demonstratio est opus factibile media positiva directione Logicæ : quandoquidem hæc dat regulas ad evidenter arguendum , seu concludendum , quales sunt omnes illæ traditæ disp. 2. ; ergo Logica est absolutè, & simpliciter practica .

64. Ubi advertè . Tota Logica est reflexa super actus intellectus, quos solos habet pro objecto immediato , quia de illis solis immediate ac directè tractat in ordine non quidem ad omnia , sed ad definiendum , dividendum , & arguendum , & similia alia : sicut tota Physica tractat de solo ente naturali, tota Ethica de solis moribus, tota Theologia purè talis de solo Deo &c. Rursus inter hos actus intellectus , de quibus agit Logica, uni sunt entitativè indivisibiles , ut plerumque definitio , & divisio : alij sunt entitativè divisibiles , ut plerumque

que argumentationes, quippè quæ plerumque coalescunt ex duobus, aut tribus actibus intellectûs. Inter utrosque est hoc discrimen in opinione asserente illos habere ex sola sua essentia significare id, quod significant, & non significare id, quod non significant. Quod ad illos primos non dirigit ut sic, vel aliter fiant, sunt enim essentialitèr tales, quales sunt; ergo non sunt capaces ut dirigatur intellectus ad illos sic, vel aliter faciendos, si vera est opinio illa: omnis quippè directio, regula, præceptum, prohibitio, consiliû debet esse de contingentibus, sicut omnis volitio, aut nolitio: ergo solû potest dirigi intellectus ad actus eos modo, quem ibi diximus, scilicet quatenus sciens, quæ sit bona, quæ sit mala definitio, & alterutram apprehendens prorumpat in bonam, & supersedeat à mala. Quocirca in ea opinione Logica dirigit ad hos actus sicut Prudentia, & dictamen practicum conscientiæ, quæ duo verè & simpliciter sunt practica, dirigunt ad nostros actus internos, nempe quatenus proponunt qui nam sint boni, & qui nam hic & nunc mali.

65. Aliud est etiã in ea opinione de argumentationibus; aliisque actibus compositis ex aliis actibus intellectûs: quoniam ad hos non solûm dirigit Logica, quatenus docet intellectum bonos, & malos, ut declinet ab his, & eligat illos, verûm etiã quatenus præscribit modum efficiendi, seu fabricandi hos actus: quia docet qui debent adjungi aliis, & qui non debent adjungi; ut conclusio sit evidens: v.g. ex regulis Logicæ scimus huic majori, *omne animal est vivens* non esse adjungendam hanc minorem, *omnis homo est rationalis*, ad concludendum, *omnem hominem esse viventem*; sed hanc aliam, *omnis homo est animal*, & similiter in aliis argumentationibus: ergo ad has dirigit Logica, quatenus dirigit ad illas verè, & simpliciter fabricandas, seu construendas; ergo tamen Logica dirigat intellectum ad instrumenta sciendi, non tamen dirigit univocè, seu eodem modo; sed æquivocè, & modo valde diverso.

66. Explicatur exemp.o artium Mechanicarum, idest earum quæ habent pro objecto opus externum, tamen alias non sint humiles, sed in republica nobiles. Architectonica v.g. non dat regulas Architecto, ut terra sit terra, ut aqua sit aqua, ut lignum sit lignum, ut saxum sit saxum, quia unum quodque ex his habet per suam essentiam esse, quod est, & non esse, quod non est, & ad hoc non sunt regulæ necessariæ: veruntamen ars Architectonica absolutè & simpliciter est practica, quia præbens regulas ad combinandum, & componendum inter se ista omnia, quæ poterant aliter, & aliter inter se com-

binari, præbet hoc ipso regulas ad construendum ædificium, quod est finis, seu objectum attributionis artis Architectonicæ.

67. Idem in præfenti: Logica non præscribit regulas, ut formetur propositiones mentales, quæ plerumque sunt indivisibiles quidam fulgores intellectus, & essentialiter sunt tales, quales sunt: vel absolute per solam suam essentiam, vel supposita vocationi, quibus respondent, significatione: ceterum præscribit regulas ad combinandum unas propositiones cum aliis, ex quarum combinatione evidenter sequitur conclusio: cumque conjunctio, seu combinatio hæc sit accidentalis, & possit fieri, & possit non fieri: (quandoquidem hæc propositio v.g. *omne animal est vivens*, non habet per suammet essentiam conjungi cum hæc altera, *omnis homo (si animal)* hæc de causa directio Logicæ quoad suum objectum attributionis est circa rem, quæ sic vel aliter fieri potest. Quod si dixeris, omnem prorsus argumentationem adæquatè sumptam esse actum entitativè indivisibilem: præter quam quod dices rem falsam, dicemus nos tunc, Logicam dirigere ad illam, sicut dirigit ad definitionem, & divisionem.

68. Obii. Juxta ea, quæ diximus, Logica non erit practica respectu definitionis, & aliorum actuum indivisibilium, qui essentialiter absolute, vel saltem ex suppositione, quod significant id, quod significant, sunt tales, quales sunt. Præ nulla cognitio, quæ est mera contemplatio sui objecti, est practica: quia omnis id generis est mense speculativa: sed omnes regulæ Logicæ circa definitionem v.g. indivisibilem, & quæ essentialiter sit talis, qualis est, erit mera contemplatio sui objecti. Prob. Omnis cognitio, quæ præcisè est representatio quidditatis, essentiae, aut proprietatum sui objecti, est mera contemplatio sui objecti: ut patet in cognitionibus, quas habemus circa essentiam, & attributa Dei, Angeli, Animæ rationalis &c. Sed omnes regulæ Logicæ circa definitionem v.g. præcisè erunt representatio quidditatis, essentiae, ac proprietatum definitionis: nam ea debere esse clariorem suo definito, debere constare genere ac differentia, debere converti cum illo, & similia, erunt de essentia ipsius definitionis: ita ut mala definitio, nempe quæ hæc attributa non habuerit, tam improprie erit definitio, quam homo pictus: est homo: ergo. Resp. eodem argumento probari poterat *Prudentiam* non esse virtutem practicam: & ultimum dictamen conscientiae non esse practicum, quandoquidem vitales operationes nostræ voluntatis, quas solas immèdiatè, ac directè dirigit Prudentia, & Dictamen illud (cum actiones externæ pendeant etiam à potentia externa, quæ non semper

per obedit exactè imperio voluntatis) sint essentialiter tales, quales sunt: undè poterat formari istud idem argumentum.

69. Negamus itaque sequelam objectionis, & minorem probationis, sed attendendo prædictæ opinioni. Ad hujus probationem distinguenda est major: quæ præcisè est representatio per se immediatè, ac directè *non juvans* ad objectum illud ponendum in rebus conc. ma. & hoc contingit in istis cognitionibus Dei &c. Quæ præcisè est representatio per se immediatè, ac directè *juvans* ad objectum illud ponendum in rebus, & insuper necessaria ad illud artificiosè faciendum; nego ma. Quoniam ejusmodi cognitio non est purè speculativa, nam hæc per se immediatè, ac directè nec est necessaria, nec specialiter juvat *positive* ad objectum illud faciendum: passim enim sunt objecta artificiosè ab hominibus ignorantibus definitionem illorum, imò à sapientibus etiam Philosophis, & Theologis, quando definitio Contritionis v. g. Fidei, aut Spei est dubia inter ipsos Theologos; ergo nullà cognitio, quæ ita est representatio quidditatis, ac proprietatum sui objecti, ut per se immediatè, ac directè jubet *positive* ad illud ponendum in rebus, & insuper est necessaria, ut illud artificiosè ponatur, est purè speculativa: ergo omnis illa est practica; sed omnes istæ regulæ Logicæ circa definitionem v. g. sunt ejusmodi, ut satis constat; aliàs cum omne tale individuum complexum ex rebus componentibus individuum ædificium, essentialiter constet tali individua terra v. g. talibus individuiis saxi, talibus individuis lignis, sequeretur, quòd nec Architectonica foret practica: demum distincta minore eisdem terminis, negamus consequentiam.

§. III.

70. **S**ecunda pars conclusionis erat Logicam esse speculativam secundum quid. Pr. Esse speculativam secundum quid stat formaliter in eo, quòd aliquos habeat actus merè speculativos; sed hoc ita contingit: quoniam ad procedendum methodicè, scientificè, ac rationaliter ita ut uni homines doceant, alii discant Logicam, oportet dare definitiones earum rerum, quas discipuli doceantur, nempe definitiones instrumentorum sciendi, ut sciamus, *quid est illud*, quòd docemus, & docemur: atqui definitiones plerumque sunt actus merè speculativi, & existunt in mera contemplatione sui objecti v. g. *definitio est oratio explicans essentiam rei*. Syllogismus

est argumentatio, in qua quibusdam positis, alterum quid à positis, necessarium est &c. quibus actibus Logicæ scimus quidem, quid sit definitio, quid syllogismus convincens, sed non scimus modum faciendi illa: ergo. Non tamen negamus definitionem divisionis, quodammodo esse practicam, & docere modum illam faciendi; nam est oratio totum in suas partes distribuens: & idem de aliis definitionibus docentibus aliquatenus modum faciendi suum objectum; verumtamen id non contingit in omnibus definitionibus; & hoc solum diximus, scilicet aliquas esse merè speculativas, & consequenter Logicam esse secundum quid speculativam.

71. Hinc 1. eam Logicam habituales, de qua est sermo in his questionibus, attribuendo ipsi, quæ sunt magis propria actuum Logicæ, sit genita ex repetitione, ac consuetudine eorum actuum, quando dicimus illam esse simpliciter, & absolute practicam, ac secundum quid speculativam, sensus est: plerosque, ac primarios actus Logicæ esse actus practicos docentes modos definiendi, dividendi, ac argumentandi; ad hoc ut intellectus humanus adipiscatur scientiam demonstrationis, quæ scopus est, & finis Logicæ, sed potius Authorum, qui excogitaverunt, & professi sunt Logicam: & aliquos etiam esse merè speculativos. Unde inferunt habitus, quibus componitur Logica, esse plerosque, ac primarios practicos, aliquos autem speculativos. Neque hoc est speciale in Logica: quoniam licet definitiones, aliæque cognitiones merè speculativæ non sint prorsus necessariae ad faciendâ opera artificiosè; veruntamen sunt necessariae ad hoc, ut regulæ faciendi opera methodicè, ac rationabiliter, ac scientifico modo tradantur ab unis, & discantur ab aliis.

72. Hinc 2. non negamus prædictas definitiones, & similes alios actus speculativos conducere, ac juvare, ut intellectus faciat definitiones, argumentationes &c; sed hoc solum non sufficit, ut sint actus practici, & definant esse merè speculativi: tum quia alias sequeretur, nullum posse formari ab intellectu actum merè speculativum circa rem, quæ alioquin est factibilis; siquidem definitio illius, & quævis alia cognitio patefaciens illius naturam, ac proprietates conducit sine dubio ad illam faciendam modo rationali, methodico, & libero; ergo omnes penitus cognitiones, quas habemus circa res alioquin factibiles, erunt practicæ. Quod falsum est, ac exorbitans à communi modo loquendi. Tum quia illæ definitiones conducunt ad definitiones ac argumentationes remote, sed non proximè, negativè,

tivè, sed non positivè dumtaxat, quatenus remonent ignorantiam quidditatis illarum, quæ ignorantia poterat esse impedimentum, ne intellectus conciperet definitiones, & argumentationes justas, vel saltem non conciperet illas scientificè, ac methodicè. Fatendum ergo est intellectui veritatis amanti, esse discrimen inter definitiones pleræque, ac regulas docentes modum definiendi, ac argumentandi, vi cujus illæ sint actus merè speculativi, hæ autem actus practici.

73. Hinc 3. verum est, quodd practicum absolutè, ac simpliciter, & speculativum absolutè, ac simpliciter sunt differentię ultimò dividentes Scientiã, & consequenter sunt essentialiter oppositę sicut rationale, ac irrationale; & consequenter nequeunt conjungi in eadē Scientia, sicut rationale; ac irrationale nequeunt conjungi in eadem entitate: veruntamen practicum absolutè, ac simpliciter; & speculativum secundum quid, nec sunt differentię dividentes Scientiam, nec sunt essentialiter oppositę, & consequenter possunt conjungi in eadem Scientia, qualis est Logica: & hoc est, quod de illa enunciamus, nempe esse practicum absolutè, ac simpliciter, & speculativam secundum quid; ergo non dicimus conjungi in illa res essentialiter oppositas: quamvis nec hoc foret magnum absurdum, siquidem in homine conjunguntur corpus, & anima, mortale; ac immortale, quę sunt essentialiter opposita, licet non quoad coexistendum. Præsumptum. Præbere regulas faciendi objectum attributionis aliquo ex eis duobus modis insinuat: & non præbere regulas has sunt essentialiter opposita; veruntamen præbere dictas regulas, & simul speculari per alios actus realiter distinctos naturam, & proprietates objecti attributionis, non sunt essentialiter opposita, sed meritò conjungibilia, & conjungenda in eadem Scientia practica, ne cæco, & irrationali modo procedat circa suum objectum docendo illud facere, quin sciamus, quid sit illud, cujus naturę, ac proprietatum.

74. Atqui Scientiam esse practicum absolutè, & simpliciter est, quodd præbeat regulas faciendi suum objectum attributionis: & esse speculativam absolutè, & simpliciter est, quodd non præbeat eas regulas rursus esse speculativam secundum quid est speculari per actus alios realiter distinctos naturam, & proprietates sui objecti attributionis; ergo licet esse practicum absolutè, & simpliciter, & esse speculativum absolutè, & simpliciter opponantur essentialiter; non tamen esse practicum absolutè, & simpliciter, & speculativum secundum quid. Hoc & non aliud dicimus de Logica, de qua si plura velis hac super re consule P. Oviedo disp. 1. proemiali puncto 2. ubi multa docet:

§. IV.

75. **S**ecunda Conclusio: Logica est simpliciter necessaria ad alias Scientias *methodicè*, *artificiosè*que acquirendas: item est moraliter, ac secundum quid necessaria ad illas simpliciter acquirendas quoad statum perfectum; secus quoad imperfectum: ceterum non est simpliciter necessaria ad illas quoad statum perfectum acquirendas, ita ut nemo possit sine miraculo possidere absque iuvamine Logicae Scientiam ullam perfecte, perfectione. utique humana, idest multis imperfectionibus scatente.

3. Reg.
6.3.

76. Loquimur in hac conclusione in numero plurali de aliis Scientiis: sed ne intelligas illas omnes *collectivè*: quia omnes illas *collectivè*, actuali possidere, nec cum Logica, nec sine Logica potest contingere hominibus in hac vita absque specialissimo iuvamine Dei, quale illud fuit Salomoni concessum: *Dedi tibi cor sapiens, & intelligens in tantum ut nullus ante similis tui fuerit, nec post te surrecturus sit*. Loquimur ergo de omnibus Scientiis distributivè, aut disjunctivè acceptis, idest de unaquaque, aut de aliqua. Prob. itaque prima pars: acquirere *methodicè*, *artificiosè*que Arithmetica v. g. stat in eo, quod definitiones, divisiones, & argumentationes, quæ fiunt in Arithmetica, sint iustæ, ac perfectæ juxta *regulas artis*: sine his quippè impossibile est, quod illa fiant *artificiosè*, tametsi alias possint simpliciter, & absolute fieri: atqui ut illa fiant juxta *regulas artis* definiendi, dividendi, & argumentandi sunt simpliciter necessariae hæ regulæ, siquidem nihil sit, aut fieri potest juxta regulam, aut præceptum, quando talis regula, aut præceptum non est in rebus; ergo ad acquirendum *methodicè*, atque *artificiosè* Arithmetica v. g. sunt simpliciter necessariae regulæ definiendi, dividendi, & argumentandi: sed hæ regulæ sunt Logica ipsa artificialis; ergo hæc est simpliciter necessaria ad Arithmetica, aliasque Scientias *methodicè*, atque *artificiosè* acquirendas.

77. Ubi jam vides duo. Primum. Non loqui nos de Logica habituali, sed de actuali: nam licet quis non habeat habitum, facilitatem, possessionemque in definiendo, dividendo, & argumentando, si tamen hic, & nunc præsentem habet in mente regulas definiendi &c. definitio, divisio, & argumentatio erunt *methodicæ*, atque *artificiosæ*, idest factæ juxta regulas Artis. Alterum est, nos loqui non solum de Logica naturali, idest de ingenio, vivacitateque intelligendi, quia hæc sunt

duo.

dubio est simpliciter necessaria ad quamlibet Scientiam acquirendam etiam quoad unam tantum scientificam Conclusionem; sed loqui de Logica artificiali, id est de regulis ipsis definiendi, dividendi, & argumentandi quæ regulæ tametsi per solû lumen naturale haberi possint ab Arithmetico, sicut habetæ sunt ab Aristotele, & aliis etiam antequam audiri cepisset hæc vox *Logica*; hoc non tollit, quod regulæ illæ verè sint Logica artificialis: nam certè hæc facultas constat regulis per se evidentibus; & cum non omnes intellectus sint pares vivacitate, usu, experientiâ, multitudineque specierum, fieri potest, & solet, quod pinis sit arduum, & obscurum id ipsum, quod aliis est per se notum: ergo quod prædictæ regulæ magno cum labore discantur ab incipientibus, non tollit quod sint per se evidentes; & quod solo lumine naturali possint nancisci illas Arithmeticus: si ergo iste cum his regulis definiret, divideret, ac discurreret in Arithmetica quin unquam Logicam didicerit, sed audierit, esset sicut ille, qui verè habet contritionem, quin sciat suam definitionem.

78. Prob. 2. pars Conclusionis, nimirum hanc Logicam esse moraliter necessariam ad alias Scientias simpliciter acquirendas quoad statum perfectum, secus quoad imperfectum. Omne, sine quo ægrè admodum, & valdè rarè habetur aliud, est moraliter, ac secundum quid necessarium ad illud aliud: & hac de causa dicitur equus, aut aliud æquivalens esse moraliter necessarium ad longissimum iter terrestrè brevè conficiendum, quia sine illo ægrè admodum, & rarè conficitur: at sic se habet Logica respectu aliarum Scientiarum: nam cum Arithmetica v. g. non sit una tantum propositio, sed complexum, & congeries plurimarum, quas oportet bene segregare, & combinare inter se, ne intellectus incidat in errorem, ægrè admodum superabit intellectus has omnes difficultates, nisi per disciplinam, aut lumen naturale præsentis habeat regulas bene definiendi, bene dividendi, & bene argumentandi: atque hæc regulæ utrolibet modo habeantur, sunt Logica artificialis, ut nuper dicebamus: siquidem videtur certum, quod Aristoteles, sed primus Author Logicæ si fortè fuit, alius possiderit Logicam artificialem, & tamen eam non habuit per disciplinam, sed per lumen naturale: ergo.

79. Caterùm possidere unam, vel alteram tantum Conclusionem scientificam Arithmetica non est res tam ardua, ut nequeat contingere intellectui etiam ignaro definiendi &c. quoniam una vel altera sola Conclusio potest, & solet non indigere definitione, divisione, aut argumentatione artificiosa, siquidem ex primis principis Arith-

meticæ possunt multi intellectus, licet non omnes, elicere sine ullo artificio unam, vel alteram Conclusionem propter metaphysicam connexionem, quam metaphysicâ evidentiâ deprehendit in eo principio cum ea Conclusionem: & in hoc casu adeo firmiter adhærebit intellectus huic Conclusioni habitę per demonstrationem *Philosophicam* (idest fundatam in sola evidentiâ metaphysicâ connexionis metaphysicæ antecedentis cum consequente) licet non per demonstrationem *Logicam*, idest factam juxta regulas Logicæ, ut vi nulla possit dimoveri ab illa Conclusionem: contra quam si ipsi occurrant insolubiles difficultates, spernet illas, ut sophismata, licet dicere non posset ubi nam sit fallacia: sicut passim Catholici spernunt difficultates insurgentes contra Mysterium, quod perfectè possident per fidem, tametsi nequeant solve illas.

§ 1. Prob. 3. pars, videlicet Logicam non esse ita simpliciter necessariam ad aliquam aliam Scientiam quoad statum perfectum acquirendam, ut sine miraculo nemo possit possidere absque juvamine Logicæ Scientiam illam perfectè. Fieri potest, quod omnes Conclusiones alicujus Scientiæ cujusvis sint, ita colligare inter se, ut instar annulorũ longissimę catenę, unæ Conclusiones evidenter metaphysicè inferantur ex aliis, & hæ ex aliis, & hæ ex aliis, donec perveniatur ad prima principia illius Scientiæ: cujus nobile exemplum habemus in Geometria, nam hujus scientię Conclusiones evidenter metaphysicè inferuntur ex aliis, & hæ ex aliis, & hæ ex aliis donec venit ad prima principia, ut constat ex libris Euclidis: ergo eo ipso, quod intellectus evidenter metaphysicè penetret illa prima principia, potest ex his elicere evidenter metaphysicè secundas, & sic omnes ceteras, quæ humanitus haberi solent.

§ 2. Sed sine Scientiâ, aut memoria regulari definiendi, aut dividendi, aut argumentandi, aut faciendi æquipollentes, aut modales, aut convertentes, aut contrarias, aut contradictorias, aut syllogismos, potest intellectus vivax, & solers absque miraculo evidenter metaphysicè penetrare prima principia (nempe naturalia, ne importunè obicias principia Theologiæ, quæ sunt supernaturalia) cujusvis in particulari Scientiæ naturalis: & ex illis postea evidenter metaphysicè elicere primas proximiores Conclusiones: & postea ex his elicere similiter alias, donec tantus cumulus acquiratur, ut jam assurgat ad dignitatem Scientiæ. Pr. In toto hoc processu longo inferendi unas Conclusiones ex aliis non intercedunt nisi cognitiones metaphysicè evidentes circa prima principia, circa primas, & proximiores Conclusiones,

circa

circa secundas, circa tertias &c. sed hæc cognitiones sine miraculo possunt haberi ab intellectu vivace, ac solerte oblito, vel ignaro penitus harum regularum.

82. Pr. Quoties A nec identitatem, nec specialem relationem, sed habitudinem habet cum B, potest humanus intellectus fungi evidentiâ metaphysicâ circa A, & omnimodam oblivionem habere, sed ignorantiam rei B, quin ullum interveniat in hoc miraculum, ut satis constat: at natura, & proprietates trianguli v. g. aut numerorum nec identitatem, nec ullam specialem habent relationem (nisi illam generalem, quam habent ceteræ omnes res) cum recto modo definiendi, dividendi &c. ergo quin ulli intercedat miraculum, potest humanus intellectus fungi evidentiâ metaphysicâ circa illa eum omnimoda ignorantia, sed oblivione modi recti definiendi &c. ergo cum ignorantia harum regularum, & multo melius sine habitibus genitis ex eis regulis: sed hæc regulæ sunt Logica actualis, & habitus geniti ex ipsis, sunt Logica habitualis: ergo absque utraq; potest intellectus vivax elicere omnes Conclusiones scientificas cujusvis Scientiæ naturalis in eo numero, & cumulo, ut jam mereatur dignitatem Scientiæ: sed hoc est, illam Scientiam v. g. Geometriam, aut Arithmeticam possidere perfecte, non quidem perfectione *extrinseca*, hoc est methodicâ, & artificiosâ (quia jam diximus in prima parte hujus Conclusionis hoc fieri non posse absque Logica) sed perfecte perfectione *intrinseca*, hoc est philosophica, stante in eo, quod intellectus evidenter metaphysicè cognoscat, & penetret omnes Conclusiones illius scientiæ: ergo sine miraculo potest intellectus ignarus, vel oblitus Logicæ possidere aliam Scientiam quoad statum perfectum.

83. Levia quinque objiei possunt. Primum: Logica est Scientia: sed Logica, nec divinitus potest acquiri sine ipsa Logica. Hoc distinguo, quatenus non potest existere sine se ipsa, concedo; sed hoc non venit ad rem: non potest acquiri sine se ipsa, quatenus non possit existere, quin ipsa præcedat sibi ipsi, & doceat modum, quo acquiri debeat, implicat in terminis: quia sicut est impossibile, quod res existat sine se ipsa, est impossibile etiam, quod res sibi ipsi præcedat secundum idem. Igitur pars Logicæ, quæ agit de definitione potest acquiri sine præcedentibus regulis syllogizandi, & vice versa. Secundum: in illo eodem processu, quod diximus, consequentiarum, quibus ex primis principiis Geometriæ v. g. elicimus primas Conclusiones, & ex his secundas &c. logizat intellectus, & Logicam exercet: ergo semper intervenit Logica: ergo sine hac impossibile est acquirere illam Scientiam. Distinguo antecedens,

Dd

logi-

logizat, & exercet Logicam purè materialiter; concedo: formalitèr, nego: & similiter explicantur cætera. Considera duos audientes Sacrum die Dominica: unum prorsus ignarum, seu oblitum præcepti, alterum memorem: ambo sanè obediunt Ecclesiæ, & faciunt quod illa jubet: sed primus obedit tantùm materialiter, secundus formaliter, unde primus non dirigitur ad illam auditionem per Ecclesiasticum præceptum; dirigitur tamen secundus. Id impræsentiarum: non negamus in illo processu intervenire discursus, ilationes, ac consequentias juxta regulas Logicæ, sed cùm hæc fieri possint ab homine penitus ignaro illarum regularum, optimè verò callente intimam metaphysicam connexionem unarum veritatum cum aliis, (maximè si discursus illi non sint syllogistici, sed mera enthymemata, ubi nullum artificium est) idcirco subsistit illum *non dirigi* per regulas Logicæ, & solum materialiter obedire illis: ergo subsistit Logicam non esse simpliciter necessariam ad acquirendum alias Scientias perfectè perfectione intrinseca illorum, tamen si necessaria sit ad acquirendum illas formalitèr formalitate obediendi regulis ipsius: sicut præceptum non est simpliciter necessarium ad audiendum perfectè, ac formalitèr Sacrum perfectione, ac formalitate actioni illi intrinseca, licèt sit necessarium ad formalitatem, ac perfectionem extrinsecam obedientiæ formalis.

84. Tertium. Non possidet perfectè Scientiam, qui non potest illam defendere ab insurgentibus sophismatibus contrariis: sed ad hoc est simpliciter necessaria Logica, quia hæc una explicat ubinam lateat fallacia; ergo. Dist. majorem, non possidet perfectè perfectione intrinseca, & in positiva qui non potest &c. nego majorem (quia sicut homo potest esse perfectè Catholicus perfectione intrinseca Fidei Catholicæ, tamen si solvere nequeat difficultates omnes insurgentes contra Fidem, ut passim experimur: ita potest esse perfectè sciens perfectione intrinseca, & positiva Scientiæ, licèt solvere nequeat fallacias contrarias, quia illa perfectio intrinseca, & positiva solum consistit in metaphysica evidentia antecedentis, atque connexionis illius cum consequente) non possidet perfectè Scientiam perfectione extrinseca, & negativa qui non potest &c. concedo majorem: & permitta minore, quæ sanè non est firma, siquidem intellectus potest sua vivacitate sine regulis Logicæ detegere fallacias contrarias, maximè quæ non pendent ex artificio fallace syllogismorum, sed ex aliis principiis malè intellectis; nego consequentiam.

85. Quartum. In præfato processu indispensabiliter occurreret multo-
ties necessitas definiendi, dividendi, convertendi propositiones, argu-
men-

mentādi &c. sed hę fieri non possunt simpliciter sine Logica. Id negatur quia sicut sine Logica præcedente, ac docente inventę sunt per solum lumen naturale regulę universales docentes definire, dividere &c. ita sine his regulis possunt fieri per lumen solū naturale ipsę definitiones, divisiones, conversiones, & argumentationes præsertim enthymemata, quę non habent artificium aliud, quàm evidentem metaphysicę proponere veritatem antecedentis, & illius infallibilem connexionem cum consequente ambę autem evidentię haberi possunt solo naturali lumine. Quintum. Habere Scientiam est habere notitiam per demonstrationem acquisitam: sed sine Logica nequit haberi demonstratio, quoniam demonstrare est proprium Logicę in quarto modo: ergo. Nego minorem, quoniam omnis argumentatio, cujus antecedens est metaphysicę evidens, & similiter connexum cum consequente est demonstratio philosophica, & quoad intrinsecam perfectionem demonstrationis, quidquid sit de perfectione extrinseca stante in eo, quod facta sit juxta regulas artis: sed sine Logica potest intellectus vivax formare argumentationem illam: ergo. Nego item probationem illius minoris, quippè proprium in quarto modo dicitur illud, quod omni, soli, & semper convenit rei, ut risibile convenit homini: at demonstrare quoad intrinsecam, & philosophicam perfectionem demonstrationis non convenit soli Logicę (quandō quidem in ceteris etiam Scientiis fiunt argumentationes metaphysicę evidentes quoad antecedens, & hujus connexionem metaphysicam cū consequente, ut constat) sed solum est proprium Logicę præbere regulas ad demonstrandum artificiosę: ergo.

C A P U T I V.

Quid, & quoniam sit objectum in genere.

86. **O**bjectum, seu materia cujusvis Scientię, aut facultatis est illud, de quo tractat, & disputat illa facultas: sic objectum, seu materia Theologię est Deus, quia tota illa est de Deo, aut de rebus ad Deum spectantibus. Objectum, seu materia Astronomię sunt sydera, quia horum motus, magnitudinem, distantiam disputat Scientia illa, & similiter de aliis facultatibus: ubi pro re præsentī, imò pro tota Philosophia, & Theologia adverte: quando dicimus *objectum materiale, aut formale talis Scientiæ, talis Artis, talis Virtutis, aut Politicę, aut Moralıs, aut Theologicę esse talem aut talem rem*, debes

id intelligere non de ipsa Scientia, Arte, aut Virtute, ut præferret hæc locutio; sed de *Artibus propriis* ipsius Scientiæ, Virtutis &c.

87. Quoniam Ars, Scientia, & Virtus acquisita consistunt in quadam quasi possessione, sed facilitate, sed habitu acquisito ex crebra repetitione actuum facilitante ad alios actus ejusdem speciei, ut sæpè monuimus: atqui hæc facilitas, sed habitus non est capax tendendi strictè, & propriè in objectum ullum sive materiale, sive formale; quia hæc facilitates, sed habitus neque sunt personæ rationales, neque cognitiones, aut actus voluntatis, sed quædam qualitates relictæ ex eis actibus respectivè (sicut odor relinquitur ex liquore) & facilitantes ad eosdem actus quoad speciem repetendos, idest ad alios similes in specie: ergo strictè, ac propriè loquendo soli actus Scientiæ, Artis, sed Virtutis sunt capaces habendi objectum materiale, aut formale, non autem ipsæ Scientiæ, Artes, aut Virtutes: invaluat tamen usus dicendi Scientiam, aut Virtutem habere tale, aut tale objectum materiale, aut formale; sed est locutio figurata, qua tribuimus causæ id, quod est proprium effectûs, & vice versa: Habitus enim acquisitus legendi v. g. est effectus unorum actuum legendi, & causa facilitans ad actus alios legendi.

88. Idem intellige de Scientiis, Habitibus, sed virtutibus infusis, nempe quæ Deus de repente ut supremus Dominus infigit animabus, quin hæc habuerint usum, sed consuetudinem eliciendi actus illos v. g. in Baptismo infundit Deus puero Habitum, sed Virtutem Fidei, Spei, & Charitatis, tametsi ille utpotè adhuc incapax nondum eliciuerit actum ullum Virtutum harum. Itaque quanquam hi Habitus, sed Virtutes neque acquirantur per crebram priorem repetitionem actuum, neque faciliunt ad hos, in quo etiam differunt ab habitibus acquisitis, nihilominus strictè loquendo non sunt capaces, ut habeant objectum materiale, aut formale; quia neque sunt agentia rationalia, neque vitales operationes intellectûs, aut voluntatis, aut alius potentiæ cognoscitivæ, sed qualitates quædam supernè illapsæ, & inhærentes animabus ad fines, quos Theologia docet: itaque quando audieris objectum formale Virtutis Charitatis esse bonitatem absolutam Dei, intellige per locutionem castigatam actum ipsum Charitatis, quodiligimus Deum super omnia, *quia bonus est*; per locutionem autem largam, & figuratam intellige Habitum ipsum, seu Virtutem Charitatis: & similiter quando similes audias locutiones passim obvias in tota Philosophia, & Theologia.

89. Objectum ergo cujuslibet Scientiæ, idest actuum propriorum

rum illius Scientiæ est duplex: unum purè *materiale*; alterum *formale*. Objectum formale, quod etiam vocatur *ratio formalis*, sub qua & *ratio formalis qua*, est titulus ille, sedè motivum, sedè ratio, sedè attributum, propter quod proxime, ac immediate actus proprius Scientiæ, sedè Virtutis attingit suum objectum, quod dicitur *materiale*, v. g. objectum formale actuum intellectûs, qui sunt assensus, est veritas intrinseca, & transcendentalis sui objecti, quia ideo proxime, ac formaliter assentimur rei, *quia vera est*: Objectum formale actuum intellectûs, qui sunt dissensus, est falsitas sui objecti, quia ideo formaliter immediate dissentimur rei, *quia est falsa*: similiter objectum formale actuum voluntatis, qui sunt amores, est bonitas objecti, quia ideo proxime immediate amamus rem, *quia est bona* aliqua specie bonitatis: objectum formale actuum voluntatis, qui sunt odium, est malitia objecti, quia ideo proxime immediate averfamur rem aliquam, *quia illa aliquo modo est mala*; sed de hoc infra.

90. Ubi adverte Sex. Unum est: objectum formale strictè tale, idest proximum, ac immediatum, quandoque distingui realiter ab objecto materiali, quandoque non distingui: etenim lux, & color sunt objectum formale corporis visionis, qua intuemur hominem v. g. & ambo distinguuntur realiter ab ipso homine. E converso bonitas Divina est objectum formale amoris, quo super omnia diligimus Deum ipsam: & certè bonitas Divina non distinguitur realiter, & forsan neque adhuc formaliter per rationem ab ipso Deo: similiter transcendentalis veritas rei est multoties objectum formale actûs, quo assentimur illi rei, ita ut agglomeratæ rationes ad suadendum illam nihil aliud faciant, quàm pandere, detegere, & aperire latentem veritatem rei illius, quæ semel detecta per se formaliter trahit nos in sui assensum, sicut bonitas trahit nos liberè, aut necessariò in suamorem: & certè transcendentalis veritas, & bonitas non distinguuntur realiter ab ipsis rebus; stet ergo objectum formale, interdum distingui realiter, interdum non distingui realiter ab objecto materiali.

91. Secundum est. Hoc objectum formale passim vocatur *specificativum*: & merito; quia illud est nobis regula ad discernendum species actuum intellectûs, aut voluntatis, virtutum, ac vitiorum, ita ut actus alterutros habentes unum objectum formale distinguamus in specie ab actibus habentibus aliud, vel saltem sub alia expressione, si habuerint idem in sensu reali objectum formale: sic virtutem

mo-

moralem Religionis, v. g. distinguimus in specie à virtute Charitatis, quia obiectum formale motuum Religionis v. g. genuflexionis, suffitus, Sacrificii &c. est *cultus Dei*; volumus namque actiones illas per actum solius Religionis, *quia sunt cultus Dei*: obiectum autem formale Charitatis est *bonitas Dei*; bonitas autem hæc, & cultus ille sunt res prorsus distinctæ: sic etiam virtutem Fidei distinguimus in specie à virtute Charitatis, quia licet autoritas Divina, quæ est obiectum formale Fidei, sit prorsus idem cum Divina bonitate, quæ est obiectum formale Charitatis; nihilo tamen minus hæc expressio, hæc notitia, hoc iudicium *Deus impotens falli, aut fallere dixit hoc*, quod iudicium regulat fidem, est specificè distinctum ab hoc altero regulante Charitatem, *quia bonus, & amabilis est Deus*.

92. Obiectum itaque formale est *specificativum*, quatenus est plerumque nobis regula, seu principium ad discernendum species nostrorum actuum, vel quia obiectum formale unorum est notabiliter diversum ab alterorum, vel quia si est penitus idem, sub diversis tamen expressionibus movet ad unos, & ad alteros: sed cave ne intelligas esse specificativum *intrinsecum* actuum nostrorum: quia hi, sicut cætera omnia specificantur intrinsecè à suamet differentia essentiali; non autem à suo obiecto formali, à quo sine dubio distinguuntur realiter simpliciter, ut distinguitur à Divina bonitate amor ille, quo diligimus Deum, quia est bonus. Potest tamen obiectum formale dici specificativum intrinsecum non quatenus sit constitutivum essentialia actus; sed quatenus hic per suamet essentiam connectitur cum illo, aut saltem tendit, pergit, seu respicit illud, five sit verum, five merè apparens, ut contingit, quoties fallimur in nostris operationibus. Scias tamen obiectum formale non esse unicum specificativum nostrorum actuum, nam specificantur etiam à modo, quo respiciunt illud, nec non à suis principiis, ut discas in Philosophia.

93. Tertium est. Obiectum formale interdum est *remotum* v. g. illud, quod proximè immediatè movet ad aliquem actum moventem ad alium, v. g. quando quis ex timore æternæ damnationis elicit actum Fidei, aut Charitatis: tunc enim damnatio æterna est motuum, seu obiectum formale remotum, sed minùs proprium Fidei, aut Charitatis, quia est obiectum formale proximum illius timoris, qui timor impellit ad actum Fidei, aut Charitatis, & hoc solet etiam vocari obiectum formale *extrinsecum*, quod licet sit ultimum resolu-

lutivum actûs, non specificat illum, ut patet in actibus dictis, qui non desinunt esse Fidei, aut Charitatis licet extrinsecè, remotè resolvantur in objectum illius timoris, ex quo concipiuntur. Interdum est objectum formale *proximum*, quod etiam vocatur *intrinsecum*, & est objectum formale proprium, nempe quando non movet ad alium actum priorem, sed immediatè, ac directè ad illum, de quo est sermo, sicut veritas transcendentalis movet ad assensum, & bonitas Divina ad sui amorem. Utrumque objectum formale, nempe remotum, seu extrinsecum, & proximum, seu intrinsecum, & proprium potest esse vel adæquatum, vel inadæquatum, & partiale; erit adæquatum, & totale, quando ipsum *solum* moveat; erit inadæquatum, & partiale, quando non ipsum solum, sed complexum ex ipso, & alio moveat. Rursus objectum formale proximum potest esse intrinsecum *terminativè*, vel extrinsecum: erit terminativè intrinsecum non quando actus ille intellectûs, aut voluntatis, de quo fuerit sermo, constituatur essentialiter per illud, (quia hoc nunquam contingit in actibus creaturarum), sed quando in suomet tendendi modo exprimat objectum illud formale v. g. *sunt æternæ pænæ, quia Prima Veritas hoc dixit*. Erit objectum formale extrinsecum terminativè, quando actus ille, tametsi formaliter in se ipso exprimat, seu non reflectat supra illud objectum formale, verumtamen illud præsupponat immediatè, ac proximè ut in hoc Enthimemate: *est homo, ergo est animal*: hoc secundum præsupponit immediatè, ac proximè illud primum.

94. Quartum est. Omne objectum formale est objectum motivum: id namque est character objecti formalis, nimirum quòd ut præcognitum formaliter, vel equivalenter per iudicium, vel per apprehensionem moveat, inclinet, impellat interdum non relinquendo libertatem, interdum relinquendo illam, impellat inquam potentiam ad actum, cuius est objectum formale. At verò non omne objectum motivum est objectum formale: quia nil, quod dumtaxat est finis, est objectum formale: sed objectum motivum multoties est finis dumtaxat, ut quando exis domo ut visites ægrotum, illa visitatio dumtaxat est finis illius exitus; & quando ut obtineas à Principe honores, ac dignitates, facis talia, & talia egregia facinora, honores illi dumtaxat sunt finis actionum illarum; & quando, ut æternam beatitudinem adipiscaris, temperas te à peccatis, æterna beatitudo est finis illius temperantiæ &c. ergo objectum motivum multoties non est objectum formale saltem proximum, & immediatum. Pr. Major.

jur. Nil quod præcisè causat, *ut sit*, hoc est quod præcisè movet ad consecutionem, causat *quia est*: nam, & ut vides, hi duo sunt valdè diversi modi causandi: sed omne, quod dumtaxat est finis, præcisè causat, *ut sit*, movendo scilicèt ad ponendum media obtinendi ergo sui consecutione: quia hoc est esse præcisè finem, nempe movere ad sui consecutionem per media: omne autem, quod est objectum formale, non causat, *ut sit*, sed *quia est*: v. g. bonitas divina non, ut sit in rebus, sed quia est, movet voluntatem ad sui amorem: veritas transcendentalis, non ut sit, sed quia est, movet intellectum ad sui assensum &c. ergo nil, quod dumtaxat est finis, est objectum formale: unde habes obiter distinctionem inter illud, quod movet, ut finis, & illud, quod movet, ut meritum ad præmiandum, nam etiam volitio præmiandi habet pro objecto formalispecificativo meritum, ex hoc *quia est* suo modo causat, & movet voluntatem præmiandi.

95. Quintum est. Cum dixerimus omne objectum formale esse objectum motivum, oportet non confundere objectum motivum *positive*, & motivum *negative*: quemadmodum enim ex causis physicis unæ influunt *positive* in suos effectus, ut ignis in calorem, alia influunt *purè negative*, & instar removentis prohibens, ut vulgò dicitur, quatenus ipsæ non producant effectum, sunt tamen necessariae, ut ille producat; ita ut sine ipsis non producat, ut approximatio ignis ad lignum v. g. quæ approximat non producit calorem, sine ipsa tamen ignis non producit calorem, & ob hanc causam dicitur causa *negative* caloris, quia removet distantiam ignis, quæ distantia prohiberet, seu impediret productionem caloris: item, ut cognitio objecti, quæ sanè non producit physicè *positive* amorem, seu volitionem illius; sed tantum *negative*, quatenus cognitio hæc removet ignorantiam objecti, quæ ipsius amorem, volitionemque impediret, quia *nil volitum quin præcognitum*, ut verum axioma docet: quemadmodum inquam res ita eveniunt in causis physicis: ita inter motiva, una movent *positive* sicut bonitas divina *positive* movet ad sui amorem, & transcendentalis veritas ad sui assensum: unde quando dicimus *amo Deum quia bonus est. Credo Deo, quia est verax*, illud quia utrobique sumitur in sensu *positivo*, & significat objectum formale.

96. Alia movent tantum *negative*: id quæ dupliciter: vel quatenus removent impedimentum motionis, & præparant intellectum, aut voluntatem ut moveatur, ut bona existimatio Petri præparat voluntatem tuam, ut movearis ad ipsi benefaciendum, unde dici potest illa bona existimatio movere *negative* ad benefaciendum: in quo

etiam

etiam sensu dicitur communiter; *Pia affectio iuvat ad credendum*, qui enim bene affectus est erga alium, facilius credit, quæ bona sunt illius, unde illa pia affectio movet *negativè* ad credendum: vel quatenus retrahit quidem ab aliquo actu nostro, sed hoc ipsum retrahere est motivum alliciens, & necessarium ad illum eundem actum: sic arduitas, quæ utique necessaria est in objecto Spei (siquidem spes non est de rebus facilibus; sed de arduis; ut suo loco dicitur) retrahit, quidem ab spe, seu conatu generoso illius rei; sed hæc ipsa remora, aut retractio est necessaria ad spem, & quasi calcaria admovet generoso animo; ut aggrediatur rem illam difficilem, seu arduam: sic heroicæ actiones hoc ipso, quodd heroicæ sint retardant animum, sed simul hoc ipso incitant animum generosum, unde movent *negativè*, quatenus ita movent, ut simul retrahant, aut ita retrahunt, ut simul propellant. Idem contingit in conscientia retrahente à peccato, quoniam ita se habet pro priori ad hoc, ut ab ipso retrahat; est tamen necessaria hæc retractio, ut actus ille sit peccaminosus, si fiat, quoniam ut sit peccaminosus, debet fieri *contra conscientiam prælucentem*.

97. Idem in conclusione obscura, & in ea, quæ sit mere probabilis: quoniam obscuritas ipsa, aut mera probabilitas motivi invitantis ad assensum conclusionis reddit quasi frigidum intellectum, ne velociter moveatur ad assensum: sed hæc eadem frigiditas seu retractio, quæ consistit in dicta obscuritate, seu mera probabilitate, est prorsus necessaria, ut assensus conclusionis sit obscurus; aut mere probabilis, quia alias non foret obscurus, sed clarus, non foret mere probabilis, sed certus. Stat ergo, quodd inter motiva, una movent *positivè*, altera *negativè* dumtaxat. Quando itaque dicimus omne objectum formale alicujus actus intellectus, aut voluntatis esse motivum ejusdem, loquimur de motivo non *negativè* tantum, sed *positivè* movente, ut in exemplo bonitatis respectu amoris, & veritatis respectu assensus diximus.

98. Deniq; sicut inter causas physicas unæ sufficiunt ad effectum, sed non requiruntur (ut ignis A, qui sufficit ad producendum calorem, sed non requiritur, quandoquidem ignis alius potest eum producere) aliæ requiruntur, sed non sufficiunt per se præcisè, ut siccitas v. g. quæ requiritur, ut ignis comburat lignum, sed non sufficit, nisi ignis sit applicatus: unde fit, quodd neque omne, quod requiritur ad aliud, sufficiat per se ad illud, neque omne, quod sufficit per se, requiratur ad illud: ita inter motiva, una solent sufficere per se, sed non requiruntur (v. g. motivum invifendi amicum sufficit, ut egredi-

diatis domo; sed non requiritur, nam vulgò dicitur, quòd hunc eundem egressum facere poteris ex motivo alio) alia requiruntur, sed non sufficiens per se, ut motiva tantùm negativè. Quando ergo dicimus, objectum formale esse objectum motivum, loquimur de motivo sufficiente, ac requisito ad actum intellectus, seu voluntatis sumptum saltem quoad speciem, ut bonitas Divina movet, ac sufficit ad amandum Deum, & veritas objecti movet, ac sufficit ad credendum illud: quòd si actus, de quo fuerit sermo, habuerit duo objecta formalia adæquata, & totalia, ut multi credunt fieri posse, philosophandum est sicut suo loco dicemus. Et hactenus de objectis formalibus.

S. I I.

99. **O**bjectum purè materiale, quod etiam solet vocari objectum *terminativum*: item *objectum quod*: item *ratio formalis quæ est illud*, in quod tendit, seu de quo tractant actus, sive intellectus, sive voluntatis non propter ipsum, sed propter aliud: & quanquam hi actus habeant etiam per suam essentiam tendere in objectum, in quod tendunt, & hac de causa dici poterat, quòd etiam objectum materiale est specificativum actus; verumtamen castigatè loquendo non est; tùm quia actus specie distincti, quales sunt Fidei, Spei, ac Charitatis possunt tendere in idem objectum materiale, nempe in eundem Deum; ergo non semper specificantur actus ab objecto materiali specificativè sumpto: tum quia objectum hoc solet latius patere; objectum verò formale est magis contractum, ac determinatum; ergo magis idoneum, ut ab ipso specificetur actus, quàm ab objecto materiali. Porro loquimur de objecto *purè materiali*, quia nostri actus multoties tendunt etiam expressè in suum objectum formale, quod idèd potest dici esse quoque objectum materiale; sed non *purè materiale*.

100. Hoc est duplex, unum *remotum*, alterum *proximum*: objectum materiale proximum est illud, de quo immediate, ac directè tractat aliqua Scientia, ut tractat Logica de actibus intellectus, & Prudentia de actibus voluntatis: objectum materiale remotum est illud, quod est objectum illius, de quo immediate tractat ars, seu scientia, ut sunt actiones exteriores, quas volumus, aut nolumus, de quibus volitionibus, aut nolitionibus immediate tractat Prudentia, ut est virtus transcendentalis: item res omnes, quas possumus definire, & super

super quibus possumus argumentari (quæ res vocantur *conceptus obiectivi*) quia illæ sunt objectum definitionis, argumentationis &c., de quibus immediatè tractat Logica. Rursus objectum materiale proximum est duplex: unum adequatum, videlicet complexum, acervus, seu aggregatum ex omnibus illis, de quibus immediatè tractat ars; inadequatum est unum quodque ex hisunde sicut non potest dici verè, & propriè *Homo est corpus*. *Homo est anima*: quia homo est complexum ex corpore, & anima simul: ita non potest dici verè, ac propriè: *Logica est doctrina definiendi*: *Logica est doctrina syllogizandi*: quia Logica est complexum ex omnibus eis doctrinis simul: omnibus inquam habitualiter sumptis, idest complexum ex omnibus eis habitibus, & facultatibus simul existentibus in eodem intellectu: actus enim ipsi Logicæ rarè, vel nunquam existunt simul in eodem intellectu, quia sunt transeuntes, & quando unus intellectus concipit unum actum, supersedit alio: habet namque virtutem cognoscitivam valde limitatam, pluribus intentus minor est ad singula sensus juxta verum proloquium, quod non procedit de solo sensu externo, sed etiam cum proportionem de intellectu ipso, qui etiam est valde limitatus.

101. Objectum inadequatum est duplex: unum vocatur *attributionis*, seu *primarium*, seu *finis* ipsius facultatis, & est illud, quod ita tractat, explicat, disputat illa facultas, ut reliqua omnia, de quibus tractat, ordinentur ad illud; illud autem non ordinetur ad aliud per actus illius facultatis: alterum vocatur objectum *attributum*, & est quodcumque aliud, de quo tractat illa facultas, sive sit unum solum, sive duo, sive complexum ex omnibus distinctis ab objecto attributionis.

102. Sed hinc cave æquivocationes, quæ oriri possunt ex frequentissimis modis loquendi hæc super re. Cum Logica, & idem de omnibus aliis Scientiis, Artibus, seu Virtutibus, non sit capax *operandi propter finem*, siquidem non est persona: item cum unæ partes ipsius non sint *ex natura sua* positivè ordinatæ, aut destinatæ ad alias, sicut materia est ordinata ad formam, sicut ignis naturâ suâ est calidus, aut nix naturâ suâ est frigida: quandoquidem doctrina, seu regulæ definiendi v. g. possunt subsistere in intellectu absque ulla violentiâ sine doctrina, seu regulis demonstrandi, item sine definitione ipsa, & sine demonstratione: cum inquam hæc ita sint, quando audias Logicam ordinare, seu dirigere cætera omnia, de quibus agit, ad tale, vel tale objectum attributionis, v. g. ad demonstrationem, hæc duo, & non aliud intelligere debes: unum est, hominem ipsum logicum,

non verò Logicam ipsam tractare cætera illa omnia jam docendo, jam discendo, jam disputando illa eo fine, atque intentione, ut habeatur plena doctrina, & scientia demonstrationis, quia Logicus, non verò Logica capax est operandi propter finem: alterum est, unas partes Logicæ, licet ex natura sua non sint destinatæ ad demonstrationem v.g. ex natura sua esse idoneas, seu esse utiles, seu esse etiam necessarias ad demonstrationem. Unde ordinatio, seu directio ad objectum attributionis sumpta radicaliter, ac in actu primo est intrinseca, & essentialis partibus Logicæ; sumpta verò actualiter, ac in actu secundo est extrinseca, & proveniens à voluntate Logicorum ordinantium illas ad demonstrationem: sicut saxa, trabes, lateres sunt quidem ex sua natura capacia, ut ordinentur ab artifice ad domum construendam; quod autem hic, & nunc ordinentur, non est ipsis essentialiale, sed quid extrinsecum à voluntate artificis proveniens.

103. Ex dictis toto hoc capite habes 1. generalem explicationem objecti materialis, & objecti formalis, quæ duo frequenter occurrunt in tota Philosophia, & Theologia, & ex quorum prava intelligentia prave equivocationes nascuntur. Habes 2. Objectum formale non bene explicari, dicendo esse illud, *quia*, quo respondemus interroganti *cur*. Etenim interroganti *cur* hoc agis, *cur* hoc vis, *cur* hoc credis, multoties respondemus per *quia* significans causam efficientem physicam, *Video, quia oculos habeo apertos, & cum omnibus dispositionibus ad videndum*: multoties per *quia* significans causam moralem efficacem, *feci hoc, quia insus fui*: multoties per *quia* significans causam finalem, *fugio peccata, quia tendo in Cælestem Patriam*: multoties per *quia* significans meram applicationem physicam, vel intentionalem, *Amo hunc, quia cognosco esse bonum*: multoties per *quia* significans rationem ex se retrahentem ab illa actione, *Volo talem rem hoc ipso, quia cædua, & periculosa est*. Atqui nullum ex his est objectum formale; ergo multoties illud *quia*, per quod respondemus, non significat objectum formale: ergo hoc non bene explicatur dicendo esse illud, quo respondemus interroganti *cur*.

104. Est ergo objectum formale actus, propriè, ac præse loquendo, titulus ille, seu ratio formalis, intrinseca, vel extrinseca objecto materiali ipsum directè, ac immediatè constituens capax, vel dignum illius actus in particulari, & in ea specie; & quando illi *cur* respondemus per *quia* id significans, tunc respondemus per objectum formale nostri actus. Dicitur *intrinseca*, vel *extrinseca*, quia objectum formale interdum distinguitur realiter, interdum non distinguitur

guitur ab objecto materiali, ut diximus num. 5. Imò aliquando ita est extrinsecum objecto materiali, ut neque per receptionem, aut unionem physicam sit in ipso, ut non est in pœnis Inferni complexum ex Autoritate, & Verbo Dei testificantis illas, & propter quod tanquam propter objectum formale credimus Fide Divina illas pœnas. Dicitur, *ipsum directè, ac immediatè*, ad excludendum titulos alios, scilicet rationes generales, quæ solent movere ad talem, vel talem actum non immediatè, ac in particulari, sed in communi. Dicitur *capax*, vel *dignum*, quia lux, & color sunt objectum formale visionis corporeæ, & aliud præstare non solent, quàm constituere parietem, v. g. cui offunduntur, capacem ut videatur oculis corporeis.

105. Sed exemplo faciliùs capientur hæc. Rogaris cur credis Incarnationem Verbi? Si respondeas, *quia volo*, ut respondere potes, quandoquidem liberè, ac voluntariè credis, non respondes per objectum formale Fidei, sed per principium morale subiectivum, qualis est volitio respectu aliarum humanarum actionum. Si respondeas, *quia Deus opitulatur mihi ad credendum*: non respondes per objectum formale Fidei, sed per rem indispensabiliter necessariam ad credendum, quia sine speciali auxilio Dei non possumus credere, prout oportet, ut docet Ecclesia. Si respondeas, *quia iubemus omnes id credere*, non respondes per objectum formale Fidei; sed per aliud principium morale, seu motivum credendi, nam certè præceptum Divinum est optimum motivum credendi, quod præcipit Deus. Si respondeas, *quia aliter damnabor*, non respondes per objectum formale Fidei, sed timoris. Si respondeas, *quia placet Deo, quòd id credam*, respondes per objectum Charitatis. Si respondeas, *quia verum est intrinsecè Verbum incarnasse*, non respondes per objectum formale illius Fidei, prout est talis specificus assensus Fidei Divinæ, sed prout est assensus in genere, cuius objectum formale est veritas transcendentalis sui objecti materialis.

106. Si respondeas, *quia honestum, & meritorium est credere hoc*, non respondes per objectum formale Fidei: nam cum illa honestas, & meritum sint tituli, & rationes valde universales, non possumus ex illis deprehendere particularem speciem Virtutis, ad quam spectat ille assensus: ergo non sunt specificativum illius. Si respondeas, *quia tot, ac tanta sunt argumenta persuadentia Incarnationem, ut non nisi temerè possimus de illa dubitare*, non respondebis per objectum Fidei, sed per ipsius externam applicationem, id est

Trid.
Sist. 6.
Can. 1.

1. et
Corinth.
cap. 3.

Psal. 93.

ideſt per extrinſecum miniſterium præparans animum ad credendum. Quemadmodum enim, *neque qui plantat, eſt aliquid, neque qui rigat, ſed qui incrementum dat Deus*; veruntamen juxta ordinariam providentiam Deus non dat intrinſecum incrementum frugibus, niſi præcedat intrinſecum miniſterium, ideſt præparatio, ac diſpoſitio plantandi, & rigandi. Ita quamvis ſolus Deus in Scholæ interiore cordis *erudiat hominem, ac de Lege ſua doceat eum*; veruntamen juxta providentiam ordinariam hoc non facit, niſi præcedente extrinſeco miniſterio, quod per argumenta, quæ dicuntur credibilitatis, præparet, ac diſponat animum, ut interiore vocem Dei ſuſcipiat, atque percipiat. Ergo reſpondere per hæc argumenta extrinſeca non eſt reſpondere per obſectum formale Fidei, ſed per ipſius externam applicationem, quia *Fides ex auditu*.

107. Denique ſi reſpondeas, *quia Deus prima veritas impotens fallere, aut falli hoc dixit*, tunc reſpondebis per obſectum formale Fidei; quia ſicut Divina Bonitas abſolutum eſt obſectum formale Chæritatis, ipſam ſpecificans, ideſt ipſam apud nos diſtinguens ab omnibus aliis Virtutibus; ita infinita authoritas Dei aliquid aſſerentis, aut negantis eſt obſectum formale Fidei Catholice, ipſam ſpecificans quaſi teſſera, vel character, quo hanc Fidem diſcernimus ab omnibus aliis Virtutibus. Ex his ergo, in quibus magis notum, & certum eſt obſectum formale, debemus ſumere regulam ad ſtabiliendum quidnam, & quodnam ſit obſectum formale quorumlibet aliorum actuum intellectus, ac voluntatis, ſive naturalium, ſive ſupernaturalium, ſive bonorum, ſive malorum, ſive indifferentium in ſua ſpecie, quales ſunt actus Logicæ, & aliarum Artium. Habes 3. Ut aliquid ſit obſectum formale alicujus actus, ſive intellectus, ſive voluntatis, ſive boni, ſive mali &c; non eſt neceſſarium, quod ſit intrinſecum ipſi actui; *quatenus per ipſum tangatur, ſeu exprimat*: nam obſectum materiale præmiſſarum ſine dubio eſt obſectum formale Concluſionis, ut ex præmiſſis illatæ. Atqui hæc Concluſio non ſemper exprimit obſectum præmiſſarum, quia non ſemper refleſtit ſupra illud explicite, ac formaliter, ut dicemus in Lib. de Anima: v. g. hic diſcurſus eſt formalis, *exiſtis unio*: ergo *exiſtunt extrema*, tametiſi hæc Concluſio non refleſtat ſupra ſuum antecedens, & ſic concipiatur, ergo *exiſtunt extrema, quia exiſtis unio*; ergo. Itaque ut aliquid ſit obſectum formale proximum alicujus actus, ſufficit unum de duobus: vel quod actus ille exprimat cauſaliter tale obſectum formale expreſſe refleſtendo ſupra illud, ut

in

in exemplo nupero: vel quod producat talis actus intellectus, aut voluntatis per actionem essentialiter præsupponentem notitiam illius non repellendo illius motionem, ut aliquando contingere potest, ut si diceret: *Volo tibi dare hoc non propter tuas preces*, (ecce repulsam motionem præcognitarum precum), sed propter aliud motum. His præmissis facilius explicabuntur præsentēs difficultates.

CAPUT V.

Quodnam sit, & quodnam non sit Objectum materiale, & formale Logicæ.

108. **S**upposito hic non esse sermonem de Logica habituali: quia hæc, ut supra diximus, non est actus intellectus, sed qualitas quædam relicta ex frequente repetitione actuum, unde pressè loquendo non est capax habendi in se, & quoad se objectum materiale, aut formale, attributum, vel attributionis; sed Sermonem esse de Logica actuali, cujus proprietates per figuratam locutionem tribui solent Logicæ habituali: supposito item Sermonem non esse de Logica reflexa, quales sunt hæc quæstiones, quæ proemiales dicuntur, quia certè objectum ipsarum est Logica ipsa directa, cujus natura, & proprietates hic disputantur; sed esse Sermonem in hac quæstione de Logica ipsa directa, idest de complexo resultante ex omnibus regulis, ac principiis Dialecticæ: his inquam suppositis, sit Conclusio: Objectum materiale remotum utriusque Logicæ, idest Minoris, atque Majoris sunt omnia, quæ concipi possunt ab intellectu; objectum autem materiale proximum Logicæ Minoris, hoc est Dialecticæ, sunt soli conceptus formales, non autem voces, aut conceptus objectivi. Logicæ verò Majoris objectum materiale proximum sunt etiam multi conceptus objectivi.

109. **Prob.** primam partem. Omne, quod est objectum illius, quod est objectum materiale proximum Logicæ; est objectum materiale remotum ipsius, ut diximus cap. antecedente: sed omnia, quæ concipi possunt ab intellectu, sunt (idest possunt esse, quia verba in definitione, atque propositionibus necessaria veritatis non dicunt actum, sed potentiam), sunt objectum illius, quod est objectum

ma-

materiale proximum utriusque Logicæ. Prob. si loquamur de Minore, objectum materiale proximum ipsius sunt definitiones, divisiones, argumentationes, nec non oppositiones, conversiones, æquipollentiæque propositionum; sed omnia, quæ possunt concipi ab intellectu, possunt esse, aut objectum, quod definiatur, aut quod dividatur, aut res, super qua argumentemur, aut res, circa quam formemus conversiones, oppositionesque propositionum &c.; ergo omnia, quæ possunt concipi ab intellectu, sunt, vel possunt esse objectum illius, vel illorum, quæ sunt objectum materiale proximum Dialecticæ.

110. Si loquamur de Logica Majore, hæc agit proximè immediatè de cognitionibus facientibus universale, facientibus genus, facientibus speciem &c. Sed omnia, quæ cognosci possunt ab intellectu, possunt esse objectum alicujus cognitionis facientis universale, quod vel sit genus, vel species &c. Quia nihil est cognoscibile ab intellectu, nec Deus ipse, ut suo loco dicemus, quod sub aliqua cognitione non possit univocari cum aliis, ita ut illa cognitio verè faciat universale, & consequenter habeat pro objecto rem illam: ergo si loquamur de Logica Minore, si de Majore, omnia penitus sunt objectum materiale ambarum, licet æquivocè, & relatè ad diversas cognitiones.

111. Prob. Secunda Pars, idest objectum materiale proximum Logicæ minoris esse solos conceptus formales, idest solas cognitiones, siue actus intellectuales, non autem voces, aut *conceptus objectivos*, idest res ipsas distinctas à cognitionibus, puta hominem, arborem &c. Objectum materiale proximum cujuslibet actus, & consequenter cujuslibet facultatis coalitæ ex multis actibus est illud, de quo immediatè, directè, atque explicitè tractat ille actus. Atqui omnes actus Logicæ minoris, idest omnes suæ regulæ, seu præcepta tractant immediatè, directè, atque explicitè de solis conceptibus formalibus idest de solis cognitionibus, non autem de vocibus, (quia licet hæ, vel scripta, vel alia signa externa requirantur, ut Logica tradatur, & discatur modo humano: sicut etiam ad Philosophiam, & Theologiam requiruntur, est tamen proprium aliùs facultatis inferioris, scilicet Grammaticæ, agere de illis), nec de conceptibus objectivis. Prob. Proferantur in medium omnes regulæ, seu actus Dialecticæ; & deprehendetur omnes illos tractare directè, ac explicitè vel de sola definitione (sub terminis utique universalibus complectentibus omnes, & singulas definitiones; non sub terminis

singularibus uniuscujusque definitionis, quia *Scientiæ non sunt de singularibus, sed de universalibus*, ut supra explicavimus), vel de sola divisione, vel de sola argumentatione, vel de sola conversione, vel de sola oppositione, vel de sola æquipollentia propositionum &c. Sed omnia ista sunt conceptus formales, seu cognitiones, ut constat, quia licet etiam omnia ista soleant fieri verbis, atque scripturis, hoc est per accidens, ut nos homines reciprocè intelligamus; sed primam suam originem trahunt ex internis cognitionibus, quas istis signis externis manifestamus, & quas solas immediate, ac directè docent regulæ Logicæ: ergo.

112. Explicatur. Esto homini ignaro loquendi, & scribendi infundere Deum totam Logicam actualem, & habitualem: iste sanè haberet Logicam, & mente posset illam exercere: sicut etiam possunt exercere Angeli, qui utpotè non habentes organa ad locutiones, & scriptiones similes nostris, non possunt loqui, aut scribere sicut nos. At homo ille nec haberet verba, aut scripta similia nostris, nec ullam scientiam illorum, ut ponimus: ergo sine Scientia verborum potest subsistere tota Logica actualis, & habitualis: ergo illa non sunt objectum materiale proximum, sed tantum remotum Dialecticæ, sicut cætera omnia.

113. Hinc 1. Tota Logica minor est Ars, seu Scientia *reflexa*: quia cum tota constet regulis, quæ sanè sunt actus intellectus, habet pro objecto definitiones, divisiones &c. quæ etiam sunt actus intellectus: ergo in Logica contingit, quoddam actus intellectus cadant, seu reflectant supra alios; unde nascitur, quoddam quando inter disputandum alludit aliquis ad talem, vel talem cognitionem nostram, dicitur loqui in sensu logico, idest reflexo, non verò in sensu physico, & directo; idest non loqui de rebus prout sunt in se ipsis coram Deo, sed prout à nobis malè, obscurè, & inadequatè cognoscuntur.

114. Hinc 2. Quanquam una ex regulis Logicæ sit definitum converti cum definitione, quod non convenit conceptibus formalibus, quandoquidem hi realiter distinguuntur invicem; sed objectivis: unde videtur inferri, Logicam minorem agere directè, ac explicitè de conceptibus objectivis etiam: nihilominus ista regula in isto sensu non est actus proprius Logicæ, sed corollarium, seu consequentia ex regula propria Logicæ, quæ hunc sensum reddit: ex conceptu formali, qui est definitum, arguitur ad conceptum formalem, qui est definitio, & è converso: & in hoc sensu ambo con-

conceptus formales valent ad convertentiam, non quatenus unus identificetur cum altero; sed quatenus ex uno reciprocè arguatur ad alterum, ut ex hujus conceptus formalis veritate, à qua præscindit Logica, *est homo*, arguitur veritas hujus alterius, à qua præscindit etiam Logica: *ergo est animal rationale*, & vice versa; unde conceptus ipsi formales mutuò etiā convertuntur in hoc sensu. Ex hac autem reflexa, convertentia inter conceptus ipsos formales sequitur, ut corollarium, convertentia ipsa directā inter conceptus objectivos, de qua agunt Logici occasione illius, quæ propriè ad Logicam spectat, cū hæc secunda ad Animasticam spectet, cujus est probare veritatem cognitionum constitui per conceptus ipsos objectivos.

115. Hinc 3. Verum est, quod purus Grammaticus nec potest constituere syllogismum vocalem, nec examinare sit nec nè benè constructus, nec combinare, ac disponere terminos propositionum, ut ex his fiant definitiones, argumentationes &c. sed hoc non probat Logicam tractare hæc immediatè, ac directè: aliàs etiam deberet tractare modum scribendi, quia merus scriba non potest rectè fabricare syllogismum scriptum, aut examinare sit nec nè bonus; Itaque cū syllogismus vocalis, & scriptus ut sit bonus non quidem bonitate materiali vocum, aut characterum, sed bonitate formali artificiosi discursus, debeat esse consonus syllogismo mentali, in cujus locum sufficitur, & ille syllogismus neque spectet ad artem loquendi, neque ad artem scribendi, sed ad solam Logicam: hac de causa neque merus Grammaticus, neque merus Scriba possunt illa facere; est ergo Logica necessaria ad faciendum illa non immediatè, ac directè, sed tanquam conditio sine qua non. Quod si loquaris de Logica, *prout est inter homines*, idest prout discitur ab unis, & traditur ab aliis hominibus, hæc potest dici habere pro objecto materiali proximo voces, & scripta, quia non nisi mediātibz alterutris discitur, & traditur ab hominibus, sicut etiam Philosophia, Theologia; & cæteræ omnes scientiæ humanæ.

116. Hinc 4. Sicut actiones exteriores dicuntur spectare mediātè, ac indirectè ad Prudentiam eo; quia præsupponunt interiores actus animæ, qui soli immediatè, ac directè spectant ad Prudentiam: ita dici potest voces quodammodo spectare ad Logicam, nec non scripta, sed mediātè, ac indirectè: quatenus præsupponunt conceptus formales, qui sunt definitiones, argumentationes &c. qui soli immediātè, ac directè spectant ad Logicam. Et in hoc sensu intelligi potest S. Tho. aliquando dicens, voces esse objectum materiale Logi-

œ: nempe mediatum, atque indirectum, & quasi corollarium illius, quod est objectum proximum, & immediatum Logicæ, cum qua majorem affinitatem habent voces, quam reliqui conceptus objectivi, quia illæ, secus hi supponunt per se loquendo cognitiones, hoc est conceptus formales, de quibus immediatè, ac directè tractat Logica.

117. Prob. Jam ultima Pars conclusionis scriptæ num. 108. videlicet multos conceptus objectivos esse objectum materiale proximum Logicæ majoris. Omnis facultas, quæ tractet immediatè, ac directè decem prædicamenta, seu categorias, ad quas rediguntur omnia possibilia, tractat immediatè, ac directè conceptus objectivos, & consequenter hi sunt objectum materiale proximum illius; sed Logica immediatè, ac directè tractat ea prædicamenta, seu categorias rerum, illas explicando, atque dividendo; quoniam eertè hoc fit ab aliqua facultate, & non à Physica, seu Metaphysica, seu alia nisi à Logica majore: ergo. Major est certa, nam illæ categoriæ, seu prædicamenta tota sunt referta conceptibus objectivis, idest rebus distinctis à nostris cognitionibus v.g. hæc arbor prædicamentalis, quæ tota ad Logicam spectat; *Ens reale* aliud est à se (ut solus Deus) aliud est ab alio (ut creatura). *Ens ab aliq* aliud est substantia, (quæ definitur *Ens per se*), aliud est accidens), quod definitur *Ens in alio*). *Substantia alia* est corporea, alia spiritualis, (quarum definitiones suo loco dabimus). *Substantia corporea alia* est vivens, ut homo, alia non vivens: ut saxum. *Vivens alia* est sensitiva, ut animal; alia non sensitiva, sed purè negativa, ut arbor. *Sensitiva*, idest animal aliud est rationale, aliud irrationale. *Rationale* aliud est Petrus, aliud est Joannes &c. En descensum, sive arborem prædicamentalem ad Logicam majorem spectantem, quamvis definitiones horum terminorum spectent ad alias facultates; constructio tamen, divisio, & combinatio spectat immediatè, ac directè ad Logicam, sicut & reliqua prædicamenta: spectat, inquam, non quoad omnia attributa, & reales proprietates horum omnium, sed quoad hanc solam dictam coordinationem: sed ista omnia, & ipsorum realis objectiva coordinatio sunt conceptus objectivi, siquidem sunt penitus distincta à nostris cognitionibus: ergo.

118. 2. Logica major immediatè, ac directè tractat de universalibus in genere: item de universalibus in particulari, docendo illa esse prædicabilia in sensu reali, & vero de multis: item de his universalibus primò intentionaliter sumptis explicando quid sint, &

quid non sint, ut postea videbis in suo loco: sed hæc omnia quamvis sublent conceptibus formalibus, sive cognitionibus, attamen non sunt meri, & præcisi conceptus formales, sed etiam sunt ipsi conceptus objectivi, hoc est ipsæ naturæ, seu prædicata, quæ verè enunciantur de multis: & maxime quando sermo est de illis primò intentionaliter sumptis secundum ea, quæ habent independentè à nostris cognitionibus, tametsi nequeamus de illis loqui independentè à nostris cognitionibus, sicut nec independentè à nostris verbis. Videtur igitur fatendum, Logicam majorem tractare immediatè, ac directè conceptus objectivos, licet non secundum omnem eorundem inspectionem, (siquidem nec Theologia, nec aliæ facultates, quæ sine dubio sunt de conceptibus objectivis, tractant illos secundum omnem prorsus inspectionem,) sed secundum aliquam; nempe secundum jam dictam: & licet non tractet illos, ut penitus separatos à conceptibus formalibus, quod tamen esse falsum constat ex tractatu de Prædicamentis, ubi per conceptus formales, ac voces, nec non dependentè ab utrisque tractat de omnium rerum coordinatione, ut independentè à conceptibus formalibus, & vocibus: sicut per conceptus formales, & voces tractat Theologia de Deo, ut independentè ab utrisque.

§. I I.

119. **S**ecunda Conclusio. Objectum formale Logicæ non est Ens rationis objectivum: sed multorum actuum Logicæ: objectum formale est sola ipsa veritas transcendentalis instrumentorum sciendi (puta definitionem, divisionem, argumentationem, conversionem &c.) Aliorum autem, veritas earum præmissarum, ex quibus evidenter eliciuntur hi alii actus proprii Logicæ. Ut capias primam partem conclusionis, adverte duo; unum est, Ens rationis solere esse duplex, nempe *effectivum*, & *objectivum*: Ens rationis effectivum est illud, quod efficitur ab intellectu, qui passim vocatur ratio, seu mens; cumque omnes cognitiones efficiantur ab intellectu, ideo omnes cognitiones sunt ens rationis effectivum: & in hoc sensu non negamus, sed potius asseveramus Ens rationis esse objectum formale multorum saltem actuum Logicæ: & in hoc sensu intelligendus est S. Thomas in textibus objici solitis, probandi ergo Ens rationis esse objectum formale Logicæ: concedendum est de Ente rationis effectivo, & negandum de obje-

objectivo, quod dumtaxat disputamus modò. Hoc Ens rationis objectivum definitur sic: *quod tantum habet esse objective in intellectu*, idest quod neque existit in rebus, nec existere potest, quod est chimæra, quod est impossibile, quod est mera delusio intellectus nostri: unde dici solet impendere tempus entibus rationis, qui chimæras, & impossibilia cogitat, & mentem his illusionibus passam habet.

120. Alterum est multos graves Doctores opinari omnem denominationem extrinsecam constitui per ens rationis. Denominatio extrinseca dicitur illa, quæ provenit à forma nec identificata realiter, nec unita physicè cum subjecto, sed penitus extra hoc existentè v. g. *rem esse visam, esse cognitam, esse amatam &c.* quia rem esse visam provenit immediatè, ac directè à visione tanquam à forma; hæc autem visio non est identificata, ac unita cum pariete v. g. viso, sed est in subjecto vidente: similiter rem esse cognitam provenit à cognitione, quæ non est in objecto cognito, sed in persona cognoscente: similiter rem esse amatam provenit ab amore, qui non est in amato, sed in amante, utpotè actus vitalis hujus: hæc atque similes vocantur denominationes extrinsecæ. Non ita rem esse calidam; aut frigidam, quia hæc proveniunt respectivè à calore, & frigore, quæ sunt qualitates physicè unitæ subjecto calido, aut frigido.

121. Ajunt ergo Authores illi omnem denominationem extrinsecam imbibere ens rationis, quia putant omnes nos, sive velimus, sive nolumus apprehendere formam illam extrinsecam *ut intrinsecam illis subjectis*: vel saltem apprehendere ex illa forma extrinseca nasci, seu derivari aliquid inhærens illis subjectis: eumque ambo sint impossibilia, & mera ludibria mentis nostræ, ecce jam putant se habere in omni denominatione extrinseca aliquod ens rationis: ex hoc autem principio generali consentaneas deducunt consequentias sparsas per Theologiam, Philosophiam, v. g. dicunt Sacramenta constitui, ac significare gratiam per ens rationis: quia cum aqua, & Verba Baptismi non habeant per se ab intrinseco dare gratiam hominibus, sed dumtaxat ex Divina institutione: & hæc institutio, seu lex, seu volitio, seu Decretum, seu Voluntas Divina nec identificetur realiter, nec physicè unjatur cum illa aqua, & Verbis, jam habetur esse extrinsecam illam denominationem Sacramenti: & consequenter apud ipsos habetur illa in suis visceribus importare aliquod ens rationis: similiter philosophantur passim.

122. Et similiter in re præsentì: definitionem, divisionem &c. esse

esse factas juxta regulas Logicæ, est una ex denominationibus extrinsecis, quia regulæ definiendi v. g. neque identificantur, nec physice uniuntur cum ipsis definitionibus, ut constat: ergo definitionem esse juxta regulas dicte Logicæ minoris jam includit aliquod ens rationis: hoc ajunt esse objectum formale ipsius Dialecticæ, seu Logicæ minoris. Sed est falsum propter duas rationes, ex quarum unaquaque nascuntur aliæ.

123. 1. Falsum est omnem denominationem extrinsecam imbibere intra se ens rationis: seu constitui per ens rationis: tum quia omne, quod in suis visceribus imbibit chimæram, est chimæra, & est impossibile: imbibet namq; duo contradictoria simul: sed omne intrinsece constitutum per ens rationis objectivum imbibit in suis visceribus chimæram: ens quippe rationis objectivum ut potè existens tantum in intellectu, id est nec existens, nec existere potens à parte rei, est chimæra, & merum ludibrium mentis: ergo omne intrinsece constitutū per ens rationis est chimæra: ergo si omnis denominatio extrinseca constituitur per ens rationis omnis illa erit chimærica: ergo chimæra est, rem aliquam esse visam, esse cognitam, esse amatam &c: imò cum Deum esse creditum à nobis, & esse amatum per charitatem, sint denominationes extrinsecæ, quia certè nostra Fides, & amor neque identificantur, neque uniuntur physice cum Deo, sequetur esse rem prorsus chimæricam, phantasticam, & mentis illusionem, quodd Deus sit creditus, aut amatus à creaturis: quod absit.

124. Si propterea dicas denominationes extrinsecas includere ens rationis *fundamentale*, sed non *formale*: detorquebis rem præsentem ad impropriissimam locutionem: fundamentum quippe ad aliquid non nisi improprie est illud aliquid: aliàs dicere possemus, injuriam esse vindictam, cum illa sæpissimè sit fundamentum ad hanc, item innocentiam esse pravam suspicionem, cum multoties innocentia fundamentum præbeat prave suspicioni: item Deum, & possibilia omnia esse chimæras, seu entia rationis, cum intellectui debili nostro fundamentum præbeant, quod non tam est datum, quam acceptum, ad hoc, ut de ipsis cogitet res prorsus absonas, & chimæricas.

125. Confirmatur in exemplo Fidei, ac charitatis nuper dato: nihil Sanctum, ac rationabile præbet fundamentum omni prorsus intellectui humano ad apprehensionem hæreticalem, ac blasphemiam, quidquid sit de aliquo, vel aliquibus intellectibus non bene dispositis. Sed Deum esse creditum per Fidem Catholicam, & esse amatum per charitatem Theologicam sunt quid Sanctum, ac rationabile:

bile: ergo hæc duo non præbent fundamentū omni prorsus intellectui humano ad blasphemiam hæreticalem apprehensionem, præbeant necne alicui non bene disposito: sed omnis apprehensio de eo, quod nostra Fides, vel amor, vel aliquid aliud ex eis derivatum apprehenditur, aut physicè uniantur cum Deo ipso, est apprehensio hæreticalis, & blasphemā: quoniam Sacrosancto Dei honori repugnat, quod nostri actus vitales, quales sunt Fides, & amor cum ipso identificentur, aut in ipso, qui essentialitèr est inalterabilis recipiantur: ergo Deum esse creditum, & amatum non præbet fundamentum omni penitus intellectui humano ad dictam apprehensionem: ergo hæ denominationes extrinsecæ non includunt ens rationis adhuc fundamentale.

126. Et ratio est: Nihil coexistens firmissimo, atq; infallibili iudicio de eo, quod res non est, & prorsus contemptum ab intellectu præbet huic actui, verè, & simpliciter fundamentū ad cogitandum, quod res sit: sed hæ dictæ denominationes extrinsecæ coexistunt firmissimo iudicio, & infallibili in quocunque intellectu Catholico de eo, quod nec per identitatem, nec per unionem, aut receptionem sit in Deo nostra Fides, aut amor, aut aliud ex his derivatum: & quæcumque apparentia huius rei prorsus contemnitur tanquam ludibrium mentis ab eo intellectu: ergo hæ dictæ denominationes extrinsecæ non præbent actui, verè, & simpliciter fundamentum omni prorsus intellectui ad cogitandum nostram Fidem, vel amorem, vel aliquid ex eis derivatum esse in Deo, aut per identitatem, aut per unionem, vel receptionem.

127. Ratio autem generalis ad probandum denominationes extrinsecas non imbibere ens rationis objectivum, est mera explicatio terminorum. Aliud est, quod apprehendamus formam extrinsecam, vel aliquid derivatum ex illa, ut *extrinsecam* subjecto, quatenus apprehendamus *illam esse intrinsecam* subjecto, apprehendentes scilicet identitatem, seu unionem physicam illius cum subjecto: (& hoc apprehendat qui volet) aliud *ut intrinsecam*, quatenus apprehendamus *illam per modum*, idest *per speciem* earum formarum, quæ sunt intrinsecæ aliis subjectis. Si contingeret primum; interveniret ens rationis objectivum: sed unde probant hi DD. esse prorsus necessarium, quod (velimus nolimus) apprehendamus visionem v. g. nostram esse intrinsecam parieti, quem intuemur: Fidem, ac charitatem nostram Deum esse intrinsecas ipsi Deo, cum sciamus certò indubitanter illas, utpotè accidentia, & actus vitales creatos, nec esse, nec posse esse intrinsecas Deo per identitatem, aut receptionem? Sed esto, quod si

ve velimus, five nolimus, apprehendere debeamus eas formas *esse intrinsecas* subiectis denominatis: hinc quo jure sequitur denominationem ipsam constitui per ens rationis? Numquid res constituuntur essentialiter per nostras apprehensiones, aut per illud quod nos apprehendimus? Quantum solent distare res à nostris apprehensionibus, ut passim experimur! Ergo tamen si contingeret semper omni intellectui humano illud primum, non sequeretur, denominationes extrinsecas constitui in se ipsis per ens rationis, sed solum sequeretur, intervenire ens rationis quando nos illas cognoscimus: sic quando agnoscimus illas, & quascumque alias, intervenit vitalis nostra operatio, nempe ipsa nostra cognitio; at neque illa, neque objecta alia constituuntur in se ipsis per nostram vitalem operationem, quæ sit cognitio.

128. Secundum itaque est, quod evenit, nempe nos apprehendere solitos esse formas extrinsecas per modum, idest per speciem formarum, quæ sunt intrinsecæ suis subiectis, ut est calor subiecto calido, albedo subiecto albo, frigus subiecto frigido &c. Sed hoc non probat nos formare entia rationis quotiescumque eas denominationes extrinsecas cognoscimus; alias quotiescumque cognoscimus Deum etiam per actum Fidei supernaturalis, & infallibilis, quoties cognoscimus Angelos, animas racionales, substantiam quamcumque, actus nostros vitales, accidentia omnia supernaturalia, haberemus cognitiones effingentes, atque formantes entia rationis. Cum enim non cognoscamus intuitivè, ac per species proprias, nisi paucula ista accidentia materialia, quæ oculis, auribus, tactu, aut alio sensu externo percipimus, cætera illa omnia agnoscimus abstractivè, ac per species valdè improprias, & alienas, & per modum, seu similitudinem rerum aliarum: ergo si hoc sufficeret ad fingendum, seu formandum ens rationis, sequeretur, omnes cognitiones prædictarum rerum esse meras fictiones, & formatrices chimærarum, seu entium rationis.

129. Ratio autem est. Quoties cognitio neque attingit rem chimericam, neque rem possibilem attingit per expressionem essentialiter falsam, & illi rei repugnantem, non efformat ens rationis: quia non sunt nisi hi duo modi formandi entia rationum: at fieri potest, quòd cognitio habeatur per speciem rei valdè diversæ, atque alienæ à suo objecto, & tamen quòd neque attingat rem chimericam, neque attingat rem possibilem per expressionem, seu tendentiam essentialiter falsam, atque rei illi repugnantem, ut patet in exemplis nuper datis: & patet insuper ex eo, quòd non sit necessarium, omnem cognitionem exprimere in se ipsa, & in suo modo tendendi qualitatem speciei, & alio-

aliorum principiorum, ex quibus nascitur: ergo fieri potest, quod cognitio habeatur per species valdè alienas, & improprias, quin fingat, seu efformet ens rationis.

130. Obiic. tria. Omnis extrinseca denominatio est ens rationis, quia denominatio fit per rationem, hoc est per intellectum. Resp. id esse verum de extrinseca denominatione *intentionaliter sumpta*, id est de actu illo intellectus, quo cognoscimus subiecto competere talem, aut talem denominationem: sed idem contingit denominationibus intrinsecis, & insuper non venit ad rem, quia ista cognitio non est ens rationis *objectivum*, quod dumtaxat disputamus: sed subiectivum. Esse tamen falsum de ipsa denominatione extrinseca realiter sumpta prout est in se ipsa, quia hæc præcisè consistit in eo, quod visio corpora v. g. sit visio parietis (idem respectivè de aliis denominationibus extrinsecis,) sed quamvis non reflexè cognoscas visionem esse visionem parietis, illa re vera est visio parietis: sicut quamvis non reflexè cognoscas nivem esse albam, illa re vera est alba, & sic in aliis: ergo quamvis non detur ista cognitio, quæ est opus rationis seu intellectus, subsistit denominatio extrinseca sumpta objectivè: & realitèr: ergo sic sumpta non constituitur per istud opus rationis.

131. Secundum est. Denominatio, seu forma extrinseca non est aliquid reale in subiecto denominato: ergo aliquid rationis. Nego consequentiam: quia quod simpliciter non est in subiecto, neque est aliquid reale *in illo*, neque aliquid rationis *in illo*: at formæ extrinsecæ non sunt simpliciter in subiecto denominato, sed prorsus extra illud: quia in hoc stat, quod sint formæ extrinsecæ: & quia actus, quo credimus Deum prorsus est sine physica unione ad ipsum, sicut etiam actus, quo Deum diligimus: ergo formæ extrinsecæ nec sunt aliquid reale, nec aliquid rationis *in subiecto denominato*, nisi forte relativè ad intellectum finitus cognoscentem res.

132. Tertium. Illud, quod ex forma derivatur in subiecto denominationis, v. g. ex visione in pariete viso, vel est aliquid reale, vel morale, vel neutrum. Resp. negando suppositum, sicut tu negares suppositum huius dilemmatis: *ille homo qui est lapis, vel est aliquid reale, vel non?* Cum enim ambo extrema supponant eandem falsitatem, ambo sunt falsa, & consequenter non sunt contradictoria: idem respondemus nos: quia ex forma extrinseca nihil derivatur in subiecto denominato: unde nec est reale, neque morale, neque neutrum, quia hæc omnia supponunt aliquid derivari, cum tamen nihil derivetur, licet apprehendatur à nobis per speciem ipsi derivatæ, sicut apprehen-

Daniel.
7.

2. Ma-
cb. 3.

ditur Æternus Pater per speciem Senis juxta Hieroglyphicum Danielis, *antiquus dierum sedet*, & rursus, *Capilli capitis ejus quasi lana mundus*: sumus tamen certissimi, quod Æternus Pater non sit Senex corporeus: & sicut apprehendimus Angelos per speciem, seu similitudinem robustorum juvenum juxta Hieroglyphicum illā, *Apparuerunt duo juvenes virtute decori, optimi gloria &c.* Judicamus tamen certò omnino, ac indubitanter Angelos non esse corporeos juvenes, sed purissimos Spiritus: igitur solum contingit, quòd existente Deo v. g. & nostro amore ipsius habetur in rebus hæc denominatio extrinseca, *Deus amandus*, quin ex nostro amore derivetur in Deo quidpiam reale, morale, aut neutrum: hæc autem denominatio sumpta in abstracto pro sola forma est prorsus extrinseca Deo; sumpta pro solo subiecto est prorsus intrinseca Deo, sumpta in concreto, & adæquate est semi intrinseca, & semi extrinseca, quia resultat ex Deo, qui perfectò sibi est intrinsecus, & ex nostro amore, qui perfectò est Deo extrinsecus.

§. III.

133.

Altera ratio promissa est: esto in omni denominatione extrinseca intervenire semper, ac necessariò ens, seu figmentum rationis: esto etiam quòd ipsa denominatio constituatur intrinsece per hujusmodi figmentum, seu ens rationis: nihilo tamen minus Dialectica, idest actuales regulæ, actualiæve præcepta ipsius non habent pro objecto formali tale ens rationis. Licet enim definitionem v. g. esse factam *juxta regulas definiendi* sit denominatio extrinseca ipsi definitioni, ut revera est, & licet id includeret aliquod ens rationis, verumtamen regulæ definiendi non habent pro objecto definitiones, *ut directas*, seu *ut factas juxta ipsas regulas*; quemadmodum licet Deum esse creditum, & esse amatum à nobis sint denominationes ipsi Deo extrinseca; veruntamen, quia nostra Fides non est de Deo *reduplicativè ut credito per nos*, sed de Deo sine ista reduplicatione: & noster amor non est Dei, *reduplicativè, ut amati per nos*; sed Dei sine ista reduplicatione: ideo neque nostra Fides, neque noster amor Dei habent pro objecto formali ullum ens rationis.

134. Explicatur. Nam ex harum, & similium reduplicationum abusu multa nascuntur absurda. Aliud est, quòd intueamur parietem: aliud quòd intueamur parietem, *ut intrinsecum*. Primum est verum; secun-

secundum est falsum, quia non intuemur nostrammet intuitionem. Item aliud est, quod audiamus voces; aliud, quod audiamus voces, *ut auditur*. Primum est verum, secundum est falsum ob similem rationem. Item aliud est, quod amemus objectum ita, ut ex nostro amore, & objecto resularet hoc totum *objectum amatum*: aliud, quod amemus objectum, *ut amatum*. Primum est verum, & sic fit exercitè reduplicatio, sed non signatè: secundum est falsum: & similiter philosophari potes in rebus similibus.

135. Idem impræsentiarum: aliud est, quod regulæ definiendi procedant de definitione specificativè, ac secundum se sumpta, & hoc est verum, sed in definitione ipsa secundum se sumpta non apparet ullum Ens rationis, quod sit objectum formale earum regularum: Aliud, quod procedant de definitione, *ut facta juxta ipsas regulas*: & hoc est falsum, quia regulæ non reflectunt supra se ipsas: unde quamvis hic includeretur aliquod ens rationis, non sequeretur illud esse objectum formale earum regularum: aliud demum, quod illæ regulæ procedant de definitione, *ut factibili juxta ipsas regulas*: & hoc est verum, aut falsum juxta sensum, quem habuerit illa reduplicatio *ut*: si significet eam falsitatem ita esse necessariam ad hoc, ut Logica agat de definitione, ut si hæc non esset factibilis, regulæ Logicæ non agerent de ipsa: si inquam id significet, est verum; sed hoc solum probat eam factibilitatem sub his terminis esse conditionem. sine qua non: sed non probat esse objectum formale.

136. Quemadmodum si paries non esset visibilis, cerè non videretur; sed hoc non probat visibilitatem quomodolibet sumptam esse objectum formale visionis, sed talem determinatam visibilitatem consistentem in luce, & colore offuscis parietis: & quemadmodum si objectum non esset amabile non amaretur; sed hoc non probat amabilitatem quomodolibet sumptam esse objectum formale amoris, sed talem determinatam amabilitatem, nempe quæ consistat in actuali bonitate objecti.

137. Sin verd illa reduplicatio, *ut* significet eam factibilitatem esse objectum formale prædictarum regularum, est falsum: tum propter nupera exempla: tum quia cum definitio v.g. non sit factibilis juxta regulas Logicæ eo modo physico, ac materiali, quod domus est factibilis juxta regulas Architecturæ, nimirum per conjunctionem, separationem, coordinationem, combinationemque unarum partium cum aliis, siquidem definitio est unus actus intellectus simplex, & indivisibilis: inde est, quod non est aliter factibilis juxta regulas Logicæ

nisi quatenus intellectus eis bene imbutus, & apprehendens multoties varios actus intellectus potius prorumpit in hunc v.g. *Animal rationale*, quàm in hunc, *Animal implume, bipes*: ergo tota factibilitas definitionis juxta regulas Logicæ stat physicè coram Deo in ipsa productione mentalis definitionis facta ab intellectu conscio regularum definiendi: ergo si objectum formale harum esset ea factibilitas, sive ut alii dicunt *dirigibilitas passiva*, objectum formale Logicæ nihil aliud esset, quàm *productio mentalis definitionis* facta ab intellectu conscio regularum definiendi: sed hoc est falsum.

138. Prob. ostendendo secundam, sed primariam partem Conclusionis scriptæ num. 115. nimirum objectum formale Logicæ (idest actualium regularum, seu principiorum Logicæ, nam hæc sola, ut advertimus, capacia sunt habendi objectum formale; secus habitus, seu qualitates, seu facilitates genitæ ex repetitione harum regularum: vel saltem, si hæc quoque qualitates habent objectum formale, habebunt idem, quod illæ regulæ, ex quibus generantur, & ad quarum usum facilitant) objectum inquam formale Logicæ esse veritatem ipsam transcendentalem instrumentorum sciendi, aliquando verò veritatem præmissarum, ex quibus illæ regulæ probantur. Omne iudicium sive sit speculativum, sive practicum, sive quæ speculativum, sive quæ practicum habet pro objecto formali veritatem sui objecti materialis: sed omnes regulæ, & principia Dialecticæ sunt iudicia quædam circa instrumenta sciendi interdum purè speculativa, ut sunt plerumque definitiones instrumentorum sciendi, interdum practica, ut sunt illæ regulæ, seu principia, quæ enunciant qualitates, seu conditiones, quas debent habere instrumenta sciendi; ergo omnes regulæ, seu principia Dialecticæ, sive quæ speculativa, sive quæ practica habent pro objecto formali veritatem non quidè veritatem alius disparatæ rei; aut veritatem in genere; sed veritatem talem, ac talem in specie v.g. veritatè, quod rectitudo definitionis poscit genus, & differentiam &c. Pergimus: vel ergo sermo est de illis regulis, quæ sunt per se notæ, atque evidentes: vel de illis, quæ instar Conclusionum probantur, & eliciuntur ex aliis præmissis? Si primum; objectum formarum illarum est transcendentalis Veritas instrumenti Sciendi, quod fuerit objectum materiale illarum, quia objectum formale cuiuslibet iudicii, seu propositionis per se notæ est transcendentalis veritas sui objecti, v. g. huius. *Bis tria sunt sex: omne totum est maius sua parte &c.* Si secundum; illæ regulæ erunt Conclusiones deductæ ex eis præmissis; objectum, autem formale omnis Conclusionis ut deductæ ex præmissis est

veritas ipsa præmissarum, quia hæc est, quæ immediatè, directè, ac positivè movet intellectum ad conclusionem.

139. Totus hic discursus videtur legitimus supposita majore, quæ facillè explicatur, atque probatur. Omnis amor, sive efficax, sive qua inefficax, sive qua solius complacentiæ, sive qua altæ appetitionis habet pro objecto formali bonitatem (sive realem, sive apparentem) sui objecti, nempe quia licet inter amores sint variæ species, hæc nunquam mutant objectum formale bonitatis, sed solum faciunt, quodd in ordine ad alia subjectivè tantum, & quasi materialiter differant amores; in objecto autem formali semper conveniunt. Idem dicimus in illa majore: judicia multifariam differunt inter se, quia præter alias multas differentias una sunt purè speculativa, altera sunt practica, tendentiaque in opus aliquod; verumtamen differentia hæc est merè subjectiva, & quasi materialis; sed omnia conveniunt in objecto formali veritatis, quia veritas sive realis, sive apparens est illud unum, quod intellectus quærit in suis judiciis.

140. Et prob. illa ma. præsertim propter judicia practica: hæc non minus, quàm speculativa habent veritatem moventem intellectum ad illa v. g. quia definitio verè coram Deo debet constare genere, ac differentia, est in Logica practicum illud evidens judicium, *omnis definitio debet constare genere, & differentia*: similiter quia verè coram Deo divisio debet distribuere totum in suas partes, est in Logica illa regula, seu illud evidens judicium, *divisio est ratio totum in suas partes distribuens*: & similiter de aliis: ergo ideo formaliter tanquam propter objectum formale concipit intellectus judicia practica, quia illa sunt vera, sicut ideo formaliter tanquam ab objecto formali amamus aliquem finem amore practico, idest instigante ad ponendum media, quia finis ille apparet nobis bonus.

141. Ubi pro æquivocationibus refecandis adverte 4. Aliud est, quodd judicia *ut practica* habeant aliam definitionem, alias proprietates, & qualitates, quàm judicia *ut speculativa*: & hoc est verum. Aliud, quodd habeant in sensu reali, quidquid sit de nostris reflexis præcisionibus, diversum objectum formale in genere: & hoc est falsum, quia omnia judicia, sive in genere, sive in specie, sive in individuo, si sint judicia affirmativa, habent in sensu reali pro objecto formali, aut veritatem intrinsecam, & transcendentalem sui objecti materialis, aut veritatem illius antecedentis, sed illius motivi, ex quo concipiuntur, ut contingit in actibus Fidei Catholicæ, qui habent pro objecto formali veritatem autoritatis, ac doctrinæ

Di-

Divinæ, quæ complexa veritas est motivum illud, ex quo proximè, adæquatè, ac positivè concipimus illos actus. Negare igitur objectum formale proximum adæquatum actuum Dialecticæ in sensu reali, ac directo esse veritatem instrumentorum sciendi ex eo, quod multi actuum illorum non sint speculativi, sed practici, videtur mera tergiversatio. *Dicimus in sensu reali, ac directo*; quia si datur locus reflexionibus, & præcisionibus mentalibus, cum hæc possint esse multiplices, multiplicia quoque esse possunt objecta formalia.

142. Secundum. Non agimus modò de fine, quem homo Logicus potest sibi præfigere in actibus Logicæ: quoniam iste potest esse multiplex, & in diversis diversus, ut dicemus capite sequente: & idem potest contingere in virtutibus ipsis Theologicis, nam potest homo concipere actum Fidei, aut actum Charitatis ex fine, vel fugiendi pœnas Inferni, vel ex fine obediendi Legi Divinæ, vel ex fine augendi merita propria. Cæterum cum isti omnes sint fines extrinseci, non obstant, quominus Charitas theologica habeat pro objecto formali solam bonitatem Divinam, & Fides solam auctoritatem Dei loquentis. Similiter impræsentiarum: ob multos fines possunt Logici concipere regulas, ac conclusiones Dialecticæ; sed isti erunt fines extrinseci, aut reflexi: non tamen obstant quominus objectum formale proximum adæquatum cujuslibet regulæ, seu actus, seu conclusionis Logicæ sit in sensu reali veritas specificabilis; quod dicit: quia non obstant, quominus illæ regulæ, seu actus, seu conclusiones sint judicia; de ratione autem judicii est habere in sensu reali pro objecto formali veritatem practicam, vel speculativam rei illius in particulari, aut in generali, de qua in particulari, aut generali est judicium practicum, vel speculativum: sicut de ratione amoris est habere pro objecto formali bonitatem absolutam, vel respectivam in generali, aut particulari rei illius, de qua in generali, vel particulari est amor absolutus, vel respectivus.

143. Tertium. Non negamus falsitatem quoque posse esse objectum formale multorum actuum Logicæ, nimirum illorum, qui fuerint negativi, idest dissensus circa suum objectum materiale: sicut enim malitia est objectum formale odii, quia movet ad hoc, sicut bonitas ad amorem; ita falsitas est objectum formale dissensus, seu negationis: quia sicut veritas, vel per se patens, vel aliundè probata movet proximè adæquatè intellectum ad assensum: ita falsitas vel per se patens, vel aliundè probata movet proximè adæquatè intellectum ad dissensum, sive negationem; unde actus negativi, qui

qui sunt in Logica: v. g. syllogismus, non debet constare *medio indistributo*, habent pro obiecto formali falsitatem illius, quod negat: quia tamen invaluit mos assignandi pro obiecto formali actuum intellectus veritatem, sicut bonitatem pro obiecto formali actuum voluntatis; ideoque terminis illis concedimus conclusionem. De cætero autem cum intellectus non minus prodeat in actus negativos, quam in affirmativos: sicut voluntas non minus concipiat actus suæ, quam prosecutionis, oportet non confundere obiectum formale unorum, & aliorum: veritas, & bonitas est obiectum formale prosecutionum; falsitas, & malitia aversionum, & sugarum.

144. Quartum. Non dicimus veritatem in genere esse obiectum formale Logicæ: quoniam genus illud est valde universale, ac non sufficeret ad specificandum Logicam: nec quamlibet speciem veritatis: sed determinatam, & specialem veritatem instrumentorum sciendi, quæ licet sint multiplicia; attamen in ordine ad finem *recte discernendi* univocantur, & faciunt unam speciem si non physicam saltem moralem: quemadmodum licet præcepta, & articuli, quibus constat Religio Catholica, sint multa, & diversa; nihilominus faciunt, & constituunt unam in specie Religionem Catholicam: rursum cum Logica non sit una qualitas simplex, ac indivisibilis, ut supra diximus, sed ad placitum, ac institutionem hominum composita ex multis actibus, regulis, principiis, ac conclusionibus, & unaquæque ex his habeat suum obiectum materiale, & unumquodque habeat suam veritatem vel per se notam, vel aliunde probatam, ideoque quando dicimus hanc veritatem esse obiectum formale Logicæ, non debes intelligere unam singularem individuum veritatem, nec unam conclusionem singularem Logicæ, sed multas veritates, ac multos actus Logicæ cum accommoda distributione, ita ut obiectum formale actus Logici A agentis de definitione; v. g. non sit veritas divisionis, sed veritas ipsius definitionis, & quidem illius determinati prædicati, seu proprietatis, quæ de definitione enunciat per illum singularem actum Logicum: & similiter de aliis. Denique nec dicimus obiectum formale esse veritatem sub his terminis *veritas, verum*; sed sub illis, sub quibus effertur actus ipse Logicus; v. g. obiectum formale huius regulæ Logicæ: *definitio debet esse clarior definito; est major ipsa claritas definitionis supra definitionem*: & similiter de aliis.

145. Sed obiectis: obiectum formale facultatis, quæ tota est reflexa, debet esse aliquid reflexum, quoniam omnis facultas specifica-

ficatur à suo objecto formali. At Dialectica tota est reflexa: veritas autem suarum regularum non est quid reflexum; ergo hæc non est objectum formale Dialecticæ. Confirmatur. Nequit esse objectum formale Dialecticæ id, cujus naturam, & proprietates ipsa non curat; sed non curat naturam, & proprietates veritatis, quia cura hæc ad Animasticam spectat; ergo. Nego maiorem, cujus adjuncta probatio est vera, sed insufficiens: aliàs objectum formale Virtutis, quæ tota est creata, deberet esse aliquid creatum, siquidem Virtutes specificantur etiam à suis objectis formalibus. At tres Virtutes Theologales totæ sunt quid creatum, ut constat: ergo objectum formale ipsarum deberet esse quid creatum. Quod Theologiæ repugnat docenti objectum formale ipsarum debere esse quid Divinum: v. g. Fidei esse authoritatem ipsam Dei docentis, Charitatis esse bonitatem absolutam Dei; itaque facultates speculativæ, atque Virtutes specificantur non quoad omnia, sed quoad *discretionem* inter unas, & alias à suis objectis formalibus, & etiam à modis, quibus respiciunt illa. Nego item maiorem confirmationis: quia actus Charitatis, quo diligis super omnia Deum propter semet ipsum; certè non disputat naturam, & proprietates bonitatis Divinæ, sed illam supponit; & tamen habet pro objecto formali bonitatem Divinam. Ratio est: ut aliquid sit objectum formale actus A, sufficit, quòd ille proximè positivè adæquatè moveatur ex illo. At potest moveri ex illo, tametsi illius naturam, & proprietates non disputet, sed aliundè supponat notas: ergo.

C A P U T VI.

Quodnam sit Objectum attributionis Logicæ.

146. **C**Um hic audis Logicam intellige hominem ipsum logicum juxta id, quod advertimus cap. 4. n. 102. Rursus hic ne intelligas Logicam Majorem, quia de hac non disputamus modò; sed Minorem, seu Dialecticam, cujus objectum attributionis nunc examinatur, & loco citato fuit definitum: quia tamen hic est multum de modo loquendi, ut notant Authores, ne vocibus hæreamus, realitates distinguemus. Sit itaque conclusio. Vel loquimur de objecto attributionis, quod sit finis proximus, intrinsecus, & naturalis Logicæ; vel de objecto attributionis, quod sit finis extrin-

intrinsicus, remotus, & ex placito hominum. Si primum; nihil est assignabile *simplex*, ac *indivisibile* physice, quod in individuo, vel in specie, aut genere infinis sit objectum attributionis Logicæ, five actualis, five habitualis. Si secundum; multa possunt esse objectum attributionis Logicæ, sed absolute, & simpliciter ex usu communi, & placito hominum est demonstratio.

147. Prob. 1. pars. Quoties facultas, Scientia, aut ars non est una res *simplex*, ac *indivisibilis*; sed complexum quoddam resultans ex plurimis, ac heterogeneis actibus, item ex plurimis, ac heterogeneis habitibus, toties finis intrinsicus proximus, & naturalis (consequenterque objectum attributionis sumptum in hoc sensu) non est quidquam physice *simplex*, ac *indivisibile*: at Logica, ut diximus cap. 1. non est res aliqua *simplex*, ac *indivisibilis*; sed compositum quoddam ad placitum, & institutionem hominum resultans ex plurimis, atque heterogeneis actibus (si sermo sit de Logica actuali) docentibus unis definire, aliis dividere, aliis convertere propositiones &c: item resultans ex plurimis, ac diversis habitibus (si sermo sit de Logica habituali) quorum uni generantur ex unis illorum actuum, & alii, ex aliis, nempe voluerunt homines unire, ac coördinare omnes illos actus, & habitus: & imponere hoc nomen *Dialectica* complexo ex illis resultanti: ergo non est assignabilis res ulla *simplex*, ac *indivisibilis*, quæ in individuo, aut in specie, vel genere infinis sit finis proximus, intrinsicus, ac naturalis Logicæ, & consequenter, quæ sit objectum attributionis illius in hoc sensu.

148. Prob. Ma. Quoties sunt multi fines intrinseci, ac naturales inadæquati, non est assignabilis finis intrinsicus, & naturalis, qui sit physice *simplex*, ac *indivisibilis*: nam multi fines inadæquati faciunt unum adæquatum compositum ex illis omnibus, & consequenter qui non est *simplex*, ac *indivisibilis*: sed quoties facultas componitur ex multis actibus, seu habitibus dantur multi fines inadæquati. Prob. Unusquisque actus ex illis habet suum finem proximum intrinsicum, ac naturalem distinctum à fine aliorum: ergo si dantur plurimi actus dantur plurimi fines proximi, ac naturales, quorum unusquisque est partialis, & inadæquatus respectu totius Scientiæ, tametsi totalis, & adæquatus sit respectu illius actus, seu habitus singularis. Prob. ant. & loquamur de his duobus actibus Logicæ, definitio debet constare genere, & differentia: Syllogismus debet constare tribus terminis solis, idem dicturi de omnibus aliis.

149. Finis proximus, intrinsicus ac naturalis primi actus est illa

denominatio, ille effectus formalis, hoc est *illud totum*, quod resultat ex ipso actu, & intellectu, cui unitur, nempe hic effectus formalis *sciens quibus debeat constare definitio*. Finis autem intrinsecus, ac naturalis actus alterius est hic, *sciens quibus debeat constare Syllogismus*. Quoniam finis proximus, intrinsecus, ac naturalis cuiusvis formæ præsertim accidentalis (quales sunt omnes actus, & habitus Logicæ) cum sit entitas incompleta, est effectus ille formalis, seu denominatio, seu totum, quod resultat ex ipsa, & subiecto, cui unitur v.g. finis intrinsecus, naturalis, & proximus albedinis, est *Album*: formæ viventis est *Vivens*, & similiter de omnibus formis: at esse scientem, quibus constare debeat definitio, & esse scientem quibus constare debeat Syllogismus, sunt res valde diversæ: ergo unusquisque ex illis duobus actibus habet finem intrinsecum, proximum, & naturalem diversum à fine alterius: similiter philosophandum de habitibus: cum enim illi etiam sint formæ accidentales, ac entitates incompletæ, finis proximus, intrinsecus, ac naturalis ipsorum est effectus ille formalis, qui resultat ex unoquoque illorum, & intellectu, cui unitur, v.g. esse scientem habitualiter, quibus constat definitio: esse scientem habitualiter seu bene, ac cum possessione, quibus constat syllogismus: quæ sunt duæ res valde diversæ licet solum distinguantur inadæquate, quando alludant ad eundem intellectum.

150. Neque dicas primò: finem intrinsecum, ac naturalem prædictorum actuum esse, *quod intellectus sciat illa, quod intellectus habeat facilitatem*, quoniam actus ipsi sunt illa scientia actualis, & habitus sunt illa facilitas: ergo haberent se ipsos pro fine intrinsecò, & naturali, aut unionem sui ipsorum cum intellectu (quæ tamen uniones etiam sunt invicem distinctæ) non ergo loquendum est isto modo in abstracto; sed in concreto, ut nos locuti sumus: quia finis intrinsecus, ac naturalis formæ præsertim accidentalis non est forma ipsa, sed totum illud, quod resultat ex ipsa, & subiecto, cui inhæret v.g. *intellectum esse scientem, esse facilem, & promptum*: quæ locutiones in concreto facile æquivocabuntur cum aliis in abstracto, nisi accuratè discernas. Neque dicas 2. præter hunc finem intrinsecum, ac naturalem, quem assignavimus, habere actus, seu habitus Logicæ alium intrinsecum etiam, videlicet demonstrationem, aut aliud quidpiam: hoc enim jam fuit refutatum cap. 4. num. 17. ubi explicuimus, quem ordinem seu relationem habeant actus, & habitus Logicæ cum demonstratione v.g. & quem non habeant.

151. Hinc objectum attributionis adæquatum Logicæ, sumptum pro fine proximo, intrinsecò, & naturali ejusdem, est complexum, seu

sed congeries, seu multitudo resultans non quidem ex omnibus actibus, seu habitibus Logicæ; sed ex omnibus denominationibus, sive effectibus formalibus Logicis, v. g. resultans ex denominationibus *Scientiæ definire*, *Scientiæ argumentari*, *scientiæ convertere propositiones* &c. Et hæc multitudo, seu complexum non respondet indivisè toti Logicæ, quasi hæc foret res aliqua simplex, ac indivisibilis: nec respondet omnibus, & singulis partibus Logicæ, quasi pars docens definire habeat pro fine intrinseco illud complexum, sive multitudinem actuum: sed respondet toti Logicæ distributione accommodata, hoc est una pars illius complexi respondet instar finis intrinseci, ac naturalis cum parte Logicæ, & alia pars illius complexi respondet alii parti Logicæ, & sic eum proportionem.

152. Hinc a. Ne apprehendas hanc Logicam instar acervi lapidum, quorum uni neque ex natura sua, neque ex hominum placito, & institutione dicunt actualem ordinem ad alios. Sed apprehende illam instar ædificii artificiosi, & ex Architecti voluntate sic, vel sic erecti. Sicut enim hoc est unum, non quia saxa, trabes, lateres, terra, ligna, ferrum, quibus constat, dicant in vicem ullum ordinem positivum sub ordinationis positivæ, ac naturalis (quando quidem trabes illæ v. g. nullam physicam paterentur violentiam tametsi non conjungerentur cum illis parietibus, cum quibus hic, & nunc construunt domum) sed quia, ex una parte ista omnia sunt intrinsecè capacia, ut sic, vel sic combinentur inter se, & ex altera parte Architectus quia voluit, sic, & sic illa combinavit in ordine ad pulchritudinem, vel commoditatem inhabitantium, vel in ordine ad alios fines. Ita Dialectica est una Scientia, seu Ars, seu facultas, ut jam monuimus, non quia Doctrinæ actuales, seu habituales circa definitionem, & similes circa divisionem, & similes circa argumentationem dicant invicem ullum positivum ordinem positivæ, ac naturalis subordinationis (quia nullam paterentur violentiam physicam Doctrinæ actuales, & habituales circa definitionem, tametsi intellectus imbutus illis nunquam cogitaret demonstrationem v. g., sed illis uteretur ad fines alios, ut poterat) sed quia ex una parte sunt intrinsecè capacia, ut juvent ad rectam aliquam, & evidentem argumentationem: & ex altera parte Aristoteles primus Professor Dialecticæ, & ceteri posteriores Logici quia voluerunt, & ex mero ipsorum placito atq; institutione utuntur illis omnibus doctrinis in ordine ad finem eliciendi evidentem aliquam argumentationem jam hanc, jam illam, jam sic, jam aliter dispositam, jam in hac jam in illa materia

quam subministrant facultates aliæ . 3. Ne objicias paritatem ex objecto formali proximo ad tale, vel tale objectū attributionis distinctum ab eo, quod assignavimus pro uno quoque respectivè actu, & habitu Logicæ: quoniam omnis prorsus cognitio judicativa intrinsecè, ac essentialiter habet esse ex aliquo objecto formali, quod pro affirmativis est veritas objecti materialis, pro negativis est falsitas ejusdem, sicut bonitas est objectum formale omnis amoris, & malitia odii omnis. Ceterum non omnia sive materialia, & externa, sive spiritualia, & interna, quæ ordinantur per homines ad aliquem finem, habent persuiammet essentiam ordinari actū ad finem illum, ut constat. Neque objicias paritatem aliarum legum, & Præceptorum, quæ habere videntur pro fine remillam, quæ præcipitur: etenim confundes præceptum cum persona præcipiente: hoc, non illud est capax operandi propter finem. Aliud igitur est, quod lex, & præceptum intrinsecè tendat in rem præceptam: sitque valdè conducens ad illum, & hoc est verum; sed tantum probat habere illam pro objecto materiali: aliud verò, quod intrinsecè tendat in illam, tanquam in suum finem intrinsecum, ita ut non possit carere illa sine violentia sibi physicè illata, & hoc est falsum. Sic panis, vinum, aqua, pisces, carnes, suapte natura sunt idonea humane nutritioni, atque ob hunc finem illis utuntur homines: ceterum illa non habent pro fine intrinseco sue nature humanam nutritionem.

§. I I.

153. **S**ecunda pars conclusionis erat: si loquamur de objecto attributionis sumpto pro fine extrinseco, ac remoto, & explicito hominum, multa possunt esse objectum attributionis Logicæ: quoniam hæc est capax, ut homo utatur illa in ordine ad multos, & diversos fines, ut constat. Ceterum absolute, ac simpliciter ex usu communi, & placito hominum sola demonstratio est objectum attributionis Logicæ. Probatur. Complexum ex actibus, seu habitibus, quod vel ex sua natura, vel ex hominum usu communi, & institutione est facultas rectè disferendi, habet ex sua natura, vel ex hominum usu, & institutione pro fine, seu objecto attributionis ipsum, quod est rectè disferere: non enim aliunde melius quàm ex definitione facultatis possumus explorare ipsius objectum attributionis: atqui Logica minor, seu Dialectica est complexum quoddam ex actibus, si loquamur de Logica actuali, seu ex habitibus,

bus, si de habituali, quod ex sua natura, vel ex communi hominum usu, & institutione est facultas rectè differendi, ut constat ex suo Authore Aristotele agente *manus Dialecticæ esse disputare*, & ex S. Augustino Primario Professore hujus facultatis agente *quid aliud est Dialectica, quam peritia disputandi*, & rursus. *A disputatione Dialectica nomen accipit: ita græce Dialecticus multo usitatus, & tolerabilius latinè dicitur Disputator; quod si usus admitteret, latinè Dialectica, Disputatoria diceretur*: ergo Logica, ex sua natura, vel ex hominum usu, & institutione habet pro fine, seu objecto attributionis hoc, quod est *rectè differere*.

1. Reib.
c. 1. § 2.
August.
17. contra
Cresconiu
cap. 18. § 14.

154. Atqui non ex natura sua, ut toties diximus. Tum quia doctrina definiendi, v. g. nullam pateretur physicam violentiam tamen si plene possideretur ab intellectu nil penitus curante demonstrationem, sicut possidetur ab Angelis nequeuntibus facere demonstrationes circa res purè naturales, & idem potiore jure de Deo. Tum quia finis proximus intrinsecus, & naturalis cujuslibet formæ præsertim accidentalis est totum illud, quod resultat, ex ipsa, & subiecto, cui unitur naturaliter. Totum autem quod resultat ex doctrina definiendi v. g. etiam reduplicativè ut doctrina, non est *demonstratio*, sed *sciens definire*; Imò totum etiam, quod resultat ex doctrina demonstrandi, non est demonstratio ipsa directa, & signata, sed *sciens modum demonstrandi*, quando quidem Angeli, & infinitè melius ipse Deus fungitur doctrina, ut doctrina definiendi, ac demonstrandi, quam utique possunt docere nos, & tamen Deus, quippe qui omnia intuetur, nec cognoscit nec cognoscere potest per demonstrationem, quia hæc est discursus, & Deus nec discurret, nec discurrere potest, ut docet Theologia. Unde licet doctrina reduplicativè, ut doctrina dicat specialem ordinem, seu respectum, seu relationem ad illud, de quo est doctrina; ea tamen relatio non est *naturalis connexionis* cum illo; sed vel solius veritatis, vel etiam conducentiæ; atque utilitatis ad illud faciendum prout fuerit subiectum, cui inest ea doctrina.

155. Ergo logica solum ex usu, ac institutione hominum habet pro fine sive objecto attributionis hoc, quod est *rectè differere*. Sed non rectitudine solius probabilitatis, aut solius certitudinis sine evidentia (qualem certitudinem habent actus fidei nostræ, qui cum certissimi sint atque infallibiles utpotè innixi Doctrinæ Dei, non sunt evidentes; Sed plerumque obscurissimi, arduique intellectui nostro) Ergo habet pro fine ex hominum usu hoc, quod est *rectè differere* rectitudinè evidentiae. Sed hoc est demonstrare rem. Ergo ex hominum usu atque

que

que institutione habet pro fine, sive objecto attributionis demonstrationem. Prob. hæc ultima Minor. Tum quia omnia, quæ docet logica Minor, & quibus uti conamur tametsi non semper assequamur, ad argumentandum sunt evidentiâ metaphysicè, ut constat consideranti regulas, conclusiones, & principia, quæ sunt in Dialectica, si intelligantur, ut oportet. At hujusmodi evidentiæ primariæ ac directæ sunt idoneæ Syllogismo evidenti, & demonstrativo potius quam Syllogismo merè probabili, aut certo quidem, sed obscuro. Ergo.

156. Tum quia licet Dialectica agat etiam de Syllogismo merè probabili, & de obscuro: hoc ideo est, ut opituletur inopiæ intellectus humani, cui non facile occurrunt demonstrationes, & ne in suis discursibus hæseat, docetur à logica modum disputandi saltem probabiliter, vel obscure, ut contingit in eis modis disputandi scriptis disp. 2. distinctis ab eis quatuor directis, atque perfectis, *Barbara, Celarent, Darii, Feriâ*. Fins autem primarius, ad quem per logicam aspirant homines, tametsi raro assequantur, est Syllogismus evidens ac demonstrativus. Tum quia ad recte faciendum rem aliquam non solum conducit scire ipsam; sed etiam scire sua contraria, id est scire modum, quo res illa non debet fieri. Atqui Syllogismus merè probabilis, & Syllogismus certus, sed obscurus contrarii sunt (id est oppositi, sicut differentiæ ejusdem generis) Syllogismo demonstrativo. Ergo ad faciendum demonstrationem conducit etiam notitia amborum. Ergo doctrina Logicæ circa ambos conducit etiam ad demonstrationem. Idem dicimus, & potiore jure de Syllogismo fallace, ac Sophistico. Ergo omnibus, quæ sunt in Logica, potest uti intellectus ad demonstrationem recte faciendam. Ut enim experienciâ constat omnia, quæ quomodolibet conducunt ad aliquem finem: sive conducentiâ positivâ, sive negativâ, sive immediatâ, sive mediatâ, sive directâ, sive indirectâ possunt, & multoties solent ex hominum usu, atque placito dirigi, sed ordinari ad eum finem proportionem servatâ.

157. Habemus ergo objectum attributionis, sive finem extrinsecum logicæ sumptum ex hominum placito, usu atque institutione esse solam demonstrationem. Hinc 1. communis illa definitio, quam & nos supra dedimus, *facultas recte discernendi est ex causa finali*, & quidem extrinseca. Ut enim suo loco advertimus definitio multoties traditur per causam finalem etiam extrinsecam, ut quando dicimus, *Homo est creatura facta, ut in æternum fruatur Deo suo ultimo fine*: sicut etiam per causam exemplarem, ut cum dicimus, *Homo est creatura facta ad imaginem, & similitudinem Dei*: est ergo illa Dialecti-

ex definitio data per causam finalem extrinsecam : nec mirum, quia multoties clariùs cognoscimus rem per suam causam finalem, aut exemplarem, aut efficientem, aut etiam per suos effectus, aliave connotata, quàm per suum genus, & differentiam.

158. Quenam ergo est definitio Dialecticæ per prædicata intrinseca, & essentialia? Resp. *Complexam ex multis actibus* (si sermo sit de Logica actuali) *vel ex multis habitibus docentibus definire, dividere &c.* quod si hinc inferas objectum attributionis intrinsecum, seu finem naturalem Dialecticæ esse Definitionem, Divisionem &c, aut modum sciendi, definiendi, dividendi &c. Resp. ut supra. aliud est hoc totum *sciens definire &c.* aliud Definitio: aliud modus definiendi, sciendi &c. Illud primum est objectum attributionis intrinsecum, ut diximus. Definitio ipsa, divisio, argumentatio &c. sunt objectum attributionis, seu finis extrinsecus, & quidem proportionatè, seu distributione accommoda, quatenus definitio v. g. est finis partis definitivæ, divisio partis seu doctrinæ dividendi, & sic de aliis : doctrinæ quippè definiendi potest homo pro suo libito uti ad definiendum, & quamvis non utatur quia non vult, vel quia aliunde non potest, non idcirco doctrina illa patietur physicam illam violentiam quam patietur ignis sine calore, aut materia sine forma sicut illam violentiam non patitur in Angelo doctrina, quam habet ædificandi domos constituendi syllogismos circa res naturales &c. ut inculcavimus numer. 9. Modus denique sciendi per definitionem, per divisionem, per argumentationem &c. si sumatur in concreto erit objectum attributionis naturale, seu finis intrinsecus Logicæ, quia sumptus in concreto est hic effectus formalis *Sciens definire. Sciens dividere. Sciens argumentari &c.* si sumatur in abstracto est doctrina ipsa definiendi v. g. quæ profectò non est objectum attributionis seu finis intrinsecus sui ipsius.

159. Hinc 2. Quando dicimus objectum attributionis extrinsecum, atque ex hominum placito esse demonstrationem, non dicimus esse talem, aut talem singularem demonstrationem in individuo, aut in specie; sed in genere : sicut objectum attributionis extrinsecum etiam, atque ex communi usu hominum ceterarum artium v. g. Architectonicæ, non est hæc, aut illa domus in individuo, aut in specie; sed in genere: idest, est *Domus*: quia Scientiæ, ac Artes non agunt de singularibus, sed de Universalibus. Nec obstat quod objectum attributionis facultatis practicæ debeat esse factibile *prout est objectum illius*; Res autem in genere non sunt factibiles, quia genera

nera non dantur a parte rei, sicut nec ullum universale: non obstat inquam: illud namque *prout* intelligi debet primò intentionaliter, non verò secundò intentionaliter, ac cum allusione ad modum tendendi; quem habent actus illius facultatis; aliàs cum hi sint spirituales, & vitales, & accidentales, objectum attributionis fieri deberet semper spirituali, & vitali, & accidentali modo: objectum ergo attributionis Artis est factibile, quatenus sciens homo per regulas universales quomodo fieri debeat omnis domus v. g. aut omnis demonstratio facit iuxta illas hanc singularem domum, aut hanc singularem demonstrationem, quando occurrit occasio faciendi illam; quocirca singula singularia sunt objectum attributionis, non sanè explicitum quasi de illo sub propriis terminis ageret facultas; sed implicitum, quatenus includitur in objecto generalis, & universalis regulæ propriæ artis illius: sicut est de Fide hoc, & illud, & illud singulare, quamvis de ipsis non procedat nominatim divina revelatio, si tamen includuntur in ea veritate universali, quam docet revelatio divina.

160. Hinc 3. Demonstratio non est quid simplex ac indivisibile; sed compositum resultans ex una, vel duabus præmissis, & conclusione, & transitu intellectus ex assensu præmissarum ad conclusionem ipsam. Rursus in quavis demonstratione inter alia sunt 1. Materia, circa quam procedit. 2. Veritas propositionum, quibus constat demonstratio. 3. Evidentia illarum. 4. Artificium, seu coordinatio, seu dispositio, vi cuius ex præmissis sequitur evidenter metaphysicè conclusio. 5. Conclusio ipsa. 6. Notitia, seu peritia faciendi demonstrationes. Quando dicimus demonstrationem esse objectum attributionis, seu finem extrinsecum, ac ex hominum placito, non loquimur de materia, de qua procedit, non de veritate, non de evidentia propositionum, quibus constat: quippè tria hæc plerumque non spectant ad Logicam, sed ad illam scientiam, artem, seu facultatem, in qua facta est demonstratio: illius enim facultatis est explorare materiam illam, nec non veritatem, ac evidentiam illarum propositionum; v. g. si demonstratio facta, vel facienda sit in materia Medicinæ, aut Astronomiæ non spectat ad Logicam materia illa, nec veritas, aut falsitas, evidentia, aut obscuritas illarum propositionum.

161. Dicimus itaque objectum attributionis Logicæ, hoc est finem extrinsecum ex hominum usu, & placito, esse demonstrationem tum quoad artificium, ordinem, & combinationem, qua coordinari debent præmissæ, quæ aliundè sint veræ, ut evidenter inferatur conclusio, tum quoad hujus evidentem illationem, qua illatio-

tione posita conclusio erit evidens, (quia ex vero non sequitur nisi verum), & consequenter esse demonstrationem in concreto, prout dicit totum evidentem discursum; quia finis, quem Logicæ præstiterunt homines, & ad quem utuntur illa, est *rectè differere, rectè disputare*, ut constat ex definitione, atque ex Aristotelis, ac S. Augustini Testimoniis prolatis: sed rectè differere, seu disputare, nec stat in solis præmissis absque conclusione, nec in sola hac fine illis, ut constat ex *praxi ipsa disputandi*; sed stat in complexo ex præmissis, illatione, ac conclusione, quia ille solus disputat, qui hæc tria facit formaliter, aut virtualiter: ergo. Nec refert, quòd unum ex his ordinetur ad aliud, v. g. præmissæ ad conclusionem: quoniam finis complexus, cujus una pars ordinatur ad aliam, potest esse indivisibiliter finis altius tertie rei: sic animal, cujus una pars ordinatur ad alteram, v. g. corpus ad animam, & hæc præsertim si fuerit materialis, ordinatur ad illud, est simul, ac indivisibiliter finis generationis, qua generatur animal illud.

162. Denique quoad notitiam ipsam demonstrationis dicimus; quemadmodum aliqua alia ars potest excogitari ab unis, & disci ab aliis eo solo fine, aut saltem primario, ut habeatur notitia de modo construendi objectum illius artis, quin ad praxim transeat, sicut Angeli, & multò melius Deus habet notitiam de modo construendi demonstrativum discursum, quin eam notitiam possit unquam reducere ad praxim. Ita Logica potuit excogitari ab Aristotele, & tradi, discique à subsequentibus hominibus eo solo, aut saltem primario fine, ut sciretur modus demonstrandi, sistendo hic, & non progrediendo ad faciendum unquam demonstrationem ullam, idest discursum penitus evidentem; cùmque in his humanis artibus non sit aliud objectum attributionis, quàm ille finis, ad quem communi usu, & placito hominum dirigitur complexum ex omnibus regulis, actibus, & conclusionibus illarum, nam finis intrinsecus illarum jam explicatus est num. 3. & iterum num. 9: inde fit, quòd objectum attributionis Logicæ potuit esse sola notitia modi arguendi, sed disputandi evidentè sistendo hic, & non progrediendo unquam ad evidentem ipsam disputationem.

163. Ceterum quemadmodum id, quod potuit contingisse in aliis artibus, non contigit de facto. Ita nec in Logica, quæ sanè excogitata est, ac de facto discitur ab hominibus, non eo solo, aut primario fine, ut *præcisè sciatur modus* disputandi evidentè, sed *ut actu disputetur evidenter*, quando se offerat occasio: quod expe-

rientiâ ipsâ constat ; & insuper ex eo, quod definitio ex causa finali Logicæ non est *Facultas sciendi rectè disputare* : sed *Facultas rectè disputandi*.

Et hæc sufficiant pro Dialectica, seu Logica Parva. Cætera usu, ac experientia invenies, assequeris, & possidebis.

F I N I S.

I N D E X.

Primus numerus Disputationem; Secundus
marginalem significat.

A

A Bindistributo nil, quomodo intelligendum? Disp. 2. num. 184.

Abstrahere quid sit? 1. 202.

Actus Fidei, ac scientifici, quo sensu essentialiter veri. 1. 3.

Actus immediatè liberi ex sua essentia excludunt rationem strictè à priori sui ipsorum. 1.

128. Actus Intellectus, & actus voluntatis quomodo differant quoad tendentiam in objectum. 1. 40.

Ampliatio termini singularis. 1. 111.

Anima quomodo formet in hac vita cognitiones. 1. 8. 33. & 52.

Appellatio terminorum cautè observanda. 1. 88.

Argumentatio quid sit? 1. 155.

Quinque possunt in ea considerari. Ibid. A priori, & à posteriori &c. 1. 158. Argumentationes erudendæ ex bona consequentia. 2. 35. Ex definitione. 2. 21. Ex divisione. 2. 27.

Ex suppositionibus. 2. 49. Argumentationum quot modi in

genere, & qualiter singuli instruendi? Ibid. per totum caput primum. 2. 2. Argumentum ab Authoritate, quale esse debet? 2. 5. Argumentum ab absurdo quale? 2. 9. Argumentationum infallibilium septedecim fontes. 2. 12. Arguendum ex principiis Prudentiæ, quando non suppetit evidentiæ. 2. 13. Argumentationes erudendæ ex terminorum suppositione, quot, & quales? 2. 49. Ex conversione propositionum quot, & quales? 2. 71. Ex modalium conversione. 2. 91. Ex habitudine Logici propositionum. 2. 99. Ex contradictione. 2. 110. Ex contrarietate. 2. 126. Ex oppositione privativâ. 2. 130. Ex relativa. 131. Ex subcontrarietate. 2. 132. Ex subalternatione. 2. 135. Ex equipollentia. 2. 143. Ex veritate copulativa. 2. 145. Ex disjunctiva. 2. 150. Ex conditionali. 2. 159. Ex identitate, ac distinctione. 2. 170.

Ars quid sit? 3. 47.

Assensus præmissarum quomodo

I N D E X.

necessitet ad assensum conclusionis? 1. 177.

B

Bruta quomodo sunt capacia signorum . 1. 12.

C

Causalis propositionis essentia, & proprietates. 1. 116.

Conceptus ultimus, & non ultimus quid sint? 1. 16. Conceptus formales, sive cognitiones non semper habent ex sola sua essentia significare, quod significant. 1. 27.

Conditionalis propositionis essentia, & propositiones. 1. 120.

Conditionales propositiones non sunt inutiles speculationes. 1. 126. Quo sensu nil ponant in esse? *ibid.* Quo sensu sint utiles, quando hypothesis est impossibilis? 1. 127. Discrimen inter illativam, & purè conditionalem. 1. 129. Conditionalis non semper convertitur in aliam assumentem pro hypothesis contradictorium conditionati, & pro conditionato contradictorium conditionis. 1. 130.

Confessarius quando, & quomodo potest uti restrictione mentali? 1. 23. Discrimen inter ipsum, & reum iudici respondentem. 1. 24.

Consequens, & consequentia quid sint, & quas habeant proprietates? 1. 130. Quot præbeat

legitimas argumentationes. 2. 35. Ubi an ex opposito consequentis &c.

Constitutivi, & connotati discrimen. 1. 195.

Consuetudo humana, aut belluina. 1. 11.

Contradictoriarum sistema logicum non est perfectum. 2. 100.

Quæ sint contradictoriæ? 2. 102.

Omnis, & aliquis non, non sunt contradictoriæ formales. 2. 103.

Contradictoriæ nec pro diversis instantibus possunt verificari. 2. 114. Contradictoria objectiva, quo sensu possint existere pro diversis instantibus? 2. 117.

Contrarietas quid, & quotuplex? 2. 124.

Conversio Logica quid, & quotuplex? 2. 71. Ipsius energia est irresistibilis. *Ibid.* 71. non sunt universales illæ regulæ *simpliciter feci* &c. *Ibid.* 71. Modus legitimus conversionis valet etiam in Divinis. *Ibid.* 75. Sophismata contra has regulas. 2. 79.

Conversa, & convertens non valent reciprocè. 2. 87.

Co-

INDEX.

Copulativa propositio quid sit,
quando est affirmativa, & quo-

modo assignanda contradicto-
ria? 1. 111.

D

Definitio quid sit, & quas ha-
beat proprietates? 1. 142.

quomodo sit definitio sui ipsius

Ibid. Regulæ ipsius. 1. 147.

Definire idem per idem, quo

sensu sit vitium? Ibid. Quo sen-

su debet converti cum definitio-

ne? Ibid. Quot bonas argumen-

tationes præbeat? 2. 21.

Demonstratio, per quam acquiritur

Scientia, potest esse à po-

steriori. 3. 34.

Denominationes extrinsecæ non

imbibunt Ens rationis. 3. 123.

Deus initio Hominibus infundit

notitiam verborum, & signifi-

cationis, quam voluit ipse. 1.

17. Loquitur nobiscum, quan-

do infundit nobis cogitationes

supernaturales; secus quando

cōcurrit ad merè naturales. 1. 63.

Dilemma quid sit? 1. 163. Quas

exigit conditionales? Ibid. Per

distraktionem quomodo argua-

tur? 2. 3.

Disjunctivæ propositionis essen-

tia, & proprietates. 1. 114.

Distinctiones importunæ inter

argumentandum quadrifariam

impugnari possunt. 1. 154.

E

Ens rationis non est objectum
formale Logicæ. 3. 119.

Nec includitur in omni deno-

minatione extrinseca. Ibid.

Enthimema quid sit? 1. 161.

Enunciatio, & prædicatio, quo-

differant? 1. 7.

Æquivalentia, seu æquipollentia

propositionum quid sit, & quo-

modo fiat? 2. 140.

Evidentia immediata, & abstra-

ctiva. 3. 32. Evidentia physica

non necessitat ad assensum. 1.

171. Evidentia probabilitatis,

& Evidentia veritatis possunt

conjugi. 1. 181. Exempla ar-

gumentationis, seu à paritate

qualia esse debent? 2. 10.

F

Fidei nostræ resolutio insinua-
tur. 3. 105.

Figure Aristotelicæ cum sophis-

mate. 2. 171.

Formaliter quot, & quas habeat

significationes? 1. 190. Ex

Falso aliquando verum. 1. 137.

Li 3

Ha-

I N D E X.

H

Habitudo Logica propositionum quot præbeat argumentationes ? [2. 99.](#)

Habitus acquisiti quid sint, & an dentur. [3. 5.](#) Discrimen ab infuso. [3. 6.](#) Non omnis Habitus docens est utens activè. [3. 10.](#)

Habitus quot sint apud Aristotelem ? [3. 42.](#)

Homines primitivi quomodo ceperunt colloqui ? [1. 20.](#) Homines omnes quomodo sunt æquales ingenio ? [3. 3.](#)

Hypothesis objectiva, & hypothesis formalis qualis sint ? [1. 120.](#)

I

Illatio quotuplex sit ? [1. 157.](#) Imperium voluntatis quando prærequiritur, & quando non ad assensum ? [1. 185.](#)

Inductio quid sit ? & quas postulet conditiones ? [1. 165.](#)

Instrumenta Sciendi quæ, & qualia ? [1. 140.](#)

Instantiæ quales esse debent ? [2. 4.](#)

Intentionaliter primò, ac secundò quot, & quas habeat significationes ? [1. 193.](#)

Iris quomodo est signum non futuri diluvii ? [1. 13.](#)

Judicia quo sensu sint essentialiter vera, aut essentialiter falsa ? [1. 36.](#) Quomodo differant ab actibus voluntatis quoad tendentiam in objectas ? [1. 40.](#)

Judicia quo sensu sint essentialiter vera, aut essentialiter falsa ? [1. 36.](#) Quomodo differant ab actibus voluntatis quoad tendentiam in objectas ? [1. 40.](#)

L

Logica omnes quæstiones super illam reflexas invenies ante Disputat. [3.](#) Logica habitualis, secus actualis adæquata existit simul in eodem Intellectu. [3. 7.](#) Docens, & utens quo differant ? [3. 8.](#) Non omnis docens est utens. [3. 9.](#) Logica quomodo influat in conclusiones aliarum scientiarum ? [3. 14.](#) Non est simplex qualitas. [3. 17.](#) Quo sensu sit una ? [3. 23.](#) Quo sensu sit necessaria ad scientias alias acquirendas [3. 75.](#) Ipsi objectum materiale, & formale. [3. 108.](#) Logica minor tractat solos conceptus formales ; Major objectivos. [3. numer. 111.](#) & seq. Illius objectum attributionis. [3. 146.](#)

Loquendi modi sunt multi. [1. 21.](#) Quid est loqui ? [1. 26.](#) Loqui cum, & loqui coram excommunicato non tolerato. [1. 61.](#)

Ma-

I N D E X.

M

M Aris procellæ, quam proportionem habeant cum ventis? 1. 9.

Materia propositionis quid, & quotuplex. 1. 108.

Medium quo pacto debeat non mutari, sed esse unicum? 2. 186.

Modalium conversio quas argumentationes præbeat? 2.91.

Quid sint Modales, & quot? 2.91.

Motus Firmamenti cur est tempus? 1. 6.

Motivum quid sit? 3.94.

N

N egatio non est malignantis naturæ, quid significet? 1. 3.

Negativus modus arguendi quotuplex? 2. 2. Ex puris negativis nil quomodo intelligendum? 2. 2.

Nomen quid sit 2.1. 1. Nomen infinitum quid? 1. 2.

Non negativum, & infinitans. 1. 3. Quot sensus reddere potest? ibid. Unde discernendum inter negativum, & infinitum? ibidem.

O

O bjectum in genere. 3. 86.
Materiale, & Formale. 2. 89. Quandoque distinguuntur quandoque non. 3. 90.

Obliqua constitutiva, verè sunt Constitutiva vera, & non sunt Conotata. 1. 72. obliqui, & recti

discrimen Scholasticum. 1. 196.

Oppositio quid, quotuplex: quot, & quales præbeat argumentationes. 2. à num.99. ab opposito consequentis ad oppositum antecedentis quomodo, & quando? 2. 37.

P

P aritates quales esse debent? 2. 10.

Partes integrantes quid sint. 1. 153.

Pia affectio quo sensu jubet ad

credendum. 3. 96.

Practicum quid sit? 3. 58.

Præmissarum multiplex qualitas. 1. 156. Præmissæ quomodo necessitent ad assensum conclus-

I N D E X.

clufionis. 1. 177.
 Prædicatio, & enunciatio quo
 differant? 1.7.
 Prædicata contradiſtoria ſecus
 propoſitiones poſſunt veri-
 ficari ſimul. 2. 112.
 Prima principia quid ſint? 3.43.
 Prima principia quo ſenſu ſint
 eſſentialiter vera, & quo po-
 tuerint eſſe falſa. 1.35.
 Prioritates Scholaſticæ quid ſint?
 1. 198.
 Propoſitiones, quæ videntur
 identicæ, & ſunt de ſubjecto
 non ſuppoſente. 1. 92. Quo-
 modo aſſignandum iſtis con-

tradictorium? 1.93. Quanti-
 tas, & qualitas Propoſitionum.
1.106. Propoſitio quæ videtur
 identica, & falſa eſt. 2.53. Pro-
 poſitiones copulativæ, ac di-
 ſiunctivæ. 2. 145. Conditiona-
 les quem ſenſum reddant, &
 quot argumenta præbeant. 2. à
 num. 159. ex puris particula-
 ribus nil, quomodo intelligen-
 dum? 2.162.
 Præſcindere quid ſit. 1.202.
 Prudentia quid ſit? 3.47. ad Pru-
 dentię principia recurrendum,
 quando non ſuppetunt evi-
 dentię. 2.13.

Q

Quia, vox valdè æquivoca, &
 multorū ſenſuum capax. 1.
116. Quia reſponſio capax
 multarū ſignificationū. 3. 103.

Quidditas quid ſit. 1.144.
 Quod, & quo quid ſignificent,
 quando ſermo eſt de ſubjecto,
 ac prædicato. 1.69.

R

Ratio formalis qua, vel ſub
 qua quid ſit? 3.89.
 Recti, & obliqui diſcrimen Scho-
 laſticum. 1. 196.
 Reductio Syllogiſmorum. 2. 189.
 Reduplicativè, qua, ut, quid ſi-
 gnificent? 1.203.
 Reſolutio Fidei inſinuatur. 3.
105. Reſolvi rem in aliquod,
 quid ſit, & quando reſolvitur

in conſtitutiva. 1.65.
 Reſtriſtio non purè mentalis
 quomodò excuſetur à mendaci-
 cio? 1. 23.
 Reſtriſtio termini debet cadere
 ſupra illum immediatè. 1.102.
 & tunc prævalet contra ſigna
 univerſalia. Ibid.
 Retorſiones quales eſſe debent.
2.4.

Sapientia quid sit. 3. 45.

Scientia quid, & quotuplex.

3. 31. Potest aliquis actus esse circa singularia, ut, talia.

3. 36. Scientiam perfectè possideri quid sit? 3. 84.

Signum quid, & quotuplex. 1. 8.

Signa, quibus Angeli, & Animæ separatæ colloquuntur.

Ibid. Solent esse ficta. 1. 10.

Signa quid sint apud Philosophum. 1. 198.

Significatio vocum unde fumen-
da. 1. 21.

Singularis terminus cujus ampli-
ationis est capax. 1. 111.

Si per possibile, vel impossibile,
quid significet hæc phrasis. 1.
207.

Syllogismus quid sit? 1. 166. quo-
tuplex in genere? 1. 168.

Syllogismorum reductio. 2. 189.

Syllogismi copulativi, ac di-
siunctivi. 2. à n. 145. ubi so-

phismata contraria. Syllogismi
conditionales. 2. 159.

Sophismata contra regulas Con-
versionis. 2. 79. Sophisma pro-
bans duas contradictorias esse
simul veras. 2. 108.

Specificativè, secundum se quid
significent? 1. 205. Specifica-
tivum actuum quid sit? 3. 91.

Speculativum quid sit? 3. 58.

Stratagemmata quomodo liceant,
aut non liceant? 1. 62.

Subiecti non supponentis propo-
sitiones. 1. 92.

Suppositio terminorum quid, &
quotuplex? 1. 89. quas argu-
mentationes præbet. 2. 49.

Suppositiones distributiva, co-
pulativa &c. 2. à num. 50.

Suspensivus, & purè hypotheti-
cus modus cognoscendi ne-
cessarius ad Prudentiam. 1.
126.

T

TEmpus extrinsecum quid.
sit. 1. 6.

Terminus quid sit, & quotuplex.

1. 65. Terminorum appellatio
cautè notanda. 1. 88. eorum-
dem suppositio quid, & quo-

tuplex. 1. 89. Termini tran-

scentes qui sint, & cur. 1.
81. non possunt infinitari. 1.
82. Tres soli termini in syllo-
gismo, quomodo intelligen-
dum. 2. 188.

Tonitru definitio. 1. 145.

V

Ventus quomodo indicat
procillas Maris. 1. 9.

Verbum quid sit? 1. 6. Verba quo
sensu significant ad placitum
Hominum, & an omnia? 1. 17.
Verborum sensus unde eru-
endus. 1. 21.

Veritas propositionum unde su-
menda. 1. 107. ex vero verum
1. 137. 138. Quomodo ali-

quando falsum. Ibid: Veritas
copulativa, & disjunctiva
quot arguendi modos dent?
ubi contraria sophismata. 2. à
n. 145. Veritas conditionalis.
2. 159.

Voluntatis imperium quando
prærequitur, & quando non
ad assensum. 1. 185.

Eratta

<i>Disp.</i>	1	fine
1.	5	effe
<i>num.</i>	6	significat
<i>marg.</i>	9	Effectus
	40	forent
	42	animæ
	42	præjivia
	51	cera
	58	quia
	88	proposiojonem
	132	bomo
	139	metaphysicè
	140	vittrato
	151	definito
	155	divisiones
	169	probabiles
	155	unimal

Corrige

fine
esse
significat
effectus
forent
animæ
prævia
vera
quia
propositionem
homo
metaphysicæ
nittrato
definitio
divisionis
probabiles
animal

*Debes in hac Disputatione 1. corrigere à numero marginali 75.
usque ad finem, ubi suppones 74. & sic deinceps.*

<i>Disp.</i>	9	Argumentio	argumentatio
2.	42	consequencia	consequencia
<i>num.</i>	65	efficacies	efficaces
<i>marg.</i>	74	Djutna	Divina
	81	extstens	existens
	84	carpus	corpus
	104	coutradictorias	contradictorias
	129	quo	quæ
	174	Darepti	darapti
	179	gropositiones	propositiones

<i>Disp.</i>	4	copias	capias
3.	34	cunelusio	conclusio
<i>num.</i>	80	cujusvis sint, ita colligare	vel cujusvis, sint ita colligata
<i>marg.</i>	84	sophimatibus	sophismatibus
	84	& in positiva	& positiva
	136	offuscis	offusis
	143	negat	negant
	151	cum parte	uni parti
	152	hoc, non illud	hæc, non illud.

Ex plurimis erratis, quæ per summam incuriam huic Operi subreperunt, hæc pauca corrige Amice Lector.

ERRATA

CORRIGE

In Dedic.

manicavat
quos sic

manicabat
quos hic

In Præfat.

Exprimere non valens
commentantur
eaeque
Fendones
Philistæi volebant
lonceas

Add. statimque apprehensum jugulabant
commendantur
ea, quæ
Tendones
Philistæi nolebant.
lanceas

Disput. 1.

num. 8. Adeſſa
19 facultatem
22 infexerunt
23 illa afficiens
ibid. vi cuius hic
26 capite proximè ſequentē
42 qui tunc
ibid. filius objecti
ibid. tunc propria
46 non ſignificarentur
58 actus ut talis
59 præcedens
76 terminetur
83 terminum eſt
101 quia olim
111 homo eſt anima
ibid. enunciatur
119 ex propoſitionibus
122 ut alibi
124 elicitivi
146 tertia definitio
147 tertia
ibid. animali
155 ut invenitur in hac
167 ergo homo
171 & ut credamus
178 non minus
185 cogitata
186 et quando
188 omnis animal
190 Ratio ſcripta numero 46.
198 tam id
209 ipſius veritas impoſſibilis

adjuta
facilitatem
inſiſſerunt
illam afficiens
vi cuius hæc
capite tertio
qui nunc
illiſus objecti
prævia
non ſpecificaretur
actus vitalis
prudens
unum terminetur
inſinitari terminum eſt
qui olim
eſt animal
enunciatur prædicatum
eis propoſitionibus
ut poſtea
electivi
Tertia. Definitio
quarta
anima
ut invenitur in hac
ergo omnis homo
ut credamus
non omnis
cogitanda
ac quando
omne animal
Ratio ſcripta numero 184
etiam id
ipſius veritas eſt impoſſibilis

ERRATA

Disput. II.

- num. 4. *seuissimè*
 5 illac impune aufugit
 9 immeritò irrideret
 34 seu vivens discursivum
 46 contradictorium A.
 50 applicandus
ibid. supponantur definitivè
 70 Aliquis homo peccat

- 81 vonvertenda
 86 vera conversio
 97 latrunculi ex lateribus
 102 propositum toti
 193 existere essentiam
ibid. Madriti v. g.
 151 ergo non est A.
 178 sub illo medio
 181 Malè quia præmissæ
 193 quam concessisti

Disput. III.

- num. 4 ut copias
 22 ex doctrina
 32 procederent
 51 hoc nanciscantur
 57 nec sunt
 69 jubet
 78 possiderit
 80 colligare
 84 & in positiva
 86 de artibus
 93 in se ipso exprimat
 94 & ut vides
ibid. ex hoc
 105 respectu aliarum
 106 præcedat intrinsicum
 107 Divina Bonitas absolutum
 117 purè negativa
 120 ac unita
 128 percipimus
 132 Deus amandus
 135 eam salubritatem
 136 offuscis
 141 De ratione autem iudicii
 151 cum parte Logicæ
 153 hoc, non illud

CORRIGE.

- seuissimè
 illac impune aufugiet
 meritò irrideret
 seu sensibile non discursivum
 contradictorium productionis A.
 explicandus
 supponantur distributivè
Add. 3. Ad uniuscujusque singularis definitio-
 nem, ut aliquis homo peccat.
 convertenda
 conversa
 latrunculi ex latebris
 præpositum toti
 existere carentiam
 Madriti v. g. ergo
 ergo est A.
 sub illo medio subiectum tuæ propositionis
 Valet: quia præmissæ
 quam concessisti

- ut copias
 & doctrina
 procedunt
 hæc nanciscantur
 vel sunt
 juvet
 possederit
 colligatæ
 & positiva
 de artibus
 in se ipso non exprimat
 ut vides
 & hoc
 respectu quoque aliarum
 præcedat extrinsecum
 Divina Bonitas absoluta
 purè nutritiva
 aut unita
 percipimus
 Deus amatus
 eam salubritatem
 offuscis
 de ratione autem iudicii affirmativi
 uni parti Logicæ
 hæc, non illud







